يوسف السباعي

امررسيية جمعية قنل الزوجات



آذرستيسبتسة

مؤلفانت پوسفانساعی



- أمر رستيبة
- جعية قثل الزوجات

اللمداء

إلى أمي العزيزة :

(الست أم يوسف)

أهدى مسرحية « أم رتبية » .


لا أحاول أن أرد بها جميلا سابقا ، فجميلها أجلّ من

أن يرد .

ولكني أرجو أن أهب لها لحظات ضحك تسرى بها

عن نفس بكية . فياضة الدمع . هامية المآق ..

(يوسف السباعي)



هذه محاولة في كتابة المسرحية ..

لقدأمتعتنى كتابتها ، إذ كنت أشعر وأنا أغلق باب الحجرة لأخلو بنفسى للكتابة . أنى لم أخل بها وأنى لم أكن فردا ، بل كنت محوطا بمجموعة أبطالها المضحكين الهازلين .

كنت أضحك وأنا أكتب ..

وقدأكون مجنونا .. وقد أكون مغرورا ..

ولكنى أؤكد لكم أننى أحببتها وأحببت أبطالها ، وأن كتابتها لم تكلفنى أى جهد ولا مشقة ، بل كنت فى كتابتها كالسامر فى جلسة سمر .

ولقد سألنى بعض الأصدقاء أن أعرضها للتمثيل على المسرح ، ولكن فضلت أن أضعها أولا فى كتاب .. لأنى أثق فى كتبى وأحب قرائى ، وأشعر بينهم بالطمأنينة والغبطة ، لأن بينى وبينهم رابطة أقوى مما بين كاتب وقارئ .. بينى وبينهم انسجام وصداقة وحب .

وثمة شيء أريد أن أقدم له .. وهو أنى كتبتها باللغة العامية .. إن من الجنون أن أحاول إنطاق ابطالها بالعربية .. فأرجو من أنصار اللغة العربية أن و يصهبنوا شويه ، ويتسامحوا معى قليلا .. فالمسام كريم .

وأرجو بعد كل هذا ألا تخذَّلنى ﴿ أَم رَتِيبَه افتضحكَ القارئ كَا أَضحَكُتنى .. فإذا فشلت فليعذرنى .. لأن إبكاءه قد يكون يسيرا .. أما إضحاكه فهو أمر جد عسير .

(يوسف السباعي)

الفصيل الأولي

المنظر : صالة فى بيت عبد الصبور أفندى بها منضدة للأكل وأريكة وبوفيه .. فى المواجهة شباك يطل على حارة ضيقة ويقابله شباك المنزل المقابل وهو منزل سيد أفندى . وعلى اليمين بابان يؤديان إلى غرف النوم وعلى اليسار باب يؤدى إلى المطبخ .

باب يؤدى إلى السلم وباب يؤدى إلى المطبخ .

تفتح الستار على أم رتيبة وقد جلست على الأريكة وأطلت بنصفها الأعلى من الشباك وأمسكت بيدها حبل تدلى منه مست ، وسنية تجلس أمام طبلية وتخرط الملوخية .

المشهد الأول

أم رتيبة: (للبائع في الطريق) يا راجل اختشى على عرضك وحط كان بطاطايه .. هو إيه ياختى ده .. هوا انت بتوزن دهب ، الله يرحم زمان كانت الواحدة تشترى حمل البطاطه بتلاته ابيض .. اوعى بقى شيل إيدك خلينى اطلع السبت .. ما آنت أصلك كده دايما وشك عكر ، وكل ما احلف ما اشترى منك .. أرجع برضه أقول يابت نفعيه دا راجل غلبان (تأخذ في جدب الحبل ورفع السبت) .

سنية : (منهمكة في الحرط .. تلوك لبانة بين شدقيها وتغنى) سايقه عليك النبي تسمح وتحضني يا عبده ، لا والنبي يا عبده .

أم رتيبة: (تفحص البطاطا وتصيح بالبائع) من بقول لك انك راجل غشاش وضلالى .. خد غير لى البطاطايه المعفنه دى .. طيب بس انكتم وانسد مانيش مغيره حاجه .. خد آدى صاغ حار ونار في جتنك (تضع النقود في

ورقة وتقذف بها من التافذة) .

سنية : (مستمرة في غنائها) سايقه عليك النبي تسمح وتقرصني يا ...

أم رتيبة : (ملتفتة إليها مقاطعة غناءها) هس اخرسي يا بت بلاش مسخره وقلة حيا . ايه الكلام اللي بتقوليه ده . مين داللي عايزاه يقرصك ؟

سنية : يوه . داعبده يا ستى .

أم رتيبة : اخرسي جاكي قطع لسانك من جوا اللغاليغ .. هوا سيدك عبده بتاع حاجات من دي .

سنية : وهوه يا ستى يعنى ما فيش حدامه عبده غير سيدى عبد العسور .. أهو فيه عبده المكوجي ، وعبده اللبان .

أم رتبية : وكان لك عين تقولى كنه يا بجحه .. يا قليلة الحيا .

سنیة : یا ستی اهو کلام .. احنا خسرانین حاجه ، أنا بقالی سبع سنین سایقة علیهم النبی .. لاحد حضن ولا حد قرص .

(يفتح الشباك الذي في البيت المقابل وتبدو فيه أم سيد) .

المشهد الثاني

(سنية تعاود الحرط ، والغناء ، ومضغ اللبانة) ..

أم سيد : العواف يا ست ام رتيبة .

أم رتيبة: يعافيكي ويعاق بدنك.

أم سيد : ازاي بسلامته سي عبد الصبور افندي .. مش بخير ؟

أم رتيبة : بخير ياختي الحمد لله ، وازاي سي سيد افندي ؟

أم سيد : والنبي بيسأل عليكي دايما .

أم رتيبة : سألت عليه العافية ، بقاله مده ما حدش بيشوفه ، ولا يسأل على سي عبد الصبور ولا حاجة ، ولا كأننا جيران ، ولا الشباك في الشباك .. يا اختى دا النبي وصاً على سابع جار .

أم سيد : والله يا ستى ام رتيبة .. أصله مشغول اليومين دول ، والدنيا تلاهى ، ويادوبك بييجى من الشغل يحط راسه ينام ، وصحته مخستكه شوية ما بقاش زى الأول . كان زمان عليه عافيه زى الحصان .. دلوقت ما بقاش يستحمل حاجة أبدا ، وطول النهار شكوى م الشغل ومن الناس .

أم رتيبه: ربنا يكون في عونه. (يسمع على الباب الخارجي طرق فتنادى علي منية) شوفي مين يابت (ثم تعاود الحديث مع أم سيد) ما تتفضلي شوية يا ست أم سيد، أنا خلاص ما وراييش حاجة .. الملوخيه اتخرطت والفرخة على النار .. مش ناقص غير أسقط الملوخيه في الشوربه . والتقليه حا خليها بعدين .. أصلى متعوده ما آطشهاش الا وسي عبد الصبور داخل ، والنبي يجدين ندردش شويه ، أصل انا زهقانه اليومين دول ونفسي متضايقه .

أم سيد : بس بسلامته سي عبد الصبور زمانه جاي دلوقت .

أم رتيبة : لسه بدرى عليه .. دا ما يجيش إلا الساعه اثنين .. لسه واخد على مواعيد الشغل .. اللي فهشي ما يخلهشي .. أهو راح المعاش لكن برضه كل يوم الصبح ياخد الشنطه تحت باطه ويخرج ، ويفضل يسرح ما يرجعش إلا الساعة اتنين زى الموظفين .

أم سيد : طيب ياختي أنا جايالك حالا .

(تختفي أم سيد داخل الشباك) .

(يطرق الباب مرة ثانية .. وسنية مستمرة فى الخرط والغناء ومضغ ____

أم رتيبة : (مُلْمُفَتَة في غضب) انظرشت والا إيه .. قلت قومى شوفي مين .. جاكي خابط في ودانك ، كفايه عليك الغنا وسي عبده .

سنية : (تنهض متثاقلة) خليه مرزى على الباب ، يعنى مستعجل على إيه .. جايب القليعه ، والا جايب الديب من ديله .. مش جايب بنكله كسبره ، (تفتح الباب) خش . خلاص .. الدنيا طارت ؟ مش قادر تصبر ؟ (يدخل زينهم الخادم مندفعا ويضع قرطاسا صغيرا ويصبح في عجلة وهو

يهم بالحروج) . 🕐

المشهد الثالث

زينهم : خدوا الكسيره اهه .. الراجل قال ما فيش حاجة اسمها بنكلة اليومين دول ، جبت بالتعريفه كله ، بنكله آل ، فيه حاجة اسمها نكله .. أنا نازل بقي .

أم رتيبة : (تغادر الشباك وتصيح بزينهم) تعالى هنا ياللى تنقصف رقبتك .. رايح فين ؟

زینهم : مش وقت شرح . أصلی مستعجل قوی ، فیه خناقه علی باب الحارة .

. أم رتيبة : وانت مالك بقى ومال الحناقة .

سنية : سبيه يا ستى يمكن ياخد له بطحه في نافوخه ، تربحنا منه شوية ...

زينهم : أنا رايح اتفرج .. دى خناقه هايلة ، زكيه الملدنه بتاعة الفول النابت مرقده الحاج وحش الجزار على الرصيف ، وبتخبطه كل دماغ واختها .. بتخلى الشرار يطلع من الرصيف ، والناس ملمومين عليها مش عارفين يخلصوا الراجل من إيديها أبدا .

أم رتبية : خش انجر يا واد بلاش مسخره ، ما لنا احنا ومال زكيه الملدنه والمعلم وحش ، امشى ياللا دق الكسيره .

زينهم : الحق على ، أنا برضه استاهل اللى ما وقفتش أتفرج عليها قبل ما جيب الكسبره .. عملت نفسى بنى آدم وقلت يا وادروح الأول ودى الكسبره لحسن ستك تكون مستعجله عليها وبعدين ارجع اتفرج ، برضه أنا الحق على . أبقى مره إذا جبتلكم حاجة بعد كده دوغرى .

سنية : خش انجر دق الكسبره بلا قلبة دماغ .

رینهم: أسكتی انتی لحسن والنبی أحطك ع الطبلیه ، واخرطك زی الملوخیه اللی قدامك (ملتفتا إلی أم رتیبة فی توسل) أروح یا ست قبل الحناقة ما تخلص ؟

أم رتيبة : قلت لك خش ، يعني خش .

زينهم : طب خلينى اتفرج عليها م الشباك (يندفع إلى الأريكة مدليا بجسده من الشباك صائحا بسرعة) .. أهم باينين .. أدينى شايفهم كويس .. زكيه فوق .. الوحش بيفلفص ، يفلفص . كويس وحش . مسكها من شعرها .. مسكته من شنبه .. الوحش بيشد .. زكيه يتشد .. ها .. شد .. شد .. شد .. يا خساره طلع في إيدها .

أم رتيبة وسنية : هو إيه ؟

زينهم : شنب الوحش ، طلع في إيد زكيه ، الوحش لوحده ، والشنب لوحده ..
الوحش من غير شنب ، زكيه بشنب ، زكيه طبقت في زمارة رقبته ،
الوحش بيصرخ .. زكيه فأعته دماغ ، ودماغ تانيه ، وتالته .. الروسيات
بترف زى المدفع الرشاش .. الوحش انفتح حاجبه .. الوحش سخسخ ..
ول زكيه ، تعيش زكيه ، فتوة الناصريه .

أم رتيبة : (تهجم وتجره من قفاه) انزل من على الكتبه جاك نازله في قصابك .. أنا مش قلت لك ميت مرة ما تطلعش على الكنبه برجليك اللي زى الطين !.

زينهم : برافو زكيه .. أنا كنت عارف انها حاتغلب ، يعنى نابك إيه يا وحش غير ضياع شنبك ، عشان تبطل الغلبه (ملتفتا إلى سنية) آدى النسوان والا بلاش ، مش زيك يا قرعه .

سنية : خليه يتلم يا ست ، لحسن والنبي اعمل فيه اللي اتعمل في الوحش .

زينهم : (مصفقا بيديه مغنيا) دانا باحبك ، بس شايله السمنه في الزلعكه .

سنية: أسكت احسن لك 1..

أم رتيبة : (وهي تجلس على الكنبه وتأخذ في تفصيص رأس فوم) امشي دق الكسبره .

زينهم : (يأخذ الكسبره ويتجه إلى المطبخ منشدا) والله بحبك بس شايله السمنه في الزلعكه (يختفي داخل المطبخ ويسمع صوته قائلا) بكره الماتش الأصلى المعتبر .. زكيه ضد على الدكر .. والله حقها تلعب كوره .. يا خسارتك يا زكيه في الفول النابت ، دانت عليك سمانات رجلين .. ولا أبو حاجه

المشهد الرابع

أم رئيبة ؛ يا الله يا بت يا سنيه ، شهلى شويه ، كفايه خرط بقى ، انت حاتخليها إيه ؟ عصيده ؟. احنا عايزين نوضب الصاله عشان ستك الحاجة ام سيد جايه ، و إلا عاجبك كده الكركبه اللي احنا فيها ؟

سنية : خلاص اهو يا ست ، خرطتين بس ، يا سلام عليكي يا ست ، دانت عليكي ضهر مكسم وزى الزبده .. يا خسارتك يا ستى في قلة الجواز ، هم الرجاله انصابوا في عنيهم والا عميوا ؟

أم رتيبة : (تتحسس نفسها في حزن) قلة بخت يا سنيه يا بنتي . و قليلة البخت تلاق العضم في الكرشه . . واحنا حتى العضم مش لاقيينه . . رضينا بالهم والهم مش راضي بينا . .

سنية : يا ستى ربنا يسهلها ويرزقك بابن الحلال .

أم رتيبة : يا بنتي إذا كان على .. أهو مسهلها ، وإذا كان على ولاد الحلال أهم كبر .. لكن الدور على سيدك عبد الصبور اللي معقدها في وشي .. وقاعد لى زى قرد قطع .. كل ما يبجى عريس يطفشه ، لما تعسّ حالى وميل بختى و خلا رقبتى بين النسوان زى السمسمه .. هو انا يا بنتى قادره اورى وشي لحد .. خسه واربعين سنه وانا قاعده استنى ابن الحلال . و كل ما يبجى ابن الحلال يصده بوشه العكر و كلامه اللي زى السم .. واهى السنه بتفوت ورا السنه . والعمر بيضيع ولا من درى ولا من شاف ، وادينى حاعيش واموت و حدانيه .. من غير لا ولد ولا بنت، وبس بالاسم ام رتيبه ، الله يجمعها خالتي ام حميده بنت الشيخ معوض فضلت تقاطع على وتنق بلسانها اللي زى العقرب ، وتقول لى يا ام رتيبه ، وانا لسه بنت ما طلعتش من البيضه ، آل إبه عشان حلمت أن انا اتجوزت و خلفت بنت اسمها رتيبه ،

ومن يومها ما شفتش الجواز الاف حلم القرشانه النقاقه ام حميده.

سنية : يوه ، يا ستى ما تزعليش نفسك ، دانت لسه صبيه فى عز شبابك ، والجايات أكتر م الرايحات .

أم رتيبة : ما هو بكره الجيات يبقوا ربحات ، وإلا يعنى تفتكرى الجيات حتبقى الجعص م الرابحات ، هو عبد الصبور أفندى تستعصى عليه حاجه أبدا ، بكره يضيع الجيات زى ما ضيع الرابحات ، ياما ضيع على فرص . هم اللى خطبونى شويه يا بنتى يا سنية ؟ دانا كان ليه شنه ورنه .

سنیة : والنبی یا ستی باین علیکی کنت بنت حنت ، تلعبی بالبیضه والحجر .. کام واحد والنبی یا ستی خطبوکی ؟

أم رتيبة: ما تفكرنيش بقى يا بنتى باللى مضى وتجرى ريقى . هوا آنا آنسى سى على العطار اللى كان دكانه قدام بيتنا لما كنا ساكنين فى حوش آدم ، وكان طول النهار عينه ما تتوريش من الشباك وانا واقفه ورا الشيش وواخده بالى . كان راجل ولا كل الرجاله . باين عليه العز والنعمه خدوده مورده ، والدم حاينط من وشه ، وطابع الحسن فى دقنه ، يساع فنجان ، وإيده متختخه وبيضه زى الفل ، وعاوج اللاسه والجلبيه سكروته عليه تشف وترف ، والبلغه الفاسى فى رجله بتضوى .. قصده ما طولشى عليكى يا سنيه يا بنتى .. كان حايتجنن على كل ما يشوف إيدى تتمدم الشباك والا يلمحنى بانشر الغسيل فوق السطوح .. لغاية ما فى يوم العصريه سمعت نقر على الباب .. بافتح اشوف مين لقيته سى على .. أنا شفته قدامى حسيت روحى ساخت ، سألته عايز مين قال عايز يقابل سى عبد الصبور .

سنية : وهوا يعني ماكنش فيه غير سي عبد الصبور اللي بقابله ؟

أم رتيبة : يعنى حايقابل مين تانى . هو انا ليه حد غيره . ما احنا اتربينا يتامى لا لى غيره ولا له غيرى . . أهو طول عمرى ما شفت لى أب ولا أم ، وكل اللى لى فى الدنيا هو عبد الصبور . قضيت عمرى فى خدمته . وهوا لا رضى يتجوز ولا يخلينى اتجوز .

سنية : وبعدين يا ستى عمل إيه سي على ؟

أم رتيبة : دخل أودة المسافرين ودخلت اصحى سي عبد الصبور عشان يقوم يقابله .

سنية : وبعدين.

أم رتيبة : دخل يقابله ، ودخلت أعمل القهوة ، وأنا قلبي بيدق ، ويدق ، أصلى كنت حاسه ، وعارفه .

سنية : يوه يا ستى وهي الحاجات تخفى .

أم رتيبة: أيوه والنبى ما تخفاش أبدا .. عقبال ما دخلت اعمل القهوة وقلت للبنت تجهد الخدامه اللي كانت عندنا قبلك تدخلها .. بصبت لقيت سي على خارج يبرطم ووشه أحمر زئ الجزره ، ووراه سي عبد الصبور بوشه الأصفراوي الناشف اللي زي جريد النخل .. بيقول له : مع السلامة يا سي على .. ما كانش يتعز .. الراجل خرج من بير السلم وانا مسكت سي عبد الصبور ، قلت له هوا إيه دا اللي ما كانش يتعز ؟. فقال لي طلبه .. قلت له هوا عايز إيه ؟ قال لى : جاي يخطبك .. قلت له : وبعدين . قال لى : ولا بعدين ولا قبلين. قلت ما كانش يتعز يعني بالعربي رفضت. سألته له: قال لى دى حاجات ما تفهميهاش انت . سيبي لي انت الحاجات دى أنا أدرى بيها .. الستات دايما قلالات العقل ، لازم يسيبوا الحاجات اللي عايزه تفكير وتدبير للرجاله ، أمال الرجال اتخلقوا له .. المقصود فضلت الح عليه واحاوره واداوره لغاية ما عرفت السبب .

سنية : إيه هو بقي يا ستى السبب ؟

أم رتيبة : قال لى إن الراجل تخين قوى وأنا تخينه قوى ، وان اولادنا ، مش حايبقوا بنى آدمين ، حايبقوا فيله وإلا بالقليل أوى .. حلاليف .

سنية : له حق والنبي يا ستي .

أم رتيبة : اخرسي جاكي قطع لسائك ، دا انا كنت جبت اولاد زى القشطه ..
المقصود قعد يجيب لى في سبب ورا سبب ، مره يقول ان ما فيش سرير
يستحملنا ، ومره يقول لى أن فيه خطوره على من جواز العطارين عشان
حافضل آكل حلبه ومفتقه وحاجات م اللي بتسمن ، لغاية ما يبجى على

وقت اطق اموت ، ويكون هو السبب عشان وافق على الجواز ، وبالطريق ده سددها في وش الراجل .

سنية : والنبي برضه يا ستى له حق . . مين يعرف لو كنت اتجوزت سي على العطار كان جر الك إيه ؟

أم رتيبة : طب وابراهيم افندي العقر .. العرضحالجي اللي قد الدنيا ؟

سنية : ماله ياستي . برضه طفشه ؟

أم رتيبة : وطفش أبوه .

سنية : ليه بقى ؟

أم رتيبة: عشان اسمه العقر . العقر . ما يقدرش بسلامته يناسب واحد اسمه العقر ، أصله هو اللي بسلامته اسمه عدل قوى ، عبد الصبور عبد الغفور عبد الشكور المقزقز ، ياختى لو كان الواحد يشوف عيبه ما كانش عايب على الناس أبدا ، إلا المصيبه إن البنى آدم من دول تلاقيه بجح . . يعنى ما يعيبش على الناس إلا بالحاجه اللي فيه ، يعنى يلاق التخين يقول لك يا سلام على قلان ده ماله تخين كده يا ساتر يارب ، وتلاق تقيل الدم ، يقول لك أما فلان ده عليه دم يا باى ، وسى عبد الصبور المقزقز ما يقدرش يناسب واحد اسمه العقر .

سنية : وعلى كذه طار العقر ؟

أم رتيبة : العقر ، والسمالوطى بناع المصبغه والشيخ عبد ربه خادم الحسين ، والحاج صميده اللبان ، والشيخ ابراهيم عبد اللاوى الملتزم ، وزكى افندى شندى بتاع المائيفاتوره .

سنية : كل دول خطبوكي وطاروا ؟

أم رتيبة : طاروا يا سنيه يا بنتى ، طاروا كلهم ، والعمر بيطير يوم ورايوم ، يعنى أيه فايده عيشة الست لما تخش الدنيا وتخرج منها من غير ما تتجوز ، تبقى قيمة العيشه إيه لما الواحدة ما تعملش الحاجه اللى اتخلقت عشانها . ربنا مش خالق الدنيا رجاله وستات عشان الرجاله يتجوزوا الستات . الست عملها ربنا (أم رتيبة)

عشان تنجوز وتجیب أولاد ، وانا ضیعت عمری مع سی عبد الصبور لا جواز ولا اولاد .

سنية : الصبرطيب يا ستى !

أم رتبية : أيوه . الصبر طيب ، وهو البئى آدم العاجز ، قدامه إيه غير الصبر ؟ أهو يعزى نفسه بأن الصبر طيب ، وهو مجبسور على الصبر ، رضى والا مارضيش ، صابر ، صابر . لكن عشان يستحمل الصبر يقوم يقول ان الصبر طيب ، هوه فيه يا بنتى أمرّ من الصبر .

سنية : ربنا كريم يا ستى بكره يفرجها ..

أم رتيبة : أيوه يا بنتى كريم ، أنا برضه لما اقعد اراجع نفسى ، واقول الحمد الله على الستر ، الحمد الله ، على اللى اداه لنا ربنا ، دا مدينا حاجات كتير ما حناش حاسين بيها ، أصل الواحد ما بيحسش اللا بالحاجة إللى مش معاه ، لكن الحاجه اللى معاه ما يعرفهاش أبدا ، ما بيعرفهاش ولا يحس بها الا لما تضيع منه ، يقوم يعرف انه كان معاه حاجه ، احنا دايما نسخط عشان ربنا ما داناش ، لكن ما بنحمدوش على انه ادانا ، مع إنه يا بنتى دايما بيدينا .. أنا بعض ساعات اقعد افكر اقول مش برضه ربنا عوضنى يعنى هو ااتا لو كنت بعض ساعات اقعد افكر اقول مش برضه ربنا عوضنى بعنى هو ااتا لو كنت أنهو حقيقى ، بنغزه ومهفوف ، ومانيش عارفه آخذ منه لا حسق ولا باطل .. لكن برضه مريحنى وموكلنى ، وكاسينى .. ولو قلت آه ، يقول ورايا ميت آه :

سنیة : أیوه والنبی یا ستی ، سیدی عبد الصبور ما فیه زیه أبدا ، ولو انه الیومین دول طالع لی فی حاجه جدیده ما هیاش عاجبانی أبدا ، ربنا یستر علیه منها .

أم رتيبة : مش حكاية دراسة الأرواح ، وتحضير الأرواح .. ربنا يكفينا شرها ، إلهى يورينى فيك يا شيخ هباب ، انت اللي جريت رجله فيها ، هوه لا كان يعرف أرواح ، ولا عفاريت ، طول عمره غرقان في الخط العسرني ، والاقلام البسط ، واليفط ، وكراريس المشق ، من يوم ما عرف سي هباب

· الطين ، وهوا ما وراهوش غير الأرواح .

سنية : ربنا يستر عليه يا ستى ، أنا والنبى بخاف عليه لما يخش الأوده ويقفلها عليه ، ويقعد يقرا زى القطط .

أم رتيبة : تكونش الأرواح دى هي اللي خسرت أخلاقه ، وخلته على دى الحال ؟

سنية : والنبي يا ستى انا مش راضيه افسر ، دا بقى ما ينطقش ، وحكاية الصراحه اللي طالع لى فيها اليومين دول كرهت فيه طوب الأرض .

أم رتيبة : أهو كان زمان برضه طالع فى حكاية انه يقول للأعور أعور فى عينه .. لكن أهو برضك كان عنده شوية خشا ، لكن اليومين دول خلاص ، ما تعرف إيه اللي جراله .. العجز .. والا الهبابه الأرواح اللي طالع فيها .

سنية : تصدق يا ستى امبارح كان طالع على السلم قام قابل إدريس افندى اللى ساكن فوقنا ، الراجل بيسلم عليه بأدب ، بصبت لقيت ده مسن غير مناسبه . بيقنول له يا إدريس افندى انت ما سمعتش على أزمة الزيت اللى ف البلد . الراجل قال له أى والله .. الله يكون في عون الناس ، فرد عليه سى عبد الصبور بشخط ، وقال له يكون في عونهم ازاى وأمثالكم عمالين يحوشوا الزيت .. الراجل استعجب قوى وقال أنا ياسي عبد الصبور .. أنا والله ما عند كشى في بيتك نقطة ويت في بيتى . قام قال له ما عند كشى في بيتك نقطة ويت .. لكن عندك في طربوشك كيلو ويت ، لو كان كل واحد ويك يعصر الخمسه سنتى الزيت اللى في طربوشه كانت انفكت أزمة الزيت .

أم رتيبة : يا عيب الشوم ، قال الكلام ده كله للراجل ، ياما انا خايفه يعمل كده مع سيد افندي وامه ، أهى دى تبقى المصيبه السودا .

سنية : وهو ماله ومالهم ؟.

أم رتيبة : أصلى ما خبيش عليكى يا سنيه ، أنا شايفه اليومين دول من ست ام سيدريق حلو ، و دايما تقول ان سيد افندى بيساً ل على ، و قلبى حاسس . إن فيه حاجه في ضميرها ، و عينى اليمين بترف و إيدى الشمال بتاكلني و عمرى ما بتحصل لى الحاجات دى الالما يكون فيه خير جاى .

سنية : خير يا ستى خير .. خير ان شاء الله .

أم رتيبة : أنا حاسه ان سيد افندى ناوى يخطبنى قريب ، وحاطه إيدى على قلبى ، لاسى عبد الصبور يلخبط الدنيا ويطيره زى ما طير اللى قبله ، وهو اليومين دول زى مانتى شايفه حاله مبرجل .

سنية : ربنا يستر . (يسمع دق على الباب) تعالى شوف الباب يا زينهم .

زينهم : (من المطبخ) قومي افتحي . أنا مش فاضي .

سنية : انت مش خلصت خلاص دق الكسبره ، بتعمل إيه عندك ؟

زينهم : وانت مالك انت ، بقرا ، حد شريكي .

سنية : انت بتعرف تقرا ؟

زينهم : أهو بتعلم ، بفك الخط .. مالك انت ومالى ، زين وفتحه زا ، ره وفتحه را ، عين وفتحه عا ، زرع ، كويسه دى والا لأ ، يا خسارتك يا زينهم فى قلة التعليم كان زمانك واخد الليسانس .

(الباب يدق مرة أخرى)

أم رئيبة : (في غيظ) قومي سديا بت اتحركي وافتحى الباب ، انفتحت في راسك طاقه ، كفايه علينا نقعد نسمع خناقكم طول النهار ، حقه بطلوا ده واسمعوا ده .

(تفتح سنيه الباب .. وتدخل أم سيد)

المشهد الخامس

أم رتيبة : يا مرحبه يا مرحبه .. أهلا وسهلا ، الدنيا نورت يا ست ام سيد .

أم سيد : الله ينور عليكي ويشرف مقدارك .

أم رتيبة : خطوه عزيزه .

أم سيد : ربنا يعزك ياختى .

أم رتيبة : أهلا وسهلا .. أهلا وسهلا .. اتفضلي يا ستى الحاجه .. تعالى هنا على الكنبه جنب الشباك .. داحنا زارنا النبي .. قومي يا بت يا سنيه فزى .. لمى الملوخيه واركنى الطبليه وشيلى الفراخ من الشوربه واسقطى فيها الملوخيه .. قومى كده اتحركى . عدم المؤاخذه يا ستى الحاجه .

أم سيد : خدى راحتك ياختى .

أم رتيبة : واديا زينهم ، تعال انجر لم عروق الملوخيه دى ارميها فى صفيحة الزباله ..

بلا زرع ، وبلا ضرب ، زرعوك زرع بصل ، وضربوك على نافوخك

بالصرم .. آل بعد ما شاب ودوه الكتّاب .. ما تأخذنيش يا ستى الحاجه

على النكشه اللي احنا فيها .. أنا أصلى ما عنديش خدامين . أنا عندى

توايب .. عندى كواين .

أم سيد : ياختي وهم الخدامين بقوا خدامين .. دول بقوا اسياد .

(يدخل زينهم وفي يده كتاب القراءة الرشيدة) .

زينهم : (إلى سنيه مشيرا بأصبعه إلى الكتاب) ــ شايفه يا بت يا سنيه راسمين امك وابوكي في كتاب القراءة .

سنية : صحيح يا زينهم ؟ وريني كله ؟

زينهم : أهم ، أم قويق ، وابو جلامبو .

سنیة : بتنکت یا روح امل ، جاتك نیله ، جاتك نیله حزم ، لم یا خویا العروق لم ، أم قویق وابو جلامبو ، والله ما فیه ابو جلامبو غیرك ، یا مصدى ، یا معفّن ، یا مقشف یا مجنزر .

أم رتيبة : اتلمى يابت انت وهوا ، انتوالسانكم ما يدخلش بقكوا أبدا ، ما تتعبوش م الحناق ، ما بيتهدش حيلكم ! فوت لِمّ العروق ووضّب الصالة ، وانتى اعمل قهوه لستك ام سيد .. تشربيها إيه يا حاجّه ؟

أم سيد : خليها على الريحه ، والا احسن خليهم يجيبولي الكنكه والسبرتو والبن وانا اعملها هنا ، أنا أصلى دايما أحب اعمل قهوتي بإيدي .

أم رتيبة : تسلم إيديكي يا ستى الحاجه ، أمرك (إلى سنية) هاتى عدة القهوة يا بت هنا قدام ستك ، اشهلي شويه . آنستينا يا ست الحاجه .. ازاى بسلامته سند افندي ؟

(يخرج زينهم وسنية)

أم سيد : والنبى حاله مش عاجبنى اليومين دول أبدا ، شايفاه مش رايق كده ، وصحته مخستكه ، وبان عليه الهم والتعب .

أم رئيبة : ياختي بعد الشرعنه ، يمكن يكون استهوى .

أم سيد : أبدا والنبي ياختي .. داحتي دايما محرَّص على نفسه .

أم رتيبة : أهو من باب الاحتياط برضك ، حقك تعملى له كاسات هوا والا اعملى له بالقدره ، أنا حابعتلك القدره اللي عندى وفتيلة الزيت تحطيها على ضهره مرتين تلاته تمص كل البرد اللي عنده وتشد وسطه وتصلب جتته .

أم سيد : والله يا ست أم رتيبة أنا منهياً لى الحكاية مش حكاية برد .. دا باين عليه مهموم ، ومتضايق ، وزى اللى فيه حاجه شاغله باله .

أم رتيبة : ومتضايق ليه ومهموم ليه ؟ ربنا ما يجيب لا هم ولا ضيق .

أم سيد : أنا أفتكرته في الأول مهموم من حاجه في شغله ، وقلت يمكن حد ضايقه والاداس له على طرف .

أم رتيبة : ما عاش اللي يضايق سيد افندي والا يدوس له على طرف . الراجل أمير ، وزى السكره ، يضايقوه ليه يا ختى ؟

أم سيد : قلت يمكن حد مسه بكلمه كده والاكده ، أهو الأمر ما يسلمش ، والا يكون هوا عمل غلطه ، أصل اليومين دول الشغل بقى متعب قوى وهوا ما بير حمش نفسه .

أَم رتيبة : الله يكون في عونه ، وياخد بيده .

أم سيد : أصل المعمل كبر قوى ، والإنتاج بيكتر ، والأصناف بتزيد ، وكل الشغل متوقف عليه وحده ، مفيش في البلد خبير غيره .

أم رتيبة : باين عليه ياختي باين ، هوا فيه حد زي سي سيد افندي !

أم سيد : من يومه والنبي يا ست أم رتيبه . . خمسه وأربعين سنه وهو الخبير الوحيد في المعمل ده . . ما ونش و لا كلُش ، لما انحرق وانكوى . . حاجه تلهلب يا ختى مين يقدر يستحمل غيره ؟

أم رتبية : ربنا يحميه ياخني .

أم سيد : يحميه أكتر من كده ، دا لو لا إنه راسي ع الشغلانه دى .. كان زمانه بقى حريقه ، كان زمانه لهلب و فرقع و انفجر .

أم رتيبة : يالطيف .. يالطيف يارب ، ياختى بلاش الشغلانه الوالعه دى ، ما بلاش معمل المفرقعات ده .

أم سيد : معمل إيه ؟

أم رتيبة : المفرقعات !! مش بيشتغل خبير في معمل مفرقعات !؟

أم سيد : مفرقعات إيه ياختي .. سلامة عقلك .

أم رتيبة : أمال معمل إيه يا ستى الحاجه اللي بيلهلبه ده ؟

أم سيد: معمل طرشي يا حبيبتي.

أم رتيبة : معمل طرشي ؟

أم سيد : أيوه معمل طرشي ، خبير في معمل طرشي . ما له ؟ وحش ؟

أم رتيبة : لا ياختي مش وحش أبدا ، اسم الله عليه ربنا يحميه .

أم سيد : يوه ما بلاش ياختي حكاية بحميه دى . هوا ناقص حموً .

أُم رتيبة : أبدا ياختى أبدا .. ربنا يبرد جوفه .. ويسقع مصارينه .. وبسلامته سي سيد افندي الخبير بيعمل إيه في معمل الطرشي ؟

أم سيد : ياختي قلت لك خبير ، هو انتي ما بتفهميش ؟

أم رتيبة : أيوه ياختي فاهمه وعارفه .. خبير.. والخبير دا بسلامته بيعمل إيه ؟

أم سيد : يدوق .. هوا الآمر الناهى فى المعمل كله .. ما فيش عينة طرشى تخرج م المعمل إلا لما تفوت عليه .. لا لفت ولا خيار ، ولا جزر ، ولا كرنب ، ولا أرنبيط ، ولا فلفل ، ولا بنجر ، ولا لمون ، ولا حاجه تخلق في عالم الطرشى والخللات ، إلا لما يحكم عليها هوه ويوافق على خروجها .

أم رتيبة : ويحكم عليها ازاي ياختي ؟

أم سيد : يعني يشوفها ناقصه شطه . ناقصه خل . دلعه .. حادقه . حاميه .

أُم رتيبة : ما شاء الله . ما شاء الله . عينى عليه بارده (يدخل زينهم حاملا معدات القهوه ويضعها على منضدة صغيرة أمام أم سيد) . زينهم : (لأم سيد) أجيبلك ميه سقعه وإلا مبة دقه ؟

أم رتيبة : اقصر لسانك جاك قطعه .. مية دقه لما تلهلب جوفك .. عدم المؤاخذه يا ست ام سيد .. أصله دايما مسحوب من لسانه ، فوت امشى انجر على المطبخ .. قول للبت سنية تاخد بالها من حلة الرز لحسن تشيطها زى ما شيطتها امبارح . (ملتفتة إلى أم سيد) أبوه يا ست الحاجه بقى بسلامته ما فيش عينة طرشى تخرج من المعمل إلا لما تفوت عليه ؟

أم سيد : أبدا ، قبل البرميل من دول ما يخرج للبيع لازم ياخدوا التصديق منه بالخروج ، هوا لوحده الآمر الناهي ، مافيش قرن فلفل يعدى من غير إذنه .

أم رتيبة : يا سلام ، يا ست ام سيد ، كل ده بيعمله سيد افندى ، ربنا يزيده من سلطانه ، وبقاله كتبر في الشغلانة دى ؟

أم سيد : من يومه ياختى .. من يوم ما وعي على الدنيا وهو خبير مصر الأول في صناعة الطرشي .. عليه لسان في دوق الطرشي مينزلش الأرض .

أم رتيبة : ما شاءالله ما شاءالله . والموهبه دى جات له منين ياختى ، خلقه كده من عند ربنا ، والا وراثه ؟

أم سيد : أبدا والنبى ياختى ولا وراثه و لا حاجه ، دا حتى أبوه الله يرحمه ما كانش له فى الطرشى أبدا ، وما كانش يحب غير الحاجات المعسله ، زى العصيده ، والمفتقه . والعسل والطحينه .

أم رتيبة : أمال المحروس سيد افندى ، خد الموهبه دى ازاى ؟

أم سيد : بالتمرين . . بمضى المده .

أم رتيبة : ازاى ياختى ؟

أم سيد : المسأله ابتدت معاه وهوا لسه في اللفه ، أصلى لما كنت برضعه . . لبني تشف ، فبقيت اديله لبن اصطناعي ، فليله من ذات الليالي صحى يصرخ بالليل وكنت متعوده دايما أول ما يصحى أروح ماده قرزازة اللبن في بقه يروح راضع شويه وتنه نايم ، ففي الليله دى مديت إيدى على الترابيزه وانا

مغمضه وعيني فيها النوم مسكت البزازه لقيتها فاضيه ، فأعدت أحسس لقيت الكبايه اللي فيها اللبن جنب البزازه رحت دلقاها في البزازه وحطاها له في بقه ، راح مقربعها لآخرها وراح نايم .

. أم رتيبة : بالهنا والشفا ، صحه وعافيه على سيد افندي اللبن كويس ومغذي .

أم سيد : ما كانش لبن يا ستى ام رئيبه .

أم رتيبة : أمال كان إيه ياختى ؟

أم سيد: مية لفت.

أم رتيبة : يوه يا ندامه ، ومنين جتك مية اللفت ؟

أم سيد : أصلى كنت محضره كباية مية لفت أشربها على الريق ، وكنت حاطه الكبايتين جنب بعض على الترابيزه ، فلما مديت إيدى بالليل جت في مية اللفت .

أم رتيبة : ياختي بره وبعيد ، وجرا إيه لسيد أفندي بعد كده .. مات ؟.

أم سيد: تفي من بقك سبع تفات .. بعد الشرعنه .

أم رتيبة : ألف بعد الشر ياخالتي الحاجه ، جرا له إيه طمنيني ؟

أم سيد : صبح لا بيه و لا عليه ، زى القرد المسنسل ومن يومه يا ختى و هو راسه و ألف سيف . . ما يدوق اللبن أبدا و لا يحطه على لسائه ، كل رضاعته مية لفت ، مية جزر ، مية بنجر .

أم رتيبة: بسم الله ما شاء الله .

أم سيد : قولى معدته اتحرشت ولسانه اتودك ، وأول ما ابتدا يمشى ويلعب مع ولاد الحاره ، كنت دايما تلاقيه يحب الطرشجيه ، فتبصى تلاقى اولاد الحاره يأخدوا مصروفهم يشتروا بيه قصب والا مصاصه والا براغيت الست ، وهوا من دون الاولاد ياخد مصروفه إن كان مليم والا نكله ، وتنه رايح على الطرشجى اللي على باب الحاره .. يفضل يقربع في ميه لفت ومية دقه لما يقول بس .

أم رتيبة : يا سلام عليك يا سيد أفندى ، من يومك وانت ابن كار .

أم رتيبة : أهو تنه كده ، يقربع في مية اللفت والدقه ، تقوليش غاوى .. لغاية ما بدأ الاحتراف .

أم رثيبة : وازاى يا ختى ابتدا الاحتراف ؟

أم سيد : في يوم من ذات الايام راح عند بتاع الطرشي ، وقال له اديني بمليم مية لفت و بمليم مية دقه ، الراجل مد له إيده بكوز مية اللفت قربعه ، ومد له إيده بكوز مية الدقة شرب شفطتين و رجعه ، الراجل قال إيه مالها ، قال له وحشه مش مظبوطه .. قال له ليه .. قال له ناقصه شطه والخل بتاعها مغشوش .. أنا عايز تجيب لى من البرميل التالت اللي علي إيدك الشمال ، أيوه البرميل ده .. الرجل فرغ الكوز وملاه من البرميل اللي قال عليه ، راح مقربعه وقال له أيوه ، أهى دى تمام .. الراجل استعجب ، خد شفطه من البرميل ده ، وشفطه من ده ، استعجب أكتر ، لقي كلام الولد مضبوط وهوا لسه مطلعش من البيضه عمره لسه سبع سنين ، راح مرجع له النكله و رقع الصبي بتاعه علقه ، وقال لسيد اسمع ياواد ، الت تيجي كل يوم هنا و رقع الصبي بتاعه علقه ، وقال لسيد اسمع ياواد ، الت تيجي كل يوم هنا تاخد لك كوزين مجانا ، وبعد جمعه كان سيد بيشتغل في دكان الطرشي ، قاعد على كرمبي ما يعملش حاجه أبداغير الدوقان ، ويفضل على كده كتير قاعده و اربعين سنه .

أم رتيبة : ما شاء الله ... ما شاء الله .

أم سيد : الدنيا اتغيرت ، والمحل كبر واتسع ، وحاله راج وبقى معمل كبير أد الدنيا ، وسى سيد هوه ، هوه ، مالوش شغله غير انه يقعد على الكرسى ويدوق ، خمسه واربعين سنه ، وهو حافظ مركزه ، خبير مصر الأول في صناعة الطرشي .

أم رتيبة : أدها وأدود ، وهو حديقدر على كده غيره !

أم سيد : عشان كده بقول أن ضيقته وعكننته اليومين دول مش ممكن تكون م الشغل .

أم رتيبة : أمال يعني فكرك تكون من إيه ؟

أم سيد : والله يا ختى أنا بقول ان فيه حاجه شاغله باله .

أم رتيبة: زي إيه ؟

أم سيد : بقى ياست آم رتيبة انت مش غريبه وانا مش حاخبى عليكى ، بقى انا طول عمرى اقول له أنا نفسى اجوزك وافرح بك ، وهو كل ما اجيب له السيره دى ألاقيه كشر ولوى بوزه ، وقال لى انا مش عاوز اتجوز . . أنا مبسوط من عيشتى كده ، لكن اليومين دول ، شايفاه كده لما نجيب له سيرة الجواز ، ما يكشرش ولا يلويش بوزه ، وحتى فى بعض ساعات هوا يقعد يقوللى . . والله يا ريتنى سمعت كلامك واتجوزت من زمان . . أهو الواحد ضيع عمره فشوش . . و دلوقت لو حب يتجوز ما يلاقيش اللي ترضى به .

أم رتيبة : ليه ياختي ألف من ترضى به .. هوا فيه احسن من سيد افندي ؟

أم سيد : برضه انا قلت له كدا .. لكن لقيت زى ما يكون فيه حاجه فى فكره عايز يقولها لكن مش قادر .. زى ما يكون كدا مكسوف .. مستعيب .. خايف .

أم رتيبة : وياختى مش قادر ليه . . هى الحاجات دى عيب . . والاحد يختشى منها ؟ . أم سيد : المقصود . . فضلت آخد منه وادى ، واحاوره وداوره ، لغاية ما ابتدا يفضفض باللي في قليه .

أم رتيبة : وطلع إيه ؟!!

أم سيد : كلمه من هنا ، وكلمه من هنا ، قال لى .

أم رتيبة : قال لك أيه ؟.

أم سيد : يوه ياختي يا ست ام رتيبه . صبرك على ، خليني آخد نفسي ، هي الدنيا طارت !.

أم رتيبة : على مهلك أوى ياختى ، خدى نفسك بالراحه خالص .. هيه .. قال إيه ؟.

أم سيد : كلمه من هنا ، وكلمه من هنا .. يا سيد قول ما تخبيش على انا مش غريبه ،
قال لى يا ام نفسى اخش دنيا ومش لاق حد يوافقنى ، قلت له يا بنى الدنيا
الواسعه دى كلها ما فيهاش حد يوافقك .. بصيت لقيته وطا رأسه في

الأرض وقال لى بوشوشه ، فيه واحده بس يا أم ، واحده ما فيش غيرها .. هى النص التانى بتاعي ، النص اللى قعدت طول عمرى أدور عليه .. انتى مش عارفه أن البنى آدم منا زى ما يكون لفته وانشقت نصين وانه طول عمره يفضل تعبان لغاية ما يلاق نص اللفته التانيه ، ياختى هوه قال لى كده وآنا اتلخبطت .. لفتة إيه وخيارة إيه .. قلت له إيه الكلام الفارغ اللى بتقوله ده يا سيد يا بنى .. إنت يا بنى عاوز تتجوز والا بتدور على نص لفته ، هو البنى آدم ده ما يقنعش . ما فيش حاجه تملاعينه أبدا ، كل اللفت اللى انت غارقان فيه طول عمرك وبعدين تقول لى أن ناقصك نص لفته !.

أم رتيبة : يا ست ام سيد مش قصده نص لفته . نص لفته . . دا قصده نصه التانى . . أصل كل واحد كده لازم له نص يكمله يعنى انا ناقصنى مثلا ، نص كرنيه . نص بطيخه .

سنية : (مقبلة من المطبخ تحمل ملعقة وطبق) وانا يا ستى ناقصني إيه ؟.

أم رتيبة: نص حيه، وإلا نص عقربه.

زينهم : (**من داخل المطبخ**) وانا يا ست ؟.

آم رتيبة : نص نعل ، يا مرقع يا بولوزه ، يا فردة شمال ، شوف شغلك بقى وبلاش لماضه ، حاكم دايما تتداخل في اللي مالكش فيه .

سنية : (تمديدها بالملعقة) شوف حدقها كده يا ست ؟.

أم رتبية : (بعد أن تتلوقها) أهى كويسه، بس هدى الوابور شويه من تحت حلة الرز (موجهة الحديث إلى أم سيد) فهمت بقى يا ست أم سيد؟ أهو ده قصده.

أم سيد : ما هو برضه قال لى كده ، فهمنى أن نص اللفته بتاعته ، يعنى الست اللي نفسه فيها .

أم رتيبة : ولقاها ؟

آم سید : آیوه یا ستی لقاها ، بس ما طلعتش لفته أبدا طلعت زی ما بتقولی کرنبه ، کرنبه عجالی .

أم رتيبة : حقيقي .. حقيقي كرنبه ؟.

أم سيد : ياختي اصبري .. مالك مسروعه كده .

أم رتيبة : وبعدين يا خالتي ام سيد لما قال لك انه لقي نص اللفته .. قصدى نص الكرنيه ؟.

أم سيد : قلت يا بني ، وهو نص اللفته برضه يوافق نص الكرنبه ؟.

أم رتيبة : يوه يا حاجه .. ما توافقش ليه .. قادر ربك يجمعهم سوا في برميل واحد .

أم سيد : ما هو برضه قال لي كده .

أم رتيبة : من فهمه وتقديره ، وبعدين يا خالتي أم سيد قال إيه ؟ ما طلبش نص الكرنبه ؟.

أم سيد : طلبها ياختى .. وقاللى يا ام انا خايف احسن ماترضاش يى .. قلت له از اى يابنى يا سيد .. دا انت أدها وأدود ، قال لى طيب روحى جسى النبض ، لقيت الحكاية مش عايزه بد .. أخدت بعضى وتنى جايالك .. إيه رأيك ياختى ؟.

أم رتيبة : رأيي ؟ آل رأيي آل ، يا سلام ياست أم سيد دا انت خليتي جتني تنمل . . دا اناطول عمري احب اللفت ، أموت في اللفت ومية اللفت .

أم سَيد : أصيله والنبي .. أصيله يا ست ام رتيبه .. أنا برضه كنت عارفه أن أملي مش حايخيب فيكي أبدا .

زينهم : (يدخل وفي يده مقشة) اسمعي يا بت يا سنيه . أنا على الكنس وانتي عليكي المسح .

سنية : (وفى يدها جردل المسح) لأكل واحد مناعليه أوده كنس ومسح ، أنت أصلك ضلالى ما عندكش ذمه . . ما بتقرطش على المقشه ، وتسبب كل التراب ، ولا بتمدش إيدك تحت الكنبه . . وادوخ انا بعدك في المسح . .

زينهم : يا سنيه ياختى ما تبقيش مناكفه .. أنا حاقش لك كويس خالص ، وامد ايدى زى مانتى عايزه .. أمد إيدى تحت الكنبه .. وتحت الملايه ، وتحت القميص .. بس ما تبقيش تقوليلي شيل إيدك .

سئية : شاهده ياستى على قلة الأدب ؟.

أم رتيبة : اخرس يا واد يا زينهم ، واختشى على دمك و خلى عندك تربيه .

زينهم : خرست . . هوه انا ما اعرفش اتكلم كلمه في البيت ده ؟.

أم رتيبة : كلمتك اجنابك (لأم سيد) خطوه عزيزه يا ست ام سيد . داحنا

زارنا النبي . دا يوم المنا . دا يوم الهنا .

أم سيد : خلاص يا ستى ام رتيبه . . موافقه ؟.

أم رتيبة : موافقه وبس ، وهوا انا الاق أحسن من سيد افندي .

أم سيد : استبينا ؟

أم رتيبة : استبينا .

أم سيد : طيب واخليه ييجي يقابل سي عبد الصبور إمتى ؟

أم رتبية : (فى فترع) عبد الصبور ا.. يا مصبتى .. يا وقعتى .. يا خيبتى .. يا : "

أم سيد : ليه ياختي كفا الله الشر ؟.

أم رتيبة : يا فرحه ما تحت خدها الغراب وطار .

أم سبد : يوه يا ندامه .. حصل إيه ياختي ما توجعيش بطني ؟.

أم رتيبة : عبد الصبور .. مفرق الأحباب .. وهادم اللذات .. يا خيبة أملك يا أم رتيبه .. يا ميلة بختك يا أم رتيبه .

أم سيد : هو إيه أصله ياختي ده . . ما تقوليلي إيه الحكاية وقعت قلبي ؟ .

أم رتيبة : ما فيش فايده يا ست ام سيد . ما دام حا يدخل فيها سي عبد الصبور باظت واتفركشت . . أناكنت ناسياه خالص . . كان رايح عن بالى . . الفرحه نستنى أن فيه شيء اسمه عبد الصبور . . وشه يقطع الخميرة م البيت .

أم سيد : ياختي ليه بس . . دا سي عبد الصبور باين عليه عاقل وابن حلال .

أم رتيبة : عاقل فى كل حاجه .. ما عدا الحكايه دى . مفيش فايده .. أنا عارفه ما

فيش فايده ..

أم سيد : طب بس فهميني ليه ؟.

أم رتيبة : أهو كده ، خلقته كده .. طبعه كده .. شغلته انبه يضيبع منسى العرسان .. اللي خلاه رفض العشرين عريس اللي فاتوا .. يعني حا يستعصى عليه سي سيد .

أم سيد : ياختى قادر وكريم .. مين يعرف .. يمكن ربنا يهدى سره ويعقله .. ويخليه يوافق .. هوا فيه حاجه بعيده على ربنا ؟.

أم رتيبة : مش بعيده على ربنا .. لكن بعيده على أنا حاسه وعارفه .

أم سيد : طيب خليها على الله ياختى ، اسكتى انت وربنا حا يجيبها سليمه .. إن شاء الله المره دى حا تصيب .. أنا قلبي حاسس كده .

أم رتيبة : يسمع منك ربنا .. ولو اني عارفه انه ما بيرضاش يسمع الحكايه دي أبدا .

أم سيد : ما تقوليش كده يا ام رئيبه .. أستغفر الله العظيم من كل ذنب عظيم .. بكره كل حاجه تنصلح .. أخلى سيد بيجي يزوره إمتى ؟.

أم رتيبة : ياما انا خايفه م الزيارة دى .

أم سيد : ياختى جمّدى قلبك ، ما تخافيش .. كل حاجه حاتيجى سليمه ، هو سيد فيه حاجه تتعاب ، دا على الفرّازه ، وأدب وأخلاق ، وكال و كال وذوق ، هوا فيه احسن من كده ؟.

أم رتيبة : ما هم اللي فاتوا كلهم كانوا كويسين ، لكن كان بيطلع فيهم القطط الفطسه .

أم سيد : لا .. بس اطمئى ، دامش حا يلاقى فيه عيب أبدا ، إن شاء الله ربنا حيتمم بخير .

أم رتيبة : من بقك لباب السما ، ربنا يهديه ويكمل سيد افندى في عينه ، بس على فكره يا ست ام سيد لازم نعمل استحراصنا على كل حاجه ، عشان المقابله تتم على خير ، وعشان ما يحصلش حاجه تعكر مزاج سي عبد الصبور ويخسر لنا الشغلانه .

أم سيد : اللي انت عايزاه منا يا ست أم رتيبه نعمله . بس أأمرى .

أم رتيبة : أول كل حاجه .. اسم سي سيد افندى الكامل إيه .. لحسن يكون فيه حالاجه كده وإلا كده ، أصله يهتم بالاسم أوى .

أم سيد : اسمه سيد افندي بنجر .

زينهم : (**ضاحكا**) بنجر .. هأ .. أو .

أم رتيبة : (بيأس) بنجر ؟ يادى المصيبه الحمرا .

أم سيد : ماله بنجر .. وحش ؟.

أم رتيبة : لأحلو .

زينهم : (مصفقا بيديه مغازلا سنية) حلو .. يا حلو .. مش حا تنجوزيني بقي يا بت يا سنيه ، أموت ولا رحش التمن .

سنية : يا خويه إلْهي تموت وتروح التمن .. يا يجح يا ضلالى ، أنا اتجوزك انت .. خلاص الدنيا خلصت منن الرجاله لما اتجوزك أنت .

أم رتيبة : (تضرب كف على كف) حلو ، حلو أوى .. يا خسارة الجوازه ، يا ميلة بختك يا ام رتيبه .

أم سيد : ياختي .. هوا إيه أصله ده .. ميلة بختك ليه بس .. هو اسم بنجر عيب ؟.

أم رتيبة : اللي ما رضي بالعقر يرضي بالبنجر .

أم سيد : يا ستى هوه ماله ومال الاسم .. هوه الاسم بيعض .. كل واحد حر في اسمه ، بنجر ، خيار ، جزر .

أم رتيبة : ما فيش فايده يا ست أم سبد ، مش ممكن مش ممكن .

أم سيد : وعلى العموم الاسم في إيدينا .. ده حاجه سهل .. من بكره يروح المحكمه الشرعية يغيره .

أم رتيبة : حقيقي يا ست ام سيد ؟ ممكن يغير اسمه ؟.

أم سيد : مش ممكن ليه ؟ ممكن قوى . هوا يعني كان لزق .

أم رتيبة : ما لزقش و لا حاجه . بس هوا يعني حا يرضي يغير اسمه ؟.

أم سيد : يرضي قوى .. عشان خاطر عيونك . من بكره يروح يغيره ، وبعد

بكره يكون هنا من غيره .. مبسوطه يا ستى ؟.

أم رتيبة : كتر خيرك ياست ام سيد . ما عدمكيش أبدا .

أم سيد : خلاص . اتفقنا . بعد بكره أقول له يبجى يقابل سي عبد الصبور ؟ .

أم رتيبة : خلاص أوى . بس قولى له . يستحمله ولا يزعلش منه . يعني إن قال له رتيبة له كلمه كده والاكده ما ياخدش على خاطره . قولى له ياخده على أد عقله يعلم به ربنا .

(يسمع طرق على الباب بعصا)

أم رتيبة : (مرتبكة) يوه . دى دقته . يا ترى إيه اللي جابه بدرى كده ؟ . (يطرق الباب ثانية) .

أم رتيبة : طيب . طيب . افتحى يا بت يا سنيه . تعالى بنا يا ست ام سيد نخش ف أو دة الضيوف .

أم سيد : لأياختي أنا خاقوم بقي عشان اشوف ورايه إيه . واسيبك يمكن يكون سي عبد الصبور عايز حاجه .

(تفتح سنيه الباب ، ويدخل عبد الصبور . أم سيد تغطى وجهها بالملاءة)

عبد الصبور : إيه ده . هوا انتوا نايمين نومة أهل الكهف.ساعه وانا عمال اخبط ما حدش راضي يفتح .. انطرشتم .

أم رتيبة : (مشيرة إلى أم سيد) خالتي ام سيد جارتنا يا سي عبد الصبور .

عبد الصبور : طبب . طبب . مش وقته دلوقت . قوموا ياللا من هنا . اخلو لنا الصاله بسرعه .. عشان خاطر عندنا جلسه مستعجله . عندنا حاجه خطيره عايزين نشوفها . ياللا اتفضلوا .

أم رتيبة : يوه .. هوا انت دايماكل حاجتك مستعجله ، جلسة إيه اللي حاتعملها هنا ؟.

عبد الصبور: جلسة أرواح، يعنى حا تكون جلسة إيه، جلسة مجلس وزراء!. أم سيد: (تلتف في ملاءتها وتنهض) طيب يا ست ام رتيبه أستأذن آنا .. (أم رتيبة) خليتك بعافيه . . إن شاء الله بعد بكره زى ما اتفقنا ؟ .

أُم رتيبة : إن شاء الله ، بس ما تنسيش اللي قلت لك عليه ، إو عي بيجي بيه ؟.

أم سيد : ما تخافيش ياختى ، اطمنى . حطى فى بطنك بطيخه صيفى ، أنا اخليه يغيره و يغير أبوه ، ما يكونش عندك فكره أبدا .

(تنصرف أم سيد ، وتودعها أم رتيبه حتى باب البيت) .

المشهد السادس

عبد الصبور: (صائحا) زينهم .. يا حلُّوف ، يا بجم يا لوح .. انت فين ؟.

زينهم : (من داخل المطبخ) يا ستار يارب .. ادحنا جينا للشخط والنطر

(بنغم طويل) حاضر .

عبد الصبور: (مستموا فی ثورته لسنیة وأم رئیبة) وانتم واقفین كده لیه ؟ یا الله اتلحلحوا شویه مافیش وقت . الجلسه حا تنعقد الساعه دلوقت اتناشر الا ربع ، عایز الصاله تكون جاهزه حالا رساعه دلوقت اتناشر الا ربع ، عایز الصاله تكون جاهزه حالا مشیرا إلی أكوام عروق الملوخیه وقشر التوم والبطاطا) یاللا شیلوا البلاوی المتلتله علی دماغكم دی . عروق ملوخیه و فصوص توم ، إیه الحاجات الأرضیه دی .. ملوخیه و توم و بطاطا .. احنا رایحین نحضر أرواح ، أرواح سماویه ، أثیریه .. انتوا عایزین الأرواح تنزل بین الملوخیه والبطاطا والتوم ، دی تقیی فضیحه فی عسالم الأرواح ، دی تبقی كارثه .

أم رتيبة : ليه يا خُويا بس .. نكيه وكارثه على إيه !! يمكن أرواح تحب البطاطا .

عبد الصبور: أرواح تحب البطاطا؟ انتى يا وليه مجنونه؟ بتخرف؟ أنا طول عمرى اقول ان عقلك على قدك ، أرواح تحب البطاطا؟.

أم رتيبة : ليه ؟ عيب ؟ قباحه ؟ مالها البطاطه ؟. دى حتى بطاطه حمر ا من بطاطة سيدى جابر زى الشهد . عبد الصبور: بطاطا ، بطاطا . . انتي ياوليه جنسك إيه . أرواح تحب البطاطا ؟ .

أم رتيبة : لا .. تحب الألمازيه ، يعنى هوا انت ضامن أنّ الأرواح اللي حا تنزل أرواح من جاردن ستى والا من الزمالك ، يمكن برضه تكون زى حالتنا كده من حوش آدم .

عبد الصبور: أرواح إيه يا شيخه اللي حا تنزل من جاردن ستى ، والا من حوش آدم ، دى نازله من طبقات الأثير ، من العالم الآخر المجهول ، أرواح ياوليه ، أرواح .

أم رتيبة : أرواح والابستليه .. أنا مالي .. تنزل من مطرح ما تنزل .

عبد الصبور: تنزل من السما، لا تاكل بطاطا .. ولا ألمازية .. دى أرواح .. عارفه يعنى إيه أرواح ؟ يعنى مثلا لما تطلع روحك ..

أم رتيبة : (مقاطعة) بره و بعيد . . تف من بقك سبع تفات . إيه الكلام دا اللي بتقوله اللي زى السم .

عبد الصبور: يا ستى يقول مثلا، مثلا. وعلى كل حال انتى زعلانه ليه، ما هى مسيرها تطلع .. وتنطلق حره في طبقات الأثير .. وربنا يتوب عليها من السجن اللي هيه فيه .

أم رتيبة : سجن ؟ فين يا خويا السجن دا اللي هيه فيه ؟

عبد الصبور: (یشیر إلی جسدها) ده .. ده .. السجن السفلی ، الدنیوی ، الجته اللیزی جته الحنازیر .. اللیزی کیس الغسیل .. بکره تفارقه و تنطلق منه .. وتمشی فی السموات السبع حره .. تطیر زی الفسراشة .. تصوری انك تبقی طایره زی الفراشه ، خفیغه لطیفه ، بترفسرفی بأجنحتك . مش احسن من البرمیل اللی انت محشوره فیه .. مش احسن من القدرة اللی عماله تدبی فیها أكل .. بطاطا ، وتسوم .. وملوخیه ، ومفتقه .. وتكلفتیها فی خرق و هلاهیل ، ایشی قمیص وایشی لباس وایشی شراب .. والنهارده بردت و بكره سخنت ، ومره طلع لها خراج ، ومره وقعت انكسر لها إید والا رجل .. مش

هي دى الجته اللي انتى مسجونه فيها ، واللي مورياك الويل والعذاب .. مش احسن لك تفارقيها .. مش أحسن إذ روحك تطلع منها ؟

أم رتيبة : روحك انت اللي تطلع . أنا عبجاني جتني . إذا كان مش عاجباك جتنك الناشفه المقدده . . اطلع انت منها . أهو باب السما واسع ، آل جتني آل . . مالها جتني ؟ عوجه . . عارجه . . خمسه و خميسه . . وحصوه في عين اللي ما يصلي على النبي .

عبد الصبور: لسه بدری علیکی عشان تفهمی .. لسه قدامك كتیر .. كستیر خالص ، ومین یعرف یمكن ما تفهمیش أبدا .. اللی زیك انتی مش ممكن یفهم .. ومش ضروری یفهم ، وعلی كل حال ده مش وقته ، یاللا یاللا .. شیلوا البلاوی دی .. الناس زمانهم جایین .. وله یا زینهم الكلب یابوز الإخص ، انت مش عایز تیجی والا إیه ؟

زينهم : ما تصبر عليه شويه ، والا أجيلك كده زي مانا ؟

عبد الصبور: تعال بسرعه .. احنا مستعجلين .

(زينهم يدخل مترددا ، فلا يكاد عبد الصبور يرى وجهه حتى يفزع وبصيح به وهو بيصق عليه) .

عبد الصبور: ارجع .. ارجع تانى .. ارجع بقول لك ، مقدرش ابص فى وشك ، شكلك بيلبشنى .. وشك نحس .. عينيك كلها سفاله .. نظر اتك كلها مكر ولؤم .. ارجع احسن لك .. أنا قلت لك ميت مره ما تخشش على بوشك مكشوف غطيه بسرعه .. يا ساتر .. يسأ

زینهم : (پیراجع) ما قلت کده ، ما عجبکشی .

أُم رتيبة : مُالُواْ يَا خُوْيِهُ وَشَهُ ؟ مَشْ خَلَقَةً رَبِنَا ؟ مَشْ زَى وَشَ الْبَنَى آدَمَيْنَ اللَّى فَ الشَّارِع .؟ حقه بطلوا ده واسمعوا ده . آهو ده اسمه كهن .. اسمه بدع .

عبد الصبور: خبوه . خبوه بسرعه . أنا قلت له ما يطلعليش بوشه مكشوف أبدا .

زينهم : (من المطبخ) _ فين يا بت يا سنيه الوش ؟. الله يخرب بيتك .

سنية : (تخرج من إحدى الحجرات) بلاش زعيق كده . دور عليه عندك

فى صفيحة الزبالة (لعبد الصبور) الطرطور والعبايه وعلبة النشوق والمنشه جاهزين على الكنبه . أحضر لك الطشت ؟

عبد الصبور: لأمش دلوقت ، أنا مش حاقلع دلوقت لسه ورايه جلسه ، وجاى لى ضيوف .

(زينهم يدخل وقد ارتدى وجها من الوجوه الورق المضحكة) .

أم رتيبة : كده يعجبك ياسي عبد الصبور ؟ كده حلو ؟ دلوقت ما بيلبشكش ولاحاجه ، راحت السفاله والخساسه ؟

عبد الصبور: أيوه كده ، كده أحسن كتير ، كده كويس خالص .

(تخرج سنية من إحدى الحجرات وتأخذ في لم عروق الملوخيه)

أم رتيبة : حكمته !! (تدخل في إحدى الحجرات) .

عبد الصبور: يا الله يا زينهم جهز الترابيزة للشغل، شيل المفرش وامسحها كويس، وجهز الكبايه، ورص الكراسي، انت عارف التوضيب كله؟

زينهم : عارفه ، عارفه ، أوعوا بقى وسعوا لنا عشان نشوف شغلنا ، اوعى كده يا بت يا سنية . . وابعدى صدرك من سكتى لحسن زاحم الدنيا (يأخذ في تجهيز المنضدة ورص الكراسي حولها) .

سنية : (وهي تجمع عروق الملوخيه والبطاطا) سامع يا سيدي بيقول إيه ؟

عبد الصبور: أنامش قلت لك ياوديا زينهم أقصر لسانك الزفر عنها ، يعنى أعمل أيه فيك أكتر ما إنا ملبسك وش ، ألبسك كامه ؟ أربط لسانك ؟ مش حرمتك ميت مره شغل البصبصه ، وزوغان العين .

زينهم : وانا اعمل لها إيه .. إذا كانت زاحمه الطريق بصدرها ، مش تلمه شويه ، بص كده واحكم شوف مين فينا الغلطان ؟

عبد الصبور : (يلتفت إلى سنية) أبوه حقيقي ، لك حق لمي صدرك يا بت واحتشمي جاكي خابط في نافوخك ، أنا مش قلت لك ميت مره بطل

المسخره دي وقلة الحيا ؟

سنية : يوه يا سيدي . . وانا اعمل إيه ما هوه اللي طالع كده خلقة ربتا .

عبد الصبور: أيوه حقيقى .. خلقة ربنا ، معذوره ، حاتعملى إيه .. الله يكون ف عونك ، ربنا ياخد بصدرك .. يا اللا ياواد يا زينهم اشهل شويه ، الكبايه فين بتاعة كل مره ؟ (سنية تنتهى من جمع عروق الملوخيه وقشر التوم وزينهم ينتهى من تجهيبز المنضدة وإحضار الكوب الفارغة) .

عبد الصبور: أول ما يبجوا الضيوف تعمل قهوه يا سنيه وتدخليها ، وبعدين مش عايز أشوف خلقة حد منكم أبدا . سامعه ؟ . قول لستك كده ، وانت يا واد يا زينهم تقف على باب المطبخ لحسن يمكن نعوز حاجه . . وتلم لسانك . . ولا تتداخلش في اللي ما لكشي فيه . واوعى تقلع الوش .

زينهم : علم يا سي عبد الصبور علم ، حافض كل حاجه . (يسمع صوت أقدام تقترب من باب الشقة ثم صوت طرق على الباب) .

عبد الصبور: س .. بس .. ياللا يا بت يا سنيه شيلي اللي في إيدك ده واطلعي بره . (بتجه إلى الباب ويفتحه) .

(يدخل الشيخ جاد الله ، والأستاذ زكى حنجل ، والأستساذ محجوب الور الذي يرتذي بدلة سوداء وكرافته سوداء) .

المشهد السابع

عبد الصبور: أهلا وسهلا .. (ينظر إلى صاعته) الساعه اتناشر وتلات دقايق ، بعنى جيين متأخرين تبلات دقايق .. لكن معلمهش .. خشوا وخلاص .. ابقوا خدوا بالكم من المواعيد بعد كده .

الشيخ جاد : (يخرج ساعة الجيب)الساعه عندى اتناشر بالضبط .

عبد الصبور: ساعتك مخرفه .. لكن قلنا خلاص .. اتناشر .. اتناشر الا تلاته .. اتناشر و تلاته .. مش مهم ، يا الله خدوا مطارحكم على التراييزه لحسن ما عندناش وقت ، عايزين نخلص الجلسه .. وننتهى بسرعه .. أمال فين علوان افندى ؟

زكى : اعتذر .. علشان راح ياخد حقنه .

عبد الصبور : حقنة إيه ؟

محجوب : حقنة كلب .

عبد الصبور: ليه ؟

محجوب : حماته عضته .

الشیخ جاد : مسکین .. أنا طول عمری اقول له علی الولیه دی انها سعرانه ، مکانش مصدقنی .. یستاهل .

عبد الصبور : يا للا يا جماعه بقى اقعدوا كل واحد ياخد مطرحه .. زينهم .. زينهم .. هات ورقة التحضير من على المكتب .

ر يدخل زينهم من المطبخ إلى إحدى الحجرات .. ويدهش الجميع
 من منظره ، ولكن عبد الصبور يهدئهم قائلا) :

عبد الصبور: اسمعوا كلامي .. كده أحلي كتير .

(زكى يضع طربوشه على الشماعه ويضع محجوب طربوشه
 بجواره) .

زكى : ابعد طربوشك لحسن يتلخبط مع طربوشي .

محجوب : إى والله انا حاسس برضك انهم حا يتلخبطوا سوا وما حدش فينا حا يعرف طربوشه أنهو .

زكى : أقول لك (يأخذ طربوش محجوب ويجذب زره فيقطعه ثم يرده له قائلا فى ارتياح) دلوقت نعرف نميزهم كويس .. طربوشك اللى من غير زر .

(زينهم يدخل ويقف لمشاهدتهم)

محجوب : (ينفعل ثم يجذب زر طربوش زكى فيخلعه) نبقى خالصين ِ.

زكى : (متأسفا) كويس كده ؟. أهم حا يتلخبطوا تانى (يهم بأن يأخط

طربوش محجوب لينزع خوصته ولكن زينهم يتداخل في الأمو) .

زينهم : ليه ؟ وعلى إيه ؟. انتوا حا تعملوا زى الاتنين البرابره اللي اشترى كل واحد منهم معزه وخافوا لا المعزتين يتلخبطوا مع بعض .

محجوب : وعملوا إيه ؟

زينهم

: ولا حاجه .. عثمان بص لمحمدين .. قال له يا مهمدين .. المئزه بتأتى هاتتلهبط ما المتزه بتاءك . . إيه الأمل . محمدين بص لعثمان . . وقال له دى بسيطه هالص يا أتمان . . تقطع و دن واهد منهم . . تبقى اللي بودن بتأتى واللي بتنين بتأتك ، عثمان بص لمحمدين و هز راسه بانبساط وقال له يا سلام أليك يا مهمدين وألى أفكارك النيره دي هاجه تمام هالص ، وعنها وراحوا قاطعين ودن معزه من المعزتين .. كان فيه واحد أبن حلال واقف بيتفرج عليهم حب يلخبطهم راح مسهيهم وقاطع ودن التانيه جم كل واحد ياخد معزته لقوهم الاتنين بودن واحده ، بصوا لبعض كده وهزوا دماغهم بزعل ومصمصوا شفايفهم وعثمان قال لمحمدين : وبأدين إيه الأمل . . المبيز اتلهبطوا تاني ؟ محمدين قال له : يا سلام يا أتمان .. ودا هاجه تزأل .. نقطع رجل واحد واللي بتلاته يبقى بتأتى واللي باربعه يبقى بتأتك ، بص عثمان لمحمدين وهز رأسه بمنتهى إلاعجاب وقال له يا سلام يا مهمدين . أمَّا أليك هته دين غ ، وعنها وراحوا قاطعين رجل معزه من المعزتين ، ابن الحلال كان واخد باله برضه خلاهم بيتلقتوا كده وراح قاطع رجل التانية ، وبعدين جه كل واحد ياخد معزته اتلخبطوا تالى ، عثمان قال لمحمدين : وبأدين بأه يا مهمدين دي حاجه تلهبط خالص . محمدين قال له ولا يكون أندك فكر ، وعنها وراح خازق عين واحده ، ابن الحلال سهاهم تباني وخرق عين التانيه .. فضلوا على كده ، محمدين يقطع رجل وابن

الحلال يقطع رجل ، لغاية ما المعزتين صفصفوا خالص ، ما بقاش فيهم حاجه أبدا ، والآخر قعد محمدين على الدكه وهز رأسه بزعل كده وقال لعثان : أقولكش با أتمان . . عثان قال له : إيه ؟ محمدين قال له : أهسن طريقة أشان أدم اللهبطه . انت تاهد البيضة وأنا آهد السوده .

الشيخ جاد : (مقهقها) يا سلام على الذكاء وعلى المخ النضيف .

زكى : طب دلوقت حا تعمل أيه في الطرابيش ؟

زينهم : (يمسك أحد الطرابيش ويقذف به من الشباك) حاجه بسيط ه قوى ، دلوقت ما فضلش غير طربوش واحد ، أظن مش ممكن يتلخبط .

عبد الصبور: (هائجا ثائرا) إيه دا يا حلوف يا ابن الحرام .

زينهم : أعمل لهم إيه ما هي أصلها حاجه تلخبط خالص .

زكى : (يأخذ الطربوش ويلبسه غير أنه يسقط على أذنيـــه) ده مش

طربوشي .

زينهم : خلاص .. يبقى طربوشك اللي تحت .

﴿ يجلس الأربعة حول المائدة ﴾

عبد الصبور: أظن دي أول جلسة أرواح تحضرها يا شيخ جاد ؟

الشيخ جاد : تقريبا .

عبد الصبور: يعني إيه تقريبا ؟

الشيخ جاد: سبق قبل كده ان انا رحت مع آمى الله يرحمها عند الشيخ الكومى ف سيدنا الحسين .. أصل الأسياد كانت تعباها .. وكان واحد منهم متسلط عليها اسمه الويشى وبعدين الشيخ الكومى طلعه وطلع على جنته البلا الأزرق بعد ما جبنا له راس هدهد وفرخه باربع أجنحه ، ومره تائيه حضرت معاها الزار عند سيده الكوديه ، واللي كان عليها برضه هوه الويشى نفسه .

عبد الصبور: زار إيه ، وكودية إيه ، وويشي إيه .. دا اللي كان على امك .. دا شغل

دجل ، شعوذه ، نصب واحتيال ، بيضحكوا بيه على المهافيسف والمخابيل ، إحنا هنا مش بندجل ، ومش بنعمل شغل مسخره من اللي كان بيعمله الشيخ الكومي اللي بتقول عليه .. إحنا هنا مش حا نجيب العفريت اللي كان على امك الله يرحمها .. إحنا حا نجيب امك نفسها . فاهم و الالا ؟

الشيخ جاد: أمى !! أمى نفسها !؟ أمى أنا ؟ يا شيخ قول كلام غير ده ؟

عبد الصبور: أمال احمنا جايين هنا ليه ، يا بجم ، دى جلسة تحضير أرواح ، يعنى حا ننزل الأرواح من السما السابعه ، هنا عندنا . . نكلمها وتكلمنا ، أى روح عايزين نجيبها نقدر نجيبها . . ومن ضمنها روح المرحومه آمك ، والا يعنى فاكر انها جعيصه ؟

الشيخ جاد : ولا جعيصه ولا حاجه .. بس هيه كانت دايما دماغها ناشفه .. الله يرحمها كانت عنيده خالص يمكن تعصلج معاكم شويه .

عبد الصبور: ما فيش حاجه هنا اسمه عنيد ولا دماغه ناشفه .. احنا حانجيبها ونجيب أبوها كان ، أنا دلوقت حالا اجيبها لك يا شيخ جاد .

الشيخ جاد : حالا !! حالا ؟! من غير راس هدهد ولا ديك برجل واحده ؟

عبد الصبور: داكلام فارغ ، دا نصب يا شيخ جاد ، دا احتيال ، قلت ميت مره ، احتيا له الله قدامك احتيا هنا حا ننزلها بمنتهى البساطة .. إنت شايف الكبايه اللي قدامك

الشيخ جاد : طبعا شايقها .. بس يعنى يقول

زينهم : (مقاطعا) ليه.. هيه المرحومه كانت حبايه في كبايه تطلع وردايه والا إيه؟

عبد الصبور: اسكت انت يا زينهم الكلب.

زينهم : طب عن إذنك ، اقلع الوش بقى لحسن حافطس ؟

عبد الصبور: إوعى ، إوعى ، إياك .

زينهم : هوه إيه أصله ده اعاوز اشم نفسي شويه يا عالم !

عبد الصبور : (في غضب) روح جوا المطبخ شم نفسك شويه وتعالى ، (إلى الصبور : (في غضب) حد بالك بقى يا شيخ جاد . شايف الكبايه دى ؟

الشيخ جاد: شايفها.

عبد الصيور: أهو دلوقت حانحطها في وسط الترابيزه ونحط تحتها الورقه المدوره دى اللي مكتوب عليها الحروف الهجائيه كلها والأرقام من اللي مكتوب عليها لا وتعم ولا أجيب ، من باب مساعدة الأرواح ... فاهم ؟

الشيخ جاد : ولا أنا فاهم حاجه .

عبد الصبور: لك حق . . فهمك على قدك . . زى اسم الله عليها اختى أم رتيه .

الشيخ جاد : يا أخى انا مش فاهم إيه دخل الأرواح بالكبايه ، وإيه دخل الكبايه بالحروف الهجائيه والأرقام ، وإيه دخل لا ونعم ولا أجيب ، ف مساعدة الأرواح .. فهمني .. اشرح لي .

عبد الصبور: حا شرح لك وافهمك كل حاجه ، بس اديني عقلك الوسخ شويه ، حاول انك تفهم . . دلوقت تلاته منا حا يحطوا صوابعهم السبابه على حرف قاع الكبايه وهي مقلوبه ، يعنى كده ، بشويش خالص ، مجرد لسب

الشيخ جاد : ويعدين ؟

زكى : ولا قبلين .. الكبايه حا تتحرك ، يمين وشمال ، وتتنقل من الحرف ده إلى الحرف ده ، وتحدد لنا الكلمات اللي حا تجاوب بها على الأسئله بتاعتنا . فاهم ؟

الشيخ جاد : ولا انا فاهم حاجه .

عيد الصبور: بعد داكله ما نتش فاهم ؟

الشيخ جاد : حلمك شويه يا مي عبد الصبور ، ما لى أنا و مال الكبايه لما تتحرك يمين و شمال .. و إيه دخل الكبايه عشان تجاوب لنا على أسئلتنا ، و أنا ليه حا سأل الكبايه ، بس فهموني يا اخوانا، إيه حكاية الكبايه ؟

محجوب : ما هي الروح هي اللي حاتحرك الكبايه .

الشيخ جاد : يعنى الروح جوا الكبايه ، امى انا ؟ الست صالحه ؟ حا تخش جوا الكبايه (يضحك يشدة) امى انا جوه هنا .. (مشيرا إلى الكوب ، ومستمرا في الضحك) وبرضك تقول لى فاهم والا لا ، طبعا مش فاهم .

زكى : ليه يا شيخ جاد ، الله لا يسيئك ، مانتش فاهم لبه ا

الشيخ جاد : أمي انا جوا الكبايه ! (يضحك بشلة) .

عبد آلصبور : أيوه أمك جوا الكبايه ، فيها إيبه اكتيره !! معضله !

الشيخ جاد : (مستمرا في الضحك) أصلك لو كنت شفت أمى ما كنتش قلت كده .. دى مرّه حبينا تدخلها في أوده ما عرفناش ، انحشرت بين الاربع حيطان .. تقوم بسلامتك عايز تدخلها في كبايه (مستمرا في الضحك) .

عبد الصبور : شيخ جاد ، يا شيخ حلوف ، يا شيخ قرد ، يا عرة المشايخ .. أمك الله يرحمها ، حا تنزل كه و كا القراشه ، تشف و ترف .. مش حا تنزل بالبراشوت زى صناديق الذخيره و التموين ، أمك اللي كانت بتنحشر في أوده ، بقت دلوقت زى النسمه الطايره .. أمك اللي كانت ما تنفدش من الباب ، بقت تنفد من المحيطه ، تنفد من السقف . أمك اللي كانت في العش .. طارت . فاهم ؟.

الشيخ جاد : ولا أنا فاهم حاجه .

عبد الصبور: عنك ما فهمت ، أمك حا تجيلك دلوقت وخلاص.

عجوب : سيبك منه بقى يا أستاذ عبد الصبور .. بلاش تضييع وقت ، ياللا بينا نبتدى .

عبد الصبور: أهم حاجه عايز سكون تام .. لا كلمه ولا حركه .. عايز نفوسكم تصفو وتفكيركم يسمو. عايز بعد عن الماديات، وارتفساع إلى السماويات والروحانيات. كلنا نركز أذهاننا فى الأرواح اللى حا نستدعيها. فى الأشياء الساميه الصافيه الأثيريه غير المنظوره. إنتو التلاته كل واحد يمد السبابه بتاعه ويحطه على طرف الكبايه.. أيوه كده، لمس.. مد صباعك يا شيخ جاد ما تخافش، الكبايه مش حا تلسعك. سكون عميق. مالك بتترعش كده له يا شيخ جاد؟ الله يخرب بيتك.

الشيخ جاد : (مرتعشا) هيه نزلت ؟

عبد الصبور: إيه هي اللي نزلت ؟

الشيخ جاد : روح امي ا

عبد الصبور : روح امك لا نزلت و لا طلعت ، لسه ما فيش حاجه لغاية دلوقت ، ما فيش داعي للرعشه دي .. والخوف ده .. انت إيه ! جنسك إيه !

زكى : شد حيلك يا شيخ جاد ، شد .. داحتى عيب عليك . انت عمرك ما

قابلتش روح ؟

الشيخ جاد : أبدا .. أبدا .

محجوب : أديك حاتقابل.

الشيخ جاد: ما هو دا اللي مخوفني ، أنا طول عمري اخاف م الضلمه والعفاريت.

عبد الصبور: انت مهفوف ، لسه برضه بتجيب سيرة العفاريت . احنا هنا مشحا نطلع عفاريت ، مشحا نحضر جن . . حا نستدعي أرواح ، أرواح ، يعني لو كنت بسلامتك مت ، كتا جبناك ، بغباو تك و سخافتك كده

زى ما انت .

الشيخ جاد: طيب .. طيب .. ما تزعلش كده .. آدى صباعي أهه .

عبد الصبور: بشویش .. ما تحطش صباعك أوى كده دامش طبق على لوز ، دى روح ، خلى إيدك خفيفه .. لمس يدوبك لمس .. مفهوم ؟

الشيخ جاد : مفهوم .

عبد الصبور : أيوه كده ، دلوقت . كل واحد يسبل عنيه . وياخد شوية شهيق طويل ، وبعدين زفير . اطرد معاه كل الأرضيات اللي في نـفسك والشواتب والرواسب المادية اللى ف ذهنك .. عايز صفاء وسمو .. مفهوم يبا شيخ جماد ؟ مما تفكسرش ف حاجسه غير الأرواح والسماويات .

الشيخ جاد : والترب والقرافات والأموات .. فاهم .. فاهم .. أنا الدمعة قربت تفر من عيني .

عبد الصبور: دا اللي انا عايزه. مش عايز ماديات أبدا أبدا .. و دلوقت تحبوا نبتدى بمين . أنهى روح تحبوا نستدعيها الأول ؟

زكى : نبتدى بروح ام الشيخ جاد .

عبد الصبور: فليكن .. أمك اسمها إيه يا شيخ جاد ؟

الشيخ جاد: صالحه .. وشهرتها ابو جلمبو.

عبد الصبور: صالحه وخلاص .. ما فيش داعي لاسم الشهره دلوقت ، وخصوصا انه أرضى خالص . واسم أبوها ؟

الشيخ جاد: النمس .. المفش .

عبد الصبور: كفايه التمس ما فيش داعى للمفش دى . زمانه فش فى السما وشبع فششان .. اسم امها ؟

الشيخ جاد : أنا فاكر ! انت حا تفتحلها محضر ! ما دام ناوى تجيبها ابقى اسألها

عبد الصبور: اسم امها يا شيخ جاد .. أنا مش بهزر معاك .

الشیخ جاد : والله ما اعرف .. أنا فاكر ان أبویا كان بیقول لها امك .. ام قویق ..
یقی لازم اسمها ام قویق . وعلی كل حال لما تنزل تبقی تتأكد ما دام دا شیء یهمك أوى .

عبد الصبور : صالحه بنت النمس وام قويق (فاظرا إلى السقف) يا ست صالحه ، أرجوك تتفضلي شويه .

الشيخ جاد : (ناظرا إلى السقف في ذعر) هي حا تتفضل من السقف ؟

زكى : (يزغده بكوعه) اثبت يا شيخ حنش .. اثبت ما تضحكشي علينا

الأرواح .

الشيخ جاد : طيب بس فهموني يا ناس ، فهموني ، حا تيجي منين ؟

محجوب : دلوقت تشوف ، حط صباعك واسكت ، ودخل لسانك جسوا يقك ..

عبد الصبور : (مستمرا في النظر إلى السقف) يا ست صالحه ، اتفضلي شويه من فضلك ، ابنك جاد عايزك .

الشيخ جاد : أيوه يا ام ، عايزك يا ام .

عبد الصبور: (يزغده) اسكت انت ، صوتك وحش قوى ، بيطفش الأرواح .

الشيخ جاد : (هامسا) أمال اعمل إيه ؟

عبد الصبور: حط صباعك على الكبايه واسكت .. وفكر في امك ، تفكير سماوى .. نقر .. نقر ..

الشيخ جاد: إيه يا خويا اللخبطه دي ، إيه أصله ده!

محجوب : لخبطة إيه يا شيخ قرد أ

الشيخ جاد : مانتاش سامع بيقول لي إيه ا

زكى : ماله ا بيقول لك إيه ؟ بيقول لك فكر في امك تفكير سماوى مرتفع .

الشيخ جاد : وهوه دا معقول بس يا ناس !

عبد الصبور: مش معقول ليه يا بلا .. مش معقول ليه ؟

الشيخ جاد : عشان التفكير السماوى المرتفع مش ممكن يجتمع مع امسى في خ واحد .. لأنى لما بافكر في امي بتصورها قاعدة قدام الماجور وبتطب في العجين .. طب . طب . أو ماسكه المنفضه وبتنفض في الكليم ، طاخ طاخ ، أو طابقه في زمارة رقبة ابويا ، وعلى دماغه ، دى ، دى .. بالذمه يبقى ده فيه إيه من السماويه والارتفاع .

عبد الصبور: طب بس ، بس .. إيه الأصوات المنكره دى .. دى أصوات تطفش سما بحالها .

الشيخ جاد : وانا مالي ، ما هي دي الأصوات اللي كانت بتعملها في حياتها ، عايز في

افتكرها ازاى امال ، ماسكه كانجه وبتضرب تقاسيم حجاز ، تن ، تن ، ماسكه مروحه وبتهوى بها بخفه ودلال ، هش ، هش .. عايزنى اتصورها بترقص بصاجات تم ، تم .

عبد الصبور: ليه لا!

الشيخ جاد : لا ، اتصورها انت ، أصلك ما تعرفهاش أنا عارفها كويس . . دلوقت تنزل لك بالحنجل والمنجل . . وتشوف ، وتقول يا ريت اللي جرا ما كان .

زكى : وبعدين معاك يا شيخ جاد ، الوقت حا يروح واحنا ما عملناش حاجه . . أرجوك تسكت ، اسكت خالص وسيبنا على امك . . واحنا غيبها لك من تحت طقاطيق السما ، بس انسد انت .

الشيخ جاد : (يضع كفه على فمه) هاب ، سكت انا .

عبد الصبور: (مستمرا في النظر إلى السقف) يا صالحه يا بنت النمس وام قويق ، أرجوك تتفضلي شويه .. كلمتين ورد غطاهم (ينظر إلى الكوب الذي لا يتحرك ، ثم يستمر) يالله بقى يا ست صالحه احنا مش فاضيين لك ، عندنا شغل (يبدأ الكوب في قلقلة خفيفة) .

زكى : بس. بس. أهي جت.

عبد الصبور: (هامسا للثلاثة) سكون ، ولا حركة ، (ناظرا إلى الكوب) أهلا وسهلا . . العواف يا ست صالحه .

الشيخ جاد : (مرتعشا) هي نزلت . هي فين ؟ هي فين ؟

محجوب : (يضربه بكوعه) اثبت . اثبت يا شيخ جاد . (الكوب يأخذ في الحجوب يأخذ في الحجوب يأخذ في الحجوب المختلفة) .

عبد الصبور: (يقرأ الحروف ويجمعها ويقول ببطء) الله يعافى بدنك .. (مخاطبا الروح) حضرتك الست صالحه بنت النمس بنت أم قويق ؟

عبد الصبور : (الكوب يتحرك وعبد الصبور يقرأ) لا . (عبد الصبور للروح فى دهشة) الله امال انت مين ؟ (قارئا) أنا صالحه قاصين (متحدثا للجماعة) صالحه قاصين ؟! هي امك اسمها صالحه قاصين يا شيخ جاد ؟

الشيخ جاد : (مرتجفا) أبدا .. أبدا ، ولا امي ولا اعرفها .

عبد الصبور: (للروح) عدم المؤاخذه يا ست صالحه الظاهر ان فيه غليط حصل .. (قارئا) يعنى ما حدش عايزنى (للروح) ما نستغناش يا ست ، لكن احنا الحقيقه كنا عايزين الست صالحه النمس أم الشيخ جاد ، عشان كان عايز بسألها على كام سؤال . (قارئا) تانى مرة تبقى تاخد بالك وتطلب الروح كويس . دى مسخره وقلة حيا .. (للروح) متأسفين خالص .. عدم المؤاخذه .. (قارئا) يعنى امشى ؟ (للروح) اتفضلى من غير مطرود ، بس إذا كنت تسمحى ولو فيها رذالة تبعتى لنا الست صالحه النمس (قارئا) من عنيه ولو فيها رذالة تبعتى لنا الست صالحه النمس (قارئا) من عنيه

الشيخ جاد : تفتكر حا تلاقيها يعنى ؟

عبد الصبور: ما تلاقيهاش ليه ؟ ضروري تلاقيها .

الشيخ جاد : أصل الله يرحمها كان لها غطسات كده فى الغوريه وتحت الربع وسيدى ابو السعود . ما حدش يعرف يعتر لها على أثر ، ربنا يسهل وتلاقيها . (الكوب يأخذ فى الحركة)

عبد الصبور: بس. بس سكون (للروح) أهلا وسهلا حضرتك مين (قارئا) برضه صالحه قاصين (للروح) أمال ما بعتيش الست صالحه النمس ليه ، ما لا قيتيهاش ؟ (قارئا) لا .. لقيتها (للروح) أمال ما بعتيهاش ليه (قارئا) ما قدرتشي تيجي (للروح) ليه كفي الله الشر ؟ تعبانه والاحاجه ؟ (قارئا) لأ إيدها مش فاضيه (للروح) مشغوله بايه ؟

الشيخ جاد : (صائحا فجأة) هي ما فيش غيرها ، هي بعينها . مفيش حد إيده مشغوله برقبة أبويا غيرها ، طول عمرها طابقه فيها ، مش مخلياها تفلفص ، هي بعينها .. ازيك يا ام ؟

(أم رتيبة)

عبد الصبور: (ثاثرا) اسكت يا شيخ هباب ، انسد ، لحسن تطفش السروح (للروح) لا مؤاخذه يا ست صالحه .. ده الشيخ جاد ، أصل عنده شوية خبل ، عقله على أده ، لسه ما تعلمش الأدب والصلاح فى حضرة الأرواح ، لا مؤاخذه (الكوب يتحرك وعبد الصبور يهز رأسه آسفا) . معاك حق ، معاك حق ، هوا كده برضه زى ما بتقولى .

الشيخ جاد : بتقول إيه ؟

عبد الصبور: بتقول انك مدب ، وغيى ، وقليل الأدب . زى امك .

الشيخ جاد : غورى غارك حنش ، وليّه هزؤ ما تختشيش ، أنا اللي مدب وغبى يا بوز الإخص يا وش النحس .. ما سمعتكيش امي كانت فصصتك و فرجت عليكي اللي ما يتفرج . أم .. أم .. عاجبك يا ام .. الحقيني يا ام . انزل بسرعة يا ام . الوليه بتشتمني .

عبد الصبور: عيب يا شيخ جاد ما يصحش . اعقل . ما تفضحناش قدام الأرواح . (الكوب يهتز بشدة والترابيزه تتأرجح وتتمايل) .

عبد الصبور: (منزعجا) يا نهار اسود ، الظاهر ان امك نزلت لها زى الـقضا المستعجل .. تلاقيهم دلوقت مسكوا فى بعض ، والحنـاق شغــال والضرب نازل يرف .

الشيخ جاد : (فوحا) ول يا ام . . اديها يا ام . . كان يا ام . ركبه م اللي بالك فيهم ، أيوه كده ، كان دماغ ، يا سلام عليك يام .

(الكوب مستمرا في الاهتزاز بشدة ثم يطير من المتضدة متهشما) .

عبد الصبور: (صائحا في عجلة) وله يا زينهم ، كبايه تانيه بسرعه يكملوا فيها المخناقه .. بسرعه يا وله .. الحناقه حاميه قوى .. بسرعه يا وله ..

(زينهم يتقدم بكوب آخر ووضعه على المنضدة .. فيضعون عليه
 أصابعهم ولكن الكوب لا يتحرك) .

عبد الصبور : الظاهر ان الحناقه خلصت .

الشيخ جاد: لازم صالحه قاصين هربت.

عبد الصبور : استنواكده لما نشوف حدمنهم موجود ؟ سكون . سكون . ارتفاع عن الماديـات وسمو عـن الأرضيـات . سمو . سمو . سماويـــات . روحانيات .

الشيخ جاد : سماويات إيه بس يا سي عبد الصبور ، هوا بعد اللي حصل يقى فيه سماويات . بلاش تضييع وقت يا شيخ ، اسألها باختصار .. مين انت ؟.

عبد الصبور: انت مين ؟ (يقرأ) مين إيه .. يا عومر . انشوا حائتلمسوا والا اضلمهالكو ، وادشدشلكوا الكبايه على نفوخكو ونفسوخ اللى يشددلكو (للشيخ جاد) لا .. دى حاجه ما تنطاقش أبدا .. دى روح شلق قوى .

الشيخ جاد : هي أمي ما فيش غيرها (صائحاً بأعلى صوته) ازيك يا ام ، سلامات يا ام ، وحشتيني يا ام (لعبد الصبور) اطلع انت منها بقي وسيبني مني لها .

عبدالصبور : (فى ثورة) ــ دى بقت حاجه هزؤ خالص . دى ما بقتش جلسة أرواح ، دى بقت جلسة أو دباتيه . (الكوب يهتز بشدة) طب بس خلاص اسكتى . حقك علينا . عدم المؤاخله .. اتفضل يا سيدى كلمها . كلم ست صالحه النمس .

الشيخ جاد: سلامات يا ام ، عامله إيه في السما يا ام ؟

عبد الصبور: (يقوأ) برضك ماشيه بالدراع زى ما كنت فى الأرض ، ما فيش روح تقدر تدوس لى على طرف ، مدوخاهم روح روح .. لو كنت شفت العلقه اللى هبدتها لصالحه قاصين كنت عرفت ان امك برضه راجل زى ماهيه .

الشيخ جاد: وازاي ابويا ؟.

عبد الصبور: (يقرأ) مدوختى فى السمازى ماكان مدوختى فى الأرض .. فلاتى وبصباص وعينه فارغه .. كنت زمان فى الأرض بعرف اعفقه . لكن دلوقت سايب على حل شعره ، طول النهار يعط فى السما ، ما انا عارفه له قرار ، راح فين ولا جه منين ، لكن لما بيقع فى إيدى عينيك ما تشوف الا النور .. لسه اقربها دلوقت كنت طابقه فى زمارة رقبته ، مخلصوش منى غير الوليه صالحه قاصين .. ما علينا .. إيه أخباركم انتم . ازاى أختك خديجه ؟.

الشيخ جاد : مبسوطه وأشيتها رضا .. من يوم ما متى ، وجوزها مهنيها وباسطها وما تخنقش معاها ولا خناقه .

عبد الصبور: (یقرأ) الضلالی ابن الضلالی .. هوا انا یعنی کنت ضبابه علی عینه ،
والا راکزه علی نفسه ، یا حبیبتی یا بنتی ، لازم مفیش حد قادر
یسودلک عیشته زی ما کنت باعمل ، لازم راکبک وموریک الویل ،
وازای خالتک زنوبه ؟.

الشيخ جاد : بتدعى عليكى ان ربنا يجحمك .. وكل ما تشوفنى تقول : جانها داهيه امك مطرح ما راحت .. من يوم ما ماتت والدنيا رايقه بلوزه .. وانا مش قادر اكلمها ولا اهب فيها .

عبد الصبور: (يقرأ) أصلك مره طالع لابوك .. وبتسكت لها ليه ؟ خايف منها ؟. الشيخ جاد: لا .

عبد الصبور: (يقرأ) أمال إيه ؟.

الشيخ جاد : الحقيقه انى شايف انها على حق .. أصل انت يا ام كان لسانك زفر قوى ، ما كانش حد يطيقك . فاكره لما دلقتى حلة الملوخيه الحامضه على دماغ الشيخ شوشه ؟.

عبد الصبور: (يقرأ) ما هو كان كان يستاهل اكترم اللي جراله ، مش كان هوا اللي مخسر ابوك ، ومعلمه السهر والبصبصه ؟.

زكى : (متململا) يا الله بقى يا أخى قول لها تنصرف ، احنا ما عندناش

وقت للكلام الفارغ ده (الكوب يهتز بشدة) .

عبد الصبور : طيب ، طيب ، ما تزعليش حقك على .

زكى : (خائفا) مالها ! بتقول إيه ؟

عبد الصبور: (يقرأ) بتقول قول للواد الاقرع اللي ينقرص في لسانه يتلم ، لحسن والنبي ، واللي نبا النبي تدشدش الكبايه على نفوخك .

زكى : لا. مفيش لزوم، وعلى إيه؟. قل لها انا راجل غلبان، وصاحب عيال.

الشيخ جاد : عايزه حاجه يا ام ؟.

عبد الصبور : (يقرأ) عايزاك تطلع القرافه على روحى بحلتين مفتقه وحلة حلبه وربطة حنا بغدادى .

الشيخ جاد : من عنيه يا ام ، بس المفتقه بقت غاليه أوى اليومين دول ، ما تخليهم حله واحده ، هو انتى مبطلتيش الفجعه دى ؟.

عبد الصبور : (يقرأ) لسه برضك مقرم .. وتموت ع المليم ؟ هوا انا خساره فيه حلتين مفتقه .. ؟ إن شا الله تنطس فى عنيك ، ياما شلتك وياما ربيتك .. آدى آخرة تربيتى وتعبى ، تستخسر فيه حلة مفتقه !.

محجوب : (وقد ضاق ذرعا) یا أخی أرجوك .. أنا حاطلع علیها باربع حلل .. بس قول لها تتفضل بقی .. وتروح لحالها .. كفایه ، عایزین نشوف شغلنا .

الشيخ جاد : طيب يا ام ، اتفضلي انتي بقي .. ابقى سلمي على ابويا ، وقولي له : التعميره اللي كان مخبيها في الطقيسي .. لقيتها مغشوشه ومخلوطه بحنه وتراب .. هي دي اللي جابت أجله .. الله يرحمه ويحسن إليه .. مع السلامه يا ام .

عبد الصبور: (يقرأ) مع السلامه.

زكى : (متنبدا بارتياح) مع ألف سلامه ، حلى عنا بقى دى أم دى يا شيخ جاد . . الله يكون في عون عزرائيل اللي قبض روحها .

عبد الصبور: دلوقت خلونانخش بقي ع المهم .. هيه . نبتدي ٩٠٠

محجوب : (بلهجه حزينة) أبوه .. نبتدى .

الشیخ جاد : (یفولهٔ یدیه مسرورا) أیوه نبتدی .. دی الحکایه سهل أوی .. قولوا بس أنهی روح عایزیسن تنزلوهما ، وانما انزلهالکسو زی العصفوره ..طلباتکم ؟.

عبد الصبور: اسكت انت يا شيخ جاد .. كل اللي عليك انك تحط صباعك وتسكت . اوعي تتكلم والا تتنفس لحسن تطرد الأرواح .

الشيخ جاد: أنا بطرد الأرواح. أمال امي نزلت لي ليه ؟.

عبد الصبور : علشان امك من نفس النوع الواطى بتاعك .. يعنى فيه توافق بين أرواحكم .. يعنى زى المتعوس وخايب الرجا .. فاهم ؟.

الشيخ جاد : عيب يا سي عبد الصبور .. تجيب سيرة أمي .. دى برضه حرمه وميته .. وأنا ما احبش حد يجيب سيرة أمي أبدا .

زكى : لا .. باين عليك متربي وابن ناس 1.

عبد الصبور: دلوقتی حطوا صوابعکم علی الکبایه .. عایز صمت .. وسکون .. سکون .. سکون .. ارتفعوا بأذهانکم .. حلقوا بأرواحکسم .. سمو .. وارتفاع .. لامادیات ولا أرضیات .

(يسمع فجأة صوت دقات شديدة بالهون في المطبخ)

عبد الصبور: (فزعا) إيه ده ؟ إيه الدق الفظيع ده ؟ إيه الضجه المزعجه دى ؟ واد يا زينهم .. بت يا سنيه ؟.

(تدخل سنيه و هي تحمل إيد الهون)

سنية : يوه مالك يا سيدى .. بتصرخ كده ليه .. حصل إيه ؟

عبد الصبور: انتم وحوش . . انتم مجانين . . ايه الدق المريع ده ؟! .

سنية : هو إيه أصله ده .. دانا بدق الكفته .

إيه ؟

الشيخ جاد : وما تنزلش ليه على دق الكفته ؟.. أمال روح العجاتى .. وروح الشيمى حايبقوا ينزلوا على إيه .. على دق الطبل .. واللا على دق الزار .. كل شيلله ويشبهلله ، كل شيخ وله طريقه .

عبد الصبور: اسكت يا شيخ هباب. مين قال لك آنى عايز انزل روح العجاتى والا روح الشيمي . . إحنا عايزين روح ناعمه . روح رقيقه .

الشيخ جاد : طب خلاص . فهمنا كده ، روحى يا بت دق على واحده ونص . رسية تختفى .. بعد حين يسمع دق مثل طبل الرقص على واحدة ونص) .

عبد الصبور: (هائجا) بس یا بنت الصرمه .. بلاش مسخره فارخه .. عایزین سکون مطبق ، سکون خالص .. ما فیش کفته ، ما فیش تقلیه ، ما فیش ملوخیه ، ما فیش ماده ، فیه سمو ، فیه ارتفاع ، فیه إحساسات فیاضه .. فیه عواطف رقیقه .. فیه تفکیر صماوی ، سکسون ، فیاضه .. فیه تفکیر صماوی ، سکسون ، سکون ، یاللا حطوا صوابعکم .. وارتفعوا بأرواحکم .. اسم الروح اللی انت عایزها إیه یا استاذ محجوب ؟

محجوب : (يتنها بحزن)نعيمه .

عبد الصبور : أبوها ؟.

محجوب : محمد .

عبد الصبور: (في ضيق) محمد إيه .. لازم يكون محمد حاجه .. هو فيه حد ما اسموش محمد .. دا أسم مشاع .. زى سى .. وزى حضرة .. اسمه الكامل إيه ؟

محجوب: محمد محمد .

عبد الصبور: محمد محمد أ..

محجوب : أيوه محمد محمد .. اسمه كده محمد محمد ..

عبد الصبور : محمد محمد كده حاف ، ما فيش المنفلوطي، الأسيوطي ، الفيومي ، حاجه كده مميزه ، ما فيش اسم تالت ؟ محجوب : الامم التالت مقدرش اقوله .

عبد الصبور: ليه اعيب !.

محجوب: مشعيب ولاحاجه.

عبد الصبور: أمال إيه ! فيه إيه ؟.

محجوب : لاولاحاجه ، بس برضك محمد ، اسمه محمد محمد محمد .. أنا ما ليش دعوه ، انت اللي قلت لي قول!.

عبد الصبور: طيب خلاص .. حصل خير ، اسمه محمد محمد محمد .. ويمكن لو بحثت شويه كان في تاريخ العيله تلاقي الاسم الرابع محمد والخامس برضه محمد ، على كل حال من باب الاختصار نسميه محمد دايره .

الشيمخ جاد : أيوه محمد بن الدايره .

عبد الصبور: اتلم يا شيخ قطران . اسكت انت بالتي هي أحسن .. اسم امها ؟.

محجوب : عديله .

عبد الصبور: تعيمه بنت محمد دايره بنت عديله . كده مضبوط ؟

محجوب: أيوه مضبوط.

عبد الصبور: (ناظرا إلى السقف) يا سيده نعيمه يا بنت محمد دايره بنت عديله .

محجوب : آنسه يا أستاذ ، ماتت قبل ما تتجوز .

عبد الصبور : عدم المؤاخذه .. يا آنسه نعيمه يا بنت محمد دايره يا بنت عديله ، تسمحي بكلمه .

﴿ اَلْكُوبِ لا يَتَحْرُكُ ﴾ .

عبد الصبور: يا ست تعيمه.

محجوب : (في حدة) آنسه يا أخي قلت لك !.

عبد الصبور: آنسه ، ست ، أهو كله محصل بعضه . . يمكن يا أخى بقت ست في السما .

محجوب : لا أنا واثق منها كويس.

عبد الصبور: طيب حقك على ، يا آنسه نعيمه .. اتفضلي ، محمس دقائق ، عايزينك

ف كلمه بسيطه ، لو سمحت .

(الكوب لا يتحرك) .

عبد الصبور: وبعدين يعنى .. يا ست نعيمه لحظه واحده .. مش حا نأخسرك كتير .. (إلى الشيخ جاد) خف صباعك شويه يا شيخ جاد ما تتقلش ع الكبايه .. بس لمس . مفيش اكتر من كده .

الشيخ جاد : أنا يدوبك لا مسها .

عبد الصبور: يا ست نعيمه ، يا آنسه نعيمه ، أرجوك ما عندناش وقت . (الكوب يتحوك ببطء) .

عبد الصبور : بس . . الظاهر انها جت ، ركزوا تفكيركم فيها . . ابتعدوا بذهنكم عن الماديات (يقوأ) حاكمبوش خاناكيك (يتكلم) ده إيه الكلام الفسار غ ده .

الشيخ جاد : (لمحجوب) هي المرحومه كانت بتتكلم بالجريجي .

محجوب : جریجی إیه یا جدع .. دی مصریه من ضهر مصری .

عبد الصبور: دى لازم روح شريره بتأوز. أصل فيه أرواح كده فاضيه وتحب اللعب والمعاكسه.

الشيخ جاد : يا أخى وفيها إيه ، خليها تأوز من نفسها شويه ، لازم مضيقين عليها فى السما . الظاهر انهم جد قوى فوق ، هات الروح الملعبانيه دى ، نلعب معاها شويه خلينا نفرفش ، حدو اخد منها حاجه .

زكي : هوا ده وقت لعب يا شيخ جاد ، احنا ف إيه والا ف إيه ؟

عبد الصبور: نجرب تانى ، ركزوا أذهانكم كويس. اسموا بتفكيركم ، فكروا فى الآخرة والملايكه والجنه والنار .. سكون ، سكون .

سنية : (من المطبخ) آى .. آى .

عبد الصبور: مالك يا بت بتصر خي ليه ؟

سنيه : زينهم قرصني .

عبد الصبور: اتلم يا زينهم لحسن اقوم اقرصك في نافوخك ، اتلم احسن لك . أنا

قلت ميت مره ما لكش دعوه بسنيه ، لحسن ادبحك .

زينهم : (مندفعا من المطبخ) هوا إيه ده ، تدبحنى ازاى ! هوا ما فسيش حريات ، أمال فين الحريه الخامسه ؟.

عبد الصبور: إيه هي الحريه الخامسه دي ياسي زينهم ؟

زينهم : حرية البصبصة ، حرية تلعيب الحواجب ، والضرب باللسان ، ومع كلا أنا غرضي شريف .. يعني بصبصتي شريفه .. أنا عايز اتجوزها . آه .

عبد الصبور: الظاهر انك عايز أجلك ينتهى ، أنا قلت مبت مره مش عايزك تجيب السيره دى على لسانك ، أنا مش عايز سيرة جواز هنا فى البيت ده أبدا ، فوت انجر من قدامى ، حلوف ابن حلوف .

(زينهم يتجه إلى المطبخ) .

عبد الصبور : عدم المؤاخذه ، نبتدي من جديد سكون ، سكون .

الشيخ جاد : سكون ، روحانيات ، سماويات ، أبوك السقا مات ، عارفين المشيخ جاد : المتولوج كله ، ياللا بقى خش على الجد ، الده لها وخلصنا ، هي إيه ؟ السفيره عزيزه ؟!!.

عبد الصبور: انت يا شيخ قطران اسكت بلسانك ، انت السبب في العطله دى ، الصبور : انت يا شيخ قطران اسكت بلسانك ، لازم تفكيرك مش ولا الروح لازم مش عايزه تنزل من تحت راسك ، لازم تفكيرك مش ولا بد . . كده والالأ ؟

الشيخ جاد : والله من جهة مش ولا بد ، فهو صحيح مش ولا بد .

عبد الصبور : بتفكر في إيه ؟ قولي لي ؟.

الشيخ جاد : عايز الحق والا ابن عمه ، أنا أصلى ما حبش الكدب .. بصراحه كده كنت بافكر في البت هائم .

عبد الصبور: هانم . هانم إيه ؟.

الشيخ جاد : هانم زبده ، هانم قشطه ، هانم حلويات ، هانم سكر نبات .. يسا خسارتك يا هانم ، ضاعت من إيدى . يا خساره ، يا ألف خساره .

عبد الصبور: إيه بس جرا ايه ؟.

الشيخ جاد : كان ميعادها امبارح تيجى تشطف حتين الغسيل ، والبيت كان فاضى مفهش حد غيرى ، وقلت يا واد احسن طريقه عشان تبلفها ، اقعدع الطشت خد لك فمين معاها .. وقعدت ، وهات يا دعك لما إيدى بقبقت ، وبعدين طلعت تنشر الهدمتين ، واستناها تنزل ما نزلتش .. أتابيها زاغت من سطوح الجيران .. أنا أصلى غلطان ، الحق على . أستاهل ألف صرمه .. كان لازم اطلع انشر معاها ، مش اسيبها تضحك على و تزوغ منى .. أهو أنا عمال افكر . لو كنت طلعت و نشرت معاها ، مكانتش قدرت تزوغ منى و كانت نزلت معايا ، وكنا قعدنا في البيت سوا .

عبد الصبور: اخص ، اخص ، اخص على التفكير السافل المنحط . . شيل صباعك من على الكبايه ، جاك قطعه دا السمو والارتفاع اللى باطليه منك يادنى يا رمرام . هانم زبده ، وهانم قشطه ، وفمين غسيل! اخص . اخص . اخص . شيل صباعك . يا دون يا بأف .

الشيخ جاد : طب خلاص شلته ، دا ماله محموق كده ليه ، هي الدنيا طارت ، هوا الغسيل حرم ، دا غسيل ، داحتي ربنا قال النظافة من الإيمان وانا كنت بعمل مع هانم شوية إيمان ، هو إيه ، حرام ؟

محجوب : (**إلى الشيخ جاد**) خلاص .. خلاص .. انتهينا ، شيل صباعك واسكت .

عبد الصبور: أنا حا حط صباعي معاكم .. ابعد يا شيخ جاد ؟

الشيخ جاد : بعدت . اما اشوف كده حا تعملوا إيه بشطار تكم وتفكير كم السامى ، با الله اتفضلوا .

عبدالصبور : سكون ، سكون .

الشيخ جاد : سماويات .. روحانيات .. يا خسارتك يا هانم يا سكر نبات .

عبد الصبور: سكون ، سكون . سمو وارتفاع .. (ناظرا إلى السقف) يا نعيمه يا

بنت محمد محمد محمد يا بنت عديله اتفضلي انزلي شويه من فضلك وإحسانك (الكوب لا يتحرك) . يا ست نعيمه وحياة والدك تنزلي شويه ، كلمه واحده بس مفيش غيرها (الكوب لا يتحرك) طبإذا كنتي مش فاضيه قولي لنا انك مش فاضيه (الكوب لا يتحرك) لا ، دى حاجه تفور الدم خالص (للجماعة) لازم فينا واحد وسيط مش كويس .

الشيخ جاد : اوعى يا شيخ كده ، شيل صباعك شيل ، أنا حافر جك ازاى تنزلها .. و مره يا سي عبد الصبور ، والنسوان ما يجوش الا بالدق على دماغهم آل إيه كلمه و احده من فضلك .. اوعى كده ، شيل إيدك من على الكبايه يا سي محجوب ، وانت عمال بتترعش ووشك اصفر زى الكركم .. سيبني عليها بلا مياعه (يضع أصبعه على الكوب بدل محجوب وينظر إلى الكوب صائحا) انت يا بنت يا نعيمة انزلى جاكى نزله فى ركبك .. انزلى وحياة امك بلا مرقعه فارغه .. انزلى بقول لك يا بت لحسن اخلى امى تجيبك من شوشتك . فارغه .. انزلى بقول لك يا بت لحسن اخلى امى تجيبك من شوشتك . عجوب : لا .. أنا ما سمحشى .. دى وقاحه .. دى قلة أدب .. أنا ما سمحشى .. دى وقاحه .. دى قلة أدب .. أنا ما سمحشى .. دى وقاحه .. دى قلة أدب .. أنا ما سمحشى ..

الشيخ جاد : طب بس اتلهى انت واسكت (للروح)يا الله يا بابث انزلى بالتي هي أحسن بدل ما خلى امي تجر جرك على ملا وشك و تفرج عليكى اللي ما يتفرج ! (الكوب يهتز) شفتم مش قلت لكم النسوان ما يجوش الا بالدق (للروح) ازيك يا بت .. ازاى امك .. انتى نعيمه بنت عديله .. (الكوب يتحرك يمينا وشمالا ، والشيخ جاد يقرأ) .. أيوه .. وانت مين ؟ (للروح) محسوبك الشيخ جاد .. ماذون أيوه .. وانت مين ؟ (للروح) محسوبك الشيخ جاد .. ماذون الصنادقيه و درب عجور وما بينهما (يقرأ) وعايز منى إيسه ؟ المروح) عايز سلامتك .. عايز نتسامر شويه .. فيه مانسع ؟ (للروح) ما تستلموها انتوا بقى يا جماعه أنا نزلتهالكم وانتوا

عليكوا الباق .

عبد الصبور : (للروح) يا ست نعيمه .. فيه هنا واحد قريب منك جدا .. عايز يكلمك (يقرأ) عايز منى إيه (للروح) والله عايز يقول لك شوية كلام كده (محجوب) انفضل يا أستاذ محجوب .. كلم الست نعيمه .

عجوب : (مرتجها) هي دي نعيمه ؟! حقيقي نعيمه !! أنا مش مصدق .. أنا خايف قوى .. أنا مش حا قدر اكلمها ، أنا كنت ما بقدرش اكلمها وهي في الأرض .. كنت لما بقعد معاها لساني ينعقد .. وقلبي يدق .. زي اللي حا ينط من صدري .. ازاي اقدر اكلمها دلوقت .. مش مكن .. مقدرش اكلمها .. أبدا .

عبد الصبور: (في تبرم) كلمها يا سي محجوب ما تخليها ش واقفه ملطوعه .. كلمها · ما يصحش .

الشيخ جاد : كلمها كلمتك اجنابك .. أمال كنت مسروع عليها ليه . لما انت بسلامتك مش قادر تكلمها اخايف من إيه ؟.. يعنى هي حا تكون اقوى من امي .. كلمها بلا نسونه .

محجوب : طب بس استنوا على شويه .. خلولى اشم نفسى وابلع ريقى .. حرام علي عليكوا يا ناس . دانا في حال يعلم بها ربنا .. (هاهسا) نعيمه .

عبد الصبور: زعق شويه .. بلاوي إيه دي أ.

محجوب : (للروح) نعيمه . (الكوب يتحرك) .

عبد الصبور: بتقول ما له كده بيصوصو .. زى ما يكون بيتكلم مس تحت الأرض .. اتكلم زى البني آدمين .

محجوب : نعيمه .

الشيخ جاد : (في صخوية) إيه اللي نعيمه .. نعيمه .. ما حنا عارفين انها نعيمه .. وهي عارفه نفسها نعيمه .. انطق قول لها عايز إيه .. انت فاكر انها

فاضيه لك .

عجوب : (للروح) أحبك يا نعيمه .

عبد الصبور : (**يقرأ**) حبك برص .

الشيخ جاد : تعجبيني يا بت يا نعيمه يسلم فمك .. آل احبك آل ، ياخي حبك الشيخ جاد : الضب وغضب عليك الرب .

محجوب : إيه ؟. هي بتقول لك كده ؟ مش ممكن .. هي ما تقولش كده أبدا ا.

عبد الصبور: أنا ما جبتش حاجه من عندى يا غبى ، ابقى اقرا بنفسك الحروف . ياللا كلمها . هي مش فاضيه لك .

محجوب : حاضر . حاضر . حاكلمها (للروح) نعيمه أنا مش طايق الحياة بعدك يا حبيبتي ، مش قادر اعيش في الدنيا من غيرك ياختي .

عبد الصبور: (يقرأ) طيب وإيه اللي مقعدك في الدنيا إيه اللي ما نعك من الموت.

الشيخ جاد : آه حقيقي . . لها حق . إيه اللي ما نعك ؟ .

عجبوب : (مرتبكا) اللي ما نعني ، اللي ما نعني (الشيخ جاد) أقول لها إيه ، إيه اللي ما نعني ؟.

الشيخ جاد : قول لها أي حاجه ، ما دام حضرتك لازم تتفلسف و تقول لها انك مش قادر تعيش من غيرها ، قول لها الغلا ؟.

محجوب : الغلا ؟!! غلا إيه !

الشيخ جاد : غلا الحانوتيه .. غلا الموت . هوا في حاجه مصبرًه الواحد على غلا المعيشه غير غلا الموت .. كل حاجه دلوقت بقت متعذره .. الزيت والفول والسكن والموت .. قول لها كده ..

محجوب : ازای أقول لها كده ، عشان تفتكرنی فقیر .. شحات ..؟ وبعدین تحتقرنی ، أنا طول عمری مفهمها ان انا راجل متیسر ، ومبحبح ، ومتریش .

الشيخ جاد : طيب خلاص ، حقك على ، قول لها اللي يعجبك ، قول لها انك متريش .

عبد الصبور: اتكلم بقي يا أخي خليت الروح زهقت. انت أصلك إيه ! انطق!.

محنجوب : (للروح) مش قادر اموت یا حبیبتی .. عشا عایش علی ذکرال ...

اللي مهون على عيشتي إني بشوف طيفك في المنام.

عبد الصبور : (يقرأ) بيقول إيه يا ختى ده ؟.

الشيخ جاد : سيبك منه دا بيخرف .

محجوب : (للمروح) ذكراك هى كل حاجه لى ، طيفك هــو اللى مصبرتى ومسليني ، بافتكرك ليل ونهار ، بافتكر عنيك وبـقك وكـــلامك الحلو .

عبد الصبور : (الكوب يهتز) ما فيش لزوم .

محجوب : بتقول إيه ؟.

عبد الصبور : بتقول يا سم .. يا دم .. يا كبه .

عجوب : كذاب ما بتقولش كده .. هي بتحبني زى ما يحبها (للروح) بفتكر كده .. كان كلامك الحلو و بفتكر تحدقيه فوق والتفاقه اللي كنت بتقيها على .. كان هزارك لطيف .

(الكوب يهتز) .

محجوب : بتقول إيه ؟.

عبد الصبور : يتقول ما كانش هزار .. ده كان جد .

عجوب : كداب ما بتقولش كده (للروح) بفتكر في الايام الحلوه اللي قضيناها سوى .. وفي الايام اللي كنت بحلم بيكي ، وبغتكر ازاى سهنيني ، وموتى نفسك ، وسيبتيني في الدنيا لوحدى .. ليه يا نعيسه .. تتسرعى ، حقيقى الظروف ما كانتش ملائمه لجوازنا ، حقيقسي الأحوال العائلية كانت بطاله .. لكن كل شيء كان مسيره يتصلح ، وكنا برضه مسيرنا نتجوز ، ليه تنتحرى عشان خاطرى ، وانا حياتى كانت فداكى .. ليه يا نعيمه !؟

(الكوب بيتز)

محجوب : إيه ؟.. فيه إيه ؟ بتقول إيه ؟.

عبد الصبور: يتقول المغقل دا بيخرف بيقول آيه ؟.

محجوب : لا .. دی دسیسه . انتوا عایزین توقعوا بینا و هی حیه .. انتوا کان بتوقعوا بینا و هی میته ؟ حرام .. حرام علیکم .

(الكوب يهتز) .

عبد الصبور : (يقرأ) حرام إيه .. حرمت عليك عيشنك .. حب إيه وهباب إيه اللي كان بينا . أنا انتحرت عشان خاطرك ؟.. يا أخى هزلت يا سي محمجوب ليه الرجاله خلصم ، والا عدم .. أنا اللي زهمةت مسن عيشتى ، أنا اللي لقيت الدنيا ما تستاهلشي .. أنا اللي يئست من كل حاجه مش لاقيه فيه عدل ولا رحمه حواليه أبدا في الدنيا بتاعتكم .. العدل فيها باللسان بس والرحمه بالكلام . لاقيه نفسي محرومه من كل حاجه . أبويه بيربي تمانيه زيي وبياخد اتناشر جنيه .. يعني لو كان بيربي ثمان معيز ما كانش قضاهم أكل .. تمان معيز .. واحنا تمان بنات ، لنا بق عايز ياكل ، وجسم عاوز يتغطى ، وعنين بتـبص وتشوف وتقرا المجلات وتتفرج ع الصور ، وتشوف الهدوم والصيغه والفلوس اللي بتتبعتر ، وتشوف بني آدمين زينا متخومين ، واحنا يبدوبك بنلاق اللقمة .. كنت عايشه محرومه إلا من النظسر والإحساس .. ياريت ما كانش عندي نظر ولا إحساس ما كنتش حسيت بالحرمان اللي انا ميه ، ولما كان الحال يفيض بي كنت أقول يمكن تفرج بالجواز .. لكن لما افكر كنت الاق ان جواز المحرومين حا يكتر المحرومين ويزود الحرمان .. وكنت الاق ان انا حاجني على او لادي زي ما جنوا على أهلى .. قلت يا بت احسن حاجه .. سيبي الدنيا ، و نقصي المحرومين عروم .

الشيخ جاد : لكي حق يا نعيمه يا بنتي . الله يرحمك .

محجوب : (للروح) يعني ما متيش علشاني؟. يعني ما كنتيش بتحبيني يا خاينه؟.

الشيخ جاد : بلاش لماضه بقى .. قالت لك ماتت من الجوع .. يعنى ماتت م الجوع .

محجوب : (للمروح) وانا اللي كنت فاكر انك انت انتحرت عشان خاطر مش قادر اتجوزك ، أنا اللي كنت مخدوع فيكي و فاكر ائك مت من حبى .. أنا اللي لابس عليكي بدله سوده وكرافته سوده ، وحالف ما اقلعهم أبدا .

عبد الصبور: (يقوأ) كرافته سوده ، وبدله سوده . إنت فاكر ان احتا هنا حاسين بالكرافته السوده والبدله السوده .. دى تفاهة أحياء ، وهيافة بنى آدمين .. روح يا خويا امضغهم .

زنيهم : (يغني داخل المطبخ بصوت مسموع) .

في ليله شفت الحبيب ساهي وباكي العين

وع الرصيف ماشى بيطوح على الجنسبين قلت الهوى عذبه والبعد كان لمه فين

خبطته ورده لقيته طب مسات م الجوع

يا ريتني يا حلو شقه وطعميه وقرص منين

عجوب : (للروح) اخص عليكى (يخلع الكرافته السوداء) اخص عليكى يا خاينه .. يا خسارة حزنى عليكى .. يا خسارة الكرافته السوده .. شاريها بنص ريال .. خدى أهى .. (يقذف بالكرافته السوداء على الأرض ثم يغمى عليه)

عبد الصبور: (صائحا) زينهم .. سنيه .. الحقونا بكباية ميه .. الحقونا بنشادر .. يا ناس .. يا هوه .. الراجل سخسخ الحقوه .. حا يموت .

الفصيلالسشاني

المنظر : حجرة جلوس عتيقة بها بعض الأرائك والكراسي ، ومكتب قديم في الركن ، وعلى جدرانها صور قديمة وآيات قرآنية ، وعلى اليسار باب يفضى إلى الصالة وعلى اليمين شباك وفي المواجهة باب زجاجي كبير ذر أربع ضلفات تبدو منه حجرة نوم عبد الصبور افتدى ، في منتصفها سرير حديد ذو أربع أعمدة وضع كل عمود في صفيحة ، وأمام السرير كرسي وعلى الحائط مشجب ورف عليه كتب صفراء وعلى أعلى الباب الزجاجي علقت ساعة حائط تشير إلى الثالثة والنصف .

المشهد الأول

سنیة : (تغنی) وان کنت خایف من امی دی امی علی ستوره .. وان کنت خایف من ابویا دا ابویا عدی المنصوره .

زينهم : (يدخل مندفعا حاملا في يده مكنسه) انا اخاف من ابوكي .. ليه ؟. هفيه .. دانا لو خبطته خبطه حا جيبه الأرض .. آل عدى المنصوره آل .. ما يعدى واللا ينفلق ، أنا يهمنى .. دانا زينهم والأجر على الله .. أنا زينهم صيى زكيه الملدنه .. قاهرة الوحش .. إيدك بقى يا بت يا سنيه .. قربى على يا سنسن يا للى زى اللوز .

سنية : خليك عندك بالتي هي أحسن .. اوعي تقرب لحسن وسيدنا الحسين الخبين الخبين اللي في إيدى أفتح قرنك .

زينهم : (في غزل) خشى على خشى .. يا سنسن يا للي زى المشبك اللي بيخر

عسل .. اخبطینی بالزهریه .. افتحی قرنی .. موتینی .. ادبحینسی .. (مغنیا) و ان دبحتینی بایدیکی عیب علی ان قلت آه .. آه .

سنية : ابعد يا زينهم واقصر الشر .. وقول اللهم اخزيك يا شيطان ، ابعد احسن لك .. لحسن والنبي أرقع بالصوت .. أجيبلك سيدي عبد الصبور .

زینهم : یا بای .. یا لطیف .. طب بس اخفیها سیره بقی .. سیدك عبد الصبور .. جاتك نیله على سیدك عبد الصبور .. ابقی خلیه ینفعك .. بكره یضیع عمر المغفله الكبری .

سنية : هي مين دى المغفله الكبرى ؟

زنيهم : يعنى حا تكون مين غير ستك ام رئيبه .. فضل يضيع منها العريس ورا العريس .. لغاية ما بلغت ارذل العمر .. وحا تطلع من الدنيا قفاها يقمر عيش .. خليكى انت وراسى عبد الصبور لغاية ما تحصلى ام رئيبه .. يا يت اعقلى .. حطى عقلك فى راسك واسمعى كلامى .. طاوعينى يا سنيه لحسن تندمى ؟

سنية : أطاوعه في إيه المنيل على عينه ده ؟. ما نيش عارفه اطاوعك في إيه .. واسمع كلامك في إيه ؟

زينهم : الكلام اللي قولتهولك الجمعه اللي فاتت لما كنت بتنشرى الغسيل فوق السطوح .

سنية : ما نيش فاكره قلت لى إيه .. أديك طول النهار بَتقول كلام فارغ زيك .. هوا انت وراك ايه غير الكلام الفارغ !

زينهم : لا يا سنية دا ما كانش كلام فارغ .. دا كان كلام جد .. كلام صحيح .

سنية : قولهولى تانى ، ما نيش فاكره .

زينهم : طلبت منك تتجوزيني .

سنية : أنا ؟ أتجوزك انت ؟ ليه .. انطسيت في عنيه انخبطت في نافو خسى ، الجناب المقصفت عليك يا سي زينهم ، الرجال خلصم يا روح امك ، ومع كلا انت حقيقي بتتكلم جد ، والا هزار ؟

زيبهم : هزار ازاى يا سنسن ، هي الحاجات دى فيها هزار .. الدنيا دى فيها حاجتين الواحد ما يقدرش يهزر فيهم أبدا .

سنية : ايه هما ؟

زينهم : أول حاجه الجواز .

سنية : والتانيه ؟

زينهم : الموت .

سنیة : یا بای علی ملافظك الوحشه ، صدق من قال الملافظ سعد .. و لما انت عارف ان الجواز وحش كده زى الموت .. حتنجوز ليه ؟

زينهم : وحنموت ليه ؟!!

سنية : قضا.

زينهم : أهو دا برضك قضا .. لا بد منه ، بس قضا عن قضا يفتر ق ، قضا يحط في إيدك الكلبش .

سنية : والقضا التاني ؟

زينهم : يخلصك منه .

سنية : و لما انت عارف كده ، بتجرى ورا الكلبش ليه ؟

زينهم : (يقترب منها) أموت في الكلبش .. أموت في طره .. يا وعدى ع العسل النحل اللي بيخر .. حا تحطى الكلبش في إيديه إمتى يا سنيه ؟

سنیة : ابعد عنی کده .. کلبش لما یطبق علی زمارة رقبتك .. آل کلبش آل .. حقه بطلوا آل .. حقه بطلوا ده او الله علی مأمور ابو زعبل ، آل کلبش آل .. حقه بطلوا ده واسمعوا ده ، ومع كل .. انت بتتكلم جد ، ولا بتهزر ؟

زینهم : قولتلك یا حبیبتی یا سنیه .. الكلام دا ما فیهش هزار . دا جد و ابن جد . أدى إیدی حطی فیها الكلبشات .

سنیة : ما کانش ینعز یا خویا. . یا ریت کان عندنا یا سی زینهم، و مع کل سیبنی

اشاور عقلی .. خلینی آفکر .. هی المسأله کده سبهللی .. دا جواز .. دا عمر .

زينهم : تعجبينى كده .. أهو كده بقيتى بت عاقله .. مش .. أتجوزك ليه ؟ انطسيت فى عنيه ، انخبطت فى نافوخى ما يصحش الكلام ده يا سنسن .. أنا برضه بنى آدم ، ولى قيمه عند نفسى ، والاحا تعملى زى المخبول الأكبر !

سنية: داييقي مين ده ؟

زينهم : أخو المغفله الكبرى .

سنية : بس .. عرفته ، والنبي راجل طيب ويستاهل كل خير .

زینهم : طیب . طیب . لکن مخبول مخبول (مقلدا عبد الصبور) خبی وشك لحسن ما بطیقوش .. غطی وشك بسرعة .. شكلت بیلبشنی .. بخاف من عینیك .. بالدمه دا كلام یتقال . أنا وشی ما ینطقش ؟. عینیه و حشین ! (ینظر إلی نفسه فی مرآة فی الحائط .. ویلعب حواجه) .

المشهد الثاني

(تدخل أم رتيبه) 🦠

أم رتيبة : كان .. كان .. يا سى زينهم .. أدى اللي كان ناقصنا . تقف في المرايا وتلعب حواجبك .، خلاص .. كملت المعانى لما تلعب حواجبك في المرايا .. عاجبك أوى شكلك اللي زى بوز الإخص . قال لو كان القرد شاف ...

زينهم : (مقاطعا) خلاص مفيش لزوم ، يعنى لازم تصدى نفسى .. قرد وما .. قرد وما قردش .. هوا يعنى الواحد كفر .. لما يشوف وشه في المرايه !؟

أم رتيبة : ما كفرش ولا حاجه .. بس قلبي عليك ، تغم قلبك وتسد نفسك . كان نفسي تتفرج على حاجه عدله . ما علينا . فوت انجر شوف شغلك .. اوصل لعم شرف هات منه قزازة كازوزه للضيف اللي جي ٠٠ ياللا فوت .

(يخرج زينهم بعد أن يقذف بقبلة في الهواء لسنية)

زينهم : (لأم رتيبه و هو يهم بالانصراف) لا مؤاخذه يا ست . دى حاجه كده ع الماشى .. دى دفعه أولى من إيجار السجن .. دى عربون تمن الكلبش (يصفق بيديه) أموت فى ابو زعبل عقبال عندك يا ست .

أم رتيبة : قطع لسانك .. قليل الحيا ما تختشيش .. إن شا الله انت وعشره زيك .. يستسلوك من رقبتك ويحدفوك فى أسفل سافلين .. سجن آل .. وكلبش آل .. بره وبعيد .

زينهم : (لسنيه وهو بجوار الباب) بقول لك على نياتها .. ما لهاش فى الطيب نصيب . (لأم رتيبه) انت لو عرفت السجن اللي قصدى عليه .. والكلبنش اللي بالي فيه .. لوديتي نفسك في طوكر .. آل بره و بعيد .. قولي ان شاء الله ألف انشا الله . عقبال الحبايب . (يخرج زينهم)

المشهد الثالث

أم رتيبة : قصده إيه المهفوف ف عقله ده .؟

سنیة : ما تاخدیش علی کلامه یاست .. أهو عمال بیخرف .. حدو اخد منه حاجه غیر کده .

أم رتيبة : امال كلبش إيه ، وسجن إيه اللي حياً جره ويدفع عربونه ؟

سنية : (تضحك) ربنا بديكي يا ستى .

أم رتيبة : انت كان بتقولى كده ؟

سنية : أيوه والنبي يا ستى ، لو عرفت السجن اللي عايز يخش فيه ، والكلبش اللي ناوى يحطه في إيديه .. لتدعى بيه على الحبايب .

أم رتيبة : ولا انا فاهمه حاجه .

: زينهم قصده بالكلبش والسجن ، الخطوبه والجواز . سنية

: طيب وهوا ماله ومال الخطوبه والجواز .. هوا ماله وش الفقر ده . أم رتيبة

: (تضحك) أصله يا ستى عقبال عندك خطبني ، والنبي يا ستى بقاله سنية

كام شهر وهوا بيزن على ودانى .

: (تبدو عليها الفرحة) بقى كده .. المنيل على عينه أبو تعسونه كان أم رتيبة بيخطب ويتجوز .. وقلت له إيه ؟

> : قلت له .. لا . سنية

: لا تسيب مفاصلك ، فيه حد تيجي له النعمه لغاية عنده ويرفضها ، أمرتيبة حدفي الدنيا يجيه عريس ويقول لا ؟

> : مش بتقولي عليه المنيل على عينه أبو تعسونه ؟ سئية

: طیب وفیها إیه ، دی حاجه ودی حاجه .. دی بشقه ودی بشقه ، أم رتيبة

مشراجل ؟ كفايه ؟

: بس يا ستى حاله على أده . سنية

: بكره ربنا يعدل حاله ، والا يعني حا تكتر على ربنا ؟ أمرتيبة

: أنا يرضه يا ست ما قلتش لا .. بعني لا .. قلت سيبني لما افكر . سنية

: وتفكري في إيه ؟ وليه ؟ هي دي حاجه عايزه تفكير ، ارضي يا أم رتيبة بت .. ارضي به ، دا اللي ما يرضي بالخوخ يرضي بشرابه .. وعريس

في اليد ، أحسن من عشرة عند الخاطبه .

: بس يا ستى خايفه من سى عبد الصبور . سنبة

> : وماله سيدك هباب ؟ أم رتيبة

: خايفه لا ما يوافقش . سنية

: وهوا ماله .. له عندك حاجه .. أبوكي ! أمك !.. حقه بطلوا ده أمرتيبة

واسمعوا ده .

: أنا أصلي شايفاه دايما ساخط على زينهم وما يطيقش يشوفه .. ودايما سنية يقول لي اوعي منه يا بت دا أصله خسيس وخبيث .

أم رتيبة : هوا فيه حد عنده مش خسيس وخبيث .. هوا كده دايما يكره العرسان ويطلع فيهم القطط الفاطسه .. الود وده الجواز يحرم على العالم .. والناس تقعد كلها زيه كده عزاب حقه عجايب .. مش كفايه مبل بختى .. هوا عايز يميل بخت اللي يعرفه واللي ما يعرفوش .. ارضى يا بت ارضى واسمعى كلامى .. ارضى دا العمر مش بعزقه ، والايام بتجرى زى ما يكون حد وراها بالكرباج .

سنية : واذا ما رضاش ؟

أم رتيبة : هوا مين دا اللي ما يرضاش !.

سنية : سيدى عبد الصبور .

أم رتيبة : ولا يهمك .. كل واحد بيقول يا الله نفسى . آل يا روحى ما بعدك روح .. شوفى مصلحتك يا بنتى .. بكره لا ينفعك ست ولا سيد .. ما حدش له عندك حاجه .. الدور على اللي مسنسلني معاه و مجر جرنى ورأه .. وسادد طريقي و مميل بختى .. وبيطفش منى العرسان بوشه اللي يقطع المخميره م البيت .. ربك يستر النهارده .. قادر يا كريم تعقله و تهديه ، و تحلي في عينه سي سيد افندى .. و تجعل الحير على قدوم الواردين و تحلي في عينه سي سيد افندى .. و تجعل الحير على قدوم الواردين و تحلي في عينه سي سيد افندى .. و تجعل الحير على قدوم الواردين و تحلي في عينه سي سيد افندى .. و تجعل الحير على قدوم

سنية : ان شِاء الله يا ستى سليمه .

أُمْ رَتِيبَةُ : سَلِّيمَهُ يَا بَنْتَى بِإِذْنَ اللهُ .

سنية : ربنايتمم بخير .

أم رتيبة : خير وألف خير .. أنا عيني الشمال بترف ، وعمرها ما رفت الاعلى خير .

سنية : خيريا ستى خير .

أم رتيبة : وحكاية جوازك دا كان فال كويس .. خلانى استبشر خير .. هوا ياختى اتأخر ليه !

سنیة : ما تقلقیش یا ستی . . أهو زمانه جای . . هوا معاده کام ؟

أم رتيبة : ست ام سيد قالتلي حا بيجي الساعه اربعه .

سنية : لسه بدرى قدامه ربع ساعه .. يكون سيدى عبد الصبور شرب القهوة وشم النشوق ووزن دماغه .. يقابله وهو فايق ورايق .

ريسمع صوت عبد الصبور افندى وتدور المناقشة بينه وبين زينهم
 من الخارج) .

عبد الصبور: (صارحا) القبقاب.

زينهم : (يجيبه من الحارج أيضا) حاضر . حاضر حا جبهولك .

عبد الصبور : يا باى .. يا باى . يا حفيظ يا مغيث .. خبى وشك يا خسيس يا إبليس يا خبيث يا منحوس .. خبى وشك لحسن بتلبش جنتى .

زينهم : امال حا جيبلك القبقاب ازاى وانا مش لاق الوش قدامي عشان البسه ، خيى و شك انت لغاية ما جيبهولك .

عبد الصبور: اناحا غمض عنيه ؟

زينهم : يكون أحسن .

عبد الصبور : خلاص .

زينهم : لسه.

عبد الصبور: خلاص ؟

زينهم : لسه.

أم رتيبة : الحقيه بالقبقاب يا سنيه يا حبيبتى .. الحقيه قبل ما يتلبش وبخلى يومنا زى بعضه .. شوفيهوله تحت الكنبه اللى قاعد عليها ، ولا دورى عليه في رجليه .. ما هو اليومين دول خلاص عمى .. تبقى الحاجه في إيده والا في رجله ويقلب الدنيا عليها .

زينهم : (صائحا من الخارج) يا سلام . يا سلام . امال إيه اللي في رجلك ده ؟

(عبد الصبور يدخل من باب حجرة النوم وهو يطرقع بالقبقاب
 وقد ارتدى جليابا وطرطورا وظهرت أرجل السروال الطويل من

أسفل الجلباب) .

عبد الصبور: مش قصدى على القبقاب ده . . قصدى على القبقاب أبو جلاحل . . القبقاب الموسيقى . . هو اللي بيهدى أعصابي ويريح جتتى .

أم رتيبة : روحى يا حبيبتى يا سنيه شوفى له الحاجه اللي هوا عايزها. طيبى خاطره شويه يا سنيه يا بنتى . هديه لاجل خاطرى ، وابعدى عنه المقروص زينهم ما دام بيلبش جتته .

(أم رتيبه تخرج من باب الصالون .. وسنيه تدخل إلى حجرة النوم من الباب المتسع حبث يجلس عبد الصبور افندى على فوتيل أمام السرير وبجواره منضدة صغيرة) .

المشهد الرابع

عبد الصبور: القبقاب ابو جلاجل.

منية : عنيَّه يا سيدي . أبو جلاجل وابو صاجات ، وابو سنه دهب لولي .

عبد الصبور: اخلصي بسرعه.

سنية : بس صبرك على ياسيدى ، اناحا جيبهولك من تحت طقاطيق الأرض . (سنية تبحث تحت المقعد وتحت السرير . . ثم تخرج قبقاب منقوش بجلاجل) .

سنية : اتفضل يا سيدى . . قبقاب العافيه . . قبقاب السعد والهنا .

عبد الصبور: ومخبيينه ليه تحت السرير، هوا معيبه والا معيره!

سنية : أبدا .. يا سيدى أبدا .. دا زينة القباقيب .. احنا بس خايفين عليه م العين (تصدر حركة منع الحسد وتدور بأصابعها متجمعة فوق القبقاب) .

عبد الصبور: كلام قارغ، أنا ما صدقش في العين .. أنا عايزه ينحط دايما وبوزه باين من تحت السرير، عايز اشوفه قدامي واتملي منه. سنية : اسم الله على بوزه . من عنيه يا سيدى .

عبد الصبور: دلوقتی سیبهولی قدامی ، وروحی هاتی لی القروانه ، وابعتی لی ستك ام رتیبه عشان اقرالها شویه .. أنور مخها .

سنیة : حاضر یا سیدی (تخرج وهی تنادی) ستی . ستی . کلمی سیدی عشان عایز ینور مخك شویه .. الله ینور علیه .. ویهدیه کان و کان .

(تدخل أم رتیبه) .

المشهد الخامس

عبد الصبور: اقعدى .. قدامي .

أم رتيبة : عايز إيه .. انا مش فاضيه لك .

عبد الصبور: اقعدى يا جاهله ، اقعدى يا مسكينه ، يا مضيعه عمرك في ظلمات الجهل ، يا تايهه في دياجير الحياه .. اقعدى لما افتح ذهنك شويه يا بائسه .. يا تعسه . اقعدى لما اديك شوية نور .. يخففوا عنك العتمه اللي انت فيها اقعدى يا غلبانه .

أم رتيبة : يا خويه اعتقنى شويه لوجه الله .. كفايه بقى فلبت دماغى باللت والعجن اللي كل يوم تصدعنى بيه ، انا مش عايزه نورك ده .. انا مبسوطه كده من العتمه اللي انا فيها .

عبد الصبور: طبعا . في كل جاهل ، وأخو الجهالة في الشقاوة ينعم . ولكن انا لازم انورك غصب عنك ، انا مسئول عن إخراجك من الشقاوه اللي انتي بترتعي فيها ، دا واجب على . . انا لازم اعلمك كل حاجه عشام حا حتاجلك في وقت الزنقه ، من سوء البخت ، انك أقرب الناس لى ، ولا فيش حد حاعتمد عليه في المهمه الكبرى غيرك . . اقعدى .

أم رتيبة : (تجلس متربعة على سجادة صغيرة على الأرض) حل عنى شويه

بقى .. مهمه كبرى إيه يا خويا وصغرى إيه !

عبد الصبور: بكره تعرف ، بعدين تعرف ، انت حا تكونى شريكه فى أكبر حدث فى التاريخ ، انت حا تقومى بدور ، ما نتش قده ، ولا حمله ، لكن اعمل إيه مفيش غيرك .. انت حا تخلدى فى التاريخ رغم أنفك .. حا تبقى عظيمه غصبن عنك .. يدى الحلق للى بلا ودان .

أم رتيبة : يا خويا اللي يفرقه العويل يسفه .. أنا لا عاوزه منك لا حلق ولا إسوره . هوا انت من يوم ما جبت لي الكردان الفالصو ، هان عليك تجيب لي حاجه بعده ؟.

عبد الصبور: كردان إيه ، وإسورة إيه ، ياوليه يا جاهله دا مثل ، دا مجاز .. انا قصدى انك حا يبقى لك شأن ، وانت بلا شأن ، حا تبقى حاجه ، وانت مش حاجه . حا تبقى عظيمه ، وانت تور الله فى برسيمه ، فهمت والا لا .. عشان كده انا عايز آنورك شويه . عايز اخليكي تور ، لكن متنور شويه . عايزك تفهمي حاجه عشان خاطر تساعديني .

أم رتيبة : أساعدك في ايه بس يا خويا يا عبد الصبور ؟

عبد الصبور: بعدين تفهمي . بعدين حا تعرفي كل حاجه .

أم رتيبة : أنا ورايا شغل .. لازم اشوفه عشان فيه ناس ضيوف جايين لك دلوقت .. وانت لازم تقوم تلبس علشان تستقبلهم .

عبد الصبور: ضيوف ؟ ضيوف مين ؟

أم رتيبة : جارنا سي سيد افندي .. الست ام سيد قالت لي انه حا ييجي يزورك .

عبد الصبور: عشان إيه . عايز مني إيه ؟

أم رتيبة : أنّا عارفه .. وهي الناس بيزوروا بعض عشان إيه ، يمكن عايز يأتنس بيك . عبد الصبور: أنامش عاوز حدياً تنس بيه ، أنا كده كويس .. مئتنس بنفسى .. أنا بحب نفسى .. أكتر من أى حد تانى .. خلاص .. مش عايز اقابل حد .

أم رتيبة : والضيف اللي جاى ده نطرده ؟. مفيش داعى يا خويا للحاجات دى ، أهو قابله برضك واقعد معاه شويه ، واجبر بخاطره .

عبد الصبور: ع العموم .. مش وقته دلوقت ، المهم انى اقرا لك دلوقت بقية الباب الرابع ، وبعدين يبقى يخلها ربنا دلوقت اسمعي كويس ، وخلى مخلك معايا .. احنا كنا بنقرا فى باب « أشباح الأحياء » .. ووقفنا لغاية « البحث النفساني » ..

أم رتيبة : حاضر يا خويا ، سامعاك كويس قوى .. اقرا في عفساريت الأحياء .

عبد الصبور: (يمسك كتاب ويأخذ في القراءة . وأم رتيبه تنعس أشساء القراءة) : « ولا يجب أن ننسى ، من جهة أخرى ، أن المكان هو الذى يوجد التقسيمات الواضحة .. فأجسامنا خارجيسة بعضها عن بعض في المكان ، ونفوسنا من حيث هي مرتبطة بهذه الأجسام ، تفصلها بعضها عن يعض مسافات ولكن إذا لم تكن النفوس ملتحمة بالجسد إلا في جزء منها كان من الممكن أن نعتبر أن يكون ثمة تداخل متبادل فيما عدا ذلك الجزء ، وكان الممكن أن يتم بين النفوس المختلفة تبادلات شبيهة بظاهرات التداخل ، وإذا صح وجود هذا التواصل كان لا بد أن الطبيعة قد اتخذت الاحتياطات التي تحول دون ضرره ، ولعل هذه هو موضوع : « البحث النفساني » لعل الرؤية الصادقة تنم على هذا النحو وكذلك تظهر أشباح الأحياء » فاهمه يا أم رتيبه ؟

أُم رَتَيبَة : (مستيقظة) أبدا ، مش فاهمه حاجه أبدا .

عبد الصبور: ولا انا .. على العموم الفهم مش مهم ، الكتب دى معموله

مخصوص عشان ما تتفهمش ، دا تلاق اللي كاتبها نسفسه ، مش فاهمها .. فيه ناس اختصاصيين في الكتابه اللي ما تتفهمش .

(تدخل سنيه حاملة قروانه نحاس وإبريق ملي بالماء الساخن) .

سنية : كلمي يا ست . ست ام سيد عايزاك من الشباك .

(أم رتيبه تنهض)

عبد الصبور: (بإصرار) خليكي قاعده لما اكمل لك الفصل.

أم رتيبة : (تهرول خارجه) هوا إيه أصله ده .. هوا حكم قراقوش ، الوليه واقفه ع الشباك . دا حتى ما يصحش .

عبد الصبور: (يضع الكتاب جانبا) طيب بس ما تغبيش كلمه ورد غطاها .. أصل انا عارفك وليه رغايه .. اللي انشال من مخك انحط في لسانك .

ر يوفع عبد الصبور طرف جلبابه ، ويشمر سرواله ويضع ساقيه فى
 القروان) .

المشهد السادس

عبد الصبور: يا للا ادلقي .

سنیه : دی ناریاسیدی . لما تبرد شویه .

عبد الصبور: مش مهم النار .. أنا احب النار اللي ق الأرض .

سنية : ليه بس يا سيدى ؟. بعد الشر .

عبد الصبور: ما بعدش ولا حاجه .. لو ما دقناش النار في الأرض حا ندقها في السما .. بني آدم لازم يدوق النار .. يا نار الحرمان في الأرض .. يا نار العذاب في السما .. ربنا قال كده يا سنيه .. حا نعمل ايه ؟ اهو الواحد منا قدامه خمره و نسوان و فرفشه في الأرض ، و خمره و نسوان و فرفشه في الأرض .. يا يا خد اللي في و نسوان و فرفشه في السما يا يا خد اللي في الأرض و ينسوا اللي في السما .. فيه ناس بينسر عوا على اللي في الأرض و ينسوا اللي في

السما .

سنية : وانت يا سيدى ؟

عبد الصبور: أنا معشم نفسى باللى فى السما . أصل العمر فى الأرض قصير يا سنيه . . دى فركة كعب . النهارده بنتولد وبكره بنموت . . أنا فاكر نفسى امبارح لسه فى اللفه . وانتى يا سنيه . . ناويه تفرفشى فى الأرض والافى السما ؟

سنبة : (تضحك) هي ، هي ، .. في الأرض يا سيدي .. السما بعيده قوى .. وما حدش عارف إيه اللي فيها .. بعيده بعيده .. واللي قبلنا ما حدش عرف مصيرهم إيه .. ييفرفشوا في السما حقيقي والا بيدوبوا في التراب .

عبد الصبور: الجسد هوا اللي بيدوب في التراب .. لكن الروح بتنطلق حره .. طليقه زي النسمه الساريه ..

سنية : مين يعرف أهو كلام بيقولوه .. حدراح هناك وقال لك ؟

عبد الصبور: أهى دى المشكله .. دى الحاجه اللي تبدد الإيمان .. البني آدم عايز حابد الصبور: أهى دى المسكله .. دى العقده اللي عايز احلها .. دى المسأله المستعصيه اللي انا عايز اوصل لها .. أنا لازم اعملها .

سنية: تعمل إيه يا سيدى بعد الشر؟.

عبد الصبور: مش وقته ، يكره تعرفوا ، بكره حاعمل لكم المعجزه الكبرى ، بكره حاحكى لكم على العالم الواسع المجهول ، واكشف لكم خبايا الظلمات المحيطه بأجسادكم الفانيه .. ما علينا .. مش وقته ده .. حطى كان شويه ميه .. فين علبه النشوق .. انا مش قلت لك دايما حطيهالي على الترابيزه جنبي .

سنية : والنبى يا سيدى كنت حطاها مطرحها .. يمكن حد شالها ف الدولاب .

(تذهب لإحضار علبة النشوق من الدولاب) .

عبد الصبور: ما فيش غير زينهم . . هوا ما فيش غيره اللي بيدعبس في حاجاتي . . هوا اللي معكنن على عيشستي . . هوا الخنيس الخبيث .

سنیه : والنبی زینهم مظلوم یا سیدی .. دا آمیر وطیب و ابن حلال و قلبه آبیض و یجبك قوی .

عبد الصبور: لكن انا ماحبوش، منظره بيلبش جنتي ..

سنية : والنبى يا سيدى دا دايما بشكر فيك قوى ، والنهار ده كان قاعد يقول ان هوه ما لوش حد غيرك ، وكلمنى في موضوع وكنت عايزه استشيرك فيه ، حاكم انا مقدرش اعمل حاجه الالما آخد رأيك يا سيدى . . أصل عقلك يعجبنى أوى .

عبدالصبور: إيه هوا الموضوع ده ؟. ﴿

سنية : أصل زينهم قاللي ..

عبد الصبور: (مقاطعا) قال لك ايه ؟.

سنية : قال لي إنه كان عايز ..

عبد الصبور: (مقاطعا في دهش) عايز ايه ما تنطقي ؟.

سنية : أنا أصل مكسوفه أوى يا سيدى .

عبد الصبور: أنا مانا عارفه ماوراهش غير الكسوف والسفاله وقلة الحيا .

سنية : أبدا يا سيدى المره دى ما قالش حاجه فيها سفاله و لا قلة حيا .. دا قاللي انه عايز يتجوزني على سنة الله ورسوله .

عبد الصبور : (منتفضا من الغضب) يتجوزك !! ؟؟. الحفيه .. ابن الحفيسه ..
الضايع ابن الضايع ، والله عال يا سي زينهم ، بقيت بني آدم وعايز
تتجوز ، والنبي لاقطع دابرك وابطلث تجيب السيره دى .. تتجوز ..
ياخي جاك جنازه حره .. يا مقطوع ، يالمام السبارس . يا عسرة
العرر .. ما بقاش الاسي زينهم كان اللي يجيب سيرة الجواز في البيت
ده .. أهو ده اللي كان ناقص .. لكن معلهش أنا برضك استاهل الل

خليته يشم نفسه ، ويفتكر نفسه راجل . لو كنت خليته زى ما كان داير بشرشين الجزر وعودين الملانه وعرقين الحلبه الخضرا .. ما كانش اتفرعن وقال اتجوز .

سنیه : یوه یا سیدی هدی نفسك هدی .. ما تعكرش دمك كده .. دا عشره زی زینهم فی ضفر رجلیك .. خدلك تنشیقه وصلی علی النبی .

عبد الصبور: (يتناول تنشيقه ويعطس) سي زينهم عايز يتجوز .. الاقرع النزهي عايز يتجوز ؟. ياخي ينسم .. وانتي قلتي له إيه ؟.. ما تفتيش في وشه ؟. ما رقعتهش صرمتين على نافوخه ؟. ما بلغتيش القسم ؟.

سنیة : یوه یا سیدی . لیه بس دا کله . . هوا کفر . أنا قلت له سیبنی لما افکر ، وقلت لنفسی یا بت استشیری سیدك عبد الصبور ، راجل صاحب شوره و کله عقل .

عبد الصبور: هي دي عايزه شوره ؟ هوا الجواز ده عايز شوره ، هوا فيه حاجه جايده المصايب والمتاعب لحلق الله أجمعين غير الجواز .. صحيح النبي قال لا تناكحوا تناسلوا ، فإنى مباه بكم الأمم يوم القيامه ، ولكن مش عشان سي زينهم يتجوز والا الوحش والا زكيبه الملدنه ، هم دول يتباهي بيهم ؟

سنية : ليه كده يا سيدى .. ناقصين رجل والا ناقصين عين !. ما كل الحلق كده وحشين زينا . ما فيش حد احسن من حد .

عبد الصبور: أبدا إحنا أوحش كتير من بقية الخلق .. يعنى لو بقية الخلف فيهم خمسه في المايه وحاشه ، احنا كده بالقليل خالص ، عندنا خمسه وتسعين وحاشه .. ثم نفرض ان احنا وحشين زى بقية الخلق ، ليه نتكاثر ونتناسل ونعمل عقلنا بعقل بقية الخلق .. ليه نزود الدنيا بلاوى .. كل المصايب جايه من الجواز .

(أم رئيسة)

سنية : يا سيدى دا نص الدين .

عبد الصبور: نص أنهي دين ؟ الدين اللي نسيناه ؟ الدين اللي مش موجود ؟. يعني نص المفيش .. يعنى مفيش .. اسمعى يا سنيه .. انت زى بنتى ، و لازم ارسيكي .. انت زي كل النسوان قللات العقل ، انتم معذورين لأن ربنا خلقكم كده من غير عقل ، لأن مفيش حاجه بتعملوها عايزه عقل، اسمعى نصيحتى .. أنا راجل عندى عقل، شوف .. أنا حا شرح لك حالتك قبل الجواز وبعد الجواز حا جيبها لك على بلاطه .. انت دلوقت بنت شایفه کیفك ، فرحانه بروحك ، خفیفه لطیفه ، شمه نفسك ، راسك لفوق ، صدرك لقدام ، بطنك لجوه ، مغيش عُليكي حمل ولا عبء ، بعد الجواز حا تبقى إيه ؟. نفسك اللي كنت شماه حا ينقطع ، حا تبقى وليه غلبانه كحيانه ، صدرك لتحت ، بطسنك لقدام . شايله فيها أول حمل تقيل بارك على نفسك ، وهادد حيلك ، ومميل خالك . . وبعدين تخلفي . . يعني تشيلي الحمل اللي في بطنات تحطيه على كتفك .. وصدرك اللي كان لفوق ، حا يبقى زى الكتينه تلفيه على صباعك ، وبعدين تفضلي كده ما لكيش شغله غير تجيبي حمل تحطيه في بطنك وبعدين تنقلي الحمل من بطنك تحطيسه على كتفك ، لا نوم تشوفى ، ولا راحه تدوقى . النهارده الولد عيى .. النهارده عطس .. النهارده كح . النهارده بيسنن . النهارده سهل . النهارده حصبه . النهارده سعال ديكي . يا لطيف ، يا لطيف . . وبعد دا كله ، جوزك اللي كان بيجري وراكي ، وبيدوب في دباديب رجليكي ، يبقى طهقان منك وزهقان من خلقتك وتبقى أي واحده من الشارع أجمل منك في عينه الفارغه اللي ما يملهاش غير التراب. آدی یا ستی الجواز . آدی الهباب ، اللی بتجری وراه کل واحده ، ميسوطه منه ؟.

سنیة : لکن یا سیدی دا واجب لازم نأدیه ، إذا کان کل واحد حا یتهرب

منه .. الدنيا تعمر ازاي .. والولاد پيجوا منين ؟.

عبد الصبور: يا ستى عنهم ما جم . ما فيش داعي بيجوا أبدا .

سنية : و لما نموت احنا والدنيا تخلص ؟.

عبد الصبور: يا ستى تخلص .. يعنى فيها إيه غير العذاب .. هوا احنا مش حاسين بالعذاب اللي فيها ، هوا مش احنا اللي قايلين (تعب كلها الحياه) .. هوا مش احنا اللي قايلين ان (هذا جناه أبي علي) .. ليه نجني على أو لادنا اذا كنا عارفين ان مجايبهم في الدنيا جنايه ؟.

سنية : لكن يعنى قصدك كده . الدنيا تخلص ولا يبقاش فيها ناس ؟.

عبد الصبور: أيوه .. ما يبقاش فيها ناس .. ويبقى هوا يشوف له تصريفه فيها .

سنية : هو مين ده ؟.

عبد الصبور: ربنا .. اللي نظمها وخلقنا فيها ، خلانا عرضه لعذابها ، وعسذاب الآخره .. ما فيش داعي يسيبنا فيها حيرانين ، لاحنا عارفين جينا منين ولا رايحين فين ، وورانا الخير وانشر ، وقال اختاروا بين الاتنين .. نختار ازاى واحنا نفوسنا كلها سفاله وقلوبنا كلها شر ؟

سنية : أستغفر الله العظيم .. من كل ذنب عظيم .. انت جرالك ايه يا سيدى .. انت ما كنتش كده أبدا ؟. انت طول عمرك مؤمن وموحد بالله !.

عبد الصبور: هوا انا قلت مش مؤمن ، أنا بس حيران قلقان ، فيه حاجات كتيره عايزُ اعرفها ومش عارفها ، أنا مش فاهم ؟.

سنية . : مش فاهم إيه كا.

عبد الصبور : مش قاهم الحاجات اللي انت ما بنحاوليش تفهميها .. وعشان كده انت مستريحه ومبسوطه ، أصل الحاجات دى مش عايزه فهم . دى عايزه عايزه جهل ، أو تجاهل ، عايزه الواحد ياخدها كده عمياني .. يؤمن بها بقلبه مش بذهنه .

سنية : والله ما انا فاهمه حاجه م اللي بتقوله ؟.

عبد الصبور : أحسن ، أحسن كتير ، على العموم سيبك م الكلام ده كله ، المهم عندى انك ما تتجوزيش ، وخصوصا زينهم الكلب ، الخسيس الخبيث ، السافل المنحط ، بوز الإخص .

(يدخل زينهم مصفقا بيديه طربا من باب حجرة الجلوس منشدا) .

زينهم : ياتلتميت مرحبه وسلامات ياخللي ، يـاللي تكيـد العــوازل وانت داخللي .

عبد الصبور: يا باي ، يا لطيف . برضك داخللي عريان ؟.

زينهم : لا عريان و لا مكسى .. اللى مش عاجبه وشى يغمض ، الوش الورق الست حطت فيه الملح ، ومع كل ، أنا حاقفل الباب اللى بينى و بينك . عدم المؤاخذه أصل فيه ضيوف جايين ، والست بتقول لك كفاياك بقى نقع رجلين .. دول لو كانوا حجر كانوا باشوا .. قوم اتفضل قابل الضيوف .. (يغلق الباب الزجاجي) .

عيد الصبور: (من وراء الباب) ما باقابلش ضيوف ، أنا مش فاضى للحاجات الأرضيه دى ، أنا مشغول في حاجات أكبر ..

زينهم : الله يكون في عونك .. الحقيقه مشغول قوى بتتعب خالص من قروانة الميه السخنه ، وعلبة النشوق .

(يسمع طرق على الباب الخارجي وصوت سيد افندى مسن الخارج) .

سید افندی : (یتنحنح) یا ساتر .

أم رتيبة : (من بعيد) يا واد يا زينهم ، شوف مين على الباب .

زینهم : (لنفسه) یعنی حا یکون مین غیر عریس الهنا (بصوت عالی) اتفضل .

(يدخل سيد افندي منتفخا وهو مستمر في قوله يا ساتر) .

المشهد السابع

زینهم : یا سانر علی إیه . خش یا سید افندی خش . . دا البیت بیتك . أهلا وسهلا . . داحنا زارتا النبی (لنفسه) ماله كده نافش زی الدیك الرومی .

سيد : (يجلس) أمال سي عبد الصبور افندي فين ؟.

(تسمع عطسة عالية من عبد الصبور).

زينهم : (مشيرا إلى اتجاه العطسة) أهو .. هوه بعينه سي عبد الصبور .. دى البشاير بتاعته .. أهلا وسهلا .. أشرقت الأنوار .. أجيب لحضرتك إيه .. قهوه مظبوط ؟.

سيد : لا :

زينهم : سكر زيادة ؟

سيد : لا.

زينهم : سادة توزن دماغك ؟

سيد : برضه لا ,

زينهم : كازوزه ؟

سيد : لا.

زينهم : كركديه .

سيد : لا.

زینهم : شای . قرفه . . ینسون . کراویه . حلبه ؟ .

سيد : لا . لا . لا . لا . لا .

زينهم: أجيب لك لقمه بجبنه ؟

سيد : متغدى .

زينهم . ما هو لازم اجيب لك حاجه . . لحسن الست ام رتيبه تدبحني .

سيد : إذا كان و لا بد .. هاتلى . (ويشير بإصبعيه السبابة و الإبهام إشارة إلى كوب) .

زيتهم : لا . لا . داسي عبد الصبور يخرب بيتي . دا ما يطقش الحاجات دى أبدا ، دا عمره ما دخل البيت نقطة ويسكى .

سيد : ويسكي إيه يا بني آدم .

زينهم : شمبانيا .. فرموت .. نبيت .. زبيب .. أمال يعنى قصدك إيه بس (ويشير بيده نفس الإشارة) .

سيد : شوية مية دقه .. بس حاميه خالص .. لحسن كلت في الغدا شوية مفتقه عامله حرقان على قلبي وعايز أضيعه .

زينهم : عايز تضيع الحرقان بمية الدقه .

سيد: : أيوه .

زينهم : الحرقان يضيع بمية الدقه ؟ حقه بطلواده واسمعوده .

سيد : أيوه يا أخى .. أنا كده ، خلقتي كده ، معدتى كده . الحرقان ما يضيعش عندى إلا بمية الدقه .. على طريقة المصل الواقى .. أو على طريقة و داوها بالتي كانت هي الداء .

زينهم : حاضر .. عيني الاتنين ، وعايز مية الدقه كده ساده والاجنبها حتتين خور ؟. خيار .. حتين جزر ؟.

سيد : لا . لا . كفايه قوى الميه ، أنا معدتي مليانه خالص .

زينهم : وفيها إيه . تهضم بالخيار واللفت .

سيد : مافيش لزوم .

(تسمع عطسة من الداخل)

زينهم : فاضل كان عطسه ، ويهل علينا .. عن إذنك .

(يسمع صوت أم رتيبه تنادى على زينهم ، فيخرج لها ... وينهض سيد أفندى لمشاهدة الصور ويقف أمام صورة صبى وصيية) .

سيد : (لنفسه) يا سلام . . هي بعينها . النص التاني ، نص اللفته ، نص

الحياره ، لازم دلوقت استوت ، وبقيت حاجه طعمه .. حاجمه تتاكل .. يا سلام عليكي باست ام رتيبه ، وعلى وقفتك الحلوه .. يس الورده اللي في إيدك ما كانش لها لزوم . لو كان بدالها حزمة جرجير . أو فجل . حاجه كده تفتح النفس مش كانت بقت أفكه ؟.

﴿ زينهم يعود وعليه سيماء الاهتمام والعجلة ﴾ .

زينهم : سيد افتدى . سيد افتدى . فيه حاجه مهمه خالص .

سيد : حاجه إيه ؟.

زينهم : حاجه مهمه خالص .. حاجه خطيره . حاجه يتوقف عــلـيا مستقبلك .

سيد : مستقبلي أنا ؟.

زينهم : أيوه مستقبلك انت وهي .

سيد : هي مين ؟

زينهم : الست ام رتيبه .

سيد : آه .. مستقبلنا المشترك .. مستقبلنا الجميل ... مستقبلنا المنتظر ، مشتقبلنا المنتظر ، مشتقبلنا المنتظر ،

زينهم : معلهش ، عدم المؤاخذه .. ما كنتش عارف انك واقع بالشكل ده .

سيد : إيه هي الحاجه المهمه دي . قول . انطق !

زينهم : الست عاوزه تطمن .

سيد : على إيه ؟.

زينهم : على اسمك . اسم الله عليك . اسم النبي حارسك .

سید : ماله اسمی .. عایزه تطمن علیه لیه .. هوا کان وقع اتکسر ، والا قالوا لکِ اتشرع منه حرف ، ولا انصاب بشَدّه ، والا همزه .. مالسه اسمی !.

زينهم : طب بس وطي صوتك لحسن سي عبد الصبور يسمعك .. الست ام رتيبه كانت وصت الست والدتك خالتي ام سيد .. انها تقول لك عشان تغير إسمك .. أصل سى عبد الصبور ده دماغه ترللى . وبعض ساعات له تلاكيك على حاجات فارغه ، فهى خافت لا ما يعجبوش اسم السيد بنجر .. يقوم يتلكك عليه ، والحكايه كلها تبوظ من تحت راس حاجه لا راحت ولا جت . حقيقى السيد بنجر بينى وبينك اسم مش حاجه . لكن فيها إيه يعنى . ياما فيه أسامى أبوخ من كده ، فقالت من باب الاستحراص تغير اسمك عشان ما نديلوش فرصه يحرن فيها ، ويقول كانى ومانى . وهى باعتانى دلوقت عايزه تطمن غيرت الاسم و الا لا ؟.

سيد : وهوا انا اقدر أخالفها في طلب ؟. أنا ارفض لها حاجه ؟ آل اسم آل . ميت إسم في ضفرها . ست رتيتب الحلوه .

زينهم : يعنى غيرته ؟.

سيد : طبعا و دى عايزه كلام .. امبارح ما كانش لى شغله غير كده ، طول اليوم في المحكمه الشرعيه . لعمل الترتيبات اللازمه .

زينهم : الحمد الله علمنك .. لا والله شهم و ذو همه ، أهو كده الحطاب والا بلاش .. عن إذنك بقى اما اروح اطمن الست .. لحسن دى قلقاته أوى .

سيد : روح طمنها خليها تحط فى بطنها بطيخه صيفى .. قول لها ان السيد بنجر ، اللي قعد طول عمر السيد بنجر ، وبقاله خمسه واربعين سنه .. الناس يقولوا له سيد بنجر خلاص ما بقاش سيد بنجر .

زينهم : امال بقى إيه ؟.

سيد : بقى . على بنجر .

زينهم : (صائحا في دهشة) على .. إيه ؟!!.

سید : علی بنجر .. فیها إیه .. مالك بتصرخ كده زی ما تكون قرصتك حیه ؟.

زينهم : على بنجر ١١٩.

سید : أیوه .. کنت سید بنجر .. وبقیت علی بنجر .. فها إیسه ؟ عجیه ؟!!.

زينهم : لا . ولا حاجه !.

سيد : أمال مالك كده بتبحلق فيه ؟.

زينهم : وانا مالى يا عم حا بحلق فيك وتبحلق فى .. أنا اروح اقول لصاحبة الشأن .. وذنبها على جنبها .. لو وقعت من طولها والاصابها حاجه انا مش مسؤول !.

سید : وقعت من طولها و الاصابها حاجه ؟ إیه الکلام اللی زی السم ده .. عشان إیه دا کله ؟. قلنا سید وحش . کخه .. کان علی مش حا یعجب .. آمال یعنی کنت اخلیه إیه ! زنوبه !. زنوبه بنجر !. کان یعجب کده ؟.

زينهم : يا أستاذ مش مسألة محمد ولا سيد ولا زنوبه ولا خدوجه .

: أمال مسألة ايه ؟.

زينهم : مساكة بنجر .. بنجر .. يا سي على بنجر .

سيد : بنجر ؟.

سيد

زينهم : أيوه بنجر !!.

سيد : ماله بنجر !. فيه أحلى و لا أغلى و لا أطعم من البنجر .. أنا اغير بنجر .. ليه ! مجنون ؟ حد في الدنيا يبقى اسمه بنجر و يغيره .. إنت عارف طبق البنجر يقف بكام ؟.

زينهم : إيه يعني .. مش بالكتير قوى بقرش ابيض ؟.

سيد : اخرص .. دا البنجر المغشوش .. دا اللفت المصبوغ اللي بيبيعوه على إنه بنجر ـــ لكن البنجر الأصلي ..

زينهم : (مقاطعا) يما أستاذ احنا مالنا ومال البنجر الأصلى والبنجر المغشوش .. إحنا عايزين عريس .. مش سلطنية طرشى .. البنجر يمكن له قيمه وسط الطرشي .. لكن وسط البني آدمين .. حاجه تبقى

ما لهأش معنى .

سید : یعنی ایه . ما نیش فاهم . یعنی کنت عابزین اغیر اسمی ، بدل سید بنجر ، یبقی سید جزر ، سید لفت ، سید جرجیر ، سید قشطه ؟.

زینهم : وهوا یعنی الدنیا ضاقت بالأسامی . اشمعنی فصیلة المخلل دی اللی انت ماسك فیها ، أصل ما فیش لزوم أبدا بیقی بنی آدم إسمه علی أسماء أصناف المخلل ، دی حاجه ودی حاجه .

سيد : أمال يعنى فيه لزوم علشان بنى آدم يبقى اسمه خشبه ، والاحمام . والا الجمل ، والاظاظا ، والاالفار . كل دى يعنى حاجات لها لزوم ، والا لها علاقة بالبنى آدمين ؟ على الأقل البنجر حاجه لها قيمه في عالم الحلو ، وعالم الحادق . انت ما تعرفش ان البنجر يبقى . .

زينهم : (مقاطعا) يبقى والا ما يبقاش .. أنا مالى .. ذنبك على جنبك .. خليك بنجر ينجر .. ابقى قول لسى عبد الصبور أن أسمك بنجر .

سيد : يعنى يعمل فيه إيه ؟.

زينهم : ولا حاجه . بالقليل خالص . حايتف في وشك .

سيد : إيه الكلام البارد'ده .. اللي يسم البدن .. هوه ماله إذا كان اسمى بنجر والاعفريت أزرق !؟

زينهم : آديني قلت لك بقى . خليك على كيفك . الظاهر ان دماغك ناشفه قوى .

سيد : على العموم احنا فيها .. خلاص إذا كان مش عايز بنجس ، مش ضرورى بنجر ، ما دام ما لوش فى الطيب نصيب . حا نعمل له إيه .. خلينا كده سيد حاف .. والا سيد على .. والا سيد قشطه .. والا سيد أى حاجه .. كده كويس ؟

زينهم : تعجبنى . أهو كده بقيت راجل عاقل . . بناقص البنجر ده . . اللي تغلبه العبه . . بس فيه حاجه تانيه عايز اوصيك عليها . . علشان الشغلانه ما تبوظش و تطلع فشوش . . الراجل سي عبد الصبور زى ما

قلت لك بنغزه .. فخده على هواه ، وطاوعه أوى .. إوعى تقول حاجه كده والاكده .. تلبشه وتفور دمه .

سيد : يعني إيه حاجه كده والاكده ؟ مانيش فاهم ؟

زينهم : يعنى مثلا هوه ما يحبش الكرنب المحشى .. فمتجيبش سيرته قدامه .. واذا جت سيرته اعمل انك ما تقدرش تدوقه على لسانك .

سيد : لكن انا بحب الكرنب المحشى خالص .

زينهم : يا أخى معلهش . استحمل . . ابقى حبه بره لكن قدامه اعمل انك ما تحبوش .

سيد : بسيطه . . حاجه مش صعب . . وإيه كان سي عبد الصبور ما يحبوش ؟

زینهم : ترمای نمره ۵ .

سيد : ترماى نمره ه ؟ إيه المناسبه ؟ يكره الكرنب المحشى معقول ، كل واحد وكيفه ، أنا مثلا ما حبش السبائخ ولا احبش التقليسه على البصاره ، لكن ترماى نمره ه ده .. إيه العلاقه بينه وبين سي عبد الصبور ؟ يحبه ليه ويكرهه ليه ؟ هوا داقه ؟ قطم حته من السلم مثلا لقاها متفله . والا داق السنجه لقاها دلعه ؟.

زینهم : سلم إیه اللي لقاه متفل ، وسنجة ایه اللي لقاها دلعه ، فیه حد یاکل ترمای ؟

سید : یمکن ، ما هو سی عبد الصبور بتاعك ده ما یستبعدش علیه حاجه أبدا .

زينهم: لأمش للدرجه دى.

سيد : أمال إبه المناسيه ، انه يكره ترماى نمره ٥ بالذات ؟

زينهم : ما فيش استلطاف .. العلاقه بينهم وبين بعض سيئه ، أصل سيدى عبد الصبور دايما يحب بركب الترماى من غير مؤاخذه ، سفلقه ، طول عمره بارع ، في التزويغ من الكمساريه ، يفضل سنين وايام ، يتقل من ترماى ١٠ لـ ٢٢ لـ ٣ ، ما فيش حد يقول له انت فين ، هوا يحط

رجله فی نمره د والکمساری والمفتش یکبسوا علی أنفاسه ، عشان کده ما یحبش حد یجیب سیرة الترمای نمره د أبدا .

سيد : لامعذور ، وإيه كان ما يحبوش سي عبد الصبور، فيه حاجه تانيه العلاقه بينه وبينها متوتره أو مقطوعه ، غير الكرنب المحشى وترماي نمره ٥ ؟

زينهم : راس العبد .

سيد : برضك بينها وبين سيدك عدم استلطاف ؟

زينهم : لا ، دي بقي عداوه مستحكمه ، حرب دايمه ، خصومه مخيفه .

سيد : وعلشان إيه ؟، وبمناسبة إيه ؟، يعادى سي عبد الصبور افندى رأس العبد ، ويعمل عقله بعقلها ؟

زينهم : الحقيقة ، في الحكايه دي ، هوه مثن غلطان ، هي السبب .

سيد : ازاى بقى ياسى زينهم ؟

زينهم : هي دايما المعتديه ، كل ما يكون رايح كده ، والا جاى كله .. تروح متزحلقه من على الأرض وواقعه على نافوخه .

سيد : طيب يا أخى ما يعمل معاها معاهدة عدم اعتداء .

زينهم : عمل .

سيد : والنتيجة ؟

زينهم : زى كل معاهدة عدم اعتداء ، بعد المعاهده على طول راحت واقعه على نافو خه مسيخه دمه .

سيد : يستاهل .. فين هي راس العبد دي عشان ابوسها من هنا ومن هنا .. دى مش راس عبد ، دى راس منصر . اللي قدرنت تعمل في سي عبد الصبور كده ، وفيه إيه كان ما يحبوش سي عبد الصبور غير الكرنب المحشى و ترماى نمره ٥ و راس العبد ؟

زينهم : العدس اللي من غير جبه .

سيد : وابو جبه ؟

زينهم : يحبه .

سيد : وإيه كأن خصوم سيدك عبد الصبور . قلهم مره واحده و خلصنا .

زينهم : زكيه الملدنه ، وسنيه القرعه ، وابو على الاحول والكسبه ، والزيت الحار ، وابو قردان ، والسمك البكلاه وبراغيت الست ، وعبد الحليم القرد ، والكرات ابو شوشه والسجق اللي من غير فلفل .

سيد : وأبو فلفل ؟

زينهم: يموت فيه ، والكسبريه ، وحشيش الأرانب .

سيد : وغير الأرانب ؟

زينهم : يتعاطاه أحيانا ، والمنجه ، والفيل ابو زلومه ، واللبـان الدكـــر ، والحلاوه السمسميه .

سيد : ديهده .. دبهده .. دا ماله عامل زى الحكومه المصريه .. مخاصم طوب الأرض .

زينهم : والرز ابو شعريه . وسكارش بتاع الجاز ، وقسم السيده . . و . . .

سید : (مقاطعا) طیب .. بس ، وانا حا جیب دماغ منین احفض کل الخصوم دول .. أنا أحسن طریقه اقعد ساکت ما فتحش بقی لا بطیب و لا بردی .

زينهم : ما ينفعش .

سيد : ليه بقى ؟

زينهم : ينام منك .

سید : ینام منی ازای ؟

زينهم : أيوه ينام منك .. لو سيبته شويه كده من غير كلام .. تلاقيه فقر ونام , ولو نام منك يا حظ ، لازم تفضل متسمر فى مطرحك .. لا حس ولا حركه .. لحسن تقلقه .

سيد . : أفضل قاعد كده قدامه ؟

زينهم : لغاية ما يصحى من نفسه .

سيد : ودى مصيبة إيه اللي طبلت على دماغى .

زينهم : اهو على أد ما تقدر ما تجيبش سيرة الحاجات اللي قلتها لك .

سید : علی العموم . . بسیطه . ما فتکرش ان حا بیقی فیه أی مناسبه لها . یعنی مش شایف ان الواحد حا ینزنق لها قوی .

زيهم : وفيه حاجه تانيه .

سيد : حاجة إيه كإن ؟

زينهم : شكلك ، وقيافتك .. وريني كسمك .. اعدل الكرافته شويه .. والطربوش ميله لقدام شويه .. أصل هوا دقيق قوى في حكاية الملابس دى ، دايما يحب القيافه والجفلطه .

ر تسمع عطسة من داخل حجرة النوم فيقفز زينهم من محله ويفتح الباب الزجاجي ويدخل عبد الصبور وقد شمر الجلباب ووضع ذيله في عبه وشمر أرجل السروال ولبس القبقاب ذو الجلاجل والطرطور وحمل في يده كتابا ضخما وفي الأخرى علبة النشوق ووراءه سنيه تحمل القروانه بالماء الساخن).

المشهد الثامن

سيد : الحقيقه باين عليه يحب القيافه قوى .

عبد الصبور: (یصوخ فی زینهم) یا لطیف یا مغیث .. برضه واقف بسوشك عربان .. اخرج بره یا خسیس .. دم لما یلهفك .. دم لما یلحس بك قعره .. عایز اتجوز .. آدی اللی انت فالح فیه .. تتجوز بوشك العكر ده . تودی نفسك من ربنا فین ؟.. یا حیوان یا حلوف (یخرج زینهم ویدو كأن القول موجه إلی سید افندی فیز داد خجله وارتباكه) آل یتجوز آل . یاخی جاك جنازه .. جاك مصیبه .. جاك و كسه .. جاك نیله حزم .

سيد : (النفسه) لا .. دى مش حاله دى .

عبد الصبور: آل جواز آل. هي الدنيا ناقصه مصايب (يلتفت إلى سيد). وانت إيه ؟

سنيه: دا الضيف يا سيدى . جارنا سي السيد افتدى بنجر .

سيد : ما بنجرش ولا حاجه .. بنجر ما فيش .. خلاص راح ، عليسه العوض .

عبد الصبور: (باهمئزاز) بنجر .. انت بنجر .. اسمك بنجر ؟ بنسى آدم اسمه بنجر ؟ أمال البنجر الحقيقي يسموه ايه !! على ؟ والخيار يسموه عمد ؟

ميد : قلنا مش بنجر . . انا مش بنجر . . يا سيدنا أنا سيد ، سيد بس ، سيد حاف ، متبرى من البنجر .

عبد الصبور: وتتبرى منه ليه .. بينك وبينه إيه ؟

سيد : علاقات مش و لا بد ، من نوع العلاقات اللي بينك وبين الكرنب المحشى و الترماى نمره ه ، وراس العبد ، ما فيش استلطاف أبدا كده لله في لله .

(يجلس عبد الصبور وتضع سنية القروانة أمامه ويضع قدميه في الماء وتأخذ سنيه في تدليكهما) .

عبد الصبور: اقعد يا سي سيد افندى . يا عدو البنجر . اقعد . اتفضل (يمد يده بعلبة النشوق) تاخد تنشيقه ؟

سيد : متشكر ما بتعاطهوش ؟

عبد الصبور : علشان إيه ما بتتعاطهوش ؟

سيد : والله ما جربتوش .

عبد الصبور: وليه ما بتجربوش. يخسّ عليك إيه! مش ممكن تلاقيه كويس وتقعد نادم على العمر اللي ضيعته دا كله من غير نشوق ؟

سيد : والله ما افتكرشي .

عبد الصبور : (بغضب) يعني إيه ما تفتكرش ؟ انت باين عليك مقاوح !

سید : (یستدرك نادما) أبدا أبدا ، أنا بس مناخیری تعبانه شویه .

عبد الصبور: أهو دا اللي يسلكها لك ويفوقك ويجلى راسك. أهو دا الحاجه الوحيده اللي تعدلك. كان لازم انت تقول لى هات تنشيئه ، انت مش صغير عشان اوريك مصلحة نفسك ، وانا مش ولى أمرك. انت راجل كيير.

عبد الصبور : (ينظر إلى العلبة فاحصا ويقلب شفته السفل) مفيش ، متأسف . اللى فاضل يدوبك تنشئتين ليه . طلبك متأخر . ما لكش في الطيب نصيب .

سيد : معلهش ، معلهش ، حصل خير . (بعبوت منخفض) ربنا ستر .

عبد الصبور: (يعيد النظر في العلبة) والا اقول لك .. تقدر تاخد لك تنشيئه .. بس صغيره ، ما تكترش .. خدى يا سنيه و دى له العلبه .

(سید افندی یتناول العلبة خاتفا ویأخذ تنشیقة فتصیبه نوبة عطس مزعجة)

عبد الصبور : عضمك طرى . لسه بدرى عليك ، دى حاجه عايزه تمرين . مش كل واحد يقدر عليها .

المشهد التاسع

(یدخل زینهم و هو مرتدیا (لوجه و محاملا بین یدیه صینیة عملیها
 کوبتین بهما مشروب أحمر اللون ویتقدم إلی سید افندی) .

سيد : (مندهشا ومذعورا) إيه ده بسم الله الرحمن الرحيم ! إنت إنس والا جن ؟

زينهم: لا إنس ولا جن .. أنا زينهم .. اتفضل اشرب .

سيد : (هستغرقا في الصحك) زينهم ، ومالك عامل كده ليه في نفسك ؟ يا سلام يا زينهم .. دا انت بقيت زينهم حقيقي ، أهو كده الجمال .

زینهم : اشرب یا سید افندی . اشرب بلاش نقوره .

(يشرب سيد افتدى الكوب مستمتعا مستطعما ويمص شفتيه في لذة) .

سيد : يا سلام . حاجه حلوه . بديعه .

(يتقدم زينهم بالكوب الآخر إلى عبد الصبور فيأخذه ويرفعه إلى فمه ولا يكاد يتناول منه رشفة حتى يقفز من مكانه ملسوعا وهو يتأوه وينفخ) .

عبد الصبور: إيه ده؟. دى مية نار ؟!!

زينهم : . . مية دقه .

عبد الصبور: مية إيه ؟

زينهم : دقه.

عبد الصبور: دقه ؟.

زينهم : أيوه مية دقه . عمرك ما سمعت على مية الدقه .

عبد الصبور : وايه اللي يخليك تقدم مية الدقه للضيوف . يا حلـوف ؛ يما ابسن الحلوف .. اتجنت .1

زینهم : اتجننت لیه ، وانا مالی . أنا عبد مأمور . . یقولوا لی هات میة دقه ، اجیب میة دقه . . هات سم هاری اجیب سم هاری ، وانا مالی .

عبد الصبور: سم لما يهرى جوفك. انا لازم اشوف قصدك إيه. انا لازم اكشف نواياك الإجرامية. انا لازم اوديك في داهيه. مين الحيوان اللي أمرك عمرة جوفنا بمية الدقه ؟

زينهم : الحيوان اللي بتسأل عنه قاعد جنبك لزق . هوا سيد افندى .. هوا الضيف بتاعك .

عبد الصبور: هوا اللي طلب منك مية الدقه (إلى سيد) انت اللي طلبت ميسة) (أم رتيبة)

الدقه .. يا اخينا ؟

سید : أیوه اتا ، أصل كان فیه حرقان على قلبى ، وخلاص راح ، والحمد لله .. الحقیقة نوع ممتاز .. نوع إكسترا .

عبد الصبور : إيه هوا اللي ممتاز أو إيه هوا اللي اكسترا ! النار الآيده دى .. فيها ممتاز وفيها إكسترا ؟. ليه . هوا انت من زباين جهنم والا من صبيان إبليس . وإذا كنت انت عندك حرقان بتطفيه بمية النار دى . أنا ذنبي إيه ! اسمع وحياة والدك ياسي سيد افندى ، اذا كنت ناوى تيجى هنا تانى ، وناوى تحس بحرقان على قلبك ، ابقى اشرب مية اللهاليب دى بره . مفهوم ؟

سيد : على العموم الحرقان دا ما بيجيلش كتير .

. عبد الصبور : كتير والاقليل ، المهم تضيعه قبل ما تيجي . فاهم ؟

سيد : حاضر ، من عنيه يا سي عبد الصبور ولا يكون عندك فكر من نواحي مية الدقه ، مع إنك لو اخدت عليها مش حا تسلاها أبدا ، زي النشوق تمام ، تروق المخ وتسلك الزور .

عبد الصبور: إيه دايا أخى الكلام الفارغ ده . حديقول مية الدقه زى النشوق ، دى دقه ودى دقه .

سید : أیوه برضك معالث حق .. إیش جاب دی لدی ، أنا غلطان خالص ، غلطان خالص ، غلطان قوی .

عبد الصبور : معلهش حصل خير ، انت شرفتنا يا سي ..

سيد 💎 : (مقاطعا) سيد ، محسوبك سيد .

عبد الصبور : سيد إيه ؟

سيد : اللي يعجبك ، اللي يبجي على مزاجك ، أنا سايبها مفتوحه .

عبد الصبور: يعني إيه . ما نيش فاهم ، السيد والدك ما لوش إسم ؟

سيد : أبدًا . نزل كده ، من غير إسم . ما رضيوش يسموه ، لغاية ما تسميه انت الإسم اللي يريحك !!

عبد الصبور: انا اسمّى أبوك ؟ وهوه انا فاضى عشان بسلامته أبوك يقعد لى خمسين سنه من غير إسم .. ويبجى دلوقت عشان اسميه .. أنا فاضى للهيافات دى ؟. أنا ورايا حاجات كتيره أهم من كده .

سید : علی العموم .. ما تتعبش نفسك ، دی حاجه مش مستعجله .. أنا كفایه علی سید بس .. سید حاف ، أهی حاجه مأمونه وما منهاش ضرر .. واللی خلاه یقعد خمسین سنه من غیر اسم . یقعد ...

عبد الصبور: (مقاطعاً) طيب .. طيب .. فضينا بقى من حكاية إسمك دى .. لنت شرفتنا .

سيد : الله يشرف مقدارك .

عبد الصبور: فيه حاجه اقدر اعملها لك ؟ عايز مشوره في علم الروح ؟ عايز تحضر . جلسه .. عايز ...

سید : (مقاطعا) لا . لا . أبدا . . كتر ألف خيرك . أنا مش عايز حاجه من دى أبدا . . أنا كنت عايز . اقول . اقول . أصلى كنت عايز اقول . . .

عبد الصبور : تقول ایه ؟ اتفضل . وقول وخلصنی یا سی سید وحیاة ابوك اللی ما یتسماشی .

سید : أنا أصلی كنت عایز اقول ، أنا طول عمری . عایش كده عازب . ووحدانی ..

عبد الصبور : (مقاطعا في حدة) خير ما عملت ، عين العقل . ربنا يديمها عليك نعمه .

سيد : لكن أنا شايف العمر بيفوت والحياه بتنقضى والشيب مـــلا راس الواحد ، والعجز دب في مفاصله .

عبد الصبور: شيء لا بد منه وبكره كان تشيب اكتر وتعجز اكتر، الزمن بيدوب الحجر مش عايز يدوب البني آدم، لازم تشيب، ولازم تعجز. هي دى حاجه غريبه!

سيد : لا مش غربيه ، بس الغربيه ان الواحد كده يخرج من الدنيا ، صفر

اليدين .

عبد الصبور: وهوا فيه واحديا أخينا ما بيخر حش منها صفر اليدين ، الدنيا عامله زى البلد الموبوءه ، وباب الآخره زى باب الحجر الصحى . لازم يجردوك فيه من كل حاجه ، لازم تخرج من الدنيا زى ما دخلت فيها ، صفر اليدين والرجلين والراس والعينين ، ما نتاش شايل معاك غير ذنوبك ، دى الحاجه الوحيده اللي ما تقدرش تسيبها .

سید : مفهوم ، مفهوم ، یا سی عبد الصبور .. لکن الواحد برضه ، لازم یکمل تص دینه .

عبد الصبور: نص دین إیه یا خویه الی طالعین لی فیه ، هوا نص الدین ما یکملشی الا بالجواز ؟ دا لو کان عندل نص دین ، الجواز حا یطیره . الجواز اللی انتوا فاکرین انه یکمل نص دین یضیع دین بحاله . . دا یکفر بلد ، إنتم ایه ! مغفلین ، مهافیف ، ملاحیس ؟ ومع کلا ، أنا مالی انا ومال نص دینك ، تکمله ما تکملوش ، أنا ما لیش دعوه ، دی حاجات متخصنیش .

سيد : لا ، من جهة الاختصاص ، ما فيش حد مختص غيرك ، إنت لوحدك جهة الاختصاص المسئولة عن تكملة ديني .

عبد الصبور: يعني إيه .. ما نيش فاهم ؟

سید : یعنی نص دینی موجود عندك هنا . معاك . . إنت المتحكم فیه ، إنت الآمر الناهی فیه ، أرجوك رده لی ، رد لی نص دینی ، ینوبك ثواب فی .

عبد الصبور: إنت إيه يا جدع انت ؟ انت مجنون ؟ اختصاصي إيه ؟ ودين إيه ؟ إحتا هنا مش مشيخة الازهر . . ارجوك قول لي قصدك إيه ؟

سيد : قسدى اتجوز .

عبد الصبور: يامغيث يالطيف . أنا اصطبحت بوش مين النهارده ؟ كل ما اقابل حد يقول لى عاوز اتجوز، ما فيش غير زينهم الكلب، هوا صبحنى بوشه ، اللي زى القطران ، اسمع يا سى سيد افندى . انا عايز اعرف ، إذا كان انت بعد طول العمر اللي ضيعته في هنا وراحه اتخبطت في راسك وعايز تتجوز ، تقدر تقولي لى انا ذنبي إيه تعكنن مزاجي وتضيع وقتى في المسألة البايخه دى ال إنت عايز تتجوز ، وانا مالى ؟

سيد : أصلى عايز اتجوز ـ اتجوز ...

عبد الصبور : (في حدة) تتجوز إيه .. انطق ؟ فلقتني ؟

سيد : عايز اتجوز أم رتيبه ·

عبد الصبور: بتقول إيه ؟ أم إيه ؟ إنت لازم مجنون . أنا نظرتى ما تخيبش أبدا . من ساعة ما شفتك وشفت عينيك المبحلقه وراسك المبططه ووشك المناويشي قلت الراجل ده مجنون .

سيد : ليه بس يا سي عبد الصبور ؟ مجنون ليه ؟ عشان جي اخطب الست المصونة أختك . عشان جاى اتشرف بقربك . هما برضه الناس يعملوا في جيرانهم كده ! النبي داوصا على سابع جار .

عبد الصبور: النبى حريوصى زى ما هو عايز .. على سابع جار .. على تامن جار ..
إن شا الله على عاشر جار . لكن انا ما احبش الكلام في موضوع الجواز
ده أبدا ، خلاص ، انتهينا .

سید : طیب بس حلمك على . خدودی معایا شویه , اسمع كلامی كله يمكن تقتنع .

عبد الصبور: ولزومه إيه ! وعشان إيه ؟. إنت تبقى مين علشان اضبع وقتى الثمين معاك في كلام مالوش فايده ؟

سید : أبوه .. كده تعجبنى .. قلت لى تبقى مين .. أنا محسوبك سید .. باشخبیر فنى معمل شبرا .

عبد الصبور : باش لميه ؟

سيد : باشخبير .. يعني كبير الخبراء .

عبد الصبور: طيب يا أنعى مش تفهمني كده من الصبح أنا فاهم انك راجل ، على

أدك . فاهم انك حمار . من ضمن الحمير اللى ماليا البلد ، ما عنديش أقل فكره عن انك راجل خبير ، فنى ، بتفهم . يا سلام . . ليه تسيبنى كده على عماى يا سى سيد يا باشخبير . وحضرتك درست فين ؟ اكتسبت الخبره الفنيه بتاعتك دى فنين ؟ من أنهى جامعه ؟

سيد : أنا ما در ستش في جامعات ، خبرتي موهبه إللهيه من عند ربنا .

عبد الصبور: ما شاء الله ، ما شاء الله . بعني خبير بالفطره ، يعني عبقري !

سيد : بالظبط .

عبد الصبور: يا سلام ، أنا من زمان وانا عايز اشوف واحد عبقرى ، أصل انا كان عبد الصبور: عبقرى ، ودايما العبقرى يحب العبقرى .

سيد: مظبوط، مظبوط.

عبد الصبور: وحضرتك خبير فني في إيه ؟

سيد : خير في الذوق .

عبد الصبور : فني في إيه ؟

ميد : ف اللوق (ويخرج لسانه) عندى لسان ، ما يخطيش ابدا ، ما ينزلش الأرض .

عبد الصبور : وهوا فيه لسان ينزل الأرض يا سي سيد يا باشخبير ، غير لسان الكلاب ، لكن أنا برضه ما نيش فاهم . حضرتك خبير باللسان ؟

سيد : مظبوط ، أدوق باللسان وحكمي لا يعلي عليه .

عبد الصبور: وحضرتك بتدوق ايه ؟ إيه المواد الرفيعه اللي بتحتاج لدّوقك الحكيم ؟

سيد : كل الأصناف .

عبد الصبور: ما نيش فاهم ، يعنى مثلا بتدوق الشربات النايلون . بتدوق الخرسانه المسلحه ؟

سيد : لا . لا . مختص بس في صنف الحادق . صنف المخلل .

عبد الصبور: يعنى حضرتك باشخبير فني في الطرشي ؟

سيد : تمام . مظبوط .

عبد الصبور: باشخبير فنى فى الطرشى ؟ ياخى دم لما يلهفك .. باشخبير طرشى ، وجى تناسبنى ، ليه قالوا لك على وقيع ، هفيه . قليل الأصل .. خلاص ، هى ضاقت على الدنيا ، ما لقيتش غير انت اللى اناسبك ! ليه اتجنت ، اتخبط فى عقلى ، أنا ادخل بيتى باشخبير طرشى ، وانا ما طيقش طعم الطرشى ، دنا لما بشوف دكان طرشى من بعيد بيغمى على ، دا انا بينى وبين الطرشجيه تار بايت وعداوه متأصله .. أقوم آجى على آخر الزمن ، أناسب باشخبير طرشى ! أنا اللى محرم عليهم ما يدخلوش فى البيت حتة لفت اقوم ادخل برميل طرشى متحرك !

سید : طیب بس حلمك شویه یا سی عبد الصبور .. ما تتحمقش كده ، هدی نفسك و خلینا نتفاهم .

عبد الصبور: نتفاهم على إيه ! وهي دي حاجه عايزه تفاهم ! أنا والطرشي عدّوان لدودان ، يبقى نتفاهم على إيه ؟ المسأله مالهاش الاحل واحد .

سيد : (بلهفة) إيه هوه ! ألحقني بيه .

عبد الصبور : إنك تقلب .

سيد : أقلب ؟

عبد الصبور: أيوه تقلب .

سيد : أقلب ازاى مانيش فأهم ؟

عبد الصبور: زى الناس .. يعنى بدل ما انت باشخبير فنى طرشى .. تبقى باشخبير فنى ، حلاوه طحينيه مثلا .. أو باشخبير فنى غزل البنات ، أو باشخبير فنى براغيت الست أو باشخبير فنى حلاوة زمان .

سيد : حلاوة زمان ؟

عبد الصبور: ايوه حلاوة زمان ، مانتاش عارفها !! الحلاوه اللي يلفوها على حتة خشبه طويله في آخرها كوز زى الشخشيخة والراجل يشد فيها ويمط ، ويعمل لك حصان وعروسه زى ما انت عايز ..؟

سيد : أنَّا ابقى باشخبير فنى حلاوة زمان ؟

عبد الصبور: فيها إيه !. يعنى مش احسن ما تبقى باشخبير فنى فلفل .. أقل ما فيها تبقى عبير في حاجه حلوه .. ما تحرقشى .. ما تشويش .. مش خبير لهاليب .

سيد: لكن دى ...

عبد الصبور: (مقاطعا) ما لكنش ولا حاجه ، انا بحب غزل البنات ، وبراغيت الست ، والحلاوه الطحينيه ، حلاوة زمان ..

يد : أنا ما قولتش حاجه حب اللي تحبه بس انا ما قدرش بعد خمسه واربعين سنه خبره في الطرشي ، اقلب في آخر الزمان ، وابقي خبير حلاوة زمان ، والاحتى حلاوة دلوقت . دى حاجه ما تعقلش ، دى تمام زى ما تقول للفسخاني اللي طول عمره فسخالي .. تعالى بيسع روايح عطريه ، يموت منك ، الربحه اللي انت فاكرها كويسه تأثسر على نخاشيشه اللي واخذه على ربحة الفسيخ تموته . والا مثلا زى لما تاخد الفحام ، اللي قاعد طول عمره زى حتة الهبابه ، وتقول له اشتغل في حمام ، يدوب منك ، يبوش في الميه زى فص الملح ، الوساخه اللي على جته اللي هني حلت محل اللحم تنزل ويسيح وما يبقاش فيه حاجه .

عبد الصبور: فحام ، حمامي ، فسخاني ، دا كله ما يهمنيش كلمه واحده ما فيش غيرها ، انا ما احبش صنف الطرشي أبدا ، جلاوه معلهش ، عندك جميع أصناف الحلويات ، كلها مقبول ، أنا ما بدقش إن شا الله تبقى خييز في المصاصه ، كله ينفع .

سيد : يا سي غبد الصبور الله لا بسيئك .

عبد الصبور : (في حدة) خلاص انتهينا .

سيد : (ثائوا) هوا إيه اصله ده ! دا استبداد ، دا ظلم . دا تحكم !

عبد الصبور: تحكم مش تحكم ، أنا قلت كلمتي خلاص ما فيش غيرها .

سيد : ده حرام ، اتقى الله يا شيخ . دا ربنا ما يرضاش بكنه أبدا .

عبد الصبور : إذا كان ما يرضاش ، خليه يجوزها لك أهي قدامه ، لكن انا مش حا

جوزها لك أبدا .

سید : ده جبر . . دی قسوه . . دا انت ربنا مش حا یوریك نصفه .

عبد الصبور : مشمهم ، النصفه اللي عنده .. ابقي خدها انت .

سید : روح یا شیخ ، ربنا یرزقك بحلة کرنب محشی .

عبد الصبور: (في فزع) آي .. اعرج بره .

سيد : والابمفتش نمره ه يكبس على أنفاسك .

عبد الصبور : الحقوني يا هوه .

ميد: والابراس عبد تطب على نفوخك.

عبد الصبور: جاى يا عالم .

سيد : (مستموا) زكيه الملدنه ، سنيه القرعه ، أبو على الاحول ، كسبة زيت حار ، أبو قردان ، سمك بكلاه .

عبد الصبور : جاى . جاى . الحقونى .. ابعدوا المجرم ده .. اخرج بره يا مجرم (يتشنج ويغمى عليه) .

(سيد يهرول هاربا إلى الحارج . تدخل أم رتيبه والحدم وراءها) .

أُم رتيبة : فيه إيه إجرا إيه كفا الله الشر ؟

سيد : (وهو بهرول إلى الحارج) آل باشخبير حلاوه طحينيه آل .. دا انا حتى ابقى قليل الأصل ، بعد العمر اللى قضيته مع الطرشي .. أنضم ف الآخر .. لمعسكر الأعداء . دى تبقى خيانة ، دى تبقى نداله .. آل إيه باشخبير مصاصه ، أصلها هزلت .. حد الله ببنى وبينكم .

أم رتيبه منهمكة في تفويق عبد الصبور ، وزينهم يهجم عليه بكوب
 ماء ويضربه في وجهه) .

عبد الصبور : المجرم . ابعدوه . باشخبير الطرشي المولع . إوعوا تدخلوه بيتي . آل كرنب محشى ، وراس عبد ، السافل المجرم .

سنية : سلامتك يا سيدي ألف سلامه ، روق دمك ما عاش اللي يزعلك .

زينهم : شفت .. عشان ما تبقاش تعايب على وشي .. اللي ما يرضي بالخوخ

يرضى بشرابه ، اهو جالك اللي جابلك الكافيه (يغادر الحجرة) .

المشهد العاشر

أم رتيبة : إيه يا خويا !. جرى إيه بس فهمني ؟. إيه بس اللي لهلبها كده ؟

عبد الصبور: باشخبير الطرشي، الدون، المنحط، ما يعتبش بيتي أبدا.

أم رتيبة : بس اهدى يا خويا ، وقول لي إيه اللي جرى ؟

عبد الصبور : آل عايز يتجوزك آل !

أم رتيبة : ودي فيها حاجه نزعل ، دي حاجه نشرح حاجه تبسط .

عبد الصبور: دا باشخبير طرشي ؟

أم رتيبة : وفيها إيه!

عبد الصبور: طرشي حراق ؟

أم رتيبة : حراق والامش حراق ، هوه قال لك تعال دوق بدالي ؟

عبد الصبور : خلاص ، أناً قلت كلمه واحده .. أنا ما حبش لا الطرشي ولا ريحة

الطرشي ولا سيرة الطرشي قلت كلمه واحده وانتهينا.

أم رتيبة : يا ميلة بختك يا ام رتيبه (تنهنه) .

سنية : معلهش ياست . ما تزعليش ياست .

عبد الصبور : بس خلاص ، بلاش عياط . اقعدى قدامي هنا . لما اقول لك على المهمه الكيرى . أنا حاسس ان وقتها جه . اقعدى قدامي ، وفتحي

ودانك كويس ، أنا نازل على الإلهام ، والوحى بيقوللي عشان استعد

من دلوقت وافهمك كل حاجه .

أم رتيبة : يا خويا سيبني في حالى . كفايه ميلة البخت اللي انت جايبهالى ، مهمه

كبرى إيه ؟ و سخام إيه ؟ و هباب إيه ؟.

عبد الصبور : اقعدى يعنى اقعدى ، دا مش وقت أخد وعطا .. الوقت ضيق ..

اقعدى وفتحى ودانك .. واسمعى كويس الكلام اللي حا قولهولك

ده .

(تجلس أم رتيبه أمامه وهي تتنهد يائسة) .

أم رتيبة : يارب .. توب على بقى م الغلب ده .

سنية : (تجلس على الأرض) معلهش يا ست . استحملي يا ست .

عبد الصبور: خدى بالك كويس م اللي حا قولهولك، فتحمى ودانك خسالص وحضرى ذهنك، ما تخلهش بتشتت لا هنا ولا هنا .. أنا عارف انك غبيه، لكن حاولي انك تفهمي ..

أم رتيبة : يا خويا قول ، علتني .

عبد الصبور: بقى انا عايز اعقد اتفاق بيني وبينك.

أم رتيبة : اتفاق ؟

عبد الصبور: ايوه .. اتفاق .

أم رتيبة : بيني أَنَا ، وبينك انت ؟

عبد الصبور : أيوه ، اتفاق بيني أنا وبينك انتي ، حاجه غربيه ؟.

أم زتيبة : أبدا . هوا فيه حاجه منك غريبه ، بس إيه المناسبه ، تعمل اتفاق بينى وبينك .. ليه ! وعلى إيه ؟

عبد الصبور : أيوه . قلتى لى ليه ، وعلى إيه ! بقى يا ام رتيبه يا عنى أنا حاسس ان الأجل قريب.

سنية : بعد الشريا سيدى .

أم رتيبة : بقى اسمع يا عبد الصبور يا خويا ، إذا كنت بتقعدنى عشان تقول لى الكلام الفارغ ده . أنا مش فاضيالك انت بقالك عشر سنين وانت تقول انك حاسس ان أجلك قرب واديك قاعدزى قرد قطع ، لابيك ولا عليك .

عبد الصبور: لا ، المره دي حاسس انه قرب قوي .

أم رتيبة : قرب والا ما قربش ، اللي انت عايزه ايه ؟

عبد الصبور: عايز نعمل اتفاق مع بعض ان اللي يموت قبل التاني ينزل يقول له شاف

إيد فوق .

أم رتيبة : هوا إيه أصله التخريف ده ؟

عبد الصبور: معلهش ، واحده ، واحده ، أنا عارف انك غبيه ، ولازم افهمك حته ، حته ، بقى يا ام رتيبه يا اختى . . الواحد منا لما يموت . . روحه بتطلع في السما وجتنة بتفضل في الأرض تعفن وتتاكل و تدوب . يعنى لما انت تموتى مش حا يفضل منك غير روحك .

أم رتيبة : يا باي على كلامك اللي زي الضرب.

عبد الصبور: فروحك وبقية الأرواح بتطلع في السما وتبقى عايشه في عالم كبير خالص أكبر من العالم اللي احنا عايشين فيه ده وتبقى مقسمه لدرجات ، واحنا دلوقت بنقدر نستدعى بعض الأرواح ، وتتكلم معاها ، إما بطريقة الكتابه والإشاره ، أو بالصوت ، يعنى الروح تحتل جسم بنى آدم اسمه الوسيط .. أو في الأحيان النادره تتجسد الروح ، فأنا عايز اللي يموت منا قبل التاني ، يبقى يتجسد وينزل ويتفاهم معاه ويديله المعلومات اللي يعرفها عن عالم الأرواح .

أم رتيبة : اسمع ياخويه يا عبد الصبور ، بلاش الكلام ده انت لبشت جتتى ، أنا لا اقدر لا انزل ولا اطلع عافينى ياخويه م الاتفاق ده . . أنا لما اموت حاستكن في تربتي لا حاهوب لا هنا ولا هنا . كل اللي انا عايزاه انكم تبقوا تزرعوا على تربتي صباره ولبلابه . . حاكم انا احب اللبلاب .

عبد الصبور : لبلابة إيه وبتاع إيه . إيه الكلام الفارغ اللي انتي بتقوليه ده .. إنت مش حاتبقي في التربه . إنتي حاتبقي هايمه في السما ولازم تنزلي .

أم رتيبة : ما نزلش ولا روحش ولا جي . بلا قلبة دماغ ، هوا انت ورايا في الحيا وفي الموت .

عبد الصبور: عنك ما جيتي ، انت اصلك راسك ناشفة . على العموم انا متأكد ان أنا اللي حاموت قبلك . لأن حاسس ان أجلى قرب خالص ، يعني يمكن أموت الليله دى . سنية : يوه يا سيدى . . تف من بقل سبع تفات .

عبد الصبور: لا سبع تفات ولا تمانيه. الواحد لما قضاه بييجي، ما ينفع في رده حاجه. على العموم أنا مش زعلان ان انا حاموت لأن دى مسألة مفروغ منها. لانا أول اللي حا يموتوا ولا آخر اللي حا يموتوا. الحياة قنطره، أو نفق، والزمن دا زى القطر الاكسبريس. الروح تركب فيه شويه لغاية ما تعدى من ناحيه للناحيه التانيه، عمر الاكسبريس ما كسكس ولا هدى ولا وقف. يعنى واصلين للنهاية عزنا والا ما عزناش. كل حاجه في الدنيا بتحلص، اشمعنا احنا اللي مش عايزين نخلص. أنا حاموت ومش زعلان اللي انا حاموت، انا مش خايف من الموت، لكن اللي أنا خايف منه، ان انا اروح كده هدر، زى كل الحمير اللي ما توا قبلي. أنا عايز استغل موتي، عايز اعمل حاجه ما عملهاش حد قبلي من عايز ارجع تالى ، عايز اموت وارجع ، أروح وآجي .

أم رتيبة : (تضرب بيدها على صدرها) يا مصيبتي !

عبد الصبور : مالك كده .. بتضربى على صدرك ، زى المخابيل . خضئينى . يا مصيبتك لبه ؟ عشان حا موت ؟

أم رتيبة : لا .. عشان حا ترجع . موتك حقيقي مصيبه . لكن رجوعك مصيبه أكثر . عايز تموت ويرجع عفريتك ينط لنا كل شوية ، يا لطيف . يا لطيف . يا لطيف . ودى مين تستحمل الغلب ده .. اللي ماحنا طايقينك وانت بني آدم .. نطيقك وانت عفريت ؟.

عبد الصبور: برضه الوليه بتقول عفريت، افهمى يا غ راكب. يا بجم. أنا مش حارجع عفريت. انا حارجع زى ما انا كده. حا ارجع روح مجسده، زى ما انت شايفانى تمام، يس أكون بقى عرفت كل حاجه، أكون كشفت الستار وهتكت الحجاب، ونورت العتمه اللي بتخبى العالم الواسع.. أكون لفيت في السما شوية، واطلعت على المستخبسي، وعرفت الأسرار المخفيه، وعرفت تركيب السموات ووضع الكون،

وجليت سر الموت ، والروح .. كل ده اللي حمار فيه الفلاسف و العلماء . بشوية لف في السما ، حا عرفه ، وبعدين حارجع لكوا ، واكشف لكوا المستتر .

أم رتيبة : يعني حا تعرف مثلا .. انا حا تجوز إمتى ؟

عبد الصبور: انتى جنسك إيه ؟ مخلوقه من إيه ؟ أقول لك أسرار الكون، والعالم المجهول .. تقوليلي حا تجوز إمتى ؟ يا بجحه يا ام عين فارغه ؟. إيش يكون جوازك، في المهمات الكبرى اللي حا تكون ورايا .. إنتى فاكراني حاشتغل في السما خاطبه ؟. إنت فاكراني حاكون فاضى للكلام الفارغ بتاعك ده ؟ ثم انت مالك ملهوفه على الجواز كده ؟.. أنا قلت لك انك مش حا تتجوزى يعنى مش حا تتجوزى لا وانا حى ولا وانا ميت .. مبسوطه .

أم رتيبة : يا باى على ملافظك اللى تسد النفس . . طيب عرفنا وانت حى مشحا تجوز ، طيب و لما تموت . . يبقى شأنك إيه بقى فى جوازى ؟ هوا انا حافضل مربوطه لك كده حى وميت ؟ حافضل متسنسله فيك ؟ . حقه دى مصيبه وطبلت على دماغى .

عبد الصبور: اللي حاصل. قسمتك كده، بختك كده. المهم خلينا في اللي احنا فيه، بلاش السفاسف دى، خلينا في الحاجه المهمة، بقى انا قلت لك ان انا لما أموت حاضرب بلطه في السما و أبرم فيها برمتين، و أرجع.

أم رتيبة : ترجع ازاي بس ياخويا ؟

عبد الصبور: أيوه .. كده عجبتينى ، قولتيلى حا ترجع ازاى ، بقى احنا دلوقت بنقدر نستدعى الروح اللى احنا عايزينها وبتتفاهم معانا وتقول لناعلى اللى احنا عايزينه يا إما بواسطة الإشاره .. أو بواسطة الصوت ، عن طريق وسيط شاطر ، فأنا دلوقت حاطلع وانا مصمم على الرجوع . بس عايز وسيط اتفاهم معاه على الرجوع ، وسيط يكون بين أرواحنا تجاذب وتفاهم ، وما افتكرش فيه تفاهم وتجاذب بين روحى وروح تانيه أكتر من روحك ، حقيقى روحك غبيه وحماره ، وروحى زكيه

وراسيه وعاقله .. لكن دا ما يمنعش التجاذب والتوافق اللي بينهم .. إنتي أقرب الناس وأحبهم لى ، رغم السخافه اللي أنت فيها ، واحنا الاتنين بقالنا خمسه وأربعين سنه مافارقناش بعض ، وعمر روحي ما تطمن وعدى الالروحك ، وعشان كده حا خليكي الوسيط .. اللي حانزل بواسطته .

أم رتيبة : (تتنهد بيأس) ولا انا فاهمه حاجه ؟ وسيط إيه وتوافق إيه ؟ وكلام فارغ ايه ؟

عبد الصبور : عارف .. عارف انك مش حا تفهمى حاجه أبدا .. لكن اصبرى على لغاية ما فهمك كل اللي انا عايزه منك . أنا مش حاطلب منك حاجه اكتر من طاقتك . إنت حا يكون دورك بسيط خالص ، وانا حا يكون على على على كل الحمل .. اللي انا عايزه منك .. انك تستعدى لاستقبالي في يوم معين .. في ساعة معينه ، ويكون اليوم دا يوم الاربعين في نص الليل مثلا .

أم رتيبة : (تهز رأسها أسفا)قصدك تقول انك حا تموت وترجع في يسوم الاربعين .. يعني حا ترجع تاخد بخاطرنا ؟

عبد الصبور: لا .. بس الفكره انكم تدونى وقت عشان الف شوية فوق ، أنا مش عايز ابقى مكروش ، وأظن اربعين يوم مش كتير علشان جوله ف السما .. يمكن احب اروح هنا والا اروح هنا ، حد من الأهسل يعرفنى .. يعمل حفلة تكريم بمناسبة صعودى للسما .. برضه الواحد لازم يعمل حسابه على المشاوير اللي زى دى .

أم رتيبة : (في سخرية) أيوه برضك لازم تعمل حسابك .

عبد الصبور: المهم ان احنا نتفق مع بعض من دلوقت. عايزك تستنى ليلة الاربعين الساعة ١٢ بالليل، ونهيئ الجو الملائم لاستقبالي. يعنى تقعدى لوحدك في أو دتى في صمت وسكون .. لا حس ولا حركه، وعايز كل حاجه في الأوده تبقى زى ما هي .. كل حاجاتي تبقى حاضره،

الطرطور بتاعي والعبايه وعلبة النشوق ، والطشت والابريق والميه السخنه ، والكتب اللي على الرف ، وما تنسيش القبقاب أبو جناجل .

أم رتيبة : حاضر من عيني الاتنين .. مش خلاص بقي ؟ أقوم اشوف شغلي ؟

عبد الصبور : استنى شويه .. مستعجله على إيه ؟ بكره تقعدى لوحمدك لما تشبعي .. فيه حاجه كان عايز اقولها لك .

أم رتيبة : إيه تانى ؟.

عبد الصبور: انا عايز التلامذه بتوعى زى الشيخ جاد والأستاذ زكى والأستاذ عبد محجوب، يكونوا موجودين عشان يشوفوا التجربه وينشروها على العالم .. بس يقعدوا هنا، وما يخشوش الأوده دى إلا لما انزل .. علمان ما يشوشوش علينا . إنت لوحدك بس اللي تستنى في الأودة بتاعتى . أنا أصلى ما عنديش فكره حانزل ازاى ، يمكن أنزل بجتى عريان مثلا ، تبقى عباره قدام الناس الغرب ، عشان كده بقول من باب الاحتياط تحضرى لى غيار .. وانت قاعده مستنيانى . عايزك تركزى ذهنك في ما تخليش حاجه في فكرك غيرى .

أم رئيبة : حاضر ، مش حاحلي في فكرى غيرك .. سيبني بقى .. اعتقنى لوجه الله ..

عبد الصبور: إخص عليكي يا خاينه .. بعد العشرة الطويله ، اقول لك انا حا موت الله دى .. تقوليلي سيبني بقي اعتقني لوجه الله !

أم رتيبة : ياخويا أصل انا شبعت من موتك ده .. بقى لك اتناشر سنه وانت تقول انك حاتموت .

عبد الصبور: (في تأثر) لا .. المره دي يظهر انه جد ، صحيح ، مش هزار .

أم رتيبة : (يبدو عليها الفزع) يا ندامه ! إيه الكلام اللي انت بتقوله ده .. إنت حاسس بحاجه . اجيب لك دكتور ؟.

(تنهض وتضع يدها على جبينه) .

عبد الصبور: ما فيش لزوم للدكتور ، عمر الدكتور ما يمنع الموت .. الا لما يكون

المريض من نفسه ، مش ناوى يموت . لكن انا قلت لكم خلاص ، أنا تاوى اموت . . أنا دلوقت حاقوم ادخل في السرير وارخى الناموسيه ، واذا كنتم تحبوا تقروا الفاتحه على روحى ، ما فيش مانع . يمكن تفيد . (ينهض ويتنجه إلى السرير) .

سنية : (تنهنه) يا عينى عليك يا سيدى ، بعد الشر عنك يا سيدى ، ما كان بدرى عليك يا سيدى .

(يدخل زينهم منزعجا) .

زينهم : فيه إيه ؟ جرا إيه ؟ فيه إيه با بت يا سنبه ؟ كفا الله الشر ؟.

سنية : سيدي عبد الصبور حا يموت .

زينهم : يموت ؟ ها أو ، أنَّا كان أموت في المهلبيه .

(سنيه مستمرة في البكاء) .

أم رتيبة : بس يا بت بلاش كهن وبدع .. إيه المسخره دى ؟. دا بقاله ..
اربعتاشر سنه ناوى يموت .. ما بيموتش .. دا عمر الشقى بقى .

(يصعد عبد الصبور إلى السرير) .

(تقف ام رتيبه وزينهم بجوار السرير .. ويحدقان بأنظارهما إلى عبد الصبور) .

سنیه : (وهی تبکی) ما کانش یومك یا سیدی .. والله حا توحشنا یا سیدی !.

عبد الصبور: نشوف و شكم بخير، حدش لازمه حاجه من فوق، حدش له حبيب عايز يبلغ له السلام.

(يشير بيديه تحية الوداع ويرخى الناموسية) .

يسدل الستار

(أمرتبية)

القصيلاالشالث

المنظر

: نفس منظر الفصل الثاني بعد أربعين يوما ، الساعة تشير إلى الثانية عشرة إلا ثلث ، وحجرة الاستقبال رصت بها مقاعد خيبزران ومنظرها غير مرتب بعد أن انفض المعزون في الأربعين ، الباب الزجاجي المفضى إلى حجرة نوم عبد الصبور مغلق ، يبدو زينهم وقد أمسك بمقشة يد وأخذ يكنس الحجرة ويجمع المقاعد الحيزران في أحد الأركان .

المشهد الأول

زينهم : والله عملتها وخلت يا سي عبد الصبور .. هوا اثا كان داخل عقلي انك حا تموت حقیقی . أربعتاشر سنه على رأى ام رتیبه وانت كل يوم بتقول انك حاسس ان أجلك قرب ، وتصبح زى الحصان . صاغ سلم . يعني اشمعني المره دى اللي صدقت . اشمعني المره دى اللي حليت عنا لازم فيها سر ، لازم محضر لنا مكيده ، لازم مدبر لنا مقلب . إنت مش ممكن تسيبنا كده بالساهل ، مش ممكن تحل عنا كنه الله في الله ... ياما انا خايف لتكون ناوى ترجع حقيقي . . ما انت أصلك ما تستبعدش عليك حاجه أبدا ، أهو كده تبان طيب وعلى نياتك .. لكن في الحقيقة قرم ابن قرم ، مين يعرف يمكن تعملها من دون الأموات ، وتقل عقلك وترجع لنا تاني ، وانت أصلك بنغزه ، وتعملها صحيح . . وتزوغ من عزرائيل زى الحربايه . . أنَّا بقالى خمس سنين معاشرك . ما شفتلكش حاجه كده تفوت زي بقية الخلق حتى موتك ، هي دي موته دي . تفضل ملبشنا كده أربعين يوم ، وكابس على

أنفاسنا و لا كإنك من .. كنا عايزين نشم نفسنا .. كنا عايزين نحس انك مت حقيقي .

(تدخل سنية وقد ارتدت ملابس سوداء) .

سنية : ماتيا الله تشهل شويه يا زينهم .. إنت عمال تحسوك في إيه ؟.

زينهم : مش لما اوضب الأوده ، عشان اللي بيتسمعوا دول يرجعوا يقعدوا تانى ... أنا مش عارف لزومه إيه الأكل في الميتم ؟

سنية : وأكل إيه ! هوا أكل بعقل ! دا انت لو شفت الشيخ جاد وهو هابش ف حتة الفخده اللي فوق الفته تقول دا عمره ما حضر مينم أبدا ، والا الأستاذ محجوب وهوا يبلحس السمن اللي في صوابعه ، وباين عليه الفرحه كده ، زى اللي نفسه كل يوم يكون في مينم .

زينهم : الحق مش عليهم . الحق على اللي سممهم ، ما كانش ضروري نعمل لهم اللي عملناه ده .

سنية : أمال يعنى فكرك كده بيجوا يعزوا مجاناً .. يقعدوا يسمعوا القرآن كده لوجه الله ، على العموم . أهى رحمه ونور على روح المرحوم .

زينهم : مرحوم ؟ أنهى مرحوم ده ؟ هوا ده تنفع فيه رحمه والا نور . دا تلاقيه دلوقت مشاكل طوب السما . تلاقيه مخلاش حد ما تخانقش معاه . أنا متأكد انه وهوا طالع مع عزرائيل خلا عزرائيل ندم على أحده ، وانه لو رجع لنا زى ما بيقول مش حا يكون راجع بكيفه أبدا ، دا يكون راجع مطرود بناء على طلب الأرواح ، حا يكون راجع مضروب تلاتين ألف برطوشه ومكسور وراه أربعين ألف قله . لكن لزومه إيه يرجع ؟ وهوا سابنا لما يرجع لنا . . بذمتك انتى حاسه انه مات ؟.

سنية : أبدا والنبي يا خويا يا زينهم ، أنا متهياً لى انه في كل ساعه قاعد قدامنا ، وكل ما ماجي أخش أو دته ألاقيه مدلدل رجليه في الطشت زي عوايده ، وكل ما بص لطرطوريتهياً لى انه قاعد تحته .

زينهم : إنت برضه كده ؟ دا انا كنت فاكر انا لوحدى . أنا كل ما فكر .. يتهيأ لى

انه هوا ما طلعش لا سما ولا حاجه وانه قاعد تحت الناموسيه زى ما شفناه آخر مره ، وكل ما اسمع عطسه .. تتهيأ لي انها بتاعته .

سنية : وستى ام رتيبه . ألعن وألعن ، متلبشه ومرعوشه وعاملا له حساب زى ما يكون حى .. أصل حكاية رجوعه تانى مخلياها زى الفرخة الدايخه .. مش مصدقه أبدا انه خلاص مات ، وانها حره تعمل اللي هي عايزاه . حاسه انه زى ما يكون في سفر وراجع ، وانه لسه بارك على أنفاسنا .

زينهم : على العموم .. كلها نص ساعه ، وننتهى .. والمسأله تفوت بالطول والا بالعرض ، واذا كان ناوى ينزل حقيقى .. أهو ينزل له شويه من نفسه و يعل عنا ما يورناش خلقته بعد كده أبدا .. نص ساعه ، ونبقى أحرار .. نص ساعه و نخلص منه خالص ، ونقطع دابره من هنا ، ونعمل زى ما احنا عايزين .. انتى فاكره يا سنيه الطلب اللي طلبته منك ؟.

سنية : فاكره يا خويا .. بس المرحوم .. خوفني م الجواز قوى ..

زينهم : وهوه المرحوم كان وراه حاجه غير كده .. أنا عارفه كويس . نوع أنانى ما يحبش الا نفسه . فضل مقعد اخته كده من غير جواز لغاية ما ضيع عمرها .. عشان عارف انه ما يقدرش يعيش من غيرها .

سنية : طبوانا ؟ ماله ومالي ؟.

زینهم : نفسه فیکی و مش طایلك .. نفسه یتجوز و مش قادر .. خایف و موهوم ، و عشان كده ضیع عمره عازب .. و عایز كل الناس تقعد زیه .

سنية : لا يا زينهم حرام عليك .. الراجل كان بيقول انه صاحب مبدأ ..

زینهم : مبدأ .. سلامات یا مبدأ .. مبدأ إیه بقی یا ست سنیه .. دانتی علی نیاتك قوى .

سنية : كان بيقول البنى آدم قدامه نعيمين ، نعيم الأرض ونعيم السما ، وانه هوا حارم نفسه من نعيم الأرض عشان قصير وزايل ، ومستنى نعيم السما عشان باق و دايم .

زينهم : هاأو ، هاأو أو أو ، دا قصر ديل يا ازعر . كلهم بيقولوا كده .. الواحد لما

ما يطولش النعمه ، يقول عليها زايله ، ويعزى نفسه بالسدايمه اللى ف السما . خليه يبقى يقابلنى فى السما . فيه حد يزهد فى النعيم بكيفه ! ما يزهد فى الحلق الا اللى بلا و دان . مافيش فى الأرض زهد . . الا بالإكراه . . والزهد فى النعمه كفر ، دا انا لما اديكى حتة ملبن و ترفضيها اتكسف ، تبقى عيبه فى حقى . أنا البنى آدم الغلبان ، إيش حال بقى ربنا ؟ يصح يدينا حاجه و نقول لا !! يصح نكسف ربنا ؟.

سنية : أستغفر الله العظيم .

زينهم : تستغفرى ليه ، هوا انا قلت كفر ؟ الكفر هوا اللى قالوه لك الله يرحمه سى عبد الصبور . أنا لازم اتجوزك ، ربنا ادانى حتة ملبن . حتة قشطه . أكسفه ! أقول لا أنا عايز من اللى فى السما .. دى تبقى لماضه .

(يفتح الباب الزجاجي وتبدو منه أم رتيبه متشحة بالسواد ويبدو الفراش والمقعد والطرطور وعلبة النشوق ، وكل الاستعدادات لاستحضار روح عبد الصبور).

أم رتيبة: مش تخلصوا بقى وتخلوها ليله تفوت على خير الساعة قربت على اتناشر، مش تقولوا للمزاغيف اللى بيتسمموا بيجوا يقعدوا بقى .. مش كفايه أكل . هم إيه بياكلوا في آخر زادهم .. ما شافوش مياتم قبل كده .. (توفع رأسها إلى السما) يارب انهينا بقى .. خلصنا م الدوخه اللى احنا فيها . الناس كلهم بيموت لهم أموات ويجزنوا عليهم ويخلصوا .. ما فيش حدموته عجب غيرنا احنا ، لازم سي عبد الصبور يروح ويبجى .. أصله واخد السكه قياسه . إلهي يعدلها له .

(يدخل سيد افندى من باب الصالة وهو يمصمص بشفتيه وبسلك أسنانه ويفاجأ بوجود أم رتية فيتراجع) .

المشهد الثانى

: يا ساتر .. عدم المؤاخذه . سيذ : (يبدو عليها الخجل وتحجب وجهها بطرف الطرحه) اتفضل يا أم رتيبة خويا . . ما فيش حد غريب . اتفضل . : (يتقدم ويصافحها وهو يتعثر من الكسوف) أهلا ، وسهلا .. أهلا (يخرج زينهم وسنيه ويتركان سيد افندي وأم رتيبة في الحجرة) . : أهلا بك يا سي سيد ، والنبي يا خويا .. مش عارفه اودي جميلك أم رتيبة فين . : على إيه ياست .. على إيه ؟ سببال أم رتيبة : على التعب اللي تعبته في جنازة المرحوم . هوا انت تعبت شويه ؟ : دا الواجب يا ست . . احنا ما عملناش حاجه اكترم الواجب . سيذ أم رتيبة : أبدا والنبي يا سي سيد افندي .. دا انت عملت أكتر واكتر .. انت أصلك طيب وابن حلال .. ربنا يقدرني على رد جميلك . : يا ستى ما فيش فرق . . إحنا برضك أهل . . أنا مش غريب . سيد أم رئيبة : غريب ازاى يا سي سيد . . دا البيت بيتك . هو ا احنا فاضل لنا مين بعد سي عبد الصبور غيرك انت والست أم سيد . : أَمَا تَحت أمرك .. أَنَا خدامك .. أَأْمرى يا ست ام رتيبه .. أَنَا مالياش بركه الاانت .. هوه لو كان الله يرحمه حط عقله في راسه ، وو افق على المسألة اياها . مش كان بقي زيتنا في دقيقنا ، وكان هدى سرنا . أم رثيبة : ربنا يتمم بخير يا سي سيد . . ربنا ما يخيبش رجا مؤمن . . احنا برضه مسيم نا لبعضنا .

: أيوه . برضه مسيرنا لبعضنا .. أنا مؤمن وربنا ما بيخيبليش رجما

سيد

أبدا .. إن شاء الله أحلامنا حا تتحقق وحا نتجوز وبسرعة أسرع مما نتصور .

أم رتيبة : ازاى ؟..

سيد : زى الناس . هوا فيه مانع اننا نتجوز دلوقت ؟ العقبـه اللي كانت موجوده زالت . السداللي كان بيننا انشال .

أم رتيبة : ما نشالشي و لا حاجه .. دا السد حا ينزل تاني الساعه اتناشر .

سيد : انت برضك بنصدق كلام الجماعه بتوع الأرواح دول . هوا برضه معقول انه ينزل ا وينزل ليه ؟ وعلشان إيه ؟

أم رتيبة : قال عشان يكشف لنا السر .

سيد : سر ؟ سر بتاع إيه ؟

أم رتيبة : أنا عارفه يا خويا .. أهو قعد يقول لى كلام كتير ما فهمتش منه حاجه أبدا .. غير انه حاينزل ثانى الساعة ١٦ ليلة الاربعين ، وان انا لازم الحضر كل حاجه واقعد لاستقباله في أودته ما فيش حد معايه أبدا .. علشان يقول لنا على اللي شافه فوق .

سيد : وهوه كان حدطلب منه يقول ع اللي شافه فوق .. حد كان سأله ؟. أما عجيبه على الجدع ده !

أم رتيبة : معلهش يا سيد افندى . . فات الكتير ما بقاش الا القليل .

سید : أنا مقدرش استنی .. أنا حاسس بفرحه عجیبه .. أنا حاخرج ادور علی مأذون .

أم رئيبة : يادى النابيه يا سيد افندى ، الناس يقولوا ابه ؟ اتجوزت ليلة الأربعين بتاع اخوها وهوا لو نزل وشاف المأذون حايخلي ليلتنا تفوت كده بالساهل ؟. دايخليها ليله زى الطين .

سيد : طيب معلهش .. انا حاصبر علشان خاطرك .. حاقعد استنى اشوف بسلامته حا يعمل إيه بنزوله ، حا يجيب الديب من ديله !

أم رتيبة : والنبي دنا حتى خايفه من قعادك ساعة نزوله .. أصل الله يرحمه ما

كانش يطيقك أبدا . كان بيقول عليك قيك شبه من الخرتيت .

سيد : الإيه ؟

أم رتيبة : الخرتيت .

سيد : والخرتيت ده بيقي ايه ؟

أم رتيبة : لازم حاجه شكلها وحش قوى .

سيد : انت شفتيه ؟

أم رتيبة : لا .. أبدا ، وانا مالي اشوفه .

سيد : هوا شافه ؟

أم رتيبة : ماظنيش ـ

سيد : أمال يعنى منين عرف ان انا شبه الخرتيت ؟

أم رئيبة : ما انا برضه سألته نفس السؤال فقال لى انه هو لما يحاول يتصور الخرتيت ما فيش صوره تيجى في دماغه غير صورتك . . وما دام كده يبقى لازم يكون الخرتيت شبهك ، وما دام الخرتيت شبهك يبقى لازم الخرتيت شبه الخرتيت .

سید : ما شاء الله .. اما استنتاج بدیع ، معلهش .. الله یسامحه ، کانت علیه لسان زی العقربه ، و کان .. لکن علی إیه ، النبی قال اذکروا محاسن موتاکم .. الله یرحمه مطرح ما راح .

(يسمع صوت الشيخ جاد من الخارج يصيح) .

الشيخ جاد : ماتيالله بقي يا جماعه .. دي الساعه قربت على اتناشر .

محجوب : أيوه .. ياللا بينا .

أم رتيبة : طيب اسيبك انا بقى يا سى سيد .. لحسن الجماعه جايين .. أنا حا خش اقعد استنا . ياما انا خايفه قوى ، كل ما الساعه بتقرب أحس ان روحى سايخه وركبى ملخلخه .. أنا أصلى عمرى ما قابلت أرواح قبل كده .

سيد : شدى حيلك ، ما تخافيش . انا قاعد لك بره ، لو كان ناوى على أزيه

ابقى ازعقى على وانا اخش اكسر لك نافوخه .. أنا عارفه جنس بطال ما يجيش غير بضرب الصرم .

(تنصرف أم رتيبه وتفلق وراءها الباب الزجاجي ثم يدخل الشيخ جاد وزكي ومحجوب تباعا من باب الصالة) .

المشهد الثالث

محجوب : (ينظر إلى ساعة الحائط) الساعة اتناشر الا عشره . فاضل عشر دقائق .

(يجلس كل منهم على مقعد وعيونهم متنقلة ما بين الساعة والباب الزجاجي) .

زكى : لو كان صحيح الأستاذ عبد الصبور حا يقدر يوفى بوعده وينزل !. يبقى معجزة قرنه !

محجوب : قرنه بس إدا يبقى معجزة ميت قرن ، لو كان يقدر ينزل بجسمه زى ما كان بيقول دايما في الجلسات بتاعتنا ، ويقول لنا عمل إيه في الاربعين يوم ، وشاف إيه .. دا يبقى الحدث الأكبر من عهد آدم .

سيد : عبد الصبور بيقي معجزة قرنه ؟ يبقى حدث أكبر ؟ دا إيه الكلام ده ؟

ز کی

: أمال .. هوا فيه حاجه محيره البنى آدم ، غير جهله باللى بعد الحياه .. البنى آدم اللى طار فى السما .. البنى آدم اللى غاص فى البحر ، البنى آدم اللى اتكلم فى لندن سمعوه فى القاهره ، واللى اتحرك فى أمريكا شافوه فى طوكيو .. البنى آدم اللى نطق الجماد وحرك الحجر . البنى آدم اللى ما عجزش عن شىء أبدا . البنى آدم اللى فهم كل حاجه وكشف كل سر .. عجز عن أبسط الأشياء وأقربها له ، عجز عن فهم نفسه . جى منين . ورايح فين ! أصله إيه ؟ وفصله إيه ؟ بيتولد ليه ؟ وبيموت ليه ؟ البنى آدم عرف كل حاجه فى الدنيا الانفسه .

عمجوب : مظبوط . فهم الشمس والكواكب .. فهم فيه إيه في باطن الأرض ، وفيه إيه ورا السماوات .. لكن ما فهمش فيه إيه في بطنه . والافيه إيه ورا نفسه .

زکی : فهم کل حاجه .. ما عدا روحه .. روحه .. اللی هی کل حاجه عنده ما عرفش عنها حاجه أبدا ، بتطلع ازای ؟ بتنزل ازای ؟ بتعمل إیه ؟ بتروح فین ؟

يد : حقيقى معاكم حق .. لكن لزومه إيه يعرف .. وحا يعمل إيه لما يعرف ؟. ما دام ما يملكش من أمر روحه حاجه .. ليه عايز يعرف عنها حاجه ؟ لا هوا اللي بيجيب روحه ولا هوا اللي بيطلعها ، يبقى ماله هوه ومالها . هوا كل اللي عليه انه يعيش ، إنه يمشى ، إنه يسيب نفسه لل خلقه ، هوا اللي منزله ، وهوا اللي بياخده . ماله هوه ومال روحه ! عرف والا ما عرفش . لا حا يقدر يوقف طلوعها ولا يمنع نزولها . يا شيخ انت وهوه ريحوا نفسكم بلاش فلسفه فارغمه . كان غيركم اشطر .

زكبي

: هوه حقیقی مش حایقدر یوقف طلوعها ، لکن علی الأقل یبقی عارف هی طالعه فین ، یبقی عنده فکره ... مش یفضل فی حیاته دایر تایه حیران ، کل اللی یعرفه عن روحه حاجات مایقبلهاش عقله ، ویضطر یصدقها من غیر تفکیر ، لأنه لو فکر مش حایصدق ، وهوه حاسس انه لازم یصدق فی حاجه ، ولازم یؤمن بحاجه ، لیه ماییقاش المصیر واضح و معروف ؟ لیه مانعرفش انه لما حانموت حانبقی کدا ، وحا ننتهی ،کدا .. ما دام مصیرنا متقرر و معروف .. لیه یستخبر علینا ؟ لیه نفضل فی ضلاله و فی ظلام ؟

محجوب : ابوه حقیقی لیه العالم الواسع دا کله ، اللی بتنفاوت علیه الأجیال ، ما یعرفوش معمول لیه وفایدتهم فیه ایه ؟ لیه یفضلوا یتخبطوا فی عقائد مختلفة ، وأوهام متناقضة ، واجیال تروح ، واجیال تیجی ، ولا حد

عارف ده راح فين ولا ده جه منين ، والا إيه فايدة و جوده في العالم .
ولمصلحة مين العالم موجود ؟ إذا كان اللي عايشين فيه هم أشقى ما فيه من ساعة ما يتولدوا وهم مهددين بالموت ، وإيه هوا الموت ما هماش عارفين . . يقولوا لهم ده انتقال من حياتهم الوحشه القانيه لحياه حلوه ، حياه دايمه ، حياه خالده ، طيب امال جم للحياه الفانيه الوحشه ليه ، لا فيه حياه حلوه ، وحياه دايمه ، وحياه خالده ؟ لزومه إيه التعب والشقا في الحياه الفانيه دى ؟ الحياه اللي بياكل فيها الكبير الصغير ، واللي عمره ما داق فيها الإنسان سلام ولا شاف هدوء ، ولا استريح باله . . إيه قيمة الفتره القصيره اللي بيقضيها الإنسان في الحياة الأولى ، مغمور في الشقا و التعاسه و الظلم ؟

: مين يعرف ؟ يمكن لو كان عرف الإنسان مصيره المجهول ، وتأكد ان الفتره اللي بيقضيها في الحياه دى فتره مؤقتة ، وان له مصير طويل آخر . ما كانش طمع في الدنيا وجرى ورا المتع وانكب على الملذات ، وحب ياخد أكبر كميه ممكنه منها قبل ما يموت ويضيع كل شيء من إيده في الآخر . . لو كان حقيقي يعرف إن حياته لسه لها بقيه طويله ، كان صبر في الحياه دى واستحمل وكان كل الناس حبوا بعض وتقاسموا الملقمة سوا ، بدل ما كل واحد يخطفها من بق التاني يا أخى دا الواحد منا لما يكون وراه عزومه ما بيرضاش يرمرم عشان نفسه ما تنسدش . . لي ؟ لأنه ضامن العزومه . . و كان لو كانت العزومه الموعود بيها في الآخر مش ممكن كان يرمرم في الدنيا . . لكن المصيبه انه حاسس انه الآخر مش ممكن كان يرمرم في الدنيا . . لكن المصيبه انه حاسس انه مش ضامن حاجه .

سيد : أيوه تمام . لو كان الواحد ضامن ان الدنيا ـــ زى ما قال سيدنا على ـــ سفر ، والآخره عايه ، كان قضى السفره زى ما تكون .

ز کی

زكى : لكن هوا مش شايف الغايه أبدا ، هوا قاكر ان السفر هوه كل حاجه ، شايف الغايه غامضه ومجهوله .. مش عارف هوا رايح فين ، وعشان كده بيقول يفوز بالسفره أحسن له ، وعصفور قدامه خير من عشره مش شايفهم .. بيقولوا له ان في آخر السفره حا تلاقي كل الحاجات الحلوه اللي انت بتشوفها في المحطات وأحلى منها ، إذا كنت بتلاق في المحطات جبنه وسميط ، حا تلاقي في آخر السفره كنافه وقطايـف وشهد ، ولبن ، لكن أهو كلام بيقولوه له .. حدوصل لآخر السفره وجه قال له ، أبدا . . ومع ده كله كان تلاقي واحد مثلا ميحبش الكنافه والقطايف والشهد واللبن، واحد نفسه حلوه بيحب الطعميم المحنه ، والبني آدم بيتغير والناس أذواق . . مش معقول انه حا يفضل باستمرار كل أمانيه ، لبن وشهد وخمر ، وكل حاجه ولها أو ان .. كان زمان ركوب الحمير زينه .. لكن دلوقت بقى مهزأه .. عشان إيه ؟ عشان فيه جنب الحمير كاديلاك وبكار.

: وليه اللف داكله با أخي ، البني آدم دلوقت بيلاق في المحطات اللي انت بتقول عليها حاجات أحسن من اللي بينوعد بيها في آخر السفره، دلوقت الناس ، اللي بيقولوا عليهم كفار ، ولا هماش مسلمين ، ولا عايشين في أرض الرسول ، عايشين عيشه أحسن من اللي اتوعدوا بيها المؤمنين والمسلمين اللي دلوقت بيتمرغوا في التراب .. دلوقت كل واحد منهم عنده فريجيدير فيه الشهد واللبن والخمر ، وكمان فوقها جاتوه ، ومرتدلا ، وبسطرمه ، وديك رومي ، وعنده تلفزيسون وعنده حاجات كتير قوى . . إخواننا المسلمين لسه ما عندهمش فكره عنها ، وعمرهم ما ينتظروها حتى ولا في آخر السفره .

الشيخ جاد : (وهو منهمك في تسليك أمنانه) وحدوه يا جماعه .. إيه أصل الكلام اللي بتقولوه ده .. (ينادى زينهم الذى ظهر بجوار الباب) شوف كده يا زينهم وحياة أبوك قشايه اسلك بها سناني .. حتة اللحمه اللي كلتها كانت متفله قوى . إيه أصل الكلام اللي عمالين تكفروا بيه ده .. أسرار إيه اللي عايزين تكشفوها دي ! هوه كل من أنعم عليه ربنا

بحتة غ ، خلاص صابه الغرور ، واستكبر على خالقه .. دا فيه حاجه اسمها ربنا ، سيدى وسيدك ، وسيد الكون .. اللي منظمه ، واللي مساويه .. هوا العامل اللي في المصنع ، مش بيشتغل الحاجه اللي في المصنع ، مش بيشتغل الحاجه اللي في إيده ؟ وريس المصنع ، مش بيديره كله وهوه قاعد في الأوده القزاز الصغيره بتاعته ؟ يعني لو كان كل عامل ساب اللي ف إيده ، وقال أنا عايز اعرف المصنع ده ماشي ازاى ، والحته اللي يعملها رايحه فين وحا يعمل بيها إيه ، والخامات دى بيجيبوها منين ، وأصلها إيه ، كان يعمل بيها إيه ، والخامات دى بيجيبوها منين ، وأصلها إيه ، كان مشي المصنع ؟. أبدا وحياتكم . كان خرب . بقي إذا كان الكلام ده صحيح في المصنع اللي قد كده ، يبقى مش صحيح في العالم الواسع صحيح في المصنع اللي قد كده ، يبقى مش صحيح في العالم الواسع ده . إذا كنا مستكترين على العامل إنه يتدخل في شؤون ريس المصنع ، يبقى اللي هوه بني آدم زيه ، يبقى ما نستكترش على المخلوق الضعيف انه يتدخل في شئون ربنا . . إذا كان العامل بيخفي عليه سر المصنع ، يبقى ما يخفاش على البني آدم سر الكون ؟ يا جدع انت وهوه عبيب اختشي .

زيتهم

: أيوه والله يا شيخ جاد ، يسلم بقك ، ذا العبد يوضه له حدود . أسرار بايه وبلاوى بايه اللي عايز يعرفها ؟ كفايه عليه يعرف ربنا كويس . كفايه عليه يؤمن بضميره ، وبقلبه .. دا الواحد مهما اتفرعن ، وكفر ، ونسى ربنا ، لما بتصيبه مصيبه أو تجراله حاجه ، غصبن عنه ، ومن غير ما يفكر ، بيقول يارب ، يارب .

(يدهب زينهم ليحضر المقشه) .

الشيخ جاد : أصل البنى آدم ضعيف ومغرور ، وعقله مهما كبر برضك عاجز ، وللشيخ جاد : أصل البنى آدم ضعيف ومغرور ، وعقله مهما كبر ولع الإيمان في ولو ساب لعقله العاجز حايضلله ، عشان كده ربنا وضع الإيمان في القلوب ، القلوب بتهدى أكثر من العقول ، والمغرور مهما اتنفخ ، حيبقى برضك زى البللونه أقل شكه تنزله على فشوش .

مجوب : (ينظر إلى الساعة وبيدو عليه الاهتام) بس بقى يا جماعه ، كفايه

كلام ، خلونا ننتظر الساعه قربت على الاتناشر ما فضلش غير دقيقة والا دقيقتين ، والأستاذ عبد الصبور ينزل ، يعنى زمان روحه دلوقت عماله تحوم حوالينا .

سيد : إنتوا برضك مصدقين انه حا ينزل ! برضك بتصدقوا الكلام الفارغ ده ؟

زكى : (إلى سيد) إيه ده يا سيدنا ، وطى صوتك كده وانت زى المدب ، حد يقول كده والروح نازله . إنت عايز تطرد الروح ، دى حاجات عجربه ومدروسه فى أكبر الجامعات ده فيه عندهم صور لأرواح . عايز إيه أكتر من كده ؟

سید : وانا مالی تنزل تنزل ، أهی عندكوا . امضغوها واشبعوا بیها .. بلوها واشربوا میتها .

محجوب : بس بقى يا جماعه ، كفايه كلام . أرجوكم عايزين سكون خالص .

الشيخ جاد: وبرضه ، سماويات ، روحانيات ؟

محجوب : طبعا ، طبعا ، ركزوا فكركم فى الأستاذ عبد الصبور ، ما حدش يفكر في حاجه تانيه .

سید : ودی مصیبة إیه دی کان !. أفکر فیه بتاع إیه ؟ هوا دل حد یفکر فیه ؟

محجوب : یا أخینا .. یا بنی آدم ، وطی صوتك ، اتكلم بهدوء .. إذا كنت مش عایز تفكر فیه .. عنك ما فكرت ، بس اقعد ساكت .

سید : سکت یا سیدی .

زينهم : (يدخل حاملا المقشة على كتفه منشدا) اللبارق ، اللبالا ، اللبلالا بالابارق ..

عبد الصبور الله يجازيك ما تقول لى بس لمين اشكيك ما لحقتش أبدا افرح فسيك تموت وترجيع تسانى تنسق اللبارق .

محجوب : (ناهرا زينهم) إيه ده يا حيوان ده ! إنت عايز تطفش الروح ؟

زينهم : ما تخافش . دا كان بحب الغنيوه دى قوى . دى يمكن هي دى اللي حا تنزله . قولوا معايه قولوا ، اللبارق . اللبارق .

محجوب : إنت حاتسكت والااقوم اكسر دماغك ؟

زینهم : ما فیش لزوم . خلاص سکت . خد یا شیخ جاد المقشه ، سلك سنانك زى ما انت عایز .

زكى : بس يا جماعه ، اسكتوا ، خلاص ، دى كلها دقيقه بس .

(يسود السكون وتمضى فترة دقيقة في صمت عميق . والكل واجم ساهم محملق في الساعه التي أخذ يقترب عقرب الدقائق فيها من ١٢) .

(تدق الساعة ١٢ دقه ، وفي كل دقه يزداد توتر أعصاب الجميع ، · ويزداد إرهافهم ، ويثبتوا في أماكنهم كالتماثيل) .

(تمضى دقيقة أخرى بعد دقات الساعة . ثم يسمع صوت جر الطشت على الأرض وسكب المياه من الإبريق فيه) .

زينهم : (يبدو عليه فزع شديد ويمسك بيده كنف سيد أفندى وهو أقرب الموجودين اليه ويهمس في خوف) يا نهار اسود دا بينه عملها ونزل ؟

سيد : (**هامسا في فزع**) هوا مين ؟

زينهم : هوا ، هوا بعينه . . سامعين رجليه بتتحرك في الطشت ، يا نهار مهيب وزى الطين سامعين يا جدعان ؟

﴿ الجميع ينصتون ويعلو وجوههم الفزع ﴾

محجوب : (**في خوف)** سامعين .

الشيخ جاد: أنا سامع كويس . . صوت الطشت بيتجرجر على الأرض .

زكى : اصبروا شويه يا جماعه بلاش قلق ، إيه اصله ده اسكتوا خلونا نسمع ، دى مصايب إيه دى ؟

(يسمع صوت وقع أقدام القبقاب ذو الجلاجل ، وتبدو سنية على

الباب مصفرة الوجه) .

سنية : (هامسه لرينهم) سامع يا زينهم .

زينهم : سامع ياختى .

سنية : سامع القبقاب ابو جناجل ؟

زينهم : سامعه كويس .

سنية : (فنرع) أنا خلاص يا زينهم ، ركبي سابت ، مش قادره اقف ، أنا كنت فاكره الحكايه كلها تهويش في تهويش .

يتهم : أنا كان كنت فاكر كده .. لكن ابن الأروبه عملها صحيح .

زيتهم : أنا كان كنت فاكر كده .. لكن ابر الشيخ جاد : فيه إيه ؟ يتتوشوشوا بتقولوا إيه ؟

زينهم ؛ ما نتش سامع ؟

الشيخ جاد : سامع إيه ؟

زينهم : القبقاب ابو جناجل ؟

الشيخ جاد : ماله القيقاب ابو جناجل ؟

زينهم : هوه فيه حدكان يقدر يلبسه غيره !

محجوب : أهه .. أنا سامعه كويس ، وسامع شخشخة الجناجل .

سید: لا .. أنا ما قدرش علی كده أبداً ، دى الحكایه بقت جد خالص ..
دى مصیبه وطبلت ، وبعدین نعمل إیه لو عملها وبلط هنا و لا رضیش
یطلع تانی ؟

زينهم : طيب بس ما تفسرش بقى .. أهى دى تبقى حقيقى المصيبه الكبرى .

سنية : الله يكون في عونك يا ستى .. يا ترى عامله إيه معاه دلوقت ؟

(يسمع صوت تصفيق)

زينهم : يانهار اسود ، أنا مالياش دعوه ، ولا انا منقول من هنا ، خشى له انت يا سنيه ، بينده لك انتى ، الصقفتين دول يعنى لكى ؟

سنية : أخش ! ليه ؟ اتجننت ؟ أنا أخش ؟ دانا عقبال ما اوصل للباب .. يكون دمي نشف .

(يعاد صوت التصفيق) .

زينهم : خشى بقه يا سنيه ، إنتى بتعرفى تهديه .

سنية : أبدا.

(يعاد التصفيق) .

زينهم : خشى يا سنيه ، لازم عايز علبة النشوق .

سنية : وانا مالي ، أهي عنده اخته تجيبها له .

(يسود الصمت فترة)

الشيخ جاد : لازم لقاها .

تصدر عطسة عالية) .

سید افتدی : (وهو پختضن الشیخ جاد) یالطیف ، هوا بعینه ، ما فیش غیره

(یبدو الحوف علی الجمیع) هی عطسته ، اللی تطلع تشرخ الودن ،
یا مغیث ، یا ناس الحقونی ، حد یشیلتی یطلعنی بره ، ودی کانت
وقعة إیه المهبیه دی ، یا ناس حرام علیکم ، دانا بینی وبینه تار بایت ،
أنا حاکون أول ضحیه له ، دا مش ممکن یتسالی حکایة الکرنب
المحشی وراس العبد ..

زينهم : طب بس بقى اخفيها سيره ، لحسن يسمعك ، يطلع يمرمـط بك الأرض .

(تستمر الجماعة فترة جالسين في أماكنهم بلا حراك ، وكلمسا صدرت عطسة انتفضوا في أماكنهم وظهرت عليهم علامات الرعب والفزع) .

محجوب : وبعدين يا جماعة ا وإيه آخرتها الحناحانفضل كده متليشين .. مش نشوف إيه اللي حصل ، دا حتى حرام علينا نسيب الوليه الغلبانه جوه كده لوحدها ، دى مش رجوله ، دا احنا دلوقت بنعمل تجربه ، والتجربه في طريقها للنجاح ، فإيه اللي مخوفكوا كده ا هوا احنا مش كنا أكتر ما بنتمناه إن الأستاذ عبد الصبور ينزل لنا روحه متجسده ، (أم رتيبة)

طبب أهو ده اللي حصل ، يا الله واحد منا يقوم يشوفه ويسلم عليه ويكلمه .. يا الله يا شيخ جاد .

الشيخ جاد : أنا ؟ ولا اعرفه ، ولا لل دعوه بيه . حد الله بيني وبينه ، أنا لا انا عايز أرواح ، ولا لى دعوه بالأرواح .

ي تني : (ناهضا من مكانه) اقعدوا بقى اعزموا على بعض لغاية ما الراجل يزهق ويسيبنا وتنه طالع .

سيد : ياريت ، ربنا يسمع منك .

رَكى : أيوه دلوقت نقول ياريت ، وبعدين نرجع نندم ، خليكوا قاعدين ، أنا حاقوم أشوفه (ينهض مترددا ويأخذ في الاقتراب من البساب الزجاجي) .

الشيخ جاد : حاسب على نفسك .

زكى : (يتقدم) العمر واحد والرب واحد ، إحنا لازم نستمر في التجربه إلى النهايه .

(يقف أمام الباب مترددا ، ثم ينحني ويضع إحدى عينيه على ثقب المفتاح فلا يكاد ينظر ما وراءه حتى يتراجع مبهوتا مذعورا)

زكى : يا لطيف ، يا لطيف ، الطف بنا يارب . هوه بعينه ، بطرطوره ، بعبايته ، بنضارته . يالطيف بالطيف .

سید : (وقد تراخت أعضاؤه) یا ناس حرام علیکم .. حدیشیلنی یرمینی بره ، أنا جنتی نملت ، ومفاصلی خلاص سابت .

الشيخ جاد : وانا زيك ، ما يقاش في نفس .

زينهم : بس كان مالنا ومال الغم ده .

(سنيه تتباوى إلى الأرض)

محمجوب : (ينهض واقفا) وبعدين يا جماعه ، والوليه اللي جوه دى نعمل فيها إيه ؟. دى ذنبها فى رقبتنا .. إذا كان احنا واحنا بره الأوده جرا لنا كده ، إيش حال هى بقى .. اللي معاه فى أوده واحده .. هى دى برضه أصول ؟ خمس رجاله طوال عراض يقعدوا كده زي الولايا ، ويسيبوا الوليه الغلبانه دي لوحدها جوه .

زينهم : أيوه حقيقي ما يصحش ، دي أمور نسوان اللي احنا عملينها دي .

سنية : ياعيني عليكي يا ستى .

الشيخ جاد : أنا ما لياش دعوه ، لو قتلتونى ما انتقلش من مطرحى .. أنا لا قلت له انزل ولا اطلع .

سید : وانا زیك .. لو كان على كنت وصیت عزرائیل یسنسله في السما بحدید .

محجوب : أقول لكم أحسن طريقه .. ولا انت ولا هوه (يتقدم بجرأة ويدفع الباب الزجاجي فيفتحه على مصراعيه)

(تبدو حجرة النوم في ضوء باهت تماما كماكانت في الفصل السابق . وعلى المقعد أمام الفراش جملس شبح يرتدى الطرطور والعباءة والمنظار على أرنبة أنفه وقد وضع ساقيه في الطشت) .

(الجميع يصيبهم فزع ويحدقون في الشبح في دهش شديد)

زكى : (هامسا إلى سنيه) بسم الله الرحمن الرحيم .. هوه بعينه الخالسق الناطق ، بس باين عليه تخن شويه .. الظاهر إن صحته جت على السما .

سنية : لكن امال فين ستى ام رتيبه ؟ راحت فين ؟

سيد : لازم أكلها .. هوا دا تستبعد عليه حاجه أبدا .

محجوب : ما تكلمه يا سي زكى .. ما تسأله .

زكى : اسأله يا شيخ جاد .

الشيخ جاد : أنا اسأله ؟ بتاع إيه ؟ وعشان إيه ؟ أنا ما كلمش الأرواح شفوى ؟ مقدرش عليها الالما تكون في الكباية بس ، لكن كده ساييه .. حدالله بيني وبينها .

محجوب : طيب بس . بس . اسكت انت وهوه . أنا حاكلمه (للشبح)

السلام عليكم يا سيد عبد الصبور عبد الغفور عبد الشكور المقزقز.

سيد : إيه ؟ عبد إلايه ؟ إيه ؟ صبور وغفور وشكور ومقزقز ، ومكانش عاجبه سيد بنجر ، ياخي جتك نيله .

(يرفع الشبح رأسه ، ويغادر مقعده ، فإذا به أم رتيبه نفسها وقد ارتدت ملابس عبد الصبور) .

أم رتيبة : (بلهجة عبد الصبور وهي تتقدم تجاه سيد) سيد إيه ؟ . سيد بنجر . . إنت هنا يابوز الإخص . ياوش الخرتيت . . يالمامة اللمامه . (يكاد الجميع يصعقون من فرط الدهش) .

زينهم : إيه ده ؟ مين دى ؟.

منية : دى ستى ام رتيبه . اسم الله عليكى يا ستى . . إيه اللي جرا لعقلك يا ستى ؟.

سيد : إيه ده ؟.. أنا بوز الإخص ؟.. أنا وش الحرتيت ؟ أم رتيبه تقول على كده .. مش ممكن ، إحنا اللي كنا متفقين حا نتجوز دلوقت ، تقوم تقابلني المقابلة دى ؟.

أم رتيبة : تتجوز ؟ ياخى جاك جنازه حاره .. مين قال لك تخش هنا يا باشخبير الولعه ، يا باشخبير اللهاليب ، لما تبقى باشخبير الحلاوه ، ابقى تعالى هنا .. يا للاقوم ورينا عرض اكتافك .

سيد : ما يمكنش ، مش ممكن أبدا تكون دى ام رتيبه . أقطع دراعى ان ما كانش دا عبد الصبور ، هو بعينه عبد الصبور .. أم رتيبه الأميره ، اللي زى السكره ، تقول كلام زى كده ؟ تقول على خرتيت ؟.

زينهم : حقيقي ، لك حق . الجكايه لازم حصل فيها لحبطه .

أم رتيبة : (تنظر إلى زينهم فى اشمئزاز) وانت إيه اللي جابك هنا قدامي بوشك المريان ده .. يا خسيس يا خبيث ، يا إبليس .. أنا مش ميت مره قلت لك ان وشك بيلبش جتتى ، مش حرجت عليك تيجي قدامي من غير وش .

زينهم : ولاكلمه ، هوه بعينه .

أم رتيبة : (لزكى ومحجوب والشيخ جاد) وانتوا إيه ؟. قاعدين لغاية دلـوقت تعملوا إيه ! ياللا وروني عرض كتافكم .

محجوب: يادى الحساره .. الوليه انصابت ، يا مسكينه يا ام رتيبه ، عقلها راح بلاش ، وهى دى حاجه بسبطه .. دا انا كنت بره وحا تجنن ، إيش حال هى ، هى المسكينه العبيطه الطيبه اللي لا تعرف لا روح ولا عفاريت .. روحتى بلاش يا ام رتيبه ، الله يجازيك يا عبد الصبور يا للي كنت السبب .

سید : یعنی خلاص . أخرج كده من المولد بلا حمص . ما فیش جـواز ولا حاجه ، ده برضه برضی ربنا !.

أم رتيبة : جواز في عينيك يا خلبوص يا وش الحرتيت يا وحش .. إياك اشوفك تعتب هنا تاني .

(یخرج سید و هو یضرب کفا بکف) . .

(أم رتيبه تجلس على المقعد وتضع ساقيها فى المياه وتشاول علبـة النشوق) .

سنية : وبعدين يا زينهم .. نعمل إيه في المسكينه دي اللي عقلها راح ؟.

زينهم : راح ؟ ولا راح ولا حاجه ، أنا عارف الحكايه . عارف اللى جرا (ينظر إلى اله رتيبه ويهز رأسه) آه يا عبد الصبور افندى يا نمس . . برضك عرفت تستكرد الوليه الغلبانه وتنزل مطرحها أنا عارفك كويس وعسارف ألاعيبك . . طول عمرك واكل عقلها وضاحك عليها ، طبعا نزلت وقعدت تدردش معاها وتاخد وتدى ورحت مسهيها ونازل بروحك فى جتها ومطلع روحها . الله يرحمك يا ست ام رتيبه . منك لله يا سى عبد الصبور . . يا مغالط عزرائيل ، طبعا مسبسوط عشان فسخت الجوازه بتاعتها ، مش دى اللى كنت بتحرب عليها ، طفشت الراجل بلسانك اللى زى المبرد و فضلت تقول له . . وش الخرتيت ، وبوز الإخص ، وطبعا عايز تفسخ جوازتى انا كان ، لكن بعينك . والنبى لنا متجوزها غصب عن

عنیك .. وابقی تعالی بقی خدها منی بجتنك المفشوله .. جنة ام رتیبه ، جنة الولیه ، تاخدها منی ۴ تقدر تنجوزها ۴ بعینك . (إلی سنیه) خشی علی یا سنسن یا للی زی اللوز ، تنجوزینی و الا لأ یابت ۴

سنية : أتجوزك يا زينهم .

زينهم : سامع يا سي عبد الصبور ، حا تجوزها ، غصبن عن عنيك لتنين .

أم رتيبة : (في غضب) اخرص ، يا خسيس ، يا إبليس يا تعيس يا منحوس .

زينهم : ولو .. برضه حاتجوزها .. ابقى خلى جتة ام رتيبه تنفعك .

الشيخ جاد : ايه اصله دا يا جهاعه ا انتوا حا تجننونا معاكم زى الوليه ما تجننت، إيه أصله ده يا وله يا زينهم ما تسبب الوليه في حالها ، عبد الصبور دا إيه وبتاع إيه ؟ مش كفايه اللي جرالها . كله دا من المسخره اللي انتوا عاملينها .. مالكم ومال الأرواح ، والأسرار .. يعني لو كان كل واحد يمشي على أده ، ويعرف اللي على أده . مش يبقي احسن . دا لازم يكون فيه فرق بين اللي يعرفه ربنا واللي يعرفه العبد .. دا اللي ماشي على الأرض ما يشوفش زى اللي فوق ، فوق فوق ، يا أخي منك له ، فوق السطوح ، إيش حال امال اللي فوق ، فوق فوق ، يا أخي منك له ، خلى اللي الله الله الله أحد ، الله الصمد ، غيل الله الله الله الله أحد ، الله الصمد ، غيل الله يولد ، و لم يكن له كفوا أحد (بصوت عال محدوه) وحدوه .

الجميع: (بما فيهم أم رتيبه) لا إله إلا الله .

أم رتيبه تهز رأسها منتفضة وتتمتم بضع كلمات غير مفهومة ثم تغمض
 عينيها برهة . . وتفيق إلى نفسها وترمى الطرطور والنظاره) .

أم رتبية : يا ندامه .. يا عيب الشوم .. أنا إيه اللي لبسنى اللبس المشوم ده ؟، أمال فين سيد افندى ؟ راح فين ؟ الحقوني بسيد افندى .

زينهم : (متجها إلى الباب) سيد افندى ، سيد افندى .

سيد : (يعود مهرولا ويقبل على أم رتيبة) أم رتبيه .. مالك ياختى . قلبى عليك ، حمد الله على سلامتك . يا ألف نهار أبيض .

زينهم : أيوه كده .. أهى طلعت روحه تانى .. ونزلت ام رتيبه مطرحها .. هى إيه ؟ سايبه . (فاظرا إلى السقف) اطلع يا عبد الصبور الكلب ، خليك فوق عندك ، إياك تهوب هنا ، الحقونا يا جماعه بمأذون قبل ما ينسزل يفشكلها تانى .

الشيخ جاد : ويلحقك ليه . أمال انا هنا باعمل ايه ؟ دانا أدها و أدود، هاتو ا إيديكم في إيدى . قال يا بخت من و فق راسين في الحلال ، وانا حاوفق اربع روس ، منهم راسين عجالي (يجلس الجميع وتسمع زغاريد) المأذون لما يسعد ، تجيله جو ازتين في ليله .

تسدل الستار

(تمت) ،

جمعية قنل الزوجات

الإمكاء

إلى النقاد الذين أثارتهم « أم رتيبة ، . . واتهموني بالإسفاف والتهريج . . أهدى مزيدا من الإسفاف والتهريج . .

يوسف السباعي

أحب قبل أن يقدم القارئ على قراءة هذه المسرحية .. أن أجعله على بينة من أمره وأمرى وأمر هذه المسرحية التي يوشك أن يضيع في قراءتها بضع ساعات ثمينة ـــأو غير ثمينة ـــمن عمره .

أنا لست واعظا ولا فيلسوفا ولا حكيما ولا مرشدا .. ولا .. ولا شيء أبدا من هذه الصفات الفاخرة .. التي قد يتوهمها القارئ في الكاتب في نفسه .

أنا عند ما أكتب أحس بمتعة من الكتابة ، وعند ما أقدم ما كتبت للقارئ أحاول أن أدعوه لمشاركتي تلك المتعة ، و تزداد متعتى عند ما أحس أنني نجحت في أن أسبب له نوعا من المتعة .. وأني هيأت له خلال أيامه المرهقة المتعبة التي تزدخر بها حياته ساعات من المتعة الذهنية وإياى في كتابي .

هذا هو كل ما أقصده و أحب أن أبلغه بكتابتي .. فإذا صادف بها القارئ ما توهم فيه عظة أو حكمة أو أى شيء آخر من هذه المسميات المحترمة فأؤكد له أنى لم أقصدها .. وأنها زجت بنفسها بين الكتابة عفوا بلا قصد منى أو تدبير .

فإذا كنت با أخى القارئ . ﴿ غلبانا ﴾ مثلى ومثل بقية الناس الذين أرهقتهم أيامهم من أمرهم نصبا وعسرا ووددت أن تخفف عنك بعض هذا النصب والعسر فاقرأ هذه المسرحية . . فقد تفلح في منحك بعض الراحة والتسلية .

وإذا كنت قارئاً ﴿ قَنزُوحا ﴾ تضن بوقتك أن يصرف إلا بين آيات بينات من الحكم والعظات فلا تضع وقتك معى عبثا . . أمامك كتب الأخلاق والتهذيب والتربية

و نفلسفة .. أو .. لم أذهب بعيدا .. أمامك الكتب السماوية .. خذ منها ما شئت من المحصح والعظة .. و لا أظن كاتبا مهما بلغ من الحكمة والعقل والبلاغة والقدرة بقادر عبى أن يأتى لك بخير منها .

أَمَا أَنَا فَرِسَالِتِي كِمَا قَلْتَ لَكَ أَنَّ أَخْفَفَ عَنْكَ بِعَضَ ضَيْقَكَ وَنَصِبَكُ فَإِذَا نَجِحَتَ .. فيها وبعمت .. وإذا لم .. فاعذرني .. إنما الأعمال بالنيات . والسلام عليكم ورحمة الله

يوسف السباعي

الفصل الأول

المنظر

اليمين قطاع حجرة يقطنها سيد الفنط ومحمود جاب الله .

اليمين قطاع حجرة يقطنها سيد الفنط ومحمود جاب الله .

في مواجهتها باب يؤدى إلى الحمام والمطبخ وسرير حديد بأربعة أعمدة يرقد تحته محمود وسيد وقد أسدلت عليهما ملاءة السرير فأخفتهما .. وعلى اليسار أريكة بالية تعلوها نافذة وضع بدل زجاجها المكسور ورق جرائد .. وفي الوسط منضدة صاج عليها لمبة زجاج وبقايا طعام وأوراق ومنبه وعود . وعلى اليسار الباب المؤدى إلى السطح ، وقد كومت وراءه صناديق وسلال وشوالات وأثاث قديم حتى لا يمكن فتحه من الخارج ومعلق على الحائط مشجب ومرآة مشروخة . وفي يسار السطح يبدو الباب الخارجي لحجرة خشبية صغيرة منخفضة وبجوارها تقفيصة فراخ .. وفي المواجهة مدخل السطح وحبال غسيل معتدة بطول السطح . الوقت قبل الفجر في أواخر الشتاء .

المشهد الأول

(تمر فترة صمت .. تسمع خلالها دقات المنبه وصياح الديكة دون أن يبدو على المسرح أحد .. وفجأة يدق جرس المنبه فيندفع سيد من أسفل السرير ويسكت المنبه .. ثم يتسلل على

أطراف أصابعه فيرتدى البنطلون والجاكتة فوق الجلباب ويدس قدميه في الحذاء ثم يقف أمام المرآة ليمشط شعره ويتزين ويدندن . محمود يمد رأسه من أسفل السرير وينظر إليه في دهشة) .

محمود : ديهده .. ديهده .. إيه الحكايه يا خال ؟.

سيد : (مأخوذا بيقظة محمود) .. حكاية إيه ؟! ما فيش حاجه أبدأ .

عمود : أبدا ؟! أبدا ؟!.

سيد : أبوه .. أبدا .. أبدا .. شايف ف حاجه غربيه ؟.

عمود : لا أبدا .. ولا غريبه ولا حاجه .. بس يعنى مش زى عوايدك تتسحب كده لوحدك من تحت السرير .. وتسيبنى أروح ضحية النوم واقابل لوحدى القضا المستعجل . انت ناوى تِخلى بيه ؟١٠

سيد : أخلى بيك ازاى ؟!. أنا ما انا واقف اهو قدامك . . مين قال لك ان أنا حاسيبك رايح في النوم وانزل . . نام نام . . لسه بدرى . . أنا مش حائزل دلوقت . . ولما آجي أنزل حا صحيك (مستمرا في الدندنة والتزين أمام المرآة) يا الله إرخى الستاره و نام .

محمود : أنام ؟! ازاى (يخرج من تحت السريو) ما يمكنش .. لازم اعرف إيه سر الحنتفة والسيسبه اللي بتعملها في روحك دى .. أنا اعرف ان بينك وبين المرايه تنافر شديد .. وخصومه مستحكمه .. كل واحد منكم ما يطقش التاني .. ازاى قادر تقف قدامها الوقفه الطويله دى ؟.

سيد : مُكرة خالك لا بطل.

محسود : وإيه اللي يكرهك على العذاب ده ؟! إيه اللي يرغمك على الاصطباح والبحلقه فيما تكره ؟!.

سيد : محتاج لها يا محمود يابني .. مزنوق فيها . لازم اهندمها واسبسها لأب كان حاستعملها .. حاعرضها للأبصار .

محمود : هي إيه دي ؟!.

: خلقتي .. اللخبطه اللي انا شايفها في مراية النحس .. لازم أساويها شويه .. لازم احتتفها .. واسبسبها .. واساويها .. واهندمهسا علشان تبقى مقبوله شويه .. ان كان على أنا ما يهمنيش .. أنا خلاص خدت عليها ، ما بقتش اخاف منها قوى .. لكن هم .. : هم مين ؟!. يحمو د : اللي حايشوفوها .. لازم اوضبها لهم ، لازم اهيأها لهم شويه . سيد : إيه أصله ده يا خال ؟! هي إيه اللي توضبها لهم وتبيأها لهم .. هي محمود لحمة راس ؟! بس مين دول اللي خايف عليهم قوى من خلقتك ؟! انت ما انت طول النهار ماشي بها كده عريانه .. وسايبها على خلق الله .. اشمعني دول يعني اللي لازم توضبها لهم .. وتهيأها لهم .. يقوا إيه دول ؟ يطلعوا إيه ؟ : يطلعوا ؟.. ما يطلعوش أبدا .. بيرمنوا سهامهم كنده وهمم سيبذ قاعدين .. بيصوبوا سحرهم كده وهما نعسانين . : ولا انا فاهم حاجه .. هم إيه دول اللي بيرموا السهام ويوزعوا محمود السحر .. يكونوش هنود حمر ؟!. : حمر ؟. يا غبي . دول سود . سوادهم عجب . سيد : هنود ، سود . إيه الكلام ده ؟. محمود : هنود ؟. هنود إيه يا جدع . مين قال هنود سود ؟. معيباء : أمال يبقوا إيه دول اللي قاعدين يسحروا ويضربوا بالسهام ، واللي محمود انت عمال توضب لهم لحمة الراس بتاعتك ؟. : عيون .. عيون سود .. مش هنود سود يا مغفل ، عيون المها ، سيذ عيون ، في طرفها حور ، عينون من اللي قبال فيها الشاعسر : و يصرعن ذا اللب حتى لا حراك به ١ . : وانت بقى ذا اللب الذي لا حراك به ؟!. محمود : لاحراك ، ولا روح ، ولا نفس ، ولا حتى .. لب ..

سيل

(أم رتيبة)

محمود : يعني بالاختصار . انت بتحب ؟!.

سيد : أيوه .

عيبود : قديمه .

عمدد

سيد : إيه هي اللي قديمه دي ؟!.

محمود : مسألة الحب بتاعث ، طول عمرك وانت بتحب ، من يوم ما وعيت عليك وانت عاشق مستهام . أنا فاكر واناصغير يوم ما جيت لنا البيت و هدو مك تحت باطك ، لما ابوك طردك و حرم عليك تخش البيت من تحت راس قصايد الحب اللي كنت بتعملها في مرات الشيخ علوان ، يعنى من يومك وانت حبيب ومستندات الحب بتاعتك ، لا تعد و لا تحصى .

سيد : مستندات الحب ؟. إيه هي دي ؟.

: الخيابه ، والفقر ، وتلتميت قصيده ، و همسين قصه ، واربعين غنوه ، مجبوسه بين اربع جدران فوق سطوح ام عبده ، ما سمعهاش غيرك ، وغيرى ، والغلبان شندى عبد الجليل الجرجاوى ، هو الحب دا حاجه جدت عليك .. طوى عمرى وانا اوعى عليك ، تبص لنجوم السما وتتنهد ، وتبص لغروب انشمس وتتحسر ، وتبص لطلعة القمرة وتتأوه . ما فيش حاجه من الحاجات دى تعدى عليك من سكات أبدا ، لكن كل ده ما كانش له صله بخلقتك أبدا ، كل الحب اللي انت غرقان فيه ده ما خلاكش مره واحده تبص في المرابه ، ولا تسبسب شعرك ولا تهندم نفسك . إيه اللي جد عليك ؟!.

سيد: ماكانش حب يا محمود.

محمود : أمال كان إيديا خال ؟!.

سيد : كان هيامان . كان إفراط في الحساسية . كان انتظار لحب . كان حب ، والحبيب مجهول .

: يعني كده ، زي الجنايه . لما تتقيد ضد مجهول .

: كان عندى فيض من الحب ، لكن ما كانش متركز في حاجه مخصوصه . كنت ابص للنجوم واحس انى بحلق بينها وادور على حاجه ناقصانى . كنت اسمع صوت الكروان سارى مع نسيم الفجر ، واحس انه بيحمل لى رساله من حبيب نائى . كنت ابص لقمر ويتهيأ لى ان فى وشه ابتسامه حلوه بتحيينى . كنت امسك العود بتاعى واحس بصوابعى بتجرى عليه ، مش بنغم ولا لحن ، لكن بمناجاة . للحبيب الهايم الغايب . كنت بحب . لكن ما كنتش عارف با احب مين . لغاية ما ليله من الليالى ، سمعت صوت لذيذ يبدندن ، بغنوة : « فى الليل لما خلى ، إلا من الباكى ، « النوح على الدوح حلى ، للصارخ الشاكى » « ما تعرف المبتلى فى الليل من الحاكى » وكنت قاعد مره على سور السطح ، وسمعت الدندنة وسط سكون الليل الخالى . حسبت جسمى بيرتعش . ولقيت دموعى نازله بتجرى زى السيل .

محمود : وعرفت مين صاحبة الصوت ؟ إ.

: عرفتها .. ليله .. ورا ليله .. بقيت اقعد لوحدى اسمع الدندنه .. ولقيت الإحساس الفياض والشعور الهايم والقلب التايه .. ابتدوا يتركزوا فى الصوت وفى صاحبة الصوت .. واتجمع كل الحب الحيران بين النجوم والسما والقمر والغروب والبلابل .. واتحط كله فى صاحبتنا دى .

محمود: بس مين هي ؟أ.

محمو د

ميد

سيذ

مبيذ

: وبقيت احس ان الأمانى بتاعتى فى الدنيا كلها انحصرت .. فى حاجه واحده .. مش انى أبقى فنان شهير ، ولا صاحب ثروة ولا سلطان .. بل فى إنى أقعد كل ليله واستنى لغاية مسا تخرج فى البلكونه .. والمح خيالها فى الليل ، واسمع الدندنه .. كل سعادتى

كانت متركزة في اللحظات القصيره دي .

محمود : هي مين بس يا خال ما تقوللي وتريح قلبي .. شفتها بالنهار والا لا ١٩.

سيد : شقتها .. وحسبت زى اما اكون بقالى تلاتين سنه ماشى فى صحرا فى عز الشمس .. ولقيت شجره خضرا تحتها ميه وأكل .. حسبت زى اما اكون لقيت حاجه بتاعتى .. مش غريسه على .. إنت بجريتش الحب يا محمود ؟! ما تعرفش حاجه عن الحب ؟!.

عمود : والله يا خال .. الحب بتاع الصحرا والشجره الخضرا .. وهات لى معالله يقره .. دا مجربتوش .. أنا أصلى ما كلش كتير من جكاية سكون الليل .. والنسيم والحاجات دى .. أنا بقالى سنتين ماشى مع البنت و زكيه ولعه ه.. ومريحانى خالص.. كل ليله ألاقيها محضرالى الكاسين والعشا .. أشرب الكاسين وآكل اللقمتين .. وانام لى شويه .. وتاتى نازل .. حاجه ألسطه خالص .. لا تعب .. ولا عسرف .. ولو انها اليومين دول موغوشانى شويه .. من حكايه عسرف .. ولو انها اليومين دول موغوشانى شويه .. من حكايه

سيد : إنت ما تعرفش الحب ، الحب اللي انا بقول لك عليه ، بينك وبينه ما يين السماو الأرض ، الفرق بين اللي بتعمله ويين الحب ، زى الفرق يين الكلب اللي بينهش حتة لحمه ، والبني آدم السابح في روضة بين الزهر والبلابل .

محمود : والله يا خال ، انا با احب اللحمه .

سيد

 كل إنسان وله طبيعته ، وكل طبيعه ولها الحاجه اللي ترضيها ، إنت تحس انه يرضيك كاسين وحضنين ، أى كاسين وأى حضنين ، وانا با احس انه يرضيني مجرد صوت أو كلمه أو لمسه ، بس من مخلوق معين وإنسان مخصوص ، يمكن يمر على العمر بطوله وانا مش لاتيه ، ويمكن يخلص العمر واخرج من الدنيا وانا بقول مع اللي قال و عبثا خلقت ، ولكن دلوقت حسبت ان انا ما تخلقتش عبث ، وان فيه حاجه تستاهل الحياه والوجود ، وان العمر ما راحش ، ومش حا يروح أو نطه ، حاسس ان انا لاقيت الحاجه اللي اتخلقت علشانها ، ولو خلصت الحياه بعد كده ، مش حاندم .. لأني شاعر اني خدت اللي انا عايزه منها .

محمود : ديهده ، ديهده ، إيه دا كله ؟! الظاهر انك واقع قوى !!.

سيد : قوى ، قوى ، قوى ، إذا كان الحب اسمه في لغتك وقوع .

محمود : ومين هي اللي عملت فيك كده ؟! قوللي مين هي دى بنت الأروبه علمود علمان اشوف تستاهل كل اللي بتقوله عليها والالأ ، مين هي دى صاحبة العيون السود اللي و يصرعن ذا اللب ، أعرفها انا ؟!.

سيد : أيوه .

محمود : وشفتها ؟!.

سيد : أيوه .

محمود: طبب يا أخي قوللي مين هي وريحني ؟ أ.

سيد : بهيه .

محمود : بهيه ؟ بنت أم عبده ؟.

سيد : أيوه .

محمود

: كده مره واحده ؟. يا نهارك اسود يا خال ، ودى تقدر عليها ، ازاى ؟! البنت من ناحية الحلاوه حلوه ، بت زى اللوز ، بس جد قوى ، وانا ما احبش الجد ، وما احبش الهوى العذرى ، وما تنساش انها بنت ام عبده كان ، يعنى ما يمكنش تقدر تقرب لها ، دى ساكنه فى منطقة الخطر ، فى المنطقه الحرام ، ودى وصلت معاها لغاية إيه ، حب من جانب واحد زى عوايدك ، من بعيد لبعيد ، والاحصل حاجه ؟!.

سيد : فضلت مده طويله ، والحب من جانب واحد وانا سعيد بيه جدا ..

كل اللي أتمناه انى أنحها بالليل واسمع صوتها وما كانش عندى فكره أبدا انها يمكن تحس بى ، لغاية ماليله من ذات الليالي قعدت ادندن أنا بالناى ، فدندنت هى معايا ، وبعدين في الآخر رفعت راسها لفوق وضحكت وشاورت بالسلام .

محمود : وعملت إيه انت ؟.

مبياد

: حسيت ان انا مش ماشي على الأرض ، حسيت ان انا بطير في السما ، حسيت ان الدنيا مش سايعانى ، ما تتصورش أد إيه تكون سعادة المحب لما يُحس ان اللي ببحبه ميزه من دون الناس ، وإنه خصه من دون الخلق دول بابتسامه أو بإشاره أو بكلمه ، سعاده عجيبه جدا ، وبقيت بااحس وأنا بستناها بالليل ، انها حاسه بيه ، وانها بتغنى لى أنا .

محمود : و بعدين فضلت كده تغنى لك بالليل وانت تصفر لها ؟ أمال إيه اللي خلاك صابح تسبسب أوى كده ؟.

: امبارح حسيت بخنين عجيب لها، وكان نفسى ادفع نص عمرى والمسها أو أمسك إيدها، فبعد ما خلصت الدندنه رحت متحرأ ومكلمها، قولتلها باللشويش، ان نفسى اشوفها... فضلت واقفه ساكته شويه وانا كأنى منتظر حكم بالإعدام لغاية في الآخر ما قالت لى انها ما تقدرش تطلع دلوقت، ولكن بكره الصبح بدرى حا تطلع لى الساعه ٢، (يرهف السمع) سامع حاجه؟، فيه صوت رجلين؟!.

محمود : (ينصت) لامش سامع .

سيد : (ينظر إلى المنبه) على العموم لسه فاضل عشر دقائق ، يا سلام ، تصور ان انا ما نمتش نص ساعه على بعضها طول الليله اللي فاتت .

محمود : ليه ؟! بخيخة الفليت ما هي محطوطه جنبك .

سيد : فليت إيه يا أخى ، أنا ما نمتش من الفرحه ، مش من الناموس ، أنا مش مصدق ان انا حاكلمها وحا سلم عليها ، أقول لها إيه مش عارف ، حضرت كلام كتير قوى عشان اقوله ، شعر ونثر ومواويل ، لكن انا عارف كل حاجه حا تطير من عنى ساعة ما اقف قدامها ، أنا باتلخبط قوام لما عينيها تيجي في عيني . . أظن يدوبك بقى لما استعد للخروج .

(يبدأ في رفع الأشياء المكومة وراء الباب) .

عمود : (منزعجا) إيه ده ؟! إيه اللي بتعمله ده ؟!.

سيد : بشيل الحاجات دى علشان افتح الباب .

محمود : (يسرع بإعادة الاشياء مكانها) إنت مجنون .. عايز تشيسل المتاريس والحصون اللي بندافع بيها عن كياننا .. عايز تزيل الخطوط الدفاعية وتسيبنا كده مكشوفين قدام الأعداء ؟.

سيد : الأعداء زمانهم نايمين في سابع نومه .. ما فيش في السطوح دلوقت الا الأحبه .

محمود : والله انا خايف من الأحبه بتوعك دول ليجيبوا لنا الكافيه .. خايف ليكونوا حلقاء مع العدو . ما بلاش يا خال خروج من الباب دلوقت .. خلينا مستورين .. أنا طول الليل احلم بالوليه ام عبده . وانها كبست علينا زى عزرائيل الموت .

سيد : طب بس ما تفسرش .. فال الله و لا فالك .

محمود: ما فسرش ازای .. وانت بنفتح علینا باب جهنم .. قال الباب اللی یجمود یجیلك منه الریح سده واستریح .. واحنا مش بیجیلنا منه ریح وبس .. بیجیلنا سموم .. هبوب .. عواصف .

سيد : يا ستار .. طب بس اخفيها سيره .. ندرن عليّه يوم ما اتلم على قرشين اسدد بيها الأجره المتأخره .. لاحطهم لها على أقدم برطوشه .. واخزأ حبابي عينيها .

محمود : قرشين ؟ منين دول ؟!. من القصائد .. والا من الأغالى ؟!.

سيد : يا سيدي ربك كريم . . يعني هوا احنا حا تفضل على طول كده

على الحديده . مسير الجواهر اللى فى الوحل ، يعرفوا الناس قيمتها . : طب وحياة أبوك . تسيينا من الجواهر اللى فى الوحل ، إذا كنا حا نقضل معتمدين عليهم ، حانتنا مدفونين معاهم فى الوحل . لا احنا طالعين و لا هم طالعين ، إحنا كل أملنا دلوقت فى او لاد الصرم اللى فى البلد يبعنو لنا حاجه .

سيد : لا .. أنا يُست منهم خالص . تلات تشهر ما يعتوش نكله . وهي الوليه أمك دى مش عارفه ان لها ابن بيتعلم ، ويهيص ، ويفرفش ، وأخ بيشقى ليل ونهار في الفن اللي ما حدش يقدره . (يأخذ في شيل الأشياء من وراء الباب) خلينا نخرج لحسن بدوبك فاضل محس دقايق .

محمود : (في است**اتة ويمسك بالأشياء)** ما يمكنش ، أنا قتيل الباب ده . سيد : أمال أخرج لها منين ؟.

: زى ما بتخرج كل مره .. من الباب الحلفى (يشير إلى النافذة الزجاجية) إحنا مش بقائنا شهر بننزل ونطلع على مواسير الميه ، زى النسائيس ، والوليه مش حاسه بينا . عايز تخرج من الباب وتضيعنا فى شربة ميه . بقلنا شهر متمتعين بالأوده ، والوليه مش قادره تقفشنا ، تصور لو اتلمت على واحد منا . حا تجيب خبره .. أنا سامعها امبارح من ورا الباب وهى بتقول لقرقر ، آه يا نارى لو أتلم على واحد منهم الضلاليه النصابين ، أربع تشهر ما يدفعوش الأجرة والنبى لاطلعها على جتهم .

سيد : يا ساتر !! سمعتها بتقول كده ؟!.

محمود

محمود

محمود : بودنی دی ، والواد قرقر الله یستره ، قال لها والله یا ست ما حد بیعتر لهم علی أثر ، أنا عارف دول اختفوا فین ، زی اما تكون الأرض انشقت وبلعتهم ، يمكن سافر م يجيبوا فلوس .

سيد : طب ودلوقت اخرج ازاى ؟! دى الحكايه كلها فاضل تلات اربع

دقايق و تطب .

سيد

محمو د

محمود : يعنى كان لازم تديملك مواعيد في السطوح ؟ لازم تحديد مواعيد الغرام ، في مناطق الخطر ؟.

سيد : أهو اللي حصل ، ما خطرش ببالي أبدا حكاية ام عبده دى ، أنا ساعتها كتت بحلق بأجنحة الحب في سماء السعاده .

محمود : طيب وحياة أبوك تخلى أجنحة الحب تنزلك لغاية تحت ، يا الله ورينا ، الشباك اهو ، ما دام حايف من المواسير .

: أنا مش خايف من المواسير ، هوا انا بعد الشهر اللي فات دا اللي خدت فيه السكه قياسه على المواسير ، بقيت انحاف من المواسير . لكن الفكره ان انا لما انزل تحت حاضطر اطلع تانى على السلم علشان الوصل للسطوح ، ولازم حا فوت عليها ، يبقى ما عملناش حاجه ، نبقى عملنا زى جحا لما قالوا له و دنك منين . اسمع انا حا خرج من الباب واللي يحصل يحصل . اوعى (يقذف بالأشياء بعيدا عن الباب) هى موته والا اكتر ، انا لو جت على شنقى لازم انحرج ، يقى معقول هى تطلع لى وتآيس وانا اقف زى الجبان ورا الباب ، خايف من امها ؟! اوعى يا شيخ بلا مسخره ، (قبدو جهية من مدخل السطح ويسمع وقع أقدامها) سامع ، الظاهر انها حت . يا سلام ، انا حاسس ان قلبي بيطب ، انا مش قادر اقف على رجلى ، مين يصدق ان انا حا كلمها و حط إيدى في إيدها ؟!

: (يدفعه) طب بس اخرج .. اخرج .. ان شاء الله حاتجيب لك الكافيه .. أنا يا عم حاخش في المخبأ اكمل نومي .. و لما تخلص من التحليق بأجنحة الحب في سماء السعاده .. ابقسي طب على صحيني .. اتفضل .

ر يدخل محمود أصفل السرير ويخرج سيد متسللا فيلمح بهية
 فيقترب منها مترددا) .

المشهد الثاني

سيد : (لنفسه) يا سلام . انا متهياً لى ان انا فى حلم . مش مصدق انها حقيقة بتحبنى وانها تخاطر بنفسها وسمعتها .. علشانى أنا .. دى نعمه ما استحقهاش .. دى سعادة انا مش أدها ، دا كرم من ربنا ما استهلوش . فيه فى الدنيا سعادة أكثر من سعادة انحب لما يلاقى نفسه محبوب .

(يصل إلى بهية فتبدو عليها الدهشة عندما تميزه)

بهية : مين ؟ اسيد افتدى ؟.

سید : أیوه أنا سید .. أنا .. أنا .. أنا مش عارف اقول لك إیه .. فیه حاجات كتیر قوى عایز اقول لها لك .. لكن محتار ابتدى ازاى .

بهية : (ما زالت في دهشتها) .. انت ؟! انت !!.

سید : أیوه أنا .. أنا عارف انك خایفه قوى .. عارف انك أول مره تقفى موقف زى دا 1. لكن أنا متأسف .. متأسف جدا .

بهية : لكن .. لكن ..

سيد : لكن إيه ؟! انت خايفه من إيه ؟.

بهية : أنا مش خايفه .. لكن .. أمال ..

سيد : أمال إيه ؟.

جهية : أمال فين محمود ؟!.

سيد : محمود ؟!.

جمیة : آیوه محمود .. کان لازم یقابلنی دلوقت .. امبارح باللیل بعد ما صفر بالنای قال لی اطلعی فقلت له انی ما اقدرش اطلع باللیل آبدا وادیت له میعاد دلوقت .

سيد : (**مرددا ف ذهول**) محبود ؟! عمود !!.

بهية : ماله ؟! هو جراله حاجه ؟!.

سید : (فی بأس شدید) أبدا .. أبدا ما جرالوش حاجه (لنفسه) أنا اللی جرالی .. انا اللی اتعلقت بأمل واهی .. أنا اللی اتحطم قلبی ، وضاع أملی .. أنا اللی طمعت نفسی بسعاده ما تخلقتلهاش .

بهية : مالك يا سيد افندى سكت ليه .. قوللي ا! طمني ! هو محمود جراله حاجه ؟.

سيد : أد كده بتخافي عليه ؟ إ.

بهية : طبعا . . طمني . . قوللي فيه إيه ؟1.

سيد : بتحبيه قوى ؟!.

بهية : قوى .. قوى .

سيد : بتعجبي فيه إيه ؟.

بهية : كل حاجه فيه .. أحب الهوا اللي بيتنفسه .. والأرض اللي بيمشي عليها .. من أول ما شفته حسيت ان فيه حاجه شدتني له .

سيد ؛ (لنفسه) أنا كان با احبك كده ، واكتر من كده لكن انتى مش حاسه بى ، وهو كان مش حاسس بيكى .. دنيا عجيبه .. تحب اللخبطة ؟!.

بهية : ما تقوللي يا أخى . . طمني . . فيه إيه ؟!.

سيد : ولا حاجه ، ولا حاجه أبدا .

بية : أمال ما جاش لبه ؟!.

سید : ما جاش لیه ؟ (لنفسه) أقول لها إیه ؟! أقول لها انه مش حاسس بیها ، أقول لها انه ماشی مع « زکیه ولغه » وانه ما یجبش الهوی العذری ؟! أقول لها ان أنا اللی با اعبدها و انا اللی کنت با اضرب لها النای ؟! لکن إیه الفایده ؟ هی بتحبه هوه .. مش بتحب النای .. ایه هی حبت النای علشانه هوه .. مش حبته علشان النای .. ایه الفایده لما احطم قلبها زی ما حطمت قلبی .. ما یمکش اخذلها ..

لأنى باحبها .. مقدرش اشوفها زعلانه . : ما تقوللي يا أخى .. ما جاش ليه ؟

بهیة : ما تفوالی یا انحی . ما جاس لیه ، سید : أیوه . ما جاش . علشان . علشان . علشان . . أصلـه . . تعبان شویه .

بهية : ماله ؟ فيه إيه .. تعبان ازاى ؟.

سيد : لا .. ولا حاجه .. بس عنده شوية ..

بهية : شوية إيه ؟ انطق !.

سيد : (لنفسه) شوية إيه .. ابن الصرمه ، دا انا سايبه زى الحصان (لبهية) عنده شوية مغص .

بهية : مغص ؟ مسكين .. لحسن يكون عنده المصران الاعور .. لازم تجيب له دكتور ، ازاي تسيبه كده ؟.

سيد : لا .. لا .. ما فيش أعور ولا حاجه ، ما فيش لزوم للدكتور .. دا مغص بسيط .

بهیة: بسیط ازای ؟! ازای تسیبه کده ، مش حرام علمیك .. لازم اشوفه .

سيد : تشوفيه ؟ لا . . لا . . ما فيش لزوم . . ما فيش داعي .

بهية : لازم اطمن عليه (تتقدم نحو الباب) .

سید : (لنفسه) یا نهار اسود .. دلوقت تعرف کل حاجمه (سادا الطریق إلی الباب) یا ستی اطمنی .. دا زمانه بقسی کسویس خالص .

بهية : لازم اشوفه بعيني .

سيد : طيب بس استنى شويه .. اما ادى له خبر .. استنى ثانية واحده (يندفع إلى داخل الحجرة ويغلق الباب وراءه ، ويمد يده تحت السوير ليخرج محمود) محمود ، محمود ، قوم قوام .

محمود : (في ذعر من أسفل السرير) إيه .. إيه .. فيه إيه ؟ هي جت ؟

هي جت؟.

سيد : هي مين دي .

محمود : أم عبده ؟.

سيد : لا ما جتش ولا حاجه .. بس اطلع بسرعه ، بسرعه .. (يخرج محمود)نام فوق السرير .. يا الله يا أخى اتغطى بسرعة ، وقول آه .

محمود : أقول آه ازاي ؟.

سيد : قول آه . الله يخرب بيتك . انت عندك مغص .

مخمود : هو إيه أصله ده ؟! أنا ما عنديش مغص !.

سيد : عندك مغص .. قول آه .. قول يا جدع .. قول وبس .

محمود : آه .. آه .

(تدخل بهية) .

بهية : ماله .. مالك يا محمود ؟.

سيد : ما تكلمهش كتير لحسن المغص اتحرك عليه .. لكن ان شاء الله حا يروح حالا .. دا برد بسيط .. ما فيش خوف منه .

(محمود ينظر بطرف عينيه إلى بهية في دهشة وإعجاب فيقرصه سيد فيصيح آه) .

بهية : مسكين .. سلامتك .. ألف سلامه .

سيد: يا الله بينا بقي .. لحسن حديطب.

بهية : لازم تحط له حاجه سخنه على معدته .

سيد : أيوه .. أيوه .. أنا حا اعمل له اللازم .

(يجرها من يدها نحو الباب) .

بهية : لازم تجيب له دكتور .. انا حا طلع اطل عليه بالليل .. لما تيجوا تناموا .

سيد : طيب . . طيب . . بس يا الله بينا بقى .

بهيه : خد بالك منه قوى ، علشان خاطرى .

سيد : علشان خاطرك ؟! علشان خاطرك حا اعمل كل حاجه .. كل حاجه في الدنيا .. مستعد اعملها علشانك .

تخرج بهیة ، ویعود سید مطرقا حزینا ویرتمی علی مقعد ویطرق
 برأسه علی کفه ویتنهد) .

المشهد الثالث

محمود: (مستمرا في تأوهه وقد أخفي رأسه تحت الملاءة) آه . . آه .

سيد: بسخلاص . كفايه . (يتأوه في يأس) آه .

محمود

محمود : (يوفع رأسه من تحت الملاءة) هيه خلاص مشبت . (يقفيز واقفا) إيه الحكايه ؟ فهمني ؟! ايه اللي جرى ؟!.

سيد : (وهو مستمر في إطراقه وإخفاء وجهه بكفه) و لا حاجه .

محمود : ولا حاجه ازای !! كل ده وولا حاجه ! تصحينی من عز النوم ، و تجرجرنی من تحت السرير و ترمينی فوقه ، تقوللی قول آه ، آه ، و أسألك دلوقتی تقوللی ولا حاجه ، فهمنی إیه اللی حصل ؟ إیه اللی دخلها هنا و إیه اللی خلاك تقول لها ان انا عندی مغص ، و انا صاغ سلم ، فهمنی یا خال ، إیه اللی جری ؟!.

سيد : (في ضيق ويأس) قولتلك يا أخي ولا حاجه ، سيبني دلوقت .

: ما يمكنش اسببلك الالما اعرف إيه اللي جرى ، وريني وشك كده (يزيج كف سيد عن وجهه ، فيرى عبرات صاحته تنساب على خديه ، فيبدو عليه التأثر والدهشة) الله إيه ده ، انت بتعبط . مالك يا خال ؟! قوللي جرى ايه ؟!. قوللي الحقيقه . إيه اللي زعلك كده . أنا عمرى ما شفتك بتعبط أبدا . كلمني يا خال ، أنا ما طيقش أشوقك كده ؟ قوللي إيه اللي حصل . أنا مستعد اعمل لك كل حاجه علشان اضيع زعلك .. بس فهمني .

سيد : (يتنهد تنهيده طويلة) ولا حاجه . ما فيش حاجه .

محمود: مش ممكن ، لازم فيه حاجه حصلت.

سيد : حصل حاجه مالهاش علاج ، لاانت ، ولا انا . ولا أى واحد يقدر يصلحها . سخريه بسيطه من سخريات الدنيا . عبث هايف من عبث الأقدار ، (واقعا كتفيه مادا شفته السفل) حا نعمل فيها إيه ، ما فيش غير اننا نستحملها و نسكت .

مجمود : إيه هوا ده ؟! أنا مش فاهم حاجه أبدا . انت صابح مبسوط وعمال تسبسب في شعرك وتهيأ في نفسك وبتقول اتك بتحلق بأجنحة الحب في سماء السعاده . وبتقول ما فيش على وش الأرض مخلوق أسعد منك . لأنك محب محبوب . وعندك موعد حب ، وخرجت علشان تقابل اللي بتحبها وتحبك .

سيد : كنت فاكر كده .

محمود : وبعدين ؟ ا.

سيد : وبعدين طلعت انها بتحب واحد تالي .

محمود : واحد تانى ؟! أمال كانت بتشاور لك وتضحك لك . وادتك الميعاد ليه ؟

سيد : ما كانش ليه دا كله .. كان لواحد تاني .

محمود : واحدتانی ۱۴. ازای ۹۱.

سيد : كانت بتحب واحد تانى ، وافتكرت ان اللى واقف في الضلمه وبيصفر لها بالناى هو الشخص اللى بتخبه ، فشاورت له وسلمت عليه ، وادّت له ميعاد .

محمود : وعرفته يبقى مين ؟أ.

سيد : يبقى اللي يبقاه ؟

محمود : ازاى الكلام ده ، مين ابن الأروبه دا ، وانا اجيب لك خبره ،

أمحيهولك من على وش الأرض ؟.

سيد : ما فيش لزوم .

محمود : ما فيش لزوم ازاى ! لازم اعرفه ؟.

سید : ضروری یعنی ؟.

محمود : طبعا .

سيد : انت ؟.

محمود: أنا ؟. أنا ؟. (مستغرقا في نوبة من الضحك) ، أنها ؟. مش

ممكن ، انت بتضحك على يا خال ؟.

سيد : باكلمك جديا محمود.

محمود : قول كلام غير ده يا خال !!.

سيد : دى الحقيقه ، إنت عارف أنا بحبها ازاى ؟!.

محمود : ميت صبابه .

سيد : أهي هي كإن كده .

محمود : بتحبني أنا ؟ ليه ، وبتاع إيه ؟! وعلشان إيه ؟!.

سيد : اللي حصل .

سيد

محمود : لكن أنا ما عنديش أى شعور ناحيتها ، دى مش النوع اللي يدخل مزاجى أبدا ، دى واحده شريفه وعذراء ، وأنا لا أحب الشرفا ،

ولا العداري .

ن ماهى دى المصيبه .. ماهى دى السخريه .. لو كنا احنا الاتنين بنحبها وانت اللى فرت بيها كانت بقت حاجه معقوله .. لكن أنا أحبها ، وهى مش حاسه بيه ، وهى تعبدك ، وانت مش حاسس بيها ، دى سخرية القدر اللى على أصولها .. دى مهارة الأقدار فى تعذيب الإنسان وإيلامه .. لكن على العموم أنا مش عايزها تحس باللى أنا حاسس بيه .. مش عايزها تتصدم الصدمه اللى انا الصدمة اللى انا الشعور ده اتصدمتها . مش عايزها تتألم زى ما أنا بتألم .. أنا بحرب الشعور ده

وعارفه ، وأنا لغاية دلوقت با احبها ، وحا فضل احبها طول عمرى ، وما اقدرش افكر انها تتألم .. ما طيقش .

محمود : (مندهشا) إيه يا خويه ده ، والعمل ؟.

سيد : العمل ما تكسفهاش .. زى ما كسفتني ؟.

محمود : يعني إيه ؟!.

سيد : يعني عايزك تحبها ، وكان تخلص في حبك لها .

محمود : إيه ؟! أحبها ؟! واخلص ف حبى لها ؟! إيه أصل ده يا خال ؟! انت جرالك حاجه ؟!.

: اسمع يا محمود . . أنا باتكلم جد . . البنت دى مش بني آدمه عاديه ، دى ملاك ، وهي بتحبك حب ، ما تستهاوش أبدا .. لو كانت، بتحبني ربع الحب اللي بتحبه ولك ده .. كنت حاسبت ان انا أسعد مخلوق على ظهر الأرض ، ولو كنت اعرف ان الحب دا ممكن الإنسان ينقله بسهوله كنت نقلته ، لكن انا عارف ان ما فيش فايده . أنا يائس من حبها .. لكن حاسس ان انا عايز اسعدها ، ولو كنت انا أقدر اسعدها بنفسى كنت سعدتها لكن المصيبه اللي يقدر يسعدها انت ، وعشان كده لازم تسعدها .. لازم تحيها ، لازم تكون كويس معاها علشان تستاهل حبها .. لازم تبقى إنسان جد ، وتستقم في الدراسة علشان تبقى شخص محترم ولك مركز . : يفتح الله .. أنا لا انا عايز احبها ولا استاهل حبها .. أنا مبسوط كده خالص ، كفايه على « زكيه ولعه » على أد إيدى ، وبسطاني ومهيآني ، والأشيارضا . . ابعد عني يا خال وحياة ابوك أنا لا بتاع حب ، ولا بتاع جد .. انت عارف من زمان ان انا ما ليش في الكلام ده . . وما تنساش ان البت زكيه نفعانا برضه لولاها كنا متنا من الجوع ، أهي برضه بتنفعنـا بقـرشين بأكلـتين ، وحكايـــة

الاستقامه في المدرسه دي عارف معنتها إيه ؟ الى انجح واتخرج،

عمو د

وتنقطع الفلوس اللي بيبعتوها لنام البلد ، ولا يبقى عندنا مصاريف مدرسه نضيعها ، ولا رسوم امتحان نتشبرق بيها ، ولا تمن كتب نسدد بيها ديوننا ، واقعد معاك كده على باب الله . لا شغله ولا مشغله ، انت عارف ان انا بتاع شغل ؟ وحياة أبوك يا خال سيبنا من السيرة دى ، خلينا كافيين خبرنا شرنا .. كفايه ام عبده واللي عاملاه فينا ، انت راجل بناع حب .. حب زاى ما انت عايز ، ما حدش قال لك حاجه .. لكن تجرجرني معاك ، وتقول عايزك تجب ، وعايزك تبقى جد ، وتستقيم .. كفايه كده . يفتح الله يبنى وبينك .

(يسمع فجأة صوت صياح فراخ وضجة في حجرة الفراخ .. ثم يفتح باب حجرة الفراخ ويخرج قرقر من الحجرة وهو يسب ويلعن محاولا حبس الفراخ في الغرفة وفي يده قلة ، وفي الوقت نفسه يصيب الذعر محمود وسيد فيقفان ويجمعان الأشياء وراء الباب) .

محمود : أنا مش قلت لك انا طول الليل احلم بيها .. هات .. هات .. حط الترابيزه كان .

سيد : بس يا أخينا .. كفايه كده .. هي كانت دبابه .. كفايه خالص . محمود : والعن من الدبابه .. دى صاروخ .. دى ديناميت ، يا باى ، أنا يا عم حا خش المطبخ .. كان فيه حتة جبنه رومي قديمه . اياك يكون الفار ساب لنا منها حاجه .

سيد : وانا اما خبش اتوضا . (يخرج الاثنان من البناب المؤدى للمطبيخ ويقف قرقس فى السطوح) .

المشهد الرابع

قرقر

: (بعد أن ينتهي من غلق الباب على القراح) يا ناس يا هوه ، يا عالم ، حد في الدنيا يرضى بكده ، طول الليل ما اشوفش النوم . أنا قرقر المسيَّط، ويحكم على الزمان، وانام في عشة فراخ !! لكن معلهش ، علشان يرضى المنت ام عبده ، وعلشان ينبسط شيخ السو ، الشيخ عجايب ، اللي طول النهار يزلط ف حمام وفراخ وكباب ، ويعزم له تعزيمتين ويتهز له هزتين ، وآل إيه يطلع العمل ، ياخي عملك اسود ومهبب على دماغك ، أنا قرقر ، انظرد من أودتي ، واترمي في أودة الفراخ ، وطول الليل ديك الكلب ده ، ينقر لي في بطن رجلي .. وانا بغير من رجلي موت . خلاني بايت مسمخسخ م الضحك ، حد في الدنيا يقول كده ، واحد ما ينامش من كتر الضحك ، طول الليل سهران اضحك ، وانا حالي يستاهل البكا ، وكل ما عيني تغفل شويه ، والا افكر شويه يزعل ، ويروح نقرني في بطن رجلي أروح مفرهدم الضحك . إلَهي تنقصف رقبته الشيخ زفت ، اللي نايم يشخر في الأوده وسايبني اناقر طول الليل مع الفراخ . ويا ريت بلاق ثانيه استريح فيها بالنهار ، الاطول التهار ما تفرغلوش طلبات ، اطلع يا قرقر ، انزل يا قرقر ، روح يا قرقر ، تعالى يا قرقر ، وياريت طلبات زي طلبات البني آدمين ، الاطلبات لها العجب، وآخر تقليعه طالع لى فيها حكاية القله، علشان ادوخ ، علشان اموت ، أنا عارف هو مشحا يستريح الالما يجيب أجلي . (يضع القله على كف يده ويتحرك في السطوح وهو يوازنها . تدخل عديله الخادمه وقمه حملت الغسيسل وكسيس المشابك) .

•	
: إلْهِي يعدلها لك ، إيه اللي انت عامله دا يا واد يا قرقر ، انت حا	عديله
تشتغل مع بتوع النقرزان ؟!	
: ﴿ يَقِفَ وَيُمِسُكُ الْقَلَمْ مِنْ عَنْقُهَا ﴾ اصطبحي وقولي يا صبح ، أنا	قوقو
مش ناقصك ، إيه طلعك كده من النجمه ؟!	
: أنشر الهدمتين اللي غسلتهم امبارح العشا وبيتهم طول الليسل	عديله
منقوعين ، إذا كنتش اعمل كده ، حا يضيع مني النهار .	
: ما يضيع ، يعني وراكي إيه ، مؤتمر سان فرنسسكو .	قرقر
: سان إيه ؟! والله اتعدلت ولسانك مشى ، الله يرحم زمان ، أيام	عديله
التريترو ، وجنينة الحوانات ، بقي انا ورايا إيه ؟ الشغل اللي مطربق	
على دماغي ده كله وورايا إيه ؟! الكنس والمسح والغسيل والطبيخ	
والمتاكفه والمناقره والمهابره، كل ده وماوراييش حاجه ؟ ياخي خلى	
حد يقول كده غيرك ، ليه هوا اما زيك ؟ طول النهار قاعد لي	
فوق السطوح زي تنابلة السلطان لا شغله ولا مشغله .	
: اللي هوا انا ؟ طيب معلهش ، انشرى الهدمتين وانزلي ، خليه نهار	قرقو
يفوت أنا اللي قاعد فوق السطوح ، ولا شغله ولا مشغله	
حاقول إيه ؟	
(يضع القله على كفه ثم يأخذ في السير بها كما كان يفعل) .	
و (في دهشه) : هو إيه أصله ده ما تفهمني بس إيه اللي بتعمله	عديله
انت جرالك إيه ؟	
: مالكيش دعوه انتي مش بتقولي لا شغله ولا مشغله سيبني	قوقر
بقى ف حالى كفايه القرف اللي انا شايفه .	
: طيب ما تزعلش حقك عليه بس قوللي إيه اللي بتعمله ده ؟	عديله
: زى مانتى شايفه كده باتمرن .	قوقر
: تشمرن على إيه ؟	عديله
: ع الشغل .	قوقو

عدیله: شغل ؟! سلامات یا شغل !! شغل إیه اللی بتتمرن علیه ده یاسی قرقر . یا ابن ام قرقر . تکونشی بتشتغل فی سیرك و لا حناش عارفین ؟

قرقر : ومش عارفين ليه ؟ ما هو قدامكوا اهو .. على عينك يا تاجر .. فيه سيرك اكتر من السيرك اللي بشتغل فيه ده .

عديله : سيرك إيه ؟

قرقر: سيرك أم عبده . . أم عبده و الشيخ عجايب .

عديله : أنت بتهزر ؟

قرَق : بتكلم جد .. شوفى شغلك بقى خلينا نشوف شغلنا . (يعاود سيره بالقله) .

عدیله : (مغتاظه) بقی اسمع بقی یا قرقر ، والنبی واللی نبی النبی نبی .. والولی واللی ولی الولی ولی . وال ..

قرقر : (يقف في ضيق) إيه بس عايزة إيه بلا نبي بلا ولى ؟

عديلة : إذا ما كنتش تقول لي إيه اللي بتعمله ده .

قرقر: حاتعملي إيه ؟

عديله : حارقع بالصوت .

قرقر : مفيش لزوم ، حاقول لك .

عديله : قول .

قرقر : بقى انت عارفه ان الشيخ عجايب مفهم ستك ام عبده ان معمول لها عمل .. و ان العمل ده هو اللي مطفش نوح افندى منها .. واللي عغليه مش طايقها .

عديله : معقول . . له حق .

قرقر : حق .. يا اخى انشا الله ينكسر خُقك .

عديلة : ان شاالله انت .

قرقر : هي ستك ام عبده ناقصه عمل . ، دي هي نفسها عمل . ، دي مش

تطفش نوح افندى ويس .. دى تطفش بلد .. أنا مش فاهسم الحكومه تايهه عنها فين .. دى لو سابوها فى القنال .. حا تطفش الانجليز فى ليله .. دى كانت تجيب لنا الجلاء فى ثانيه .

عديلة : المهم ، خلينا في اللي احنا فيه هنا ، بتقوللي ان الشيخ عجايب مفهم ستى ان معمول لها عمل ؟

قرقر : أيوه .

عديلة : وبعدين ؟

قرقر : ولا قبلين ، عايز يطلعه .

عديلة : له حق لازم يطلعه .

قرقر: بس دا حا يطلعه على عنيه .

عديلة : وانت مالك .. إيش حشرك ؟

قرق : مالى ازاى ؟ ما هو كله على دماغى ، هوا بيخلينى اون ثانيه ، أنا المسئول عن كل الطلبات البايخه اللى بيطلبها ، ما هو لو كان العمل دا حا يطلع كده زى كل حاجه ما بتطلع ، كانت هانت ، الا العمل بتاع ستك ام عبده مش عايز يطلع ، الا يحاجات ما وردتش ، مالهاش نظير ، ما سمعتش عنها عمرى .

عديلة : زي إيه كده ؟!

قرقر : خدى عندك ، أول حاجه طلبها ، جدى احول .

عديلة : وماله .

قرقر : وماله ازای ؟!

عديلة : هات له جدى أحول .

قرقر: وهوافيه جدى احول يا مغفله ؟.

عيدلة : يوه ، ما فيش ليه ، هو مش فيه بني آدم احول ؟

قرقر :فيه.

عدیلة : بیقی لازم فیه جدی احول ، زی ما فیه بنی آدم اعمی وجدی

اعمى ، وبني آدم اعور و جدي اعور .

قرقر: أصل الاعمى والاعور دى فى إيدينا ، أقدر أجيب له جدى سلم واخزق له عينه يبقى اعمى ، والاعين واحده يبقى اعور ، لكن الاحول ده أحوله ازاى ؟!

عديلة : زى الناس .

قرقر : يعني إيه زي الناس ؟!

عديله : يعنى جيب له معزه على يمينه ومعزه على شماله تبص تلاقيه يحول ، هو البنى آدم بيحول من إيه ، من كتر البصبصه يمين وشمال ، من فروغية عينه .

قرقر: طب افرضي طلع جدي ، تقي ، جدي مطمطم ١٩

عديلة : حايحول أكتر .

قرقر: طب انتهينا م الجدي ، والفرخه الزعلانه ، دي أجيبها له منين ؟!

عديلة : فرخه إيه ؟

قرقر : زعلانه ، ابن الرفضى ، لازم يعقدها ، يعنى إذا كانت مبسوطه ما تنفعش ، ما يطلعش العمل ، أجيب له الزعلانه دى مسنين بذمتك ؟!

عديلة : بسيطه خالص .

قرقر: برضك أجيب لها ديكين ؟!

عديلة : لأديك واحد.

قرقر : تقوم تزعل ؟

عديلة : حاتنبسط في الأول .

قرقر: تبقى مش نافعه .

عديلة : أصبر عليه شويه .

قرقر : صبرنا.

عديلة : تجيب لها ديك وتسييه معاها .

قرقر: سبناه معاها .

عديلة : حاتفرفش.

قرقر : فرفشت .

عديلة : تكبس عليها بتلات فرخات ، مره واحده . وتسيبهم مع الديك .

قرقر : حاتزعل؟

عديلة : تزعل ويس ، دى يمكن تنزل عليها نقطه .

قرقر : يا سلام عليكي يا بت يا عديله ، ياللي مفيش منك ، يسلم بقك ، (يضع القله على كفه ويعاود السير) عن إذنك بقى اما اكمل الشغل .

عديلة : (في غيظ) ينيلك ، بقى بعد دا كله ، وما تنوليش بتعمل إيه ؟!

قرقر: أيوه والله كنت حانسي ، حا اقول لك اهه .

عديلة : قول .

قرق : بقى يا ستى .. الراجل الضلالي طول النهار ما كفاهوش الطلبات المعقده اللي بيطلبها ، واللي مدوخني بيها ، لا ، آخر المتمه ، قال ان العمل ده مشحا نعرف هو موجود فين الا بطريقة القله .

عديلة : طريقة القله ؟

قرقر: اينوه يا ستى طريقة القله.

عديلة : و ذي تبقى إيه دي كان ؟!

قرقر: قال نملا قله للآخر .

عديلة : وبعدين ؟!

قرقر : واحد يحطها على كفه ، كده .

عديلة : بسيطه .

قرقر: لأمش بسيطه ، يفضل فارد دراعه بيها .

عديلة : حاجه سهله ، انا اقدر اعملها .

قرقر: يا ستى اصبرى على لما اكملك.

: طيب كمل ، أنا أصلى عار فاك قليل الحيله . عديلة

: يفضل فارد دراعه كده ، وماشي بيها ، ماشي ، ماشي . ماشي . قر قر

(يأخذفي السير).

: وبعدين . عديلة

: يفضل ماشي ، ﴿ وَيَأْخُذُ فِي السيرِ ﴾ . قر قر

: خلاص ، فهمنا ، وآخرة المشي ؟! عديلة

: لحد ما تتدغدغ رجليه ، ويتقطم وسطه . ويتخدل دراعه ، وتقع قر قر

القله تتكسر.

: طب وبدال ما يفضل ماشي لغاية ما يجراله كل اللي حا يجراله ده عديلة مايدشدشها من الأول ويريح نفسه .

> : ما ينفعشي ، لازم يسيبها لحد ما تقع من نفسها . قر قر

> > : طيب وقعت من نفسها . عديلة

: يطب وراها في الأرض ، والحته اللي تقع فيها ، يفضل يحفر فيها لغاية قر قر ما يطلع العمل.

: يا سلام ، أما طريقه مدهشه ، وجربتوها دي يا قرقر ؟! عديلة

قر قر

قر قر

: ازای .. احکی لی احکی ، حصل إیه ؟ا. عديلة

: خرجت أول امبارح العصر . بعد ما مليت القله لتمت عينها ، وفردت إيدى بيها كده ، ونزلت السلم . وخرجت من الباب ، أقول لك الحق ، أنا كنت مكسوف وعارف ان الناس حا تضحك عليه ، وقلت أخرج بيها كده قدام الست ام عبده ، أهو برو عتب ، وبعدين أدشها في أقرب حته بدل ما مشى بيها في الشارع وافرج الناس عليه ، لكن لما نزلت الشارع الفار لعب في عبي ، وقلت يمكن تكون الحكايه صحيح ، ولو وقعتها بالعنيه يمكن ما يطلعشي العمل ، قولي الشهامه مسكتني وضميري أنبني وقلت يا واد امشي

واستحمل .

عديلة : لك حق ، طول عمرك شهم .

قرقر : مشیت ، من شارع السد علی میدان السیده ، والعیال حوالیه
والنقوره دایره ، شقع بقع یارب تقع . و کل من هب و دب یرقعنی
بکلمه ، لحد ما وصلت شارع خیرت علی عابدین ، حسیت ان
دراعی خلاص ابتدا پتصلب و کتفی حا ینخلع ، ضغطت علی
نفسی . وفضلت ماشی ، ماشی ، لغایة ، ما حسیت زی اما یکون
دراعی انشل ، ما بقیتش حاسس بیه خالص ، ومره واحده ، القله
طبت انکسرت .

عديلة : وبعدين، عملت إيه ؟!

قرقر : رحت طابب وراها على الأرض ، ورافع الفاس اللي شايله في إيدى التانيه ، وهات يا حفر . فضلت احفر ، احفر ، احفر .

عديلة : لغاية ما طلعت العمل ؟

قرفر: لا ، لغاية ما جم العساكر وودونى القسم ، وبيتونى ليلمه على الأسفلت .

عديلة : له ؟!

قرقر : لأنى كنت بحفر في وسط ميدان العتبه ومعطل حركة المرور كلها .

عديلة : يا خساره ، والعمل ؟!

قرقر: عمل اسود ، لازم سفلتو فوقوا تاني .

عديلة : والشيخ عجايب قال لك إيه ؟!

قرقر : ولا حاجه .. هو خاسس عليه إيه ، قاللي اطلع تاني مره ، وامشي حسب القله ما توديني يعني مش زي ما أنا عايز .. أميل مطرح ما تميل .. مالت في عطفه ادخل في عطفه ، مالت في زقاق ادخل في زقاق ، مخلت في بيت ادخل في بيت .. عشان المره دي .. مش يودوني قره مبدان على طول ، إياك

ينبسط الشيخ السو .. إياك يرضيه ، أنا عارف هو مش حا يستريح الا لما يجيب داغى . لكن أنا مش حا سكت له ، مش كل الطير اللي يتاكل لحمه ، لازم اجيب داغه قبل ما يجيب داغى .. لازم اطربقها عليه .

(يندفع فى ثورة من الغضب ويرقع يده بالقلة ويهوى بها على سقف الحجرة التى ينام فيها الشيخ عجايب فتنكسر القلة وينزل ما بها من مياه على الشيخ عجايب من خلال فتحات السقف الخشبى ويسمع استغاثات الشيخ عجايب وتأففه من المياه النازلة فوقه) .

عديلة : يا منيل على عينك ، انت اتجننت والا جرى لعقلك حاجه .. الراجل يقول إيه دلوقت ؟!

قرقر : ولاحاجه .. نطره .

عديلة : نطره ؟!

قرقر: أيوه نطره . حاجه عجيبه ، السما ما بتنطرش أبدا ...

عديلة : والسما اللي نطرات دي مش بتنظر في كل حته ؟!.

قرقر: لا . . بعض ساعات تنظر في حته وما تنظرش في الحته الثانية .

عديلة : يعنى النطره ما عجبتهاش حته تنزل عليها في كل الدنيا الواسعه دى غير أو دة الشيخ عجايب ؟

قرقر : أيوه .. لأن ده السطح البارد الوحيد اللي قابلته .. دى نظريات علميه ما تفهميهاش .. حاجات عرفتها زمان لما كنت فى كتاب الشيخ زكى ، وعلى العموم علشان نسبكها عليه نعمل لها شوية تحابيش .

(يخرج من جيبه بطارية ثم يضيئها عدة مرّات سريعة متوالية) دابرق (يدق ضربات قوق سطح الحجرة أشبه بالرعد) ودارعد (يصفر صفيرا أشبه بالريح) ودي العاصفه . . أظن بعد كده يبقى ما لناش ذنب ، وإذا ما صدقش انها نطره .. عنه ما صدق ، أنا عملت اللى عليه .. يعنى هي السما بتعمل إيه أكتر من كده . (يسمع صوت أم عبده من بير السلم) .

أم عبده : بت يا عديله .. بت يا عديله ، انت نمتى فوق والا إيه ؟!.

قرقر: يا حفيظ .. زمارة الخطر .

عديلة : أيوه يا ست ، أصل الحبال كانوا وسخين قوى وكنت بامسحهم . (يسمع صوت أقدام صاعدة بالقبقاب) .

قرقر: يا نهار اسود، دى طالعه .. القضا المستعجل طالع .. اخلصي يا عديله ، دلوقت تخش للشيخ عجايب علشان يرقبها .. فتعرف اللي حصل ، وتشوف القله المكسوره اسمعي أنا لازم استخبى .

عديلة : خش في أو دة الفراخ .

قرقر : ما فیش فایده .. حا تدور علیه و تقفشنی ، اقول لك .. أحسن حاجه أخش عند الجماعه دول (یشیر إلی حجرة سید و محمود) .

عديلة : لكن دول ساكين الأودة وبقالهم مده ما بيجوش .

قرقر: لا أنا عارف انهم موجودين بس بيطلعوا على مواسير الميه وبيدخلوا من الشباك علشان ام عبده ما تقفشهـمش وتطالبهم بالأجــرة المتأخره .

عديلة : طب وحايرضوا يفتحوا لك ؟!

قرقر : طبعا .. إحنا فيه بيننا وبين بعض عمار ، فيه موده .. انا وهم على ام عبده . (تنهمك عديله فى النشر ويستمر صوت القبقاب فى الاقتراب) .

(يطرق قرقر الباب وف هذا الوقت يكون سيد خارجا من دورة المياه يجفف وجهه استعدادا للصلاة) .

(سيد يقف منسمرا في حالة فزع .. قرقر يعاود الطرق دون أن
 يجيب عليه أحد) .

قرقر : افتح یا سی سید افندی .. افتح انا قرقر ، افتح بسرعه .. انا فی عرضك .

(سيد يزيج ما وراء الباب ثم يفتحه ، فيدخل قرقر ويغلق الباب
 وراءه) .

سيد : إيه ؟ فيه إيه ؟.

قرقر: القضا المستعجل طالع.

سيد : القضا الستعجل ؟

قرقر: أيوه أم عبده.

سيد: يانهار اسود ؟! طالعه هنا ؟

قرقر : أيوه ، في السطوح . . طالعه للشيخ عجايب عشان بيخرها ويرقيها و يلبسها الحجاب .

سيد : طيب وانت خايف ليه ؟!

قرقر : أصل عملت في الراجل خازوق ، وخايف لا تطلعه من عنيَّه ؟

سيد . : طيب اقعد لما اصلي ركعتين .

(سيد يبدأ الصلاة ، ويجلس قرقر وراء الباب ينظر من خلال الثقب) .

(تظهر أم عبده صاعدة من السلم في السطوح).

المشهد الخامس

أم عبده : مش خلاص والاحاتفضلي تنشري في الهدمتين طول النهار .. أمال فين قرقر ، لسه ما صحيش ؟!

عديلة : ما اعرفش والنبي يا ستى ، انا من ساعة ما طلعت ما شفتلوش أثر .

أم عبده : لازم لسه بيشخر .. هوا دا عنده دم ، عايز الخدامين بتوع أبوه يصحوه ، لازم ينام لى لغاية الضحى . (تقترب مسن عشة

(الفواخ) واديا قرقر ، انت يا واديا قرقر ، قوم فز اصحى . . هى نومة أهل الكهف ، قوم يا الله (لا يجيب عليها أحد.. تفتح التقفيصة وتحد رأسها إلى الداخل فلا ترى غير الفراخ) ما هواش نايم جوه . . هوا راح فين يا بت ؟!

علىلة : انا عارفه يا ستى .. هوا حد عارف له قرار ، أهو داير ينط زى فرقع لوز .

أم عبده : يمكن نايم مع الشيخ عجايب ، مع ان انا قلت له يسبب له الأوده و لا يعتبش جواها علشان ما يضايقش الراجل و يعطله .. الراجل و راه شغله .. طول الليل ما يبطلش قرايه و كتابه و تعزيم .. ربنا ينجحه ، و يطلع لى العمل اللي ملبش لى الراجل ، ومهججه .

(تنقر بسبابتها على باب حجرة الشيخ عجايب) .

الشيخ عجايب : (من الداخل) ها .. مين ؟

أم عبده : (بصوت رقيق) أنا .

الشيخ عجايب : (لا يسمع) مين اللي بيخبط ع الصبح مش كفايه التعب والسهر والشيخ عجايب : والدوشه اللي شايفينها طول الليل ؟

عديلة : افتح يا سيدنا الشيخ دى الست ام عبده .

الشيخ عجايب : طيب ياست ام عبده .. لا مؤاخذه ، حالا .

(يفتح الباب ويبدو مبتل الوجه والثياب) .

الشيخ عجايب : عدم المؤاخذه .. أنا افتكرت .. الواد قرقر .

أم عبده : أنا صحيتك م النوم ؟

الشيخ عجايب : هوا انا باشوف النوم .. وآخر الليل جيت اغفل شويه .. لقيت النطره نازله ترخ .

أم عبده : نظره ؟! نظرة إيه ؟! هي الدنيا نظرت يا بت يا عديله ؟

عديلة : (موتبكة) والله يا ستى مانا عارفه .. يمكن قبل ما اطلع .

الشيخ عجايب : لا .. لا . دي نطرت حالا دلوقت السقف خر على غرفتي .

أم عبده : يمكن ندا يا سيدنا الشيخ ؟

الشيخ عجايب : ازاى . . دى نطره . . برعد ، وبرق ، وعواصف .

أم عبده : كان ؟

عديلة : يمكن يا ستى من عمايل الجن والعفاريت .. ما هو سيدنا الشيخ طول الليل يبحضر فيهم .. اللهم اخفظنا .

الشيخ عجايب : على العموم يا ست هانم أحسن حاجه تشوق لنا أوده تانيه يكون سقفها كويس ، علشان لما النطره ترخ علينا تالى ما تبقاش تنزل تغرقنا وتتلف شغلنا .

أم عبده : أنا برضه بفكر ف كده .. بقول الى ادبك أودة الجماعة النصابين دول اللي بقى لهم تلات تشهر ما بيدفعوش الأجره .. أحسن حاجه ال انا اعز لهم واقضيهالك .

الشيخ عجايب : كتر خيرك ياست هانم .. علشان نعرف نشوف شغلنا كويس .. الحاجات دى عايزه تعب ، وعايزه سهر اتفضلى جوه .. أما اوريكى أنا عملت إيه طول الليل .. اتفضلى (تلدخل أم عبده فى الحجرة ، وتحمل عديله السبت و تهبط به) .

المشهد السادس

ر سيد ينتهى من الصلاة .. محمود يدخل من المطبخ ... قرقر
 يرقب من ثقب الباب) .

محمود : الله !! إيه ده ؟! إيه اللي جابك يهنا يا قرقر ؟!

سيد : لاجيء سياسي .. هارب من العدو المشترك .

محمود: يعني إيه مش فاهم ؟!

قرقر: طب بس ما تعليش صوتك ، الوليه قاعده بره .

: ولية مين ؟ محمو د : أم عيده . قرقر : يا نهار اسود !! يره .. يره ! يعني في السطوح ؟! عمود : أيوه . قر قر : يا لطيف ، وقاعدين كده ساكتين ؟! محمود : على العموم هي دخلت دلوقت في الأوده بناعتي عنـد الشيسيخ قرقر عجايب ، ودلوقت زمانها ملخومه في الأحجبة والبخور ، وزمان الراجل عمال يرقي فيها . : يعنى ما فيش خوف ؟! فيه حال أمان ؟! محتود : أمان مؤقت .. وبعده .. الخراب المستعجل .. فيه أنباء سيئه جدا قرقر عرفتها دلوقت . : إيه هي ؟ مبيد : بعد عشر دقائق بالكتير . حا تصبحوا بلا مأوى .. حا تبقوا كده قرقر زي حالاتي . : يعني إيه ؟! محمو د : يعنى حا تنظردوا ، الشيخ عجايب ، حا ينتقل في الأوده بتاعتكم قرقر لأن الأوده بتاعتي اللي هو فيها دلوقتي سقفها بيخر . : بيخرإيه ؟! هوا ؟! سيد : لا .. ميه . قر قر : ومنين جات له الميه ؟! ميد : نظره . قر قر : نطره ؟! مش ممكن ، الدنيا ما نطرتش أبدا . محمود : مطر صناعی . . مطر قناوی . قر قر : إيه يا سيدنا الكلام اللي بتقوله ده .. مطر في الصيف ؟! مبيد : لا .. أصل انا اتغظت منه وكسرت القله على نفوخه .. المهم ان قرقر

القضا المستعجل قال انه حاينقله في الأوده بتاعتكم دلوقت فإيه	
العمل ؟!	
: إيه العمل ؟. دي تبقي كارثه دي تبقى تكبه حا نروح فين وننام	سيد
فين ، ونودي العفش دا فين داحنا ما معناش اللضا .	
: على العموم بسيطه ، نقعد سوا في الأوده بتاعتي . والا تناموا فيها	نوق <i>و</i>
وانا انام في أودة الفراخ ، وعوضي على الله . بس المهم انكم تزوغوا	
دلوقت قبل ما تقفشكم .	
: لكن ازاى تاخد الأوده بناعتنا دى ما لهاش حق قانونى احنا	محمود
مأجرين منها أجره بالسنه ولنا الحق ان احنا نقعد لغاية آخر	
السنه .	
: أيوه يا أستاذ لك الحق لو كنت بتدفع الأجرة أو لو كان معك	سيد
فلوس دلوقت تدفعها لكن عايز تقعد ولا تدفعش حاجه مش	
معقوله . إذا كنا عابزين نقاوح ونتبت في الأوده لازم اقل ما فيها	
نكون دافعين الأجرة المتأخره بس لو تسيبنا يوم والا يومين ،	
كان الواحدقدر يدبر المبلغ .	
: ما فيش فايده ، بعد نص ساعه حا تكون مستوليه على الأوده ، أنا	نوق و
عارفها كويس دماغها ناشفه .	
: والاحديس يشوف لنا سلفيه !	سيد
: سلفيه منين يا خال ، داحنا مديونين للشارع كله ، المكوجي ،	محمود
والبقال ، والخضرى ، والجزار ، ويتاع البسبوسه ، وبتاع لحمة	
الراس ، وبتاع الفول والبليله السخنه ، يُعني مفيش حدياً منا أبدا .	
: بس يا جماعه أنا سامع صوت رجلين .	ئرقر ·
﴿ يبدُو فِي السطوح عم على بائع الفول ويتجه إلى باب الحجرة	
ويطرقها).	
﴿ الجَمْعُ يُصغُونُ يزداد الطرق) .	
· · · · · · · · · · · · · · · · · · ·	

(أم رتية)

عم على : هو إيه أصله ده ، ده اسمه نصب ، انتوا عايزين تاكلوا بلاش ، بقالى خمس تيام واتا آجي علشان الشلن اللي انتوا واخدين بيه . . دا حتى حرام ما يرضيش ربنا .

(يقف برهة .. ولكن دون مجيب .. بيأس الرجل وينصرف) .

قرقر : (ينظر من ثقب الباب . . هامسا) داعم على بتاع الفول ، مشى خلاص .

(الاثنان يتنفسان الصعداء) .

سيد : ها . و بعدين . العمل إيه ؟

محمود : ولا قبلين .. ما فيش قدامنا غير الطريق الوحيد ده (يشير إلى التاقذة) .

سيد : أيوه بس حانبات فين بعد كده ؟! والعفش والحاجه بتاعتنا حانعمل فيها إيه ؟

محمود: يا أخى يبقى يحلها ربنا .

قرقر: هس . . فيه صوت رجل تانيه .

(يدخل عم إبراهيم بائع لحمة الراس . . ويطرق الباب) .

عم إبراهيم : لا .. ما هو ما ينفعش ده .. أنا ما فياش نفس اطلع كل يوم السلالم علم إبراهيم علمان الريال من غير فايده .. دانتوا أفنديه محترمين امال خليتوا إيه للهلافيت .. لما انتوا مش أد الجواهر .. تاكلوا جواهر ليه ؟! كلوا أباوه .. كلوا كرشه .. معلهش مسيركو تقعوا في إيديه ، وانا اوضبكوا كويس .

﴿ يَنْظُرُ بُرِهَةً وَلَكُنَّهُ بِيأْسُ فَيْنَصُرُفَ ﴾ .

قرقر : (ينظر من ثقب الباب هامسا) دا عم إبراهيم .. يا جابر ..

محمود : يا ساتر .. هو لسه واقف ؟!

قرقر: لا .. مشى والحمد للله .

: (متنهدا) الذي لا يحمد على مكروه سواه . سيد : ودلوقت يا الله بنا يا خال نزوغ بسرعه من الشباك قبل ما الوليه محمو د تطب علينا ونروح في شربة ميه . : مش بس يا أخى تفكر في الحكايه كويس ، حا نبات فين ، ونودى سيد الحاجه بتاعتنا دي فين ؟! : بعدين نفكر في الحاجات دي كلها ، المهم اننا نزوغ دلوقت . محمو د ر يأخذان في ارتداء ملابسهما) . ﴿ يسمع صوت أقدام أحرى تقترب ويبدو في السطوح الشيخ زين يوتدى جلبابا بلديا .. يطرق باب الحجرة) . : ودامين دا كان ؟ سيبل : (من ثقب الباب) مش باين ، ما عرفش يبقى مين شحط كبير قرقر قوى سادد الباب . : يعنى حا يطلع مين ؟ مندوب البنك الأهلى ؟ أهو لازم واحد من شحمو د الديانه ، تلاقيه عم حلاوه بتاع البسبوسه ، والا الحاج عضمه الجنزار . : لكن دا ما بيتكلمش . سيد (زين يستمر في الطرق على الباب) . : لازم ناوي على الشر ، لازم بيخمن لنا على حاجه . (زين يمل من يحمود الطرق فيجلس أمام الباب). : يا نهار أسود ، ده قعد ، ده مبلط خالص ، يعني مش ناوي يعتقكم قرقر أبدا : قلت لك يا خال ، النهارده باين من أوله ، با الله وحياة أبوك بنا شممود نزوغ من الشباك ، أنا حلمت الليله اللي فاتت حلم وحش قوى . (يتجه إلى الشباك ويهم بإخراج ساقه ولكنه يتراجع) . : يا وعدى ، الظاهر انها طبلت من كل ناحيه . محمود

: إيه ؟ فيه إيه ؟. سيد : الطريق مقفول . عحمو د : يعنى إيه مقفول ؟ سيد : يعنى الست بهيه ، بسلامتها واقفه في البلكونـ اللي تسبص على شحمو د المواسير ، يعني حا تكشفنا ، على كده مش حا نقدر ننزل . : ويعدين ؟! سيد : (يتقدم مرة أخرى إلى الشباك) على العموم انا حا نزل ، ميت بهيم محمود ولا واحدام عبده ، يعني حا تعمللي إيه ؟ : (يمسك به) مش ممكن .. ما يصحش نتفضح قدامها .. مسا سيد يمكنش اخليك تنزل ابدا . : ياسيدي انت مالك ، انا ما يهمنيش .. أنا حا نزل وحدى ، خليك محمود انت ، ما دام مكسوف من الست بهيه (يتقدم إلى الشباك شم يتراجع ثالية في يأس) خلاص ، اتقفلت من كل ناحيه . : في إيه تأني؟! سيد : نوح افندى واقف في الشباك اللي قصادها ، وعم على واقف في محمود الشارع بعربية الفول والبليله السخنه ، يعنى عاملين علينا حركة كاشه ، حصار من جميع الجهات . خلاص . رحت بلاش (يجلس في يأس) . : (لقرقر) وأخينا دا لسه برضه قاعد بره ؟! سيد : (ينظر من الثقب) دا مصمم ، ما فيش فايده . قوقو (يسمع صوت أقدام .. تظهر عديلة في السطوح) . : و دا مین تانی ؟! سيد : عديلة ، لو اعرف انده لها يمكن تسرب لنا اللوح اللي مبلط على قر قو الباب ده ، بس حانده لها ازاى ؟! اهى دى اللي تقدر تنقذنا ، يا نهار اسود دى راحة الأوده التانيه ، استنوا شويه اما نشوف إيه

اللي حا يحصل .

(تتجه عديلة إلى باب حجرة الشيخ عجايب وتطرق الباب) .

الشيخ عجايب: (من الداخل) مين ؟

عديلة : أنا عديله .

أم عبده : عايزه إيه يا عديله ؟

عديله : الباميه حا نعملها بالسلق ولا بالقوطه .

الشيخ عجايب: انا احبها بالسلق.

أم عبده : استنى انا جايه لك .

تخرج أم عبده وقد علقت على صدرها حجابا ووراءها الشيخ
 عجايب) .

الشيخ عجايب : الحجاب ده ، ما تقلعهش أبدا ، انا بقالى تلات تيام با اعمل فيه ، وان شاء الله النهارده جا نشوف حكاية العمل ، لازم اطلعه بإذن الله . بس انا عايز آخد حته من أترك . اتفضلي جوه شويه .

(يعود الاثنان إلى الحجرة) .

قرقر : (يصف ما براه) أم عبده على الباب .. الشيخ عجايب وراها .
الشيخ عجايب دخل الأوده . أم عبده دخلت وراه . عديله واقفه
بتتقصع .. اللوح قاعد زى ما هو ، ما بيتعتعش ، أم عبده
خرجت ، الشيخ هباب خرج .

المشهد السابع

(أم عبده تخرج ووراءها الشيخ عجايب) .

الشيخ عجايب : ودلوقت وحياة أبوكي يا ست أم عبده ابعتي لي الفطار .

أم عبده ; عنيه يا سيدنا الشيخ ، عنيه .

الشيخ عجايب : بس امبارح كان شويه وانت عارفه ان انا طول الليل سهسران

وتعبان .

قرقر : (من الداخل) قوى ، الله يكون في عونك .

الشيخ عجايب : وعايزك تبعتى لى أد ست بيضات مقليين واذا كانت عندك حتة قشطه على شوية عسل نحل ، يبقى كويس ، بلاش الفول لأنه يعمللي عسر هضم ، إذا كان تقدرى تبعتى لى رطل بسبوسه علشان احللي بيه ما فيش مانع ، أصلى ما حبش اتقل كده .. طلبات حقيفه .

أم عبده : من عنيه يا سيدنا الشيخ .

الشيمخ عجايب : وحكاية الأوده اللي قلت عليها ؟

أم عبده : دلوقت حالا .. هات الحاجه بتاعتك كلها وانتقل فيها دلوقت ، دول جماعه نصابين .. حراميه .. أنا حا عرف اوريهم ازاى .

ريدخل الشيخ عجايب لإحضار ملابسه وصندوقه ومعداته
 وتتجه أم عبده إلى باب الغرفة) .

قرقر: يا نهار اسود .. استدوني .. خلاص .

محمود : حا تعمل إيه دلوقت ؟ قول قوام .

سيد : أنا عارف .

(يجلس الثلاثة في يأس . أم عبده ترى الشيخ زين) .

أم عبده : وانت مين ؟

الشيخ زين : أنا الشيخ زين .

أم عبده : وعايز إيه ؟

الشيخ زين . : عايز الجماعه اللي هنا .

أم عبده : ما بيجوش .

الشيخ زين : حاستناهم .

أم عبده : مش حا بيجوا أبدا .

الشبخ زين : برضه حاستناهم .

: خليك مستنى (إلى عديله) بت يا عديله انزلى قولى للأسطى	أم يحبذه
أحمد النجار ييجي يكسر لنا الباب ده .	·
: حاضريا ست .	عديلة
(الشيخ عجايب يحول مهماته أمام الباب) .	
: يا جماعه لازم نشوف لنا حل احنا حا نفضل قاعدين كده	محمود
لازم نستخيي في حته .	
: ما فيش فايده ، دي حا تخش تدعيس هنا وهنا وحا نتكشف لو	ٔ سیل
استخبينا في أي حته ومش حا ينوبنا غير الكسفه .	
: (ينظرُ إلى الشوالات الفارغة) اسمعوا يا جماعه أنا عندى فكره	فرقو
کویسه .	
: إِيه هي ؟	محمود
: كل وأحد منكم يدخل في شوال واربط عليه واركنه جنب بقية	قرقر
الشوالات ومُش معقول أبدا حد حا يفكر في فتح الشوالا دي .	•
: بقى معقول اننا نتحبس في الشوالات ؟	مبيذ
: مشَّ معقول ليه ؟! خمس دقايق لغالية ما تنزل ام عبده وبعديس	قرقر
اسرب لكم الشيخ عجايب وتزوغوا بعد كده .	
: لكن بس حكاية اللشوله دى !.	مىيد
: ما فيش حل غير كده .	قرقر
: أَنَا كَانَ عَنْدَى انْوَلَ احْسَنَ عَلَى لِلْوَاسِيرِ .	سيل
: ما خلاص حكاية المواسير دي ما فيهاش فايده كل الطرق مقفله	بحمود
الظاهر ان حكاية الشوالات دى ما فيش منها مفر هي الطريق	_,
الوحيد لإنقاذ ما يمكن إنقاذه .	
: يا ناس كل ده علشان تلاته اربعه جنيه ، تلاته اربعه جنيه نسد	مىيد
بيهم بق الوليه ، وتخلينا بقيمتنا بدل البهدله في الشوالات .	
: طبّ ما نحط العفش ورا الباب زي ما كنا حا طينه ؟!	محمود
: ما فيش فايده دي بعثت تجيب النجار ومصممه على الاستيلاه على	قرقر

الأوده .. و لو أدى الأمر انها تخلع الباب . : طب وانت حاتعمل آيه ؟! يحمو د : ولا حاجه حا اعمل نقسي بردت بالليل من أودة الفراخ ولقيت قرقو ُباب الأوده مفتوح فدخلت وسكيته ونمت . (تحضر عديله ومعها النجار الذي يبدأ في كسر الباب). : يا الله يا جماعه . قوقر ﴿ يَدْخُلُ كُلُّ مَنْهُمَا فَي شُوالَ وَيُرْبُطُ عَلَيْهُ ، وَيَضْعَهُمَا بَجُوارَ بَقْيَةً الشوالات ، ثم يرتمي على الفراش ويغط في النوم) . : (تلخل فترى قرقر على الفراش) . يوه .. ودا إيه دا كان ؟! أم عبده : دا قرقر یا ستی . عديلة أم يحبده : ينيلك يا قرقر . . إيه اللي جابك هنا ؟ دا إنا دخت عليه ، ولسه نايم لغاية دلوقت .. قوم فز .. قامت قيامتك وانتصب ميـزانك .. متمطع قوى على السرير تقولشي في بيت ابوك. : (يقف ويفرك عينيه) . . هوا إيه ده ؟! يعني انا كفرت ؟! قر قر : أخرج يا الله ، فضى الأوده لسيدنا الشيخ . أمعبده : طب والناس اللي ساكنين فيها ؟ قرقر أم عبده : دول نصابين . : والعفش بتاعهم ؟ قوقو أم عبده : أنا احجز عليه لغاية ما يدفعوا الفلوس ، حا نزلوا عندي في الشقه ، إذا ما دفعوش . . حا بيعه . . أما اشوف يا أنا ياهما . : تنزليه في الشقه ؟! مش ممكن . قرقر : مش ممكن ليه يا عمر .. حا يستعصبي ؟! آم عبده : لا بس مش شايف انه يستاهل .. كله شوية كراكيب على كام قوقو شوال.

: أحسن من عنيهم .. اللي بيجي منه أحسن منه . أنا ما يتكلش حقى

أم عبده

أبدار

: بس طول بالك ما تبقيش كده يا ست طبعك حامى كل	قوقر
حاجه بالذوق كويسه . : ذوق ؟! سلامات يا ذوق هما فاكرين إيه . عاكرينها تكيه فاكرينها أردغانه فاكرينها شفط فاكرينها نهب أنا لازم أفرجهم لازم ادوخهم زى مادوخونى لازم افضحهم في الحي	أم عبده
كله وافرج عليهم اللي يسوى واللي ما يسواش . : يا ست ما فيش لزوم . دول ناس طيبين وطول عمرهم ما حدش سمع لهم حس ولا خبره .	قوقو
: اخرس انت ما حدش عملك محامى . خش يا سيدنا السّيخ ،	أم غيده
(إلى عديله) وانت يا بت يا عديله خشى حولى العفش ده مع قرقر ونزلوه تحت (قرقر وعديله يحملان الشوال الذي به سيد) .	·
: هُوا مَالُه تَقْيَلُ كَدُهُ ؟ حَاطِينَ فَيه زَلْطُ ؟	عديلة
: شیلی من سکات بلاش غلبه لازم تنسحبی من لسانك . حاطین زلط حاطین زفت احتا مالنا .	قرقر
 رقرقر وهو خارج ينظر فيجد الشيخ زين ما زال جالسا فينظر إليه ف تهكم وغيظ) . 	
: وانت يا أخينًا مستنى إيه ؟	قوقو
: مستنى الجماعه .	زين
: جماعه ؟! جماعة مين ، قوم ، قوم ، ما فيش لزوم الجماعـه	قوقو
خلصوا خلاص الجماعة بقوا عفش والعفش انشال .	
: يعنى إيه ؟! عزلوا ؟	زين
: بيعزلوا دلوقت ، ما شيين قدامك اهم .	قوقو
: طب واروح لهم فين ؟!	زين
: ما فيش فايده . ما فيش داعي تروج لهم أبدا . مش حا تعرف تاخد	قرقر
منهم لا حق ولا باطل دول ما حيلتهمش اللضا . مش حا يدوك	
ولأمليم .	

: ما حيلتهومش اللضا ؟ هو انا جاي اشحت ؟ هو انا محتاج ؟. وهو زين انا عايز منهم حاجه ، أنا جايب لهم قرشين من البلد ، معايا عشرين جنيه عايز أديهم لهم . : (يتوك الشوال يسقط من يده من فرط الذهول) يابن القديمه !! قرقر معالت إيه ، عشرين جنيه ؟! الله يخرب بيتك بحق جاه النبي .. وقاعد المده دي كلها ما بتقولش حاجه ؟! طيب هات الفلوس ، هات ، إيدك . : أجيب الفلوس ؟ ليه أهبل ؟.. عبيط ؟.. أديك الفلوس ازاى ما زين يمكنش ، لازم أسلمهم لهم يدإ بيد . وبعد فحص وبحث وتمحيص و تدقيق وإثبات الشخصية والذي منه . : ما فيش لزوم لحكاية الفحص والبحث دلوقت .. اديني الفلوس الله قوقو يسترك وبعدين ابقي افحص وابحث زي ما انت عايز . ! (إ أ أ ك ؟ ! زين : لأن الفحص والبحث مش ممكن دلوقت .. لو بحثت عنهم دلوقت قر قر حا تلاقيهم هما والرز والفاصوليا والفول المدشوش واحد . هات القلوس تكسب فيهم ثواب . : أنا اديك الفلوس ؟ ليه ؟ اتهبلت ؟ اتخبطت في نافوخي . عايز زين تضحك عليه . فاكرى غشيم . . يا ضلالى يا نصاب . . يا محتال . . يا حرامي .. أديك الفلوس علشان تضرب عليهم عسواف .. فاكرني هفيه ، دا اتا او ديك البحر و أجيبك عطشان . . دا أنا او ديك في داهيه . : وعلى إيه ما فيش داعي ، أنا مالي ، خليهم هم اللي يروحوا في داهيه . قرقر أنا عملت اللي على وهم سامعين وشاهدين . شيلي يا بت يا عديله

شیلی ، الحکایه مش بایته حا تنتهی علی خیر أبدا ، شیلی ، خلینا

غلص شيلي ، السلام عليكم .

الفصل الثانك

صالة الجلوس والأكل في شقة أم عبده ، على اليمين باب يؤدى إلى السلم ، وعلى اليسار باب يؤدى إلى داخل الشقة ، وفي الواجهة نافذة مسمرة بقطعة من الخشب حتى لا يمكن فيحها ، وفي الركن الأيمن البعيد أثاث سيد ومحمود الذى أنزل من غرفتهما وبعض الشوالات وبينها الشوالان اللذان وضعا بهما ، وفي الركن الأيسر البعيد أريكة عليها عود وأمامها قانون ، وفي المنتصف منضدة عليها ورق ، وبالحجرة فوتيلات وبعض مقاعد متقرقة ودولاب للصيني والزجاج والطعام الجاف أشبه بنملية ، وفي الركن اليمين القريب منضدة صغيرة عليها عراموفون وأسطوانات ، وفي الركن اليسار القريب راديو على منضدة صغيرة أخرى .

المشهد الأول

أم عبله

: بس .. خليهم محطوطين كده لغاية ما يدفعوا الاربعة جنيه اللي عليهم .. إذا ما جوش بعد جمعه ، حابيعهم لبتاع الروبابيكيا .. زى ما يحيبوا .. ان شا الله يجيبوا تلاته أبيض ، أحسن من حبابى عنيهم ، الضلاليه النصابين .

بهية : ليه بس يا نينه .. هم عملوا حاجه ؟

أم عبده : عملهم اسود ومطين على دماغهم ، مش كفايه مدوخيني على الأجره بقالهم أربع تشهر ، عايزاهم يعملوا اكتر من كده إيه ، يسرقونا ، يتهبونا ، يدبحونا ويشربوا دمنا .

: يا نينه الحكايه مش مستاهله دا كله ، يمكن مزنوقين ، يمكسن بهية : المعذور ما يسكنش في بيوت الناس .. ويدوخهم على الأجره . أم عبده : أمال يعني يعملوا إيه ، يناموا على الرصيف ؟ بهية : أيوه حقيقي .. يناموا فين ؟ قر قر : انسد انت ، ما تتحشرش في اللي ما لكش فيه ، خلاص انتهنا .. أم عبده مش حا يعتبوا الأوده يعني مش حا يعتبوها .. مفهوم .. رجليهم مش حا تتمد فيها . : مفهوم قوى .. هم يقدروا يمدوا إيدهم لما حا يمدوا رجليهم . قرقر : ما يمدوش ليه ، دول بمدوا إيديهم ورجليهم ، أمال بيتشعبطوا عديلة از اي . أم عبده : بيتشعبطه ا ؟ : قصدها بيتشعبطوا على الترماي ، ما تاخديش على كلامها يا ست ، قرقر . هي وراها إيه غير الهلوسه ، روحي اقلي البيض للشيخ عجايب ، حلى الراجل يشوف شغله . : أيوه حقيقي ، مستنيه إيه ، أنا مش قلتلك تحضري له الفطار ، هوا أم عبده انت كل حاجه تقفى تطقسي عليها وتحشري نفسك فيها .. فوتى انجري اقلى البيض وحضري طبق العسل والقشطه ، يا الله قوام احنا ورانا حاجات كتير، أديكي شايقه، البيت يضرب ويقلب. : (شامتا) أهو كده ، أمال إيه ، الحكاية لعب . قر قر : (تنظر إلى العفش وتتنهد) بس انا صعبانين على الجماعه دول . بهية : ما يصعبش عليكي غالى .. فوتى يا الله انتي كان شوفي شغلك ، أم عبده إحنا ما وراناش فضا ، شوق المقلوب ابوكي قام والالأ ؟. : قام ونام تاني . بهية

ة قام ليه ؟.. ونام تاني ليه ؟! إلهي تعدلها له .

أم عبده

: قام علشان يشرب . بهية أم عبده : يشرب إيه ؟!. : أنا عارفه يقى ، يشرب م القزازه اللي حاططها جنب السرير . عيبة : طبعا ، هوا وراه إيه غير كده . وراه إيه غير البصبصه والشرب ، أم عبده لكن معلهش مسيري امشيه على العجين ما يلخبطوش ، مسيري ادشدش القزايز اللي هو مخبيها لي تحت السرير . (تبدو حركة من أحد الشوالات فيلحظها قرقر ويبدو عليه الاضطراب ويتنحنح بصوت عال) . أم عبده : إيه أصله ده ؟ إيه اللي جرالك ؟. : أصلى ، أصلى شرقت ، حكاية القزاين اللي حما تسدشدش دى قوقو أم عبده : وانت مالك ، إيش حشرك . : أبدأ ما فيش حاجه (تعود الحركة ويعود إلى التنحنح) ما بلاش يا قرقر ستى حكاية دشدشة القزايز ، لحسن باين عليها مزعلاه خالص . : مزعله مين ؟.٠ أم عيده قرقو : مزعله سیدی ، سیدی نوح افندی . : وانت مالك انته يا بارد . . إيه دخلك . . اشتكالك ؟! أم عبده : أَنَّا مالي .. أَنَا قلبي على القزايز الفاضيه .. خساره تتدشدش وتروح قر قر هدر ، نبيعها احنا لبتاع الروباييكيا نستفيد بتمنها أحسن . : بقى كده ؟! القزايز الفاضيه بس هي اللي مزعلاك ، طب فوت يا أم عبده الله شوف شغلك ، هات لي السبرتو وكنكة القهوة والبن . (تهم بالجلوس فيبدو القلق على وجه قرقر) . : ما تتفضلي يا ستى تعمليها في المطبخ علشان ننضف هنأ ، بعدين قو قو التراب يطلع عليكي .

: مالكش دعوه .. فوت اعمل زي ما بقول لك .

أم عيده

(تجلس على الكنبه).

: يا ست انا حاشيل الشلت والبياضات . قر قر

> : أكنس الأرض قبله . أم عبده

: أصل الأرض لسه عايزه غلبه كتير .. قو تو

(يسمع صوت نوح افندي ينادي بهية) .

: ويه . . ويه . نوح

قر قر

: أيوه يا بابا (تخرج) . بهية

: قومي يا ستى شوفيه .. صبحى عليه ، يمكن يكون عايز حاجه . قر قر

> : أصبح عليه ، الله لا يصبحه ولا يربحه . أم عبده

: يعنى حا تسبيه كده لغاية ما يبص من بلكونه ولا شباك ، تقع عنيه قرقر

على واحده من الجيران.

أم عيده : (تقفز من مكانها كمن لدغتها عقرب) تقع عنيه ؟ ياخي جه قلع عنيه ، ما يوعي يبص بيها لا يمين ولا شمال ، ما انا عارفاه ، راجل د في ورمرام ، والنبي لانا مستكراله بقيت الشباييك والبلكونات ، أما اشوف حا يبص منين ، هو خلا حد في الحته ما يبصلوش ، دا فاضحني في وسط الجيران .

(تخرج أم عبده .. يتبعها قرقر حتى الباب) .

: الله يكون في عونك يا ست ، خدى بالك منه كويس ، امسكيه قرقر جامد . سنكرى الشبابيك قوى .

﴿ قَرَقَرَ يَرِدُ البَّابِ وَرَاءَهَا . . ويعودُ وهو يَفْرَكُ يَدْيَهُ فَرَحًا ﴾ .

: بس ، ولا كلمه ، يا سلام على حداقتك يا واديا قرقر ، يا اللي ما فيش منك في الاربعتاشر مديرية ، (يقترب من الشو الات ويوجه إليها الحديث) إيه رأيكم بقي ، مش برضه عرفت ازوحهم . أهو لو ما كانش ربنا ألهمني حكاية نوح افندي دي . ما كانتش عنيكم حا تشوف النور أبدا ، كنت حا تخدوها تأبيده جوه الشوالات .

لكن ربنا ستر ، أصل نيتكم كويسه ، دلوقت بقى ، فين سيد افتندى ، وفين سى محمود . أظن ده سى محمود . (يحدث الشوال) كنت متأثر أوى على قزايز الويسكى وعمال ترفص كنت حا تودينا فى داهيه . اتفضل (يفتح الشوال فيخرج منه راس سيد افتدى) الله هو انت سيد افتدى ، أمال كنت بتتقلب قوى ساعة ماجت سيرة الويسكى ليه ؟.

سيد : ويسكى إيه يا سى قرقر ، أنا كنت با اهرش ، معرفش فيه إيه في الشوال بيقرصني .

قرقر : طب مش وقته اطلع قوام . لما اسبب سی محمود راخر . (يهم بالذهاب إلى محمود ، ويهم سيد با قروج عندما يسمع صوت بهية مقبلة) .

بهية : حاضريا نينه ، حاضر ، انا حا قطفها .

قرقر : یا نهار اسود . خش یا سید افندی خش ، خش احسن ست بهیه جایه ، (یوبط علیه) ما تتقلبش بقی لحسن تودینا فی شربة میه ، ابقی استحمل القرص .

(تدخل بهيه متقدمة إلى قرقر الذى يقف بينها وبين الشوالات
 وقد تناول مكنسة كانت مستندة على الحائط) .

بهیة : (فی عجلة ولهفة) اسمع یا قرقر . انا عایزاك فی حاجه ضروری .

قرقر : (فى قلق) حاجه ضرورى ؟. طيب بس اما اخلص الصاله دى ، عن إذنك شويه لحسن العفار يطلع عليكى (ويأخذ فى الكنس) .

بهية : يا أخى استنى شويه ، الدنيا ما طارتش على الكنس .

قرقر : ما طارتش على الكنس ؟! لكن حا تطير على ابن الهرمه اللي فوق ، دلوقت حالا برقع بالصوت ، عايز الفطار ، وبعدين عايز الجدى الاحول والفرخه الزعلانه ، والقله ، والكفته والكباب والسم اللي يهرى مصارينه ، كل دا دلوقت يطلبه ، وإنا لازم اخلص من الأوده

واللي في الأوده . مش معقول أبدا أسيبها وامشى .. دى تبقى مصيبه .

بهية : هو إيه أصله ده . انت اتجننت ؟ اسمع الكلام اللي حا قولهولك ده من سكات .

قرقر : سمعت . اتفضلي .

بهية : الجماعه راحوافين ؟.

قرقر : أنهى جماعه ؟.

بهية : سيد افندى وسي محمود .

قرقر : وأنا إيش عرفتي .

بهية : انت مش كتت في الأوده معاهم ؟.

قرقر : لا ، لا يا ست بهيه ما تلخبطيش في الكلام لحسن الست ام عبده تسمعك توديني في داهيه .

بهية : توديك في داهية ازاي . انت مش كنت في الأودة قدامها ؟

قرقر: كنت في الأوده أيوه ، لكن معاهم لأ.

بهية : ازاى ؟! إذا كانوا هم كانوا فى الأوده ، تبقى ما كنتش معاهم ازاى ؟.

قرقر: وايش عرفك بقى انهم كانوا في الأوده ؟

بهیه : وایش عرفنی ۲ أصل . أصل . ..

قرقر : أصل إيه !؟.

بهية : أمال يعنى حا يباتوا فين الا فى الأوده ، ما هم لازم يكونوا فى الأوده .

قرقر: يعنى استنتاج كده ؟

بهية : أيوه .

قرقر: اذا كان كنده تيقى غلطانه ما كانوش في الأوده.

بهية : بقول لك كانوا في الأوده يعني كانوا في الأوده ، أنا متأك.ده

خالص . : متأكده منين بس . إذا كنت أنا نايم في الأوده لوحدي طول الليل -قر قر : كداب . أنا شفتهم بعيني ، شفتهم في الأوده وانت ما كنتش فيها . بهية : يا نهار أسود . شفتيهم بعينك ؟. قر قر : أيوه شفتهم . وعايزه اطمن عليهم ، راحوا فين ؟ جرالهم ايه ؟. بهية : راحوا فين ؟. إيش عرفني !! هم لازم ، خرجوا يشطحوا زي قوقر عوايدهم . : ﻣﺶጵﻜﻦ . بهية : ليه بس يا ست بهيه ؟ مش ممكن ليه ؟! إيه عدم إمكانيتها ؟. قر قر : لأن سي محمود كان راقد ، كان عيان خالص . 4.... : محمود إيه ؟. راقد .. عيان . لا . دى انت بقى اللي ما عندكيش قر قر فكره عن الموضوع خالص . : إزاى ؟. بهية : لأن محمود صحيح اربعه وعشرين قيراط ، صحته زي البسب . فرقر : بحب ازاى ، إذا كنت انا شايفاه بعيني دى ، راقد وتعبان . وبيقول جهية . ie ?!. قر قر ز أيوه . بهية : يمكن .. قادر ربنا يعييه ويعيى أبوه ، لكن على العموم اطمني قوى قر قر ربنا خد بيده خالص ، آخر لحظه شفته فيها ما كانش بيقول آه . : ازای بس ا دا کان عیان قوی ، یا تری راح فین ؟ و حا یر قد فین ؟ بهية اسمع يا قرقر ، أنا عايزاك تسيب الأوده دلوقت وتخطف رجلك تسأل عليهم ، تشوفهم راحوا فين ، وجم منين . : أسيب الأوده . قر قر

: أيوه .

جهية

(أمرتيبة)

: ما يمكنش ، دا انا قتيل الأوده ، ما سيبهاش أبدائم .. حكاية السؤال قرقو عنهم دي .. مش عايزه لا خطف رجل ، ولا سيبان أوده .. اسمعي . يا ست بهيه .. إنتي يهمك أمرهم قوى ؟. : أوى وبس .. أوى خالص . بهية : يعنى تخافي عليهم ، وتحبى مصلحتهم ؟. قرقر ببية : والله الك أميره وبنت حلال ، طيب حيث كده .. انا حا اقول لك قرقو على الحقيقه . يمكن تقدري تساعديني . : بس قبل كل حاجه انا عايزاك تسأل عنهم .. تشوفهم راحم فين جوية وجم منين . : حاضر .. من عنيه .. اطمني .. هم لا راحم ولا جم . قرقر : يعني مستخبيين فوق ؟. بهية : لا .. مستخيين تحت .. ومن جهة السؤال حاسأل لك حالا عليهم قرقر (يتجه إلى أحد الشو الات ويربت عليه) ازيك يا سبد افندي . : (من داخل الشوال) زى الزفت البتاعه لسه نازله فيه قرص . سيذ : معلهش .. تقدر تهرش شویه .. ما فیش حد غریب هنسا .. قرقر (يربت على الشوال الآخر) وانت ازيك يا سي محمود .. لسه يتقول آه ؟. : (من داخل الشوال) آه . محبو د : ليه بقى .. ما انا حطك في الشوال سليم اربعه وعشرين قيراط لا قرقو بيك ولا عليك .. إيه اللي بيخليك تقول آه دلوقت ؟. : الجوع .. جعان قوى .. حتة الجبنه الرومي اللي كنت شايلها من محمود

قرقر : والربع الباق ؟.

محمود : نصه واكله الصراصير والربع واكله النمل . الظاهر كان عندهم

المبارح .. لقيت الفيران واكله تلات ارباعها .

عزومة حشرات .. آه .

قرقر: طب بس ما تزعقش كده .. لحسن الست ام عبده تسمعك اصبر شويه انا حا افتح لك دلوقت .. اصل ست بهيه عرفت خلاص .. بقت مننا وعلينا .

بهية : (فى ذهول) إيه ده ؟ إيه اللي عملتِه فيهم ، ازاى ترميهم الرميه دى ؟.

قرقر : آل إيه اللي رماك على المر ، قلت له اللي أمر منه .. قال إيه اللي رماك ق الشوال ، قلت خوف لاقع في إيد أم عبده عرفتي بقي يا ست بهيه ، ما كانش فيه وسيله للهروب من فتك الست والدتك غير الحكايه دى ، وأظن دلوقت ما فيش داعي نضيع وقت في الأخد والعطا .. المهم اننا نفرج عنهم ونخليهم يطيروا قبل ما تيجي ست ام عبده وتقفشهم .

بهية : طب وبعدين حايرو حوا فين ، ويناموا فين ؟.

قرقر : يا ستى يحلها الحلال .. المهم دلوقت ان احنا نطلق سراحهم .. تخرجهم بره اللشوله .. نخليهم ياخدوا نفسهم ، نخليهم يشموا النسمه .

بهية : طب ومحمود ؟.

قرقر ; ماله محمود ؟.

بهية : مش ييقول لك انه جعان .. حا نسيبه كنده جعان ؟.

محمود : (من داخل الشوال) أيوه جعان .. جعان قـوى واقـع مــن الجـوع .

قرقر : يا جمدع أسكت انت الله لا يسيئك .. لحسن أم عبسده تسمعك .. ابقى شوف لك اى حاجه بره ، انشأ الله حتى لقمه بجبنه .. المهم بس انكم تخرجوا .

(يهم بفتح الشوال عندما يسمع صوت نوح افتدى قادما) .

المشهد الثاني

: (من الخارج) دى ما بقتش عيشه .. دى بقت جهنم الحمرا .. نوح وأديا قرقر .. قرقر . : لا .. الظاهر ان اليوم ده مش حايتم على خير أبدا .. ما فيش قر قر فايده .. باينكم حا تخدوها تأييده .. أصل لو نوح افندي اترستاً في الأوده دي .. ما حدش حا يعرف يطلعه منها ولا بالطبل البلدي .. الحقيه يا ست بهيه .. حوشيه شويه لغاية ما اخرجهم . (تهم بهية بالحروج عند ما يدخل نوح مرتديا الجلباب ، وقد أمسك زجاجة ويسكى في يده وارتدى فردة حذاء ، وأمسك بيده القردة الأعرى) . : ما يتردش ليه يا قرقر الكلب ؟. نوح : (ف يأس) نعم يا سيدى .. أفندم . قر قر : فين فردة الشراب الشبيكه ابو نقره واحده ؟. نوح : أمال إيه اللي في إيدك دى ؟. قرقر : دى بنقرتين .. واحده عند الصباع وواحده في الكعب ، لكن انا نوح فاكر ان التانيه كانت بنقره واحده عند الصباع ، تبقى راحت : تبقى برضه هي اللي في إيدك .. بس ربنا أنعم عليها بنقره زياده ، قر قر و بكره كان تبقى بتلاته وأربعه . : طب بلاش الشبيكه ، هات لي ابو حربه .. أما آخر مره قلعته كان نوح بحربه واحده ، دلوقت حلاقيه بحربتين والا إيه ؟. : وافرض انك لقيته بحربتين ، تزعل ليه ؟! أهه زياده في التسليح ... غَر قر حدلاق.

: طيب زي بعضه .. حربه حربتين .. هاته والسلام .

نوح : تعالى يا بابا .. أنا اجيبلك اللي انت عايزه .. تعالى معايا .. بهية : لا .. مش جاى ، أنا مش عايز اشوف وش الوليه امك دى مره تانيه نوح أبدا .. أنا حا سيبلها البيت .. أنا حافرجها .. أنا وهي والزمان طويل . : ليه بس يا بابا ؟ هي عملت حاجه . بهبة : عملت حاجه ؟ كل اللي عاملاه فيه ده .. وما عملنش حاجه ؟. نوح عايزاها تعمل إيه اكتر من كله .. هي مخلياني عارف اتنفس .. حاشره نفسها في كل شؤوني .. دا مش جواز ، دا أسر ، لكن معلهش هانت ، فوت يا واد يا قرقر هات الشراب والبدله (يجلس على الأريكة) . : (ينظر مترددا إلى بهيه) حضرتك حا تقلع هنا ؟. قرقر : أبوه .. إيه المانع .. هوا انا حا قلع في الشارع ؟. نوح : طب ما تتفضل في أو دتك يا بابا وانا اجيب لك اللي انت عايزه . ببية : أودتى ؟! هي بقت أوده ، دى بقت زنزانه ، انت عارفه عملت فيه نوخ إيه ؟. : عملت ايه ؟. بهية : أنا لسه بقول يا فتاح يا علم لقيتها لك من غير مناسبه هاجمه زي نوح الغول وفي إيدها الشكوش وشوية مسامير وهات يا دق في باب الملكونه والشباك . . قال إيه علشان ابطل البصبصه للجيران . . هوا انا لسه فتحت عيني ؟. الوليه دي لازم اتجننت .. اتخبلت .. ومع كل هي البصبصه حرمت . طيب أديني خارج دلوقت .. اما أشوف حا تقدر تمنعني من البصبصه ازاي ؟. : طيب يا بابا قوم البس هناك و بعدين اخرج زي ما انت عايز . بهية : (ف إصوار) لا .. أنا حلفت ما أنا داخل الأوده لاجل خاطرها .. تو ح

فوت يا واد يا قرقر هات لي البدله والشراب ابو حربة ، وحمالة الشراب ، وهات علبة السجاير من فوق المكتب .. بس اوعى تلطش منها حاجه . : (تشير إلى قرقر أن يبقى مكانه) خليك انت يا قرقر شوف شغلك أما أروح ادور انا على الحاجات اللي هوا عايزها . (تخرج بهية) . : ﴿ وَهُوَ يَدَنُدُنُ عَلَى الْعُودُ ﴾ وبعدين يا واد يا قرقر ، وأخرتها ؟. تو ح : ﴿ وَهُو يَكْنُسُ حُولُهُ مَثْيُرًا الْغَبَارِ لَمُضَايَقَتُهُ ﴾ آخرتها في إيه ؟. قر قر : في إيه ؟! في ستك أم عبده .. هوا ربنا مش حا يتوب علينا منها .. نو ح ده مش عدل أبدا .. دانا أعرف واحد قتل قتيل خد فيه عشرين سنة سبجن ، واليومين دول طلع م السبجن ، بقى حر .. يعمل زى ما هو عايز ، يبصبص للجيران زي ما هو عايز . . ويروح البيت وقت ما هو عايز ، ويشرب ويسكي زي ما هو عايز ، ويغني زي ما هو عايز ، وانا اللي ما قتلتش ولا حاجه .. لغاية دلوقت في السجن ، مش عارف اتفلفص .. تقدر تقوللي بقي ليه أفضل أنا ويخرج : لازم كان حسن السير والسلوك . قر قر : والله لو أعرف اني بقيت حسن السير والسلوك . ربنا يتوب على توح منها .. لكنت صليت من بكرا لكن انا عارف ما فيش فايده .. يقي لا انبساط ولا حريه ؟. : معلهش يا سي نوح .. استحمل ، أدحنا كلنا مستحملين . قرقر

: انا كنت زمان با استحملها .. لكن دلوقت ما بقتش تنطاق أبدا .. في حد في الدنيا يسنكر الشبابيك كلها كده زي ما هي عامله ؟! هوا دا بقى بيت يتسكن . والنضافه اللي هي طالعالي فيها دى .. اقوم من التوم افتح عيني على طاخ .. طاخ .. يتهيأ لي ان التنظيم بيهد

نو س

البيت وبعدين الاقيها بتنفض الشبايك . ما يحبكش مسح السلالم إلا الساعه اتنين وانا جاى . . علشان مية المسح كلها تنزل على نفوخى ، هوا انا عمرى شفت البيت في حاله طبيعيه أبدا . . لازم السجاجيد فوق الكراسي ، والكراسي فوق الترابيسزات ، والترابيزات جنب الحيط والأرض مبليطه ، تزحلق بلد بحالها ، ده بيت ينقعد فيه ده . . انا اقدر اقعد قاعده هاديه . . أشرب لى فيها كاسين ولا اتنتن لى تقسيمتين .

قرقر: هوا انت یعنی بتقعد یا سی نوح افندی ؟.

نوح : أقعد فين .. هوا فيه حته ينقعد فيها ، دى حاجه تخلى الواحد يهج ، وآخر المتمه .. الشيخ اللي جايبهولى فوق السطوح .. تقدر تقوللى جايبهولى فوق السطوح .. تقدر تقوللى جايباه ليه ؟.

قرقر : عشان يطلع العمل .

نوح : عمل ؟! يعني إيه العمل ؟.

قرقر : أصل فيه ناس قالوا لها ان الحاله اللي انت فيها نتيجه عمل اتعمل لك .

نوح : حالة إيه اللي انا فيها ؟.

قرقر : ولا مؤاخذه .. البصبصه والعربده ، وفروغية العين ، والشرب والمهيصه والهجان بره البيت ، وال

نوح : مفهوم .. مفهوم .. ماله ده کله ؟.

قرقر : كله ده صايبك .. علشان حد متغاظ منها فعمل لك عمل علشان يطفشك منها .

نوح : وبعدين ؟.

قرقر : ولا قبلين ، قالوا لها على الشيخ عجايب انه راجل مجرب واحجبته ما تنزلش الأرض .

نوح : يعنى حا يعمل ايه ؟.

قرقر: حا يطلع العمل .. ويعمل شوية تعازيم واحجبه ..

: والنتيجه ؟. نوح : التتيجه إنك تتلم ، وتبطل الشرب والسنكحه والبصبصه وتقعد في قرقر البيت .. وتحب ست ام عبده وما تبصش لغيرها . : (منزعجا) يا مغيث .. يا حفيظ .. الراجل ابن اللئام اللي فوق ده نوح حا يعمل فيه كده ؟. : دا المفروض . قر قر : دا انا اقتله ، ودى تبقى أنهى عيشه دى .. أنا اقعد في البيت ولا نو ح اشربش ولا اهيصش ، وما اعملش حاجه غير ان أنا أبص لام عبده .. يا هوه .. الراجل المجرم ده عايز يعمل فيه كده ، وتفتكر انه يقلر يعمل الحاجات دي يا قرقر ؟. : مين يعرف .. أهو اذا ما كانش ده يقدر غيره حايقدر .. هي يعني قرقر حا تسكت .. حا تسيبك كده لغاية ما تطير من إيدها .. أهي حاتنها وراك كده .. لغاية ما تسنسلك . : فال الله ولا فالك يا شيخ .. على العموم الحمد لله ، اللي ربنا ألهمني نوح المشروع اللي أنا ماشي فيه دلوقت هوا الوحيد اللي حا يتقذنا من المصيبه دى . : مشروع ؟! مشروع ايه ؟. قر قر : قرب .. قرب هنا .. اديني ودنك .. (يقتىرب منه قرقىر) نوح مشروع جمعیه سریه . : جمعيه سريه ؟!.. بتاعة إيه ؟.. وعلشان إيه ؟.. واسمها إيه ؟. قرقر : اسمها جمعية قتل الزوجات . نوح : يا ساتر . . مره واحده كده ؟ . قرقر : أيوه ما فيش طريقه لإنقاذ العالم من السيطره النسائية ولإعطاء نو س الرجل حريته غير كده. : ودي خلاص عملتها ؟. قر قر

نوح : امال ! دا انا ما شي فيها جد قوى .. انا لازم اجيب خبرها .

قرقر : هي إيه دي ؟.. الجمعيه ؟.

قر قر

نوح : لا .. أم عبده .. لازم اقضى عليها هي وأمثالها ، قبل ما يضيعونا في شربة ميه ، أنا فكرت فيها من زمان ، وكل الشله اللي باقعد معاها وافقتني على المشروع ، وقالوالي دى فكره هايله ، وكنت بادرس الموضوع شويه على مهلى ، لكن حكاية الشيخ عجايب واللي ناوى يعمل فيه خوفتني أوى ، المسألة دلوقت لازم نمشي فيها بجد ، دى مسألة حرب ، يا هم يلمونا في البيوت ، يا احنا نجيب داغهم ، دا صراع على تقرير المصير ، انا اقعد في البيت ولا ابصش لغير أم عبده .. يا هوه .. يا جاه النبي .

على العموم ما فيش داعي للخوف كده .. الحكايه مش مستعجله أوى .. والجماعه دول اللي زى الشيخ عجايب معظمهم نصابين ، يعنى هي أول مره تجيبهم أهي بقالها سنين تنرقى وتشبشب وتلبس في احجبه وتطلع في عمل ، علشان ربنا يتوب عليك وتتهدى ، ما بتهديش ، هي تتنقل من شيخ لشيخ ، وانت تنتقل من واحده لواحده ، ما فيش حاجه بتحوق فيك أبدا ، لغاية ما رسيت على الشيخ عجايب وانت رسيت على زكية ولعه . أما نشوف مين اللي حا يغلب ، الشيخ عجايب والا الست ولعه ؟

نوح : إيه يا واد ده انت اتجننت ؟ وطى صوتك ، انت عايزها تسمعك تيجى تطلع على جتتنا البلى !!.

قرقر: انت لسه بتخاف منها بعد الجمعيه اللي عملتها ؟ دا انت رئيس جمعية قتل الزوجات على سن ورمح ؟.

نوح : قولتلك متزعقش ، دى جمعيه سريه ، لازم تفضل مستخبيه كده . تعمل ف الخفاء .. انت عمرك ما اشتركتش في جمعيه سريه أبدا ؟!.

قرقر: أبدا ، لا سريه ولا علنيه .

: على العموم تفادر فشترك .	وح
: لكن انا مش متجوز ؟.	ے نرقر
: مش مهم ، الجمعيه حا تجوزك . وبعدين هي نفسها تتولى أمر	ء نوح
تخليصك من مراتك .	
: وعلى إيه اما اتجوز ، يبقى يحلها ربنا .	قرقر
: ما تضبعش الفرصة من إيدك ، واسمع نصيحتي اشترك من دلوقت	ر نوح
أحسن لك ، دى أحسن طريقه لضمان حريتك ولتأمين حياتك ،	حر_
وللقضاء على ام عبده وأمثال ام عبده .	
(يتحرك أحد الشوالات ويصدر الآخر صوت آه) .	
: (في فزع) يا نهار اسود وهوا فيه حاجه حا تنجينا من ام عبده ؟!	= =
ولا ميت جمعيه سريه ، ولا انقلاب كامل ، (تستمر الحوكة)	قرقر
اصبر شویه یا ویکا .	
اصبر سنویه یا ویک . : أصبر اكتر من اللي صبرته ، مش ممكن ، أنا لازم اقضى عمليها	_
: اصبر ۱ کتر من ابلی صبرت ، مس ساس ۱۰۰۰ در ۱۳۰۰ می ۱۰۰۰ در ۱۳۰۰ می ۱۰۰۰ در ۱۳۰۰ می ۱۰۰۰ در ۱۳۰۰ می ۱۰۰۰ در ۱۳۰ خالص ، بس عایزین أعضاء ، عایزینها تکبر ، لازم تشسرك ،	نوح
فاهم ـ محدد و محدد و محدد المحدد	
: حاضر حا اشترك ، بس عن إذنك شويه ، أنا عايز انفض الكنبه اللي	قرقر
انت قاعد عليها ، تسميح تتفضل في أو دتك شويه .	
: انت كان بتجيب سيرة التنفيض ، إخص ، إخص عليك ، يا خيبة	نوح
أملي فيك ، خلاص مش حا تنفع أبدا معانا .	
: لیه بس یا سی نوح افندی ؟.	قرقر
: عايز تدخل الجمعية وانت بتنفض ؟ عايز تبقى عضو ، وإيديك	نوح
ملوثه بمجريمة التنفيض ؟.	
: وفيها إيه يعني ؟ مش جمعية قتل ؟.	قوقر
: أيوه قتل ، لكن مش تنفيض ، قتل بطرق شريفه نضيفه مش قتل	نوح
بإثارة الغبار ، مش قتل بتحطيم الأعصاب ، دى من أول الحاجات	•
1	

اللى بتنادى بيها الجمعية ، المطالبه بحرية الوساخة ، وحق الكرّكبه والفركشه واللخبطه واللخفنه ، تقوم تيجى حضرتك وتقوللي قوم علشان انفض .. اتفو عليك .

قرقر: الله يسامحك ، طب بلاش التنفيض ، قوم عشان تفطر .

نوح : مالياش نفس ، انا حاخد بق م القزازه كفايه (يشرب) الله .. بالصحة والعافية .. بالهنا والشفا .

قرقر : قوم بقى يا سى نوح افندى الله لا يسيئك ، قوم الله يستر عرضك .

نوح : مشحاً قوم خلاص انا عايز ادندن شويه عندى كيف للغنا ، ناولني العود ، ناول .

قرقر : عود ؟ الا ، الظاهر انها حا تطبل على دماغنا (يناوله العود) ما دام مسك العود يبقى مش حا يطلع من هنا أبدا .

نوح : تعرف تشتغل معايا على الرق ؟.

نوح

قرقر : رق ؟ رق انت شویه ، وقوم .. قوم الله یجبر بخاطرك انا لالیه فی طبله و لا فی رق .. انت عایز ستی تیجی تلاقینی ماسك الرق تقطع عیشی ، انت یا سیدی بتقدر علیها ، لكن انا غلبان ، علی قد حالی .

: (يبدأ في ضرب العود والغناء) يا سبدى زعلان ، يا روحى زعلان (قرقر يمد يده تحت الأريكة ويخرج منها لافتة يعلقها أمام نوح مكتوب عليها : « بمنوع الغناء بأمر أم عبده » فلا يكاد يراها حتى يصيبه الذعر ويصمت ثم ينهض ويقلبها فيبدو عليها « بمنوع البصبصة بأمر أم عبده » فينتزعها ويقذف بها تحت الأريكة ثم يعاود الغناء) . يا سبدى زعلان . . يا روحى زعلان . (يتحرك ميد ويتأوه محمود) .

(قرقر يزداد ارتباكا ويقترب من الشوالات ويربت عليها في غفلة من نوح افتدى) .

: (للشوالات) حاضر اصبر شویه دلوقت اجسیب لك	قرقر
مُاندُوتُش جبنه ، بس لما أخرج الكاينه دى حالا ، ربنا يسهل .	
: ﴿ مُلْتَفْتًا إِلَى قَرْقُر ﴾ انت بتعمل آيه عندك بتكلم مين ؟!	نوح
: لا ما فيش حاجه دانا بس بدندن .	رے قرقر
: بتدندن ؟! انت جنسك إيه حيوان تدندن وانا با اغنى	رر توح
انت ما عندكش إحساس انت جماد لما انا اغنى يبقى لازم	ري
الدنيا كلها تسمع وإيه اللشوله اللي عندك دى إيه دا كله ؟!.	
: دا عفش الجماعة اللي كانوا ساكنين فوق السطوح .	قرقر
: وإيه اللي جابه هنا ؟.	ر نوح
: ست أم عبده نزلته .	ر قرقر
: علشان إيه ؟.	رر نوح
: حاتبيعة .	رے قرقر
: تبيعه ؟ واصحابه راحوا فين ؟.	نوح
: طردتهم .	د <u>ي</u> قرقر
: كده على طول وليه تطردهم ؟.	ئوح
: علشان تسكن الشيخ عجايب .	قرقر
: أما وليه دون تطرد الناس الطيبين الأمرا علشان تقعد الراجل	نوح
النصاب المحتال طب وحا تبيع عفشهم ليه ؟.	•
: علشان تاخد أجرة الأوده من تمنه .	قرقر
: إخص على السفاله والإجرام تبيع عفش الناس علشان تأخد	نوح
الأجره .: لا أنا ما اسكتش على كده أبدا .	
: ﴿ فَرَحُمْ ﴾ إيه ! أطلعه تاني ؟.	قرقر
: لا لا ما فيش فايده لو طلعناه حا تنزله تاني .	نوح
: أمال إيه ؟! نعمل ايه ؟.	قر ق ر
: نعقد جلسه غير عاديه جلسه مستعجله .	ئوح

: جلسه ! لإيه ؟.	قوقر
: للجمعيه ما قيش غير	نوح
: (مقاطعا بخيبة أمل) دا كل اللي تقدر تعمله ؟.	قرقر
: وده شویه لازم نجمع الجمعیه لاتخاذ قرار ضدها .	نوح
: (بيأس)طب واجمعها.	ئے قرقر
: لكن ، لكن حاتجتمع ازاى اذا كان ما فيش أعضاء ، عايزيسن	
	نوح
أعضاء ، لازم تشترك .	
: حاضر حا اشترك .	قرقر
: وتجيب كان حد يشترك .	نوح
: حاضر حا جيب لك حد يشترك . المعلم عضمه الجزار لسه	قرقر
متخانق مع مراته وراقعاه علقه لما قطعت نسفسه اجبهولك	
يشترك ؟.	
: أيوه ، ده ينفعنا كويس ، مش يعرف يدبح ؟.	نوح
: قوى دى شغلته بس عن إذنك بقى دلوقت خمس	قرقر
دقايق حل عن الأوده شويه .	
: علشان إيه ؟.	~ .;
. تصلی أصلی عايز انكشها شويه وفيه شوية زباله بره	نوح
· -	قوقر
عايز أدلقها على الكنبه علشان القعده تحلى .	
: لا ما فيش لزوم ما تتعبش نفسك أنا اقدر استحملها	نوح
كده ناولني العود ناول واقعد جنبي هنا لما أشنف ودانك .	
: أنا عارف ما فيش فايده أيضا اتفضل يا سي نوح افندى	قوقو
(يناوله العود) وآدى قاعده (يجلس على الأرض بجواره ، وهو	
يلتفت إلى الشوالات) أنا عملت اللي عليه وفوق اللي عليه لكن	
أعمل إيه لازم يشنف وداني ، اتفضل شنف .	
: (يأخذ في العزف والغناء) يا سيدى زعلان يـا روحـــي	نوح
	(J

زعلان .. لان .. آه یا سیدی زعلان .. یا عینی زعلان .. یا روخی زع .. لان یا .. عینی زع .. لان یا .. یا .. یا .. سیدی زعلان .. و کان زعلان ..

قرقر: (يصيح فجأة منفجرا بالبكاء) آه .. ياني .. آه .

المشهد الثالث

﴿ تَدْخُلُ أَمْ عَبِدُهُ مَهْرُولَةً . . ونوح افتدى مَنْهِمَكُ في غنائه ﴾ .

أم عبده : إيه .. مالك يا واد .. انطق قول ؟.

قرقر: آه .. ياني .. آه .

أم عبده : مالك .. بتعيط ليه ؟.

قرقر: با اعیط علی سی نوح افندی .. بقاله نص ساعه .. زی مانتی شایفه کده .. لا بیسکت .. ولا بیقول زعلان لیه .

أم عبده : طب بس انسد .. قوم شوف شغلك .. وانت التاني ما كفاكش غنا .. جايب الواد مقعده جنبك ومعطله عن شغله ؟.

نوح : يعني وراه إيه .. المفاوضات ؟.

أم عبده : انتهينا . . قوم بقى من فضلك كفايه غنا .

نوح : ليه .. الغنا حرم ؟!.

أم عبده : ما حرمش ولا حاجه .. بس مش وقته .. قوم بقى علشان تلبس وتروح تشوف شغلك .

ح : وانت مالك .. عملوكي وصيّه على .. أما دى مصايب .. يا ستى اتا مش قلتلك ميت مره ما لكيش دعوه بى . هو انتى لكى عندى حاجه ؟.

أم عبده : بقى اسمع اما اقول لك .. أنا العفاريت بتتنطط فى وشى .. وإذا .. (تصدر فجأة صيحة من محمود وهو داخل الشوال) .

محمود : آه .

أم عبده : (تتلفت حولها في ذعر) إيه ده ؟! انتم سامعين ؟.

قرقر : يا نهار أسود ، جالك الموت يا تارك الصلاة .

أم عبده : إيه ده ؟.

قرقر : ده .. ده (يتلفت حواليه في حيرة) دول دول لازم العفاريت

أم عبده : أنهو عفاريت ؟.

قرقر: الغفاريت . اللي كانوا بيتنططوا في وش حضرتك . الظاهر . ان

واحد منهم ، طب وقع في الشوال .

محمود : آه .

قرقر : يا نهار اسود .

أم عبده : الحقوني ، أنا جنتي حا تتلبش ، الحقوني بالشيخ عجايب .. أنا بقالي ليلتين حاسه ان فيه حاجه في الشقه .. اندهولي الشيسخ

عجايب قوام .. ما فيش حد حا يطلعهم غيره .

نوح : هم إيه دول اللي حا يطلعهم ؟

أم عبده: العفاريت اللي ماليين البيت .

نوح : عفاریت إیه یا ولیه ، انت مش حا تبطلی بقی شغل الهفه دی ، مش

حا تعقلي أبدا ؟

أم عبده : اسكت انت .. ما تتداخلش في اللي ما لكش فيه .. اطلع يا قرقر نادي لي الشيخ عجايب .. الحقني بيه .

قرقر : أيوه ، علشان تكمل ، ما هو مفيش غير هوا اللي ناقصنا ، علشان ينسطوا ، أنا مالى ، انا خاسس على حاجه ، أنا واقف على رجلى ، الدور على المقرفصين جوا الشوالات .

أم عبده : هم مين ؟.

قرقر : العفاريت .

أم عبده : يا هوه ، يا مغيث ، ما تفسرش بقي لحسن جتتي بتلبش . . اجرى

الحقني بيه .. مد شويه .

(يخرج قرقر .. وترتمى أم عبده وهى تلهث .. وفى اللحظة
 نفسها تدخل بهية) .

المشهد الرابع

بهية : (ف دهشة) إيه ؟ في إيه ؟، مالك يا نينه ؟

أم عبده: هس ، ما تزعقيش .

بهية : ليه ؟ جرا إيه ؟

أم عبده : قولتلك ما تزعقيش كده ، لحسن بعدين يتفزعوا ، خليهم مكنونين

زى ماھم.

بهية : هم مين دول ؟

نوح : اللي في اللشوله . . أصل الدنيا ضاقت بيهم . . مالاقوش حته يطبوا

فيها غير اللشوله .

بهية : ﴿ فَى فَرْعَ ﴾ إنتوا عرفتم ؟

أم عبده : وانتي كان كنت عارفه ؟

يهية : أيوه يا نينه عرفت ، وصعبوا على قوى ، والنبي دول غلابه .

نوح : هم إيه دول الغلابه ؟! عفاريت غلابه ؟! حلوه دى ، أول مره اسمع على عفاريت غلابه .

بهية : عفاريت ؟. (تتنهد في راحة) أيوه برضه فيه عفاريت غلابه .

محمود : (من الداخل) آه .

أم عبده : يا مصيبتي ، يا وقعتي .. متفسروش بقي .. كفايه ، أنا خلاص ما بقاش فيه نفس ، فين هوا ده الشيخ هباب يلحقني قبل ما اروح

قطيس.

بهية : هو الشيخ عجايب حا يطلعهم ؟

: أيوه قرقر طلع ينده له . أم عبده : ﴿ فَي فَرْعَ ﴾ طلع ينده له ؟.. وبعدين .. وبعديـن لما يطلعهـــم بهية حقیقی ، یروحوافین ؟ : يطلعوا على جتنا .. يشاركونا في عيشتنا .. علشان تنبسط امك نوح ويهدا بالها .. أمال .. العفاريت بتنطط في وشها ، ويطبعوا في الشوالات ، وبعدين تطلعهم على جتنا ، هي وراها إيه غير تطلع على جتتنا التراب والعفاريت. : يا راجل اسكت بقى وانسد ، ما تقعدش تجيب سيرتهم وتهيجهم . أم عبده : أنا يرضه اللي بهيجهم ؟ . . أنا اللي بعت أجيب لهم الشيخ عجايب نوح علشان يطلعهم من اللشوله ؟ . . مالك ومالهم إذا كانوا قاعدين في اللشوله مستريحين تطلعيهم ليه ؟ : أيوه يا نينه حقيقي .. تطلعيهم ليه ؟! ما تخليهم قاعدين مستريحين ! جهية : انتوا اتجننتوا ، أخليهم كده قاعدين معانا ؟ باركين على نفسنا ؟ أم عبده : مش بماركين على نفستما ولا حاجمه ، النماس مكتبونين جملوا نوح الشوالات ، والشوالات مش بتاعتنا يبقى حا يخس علينا إيه ؟ : يعنى حا يفضلوا كده قاعدين ؟ أم عبده : أيوه يفضلوا .. لغاية ما يزهقوا ويمشوا من نفسهم ؟ بهية : واذا ما زهقوش ؟ أم عبده : نعتبرهم ضيوف ، يعني حا يكلفونا إيه غير لقمة بجبنه ، والا شوية بهية خضار . : وكان حيا كلوا ..؟ أم عبده (من داخل الشوال) آه . هجمو د : يا مصيبتي ، الحقوني ، يا ناس ، أنا مش قادره ، يا واد يا قرقر ؟ أم عبده ﴿ يَدْخُلُ قَرْقُرُ وَمُعُهُ الشَّيْخُ عَجَايِبٌ حَامَلًا كَيْسٌ فَ يَدُهُ أَشْبُهُ بالخرج) . (أم رتيبة)

المشهد الخامس

: آدى الشيخ عجايب .. اتفضلي .. اتفضل يا سيدنا الشيخ قرقر اتفضل. : يا ساتر . عجايب : اتفضل يا سيدنا الشيخ .. اتفضل . أم عيده : بسم الله الرحمن الرحيم . عجايب : الحقنا يا سيدنا الشيخ .. الحقنا . أم عبده : يا أرحم الراحمين ارحمنا .. يا لطيف الطف بنا .. يا لطيف الطف عجأيب بنا .. فيه إيه يا ست هانم ؟ فيه إيه ؟ : عفاريت يا سيدنا الشيخ . . يعني حا يكون فيه إيه غير كده . . انت نوح لك اختصاص في إيه غير العفاريت ؟ : هم فين ؟؟ هم فين ؟ عجايب : جوه هنا في اللشوله .. مع العفش المحجوز عليه .. أصل الست ام قوقو عبده حجزت على العفش بالعفاريت اللي فيه .. لكن دلـوقت استغنت عن العفاريت .. يعنى ممكن انك تطلعهم ؟ : بس تاخدهم معاك .. مش تطلعهم من اللشوله على جتناً .. نوح مفهوم ؟ : مفهوم يا سيدنا الافتدى مفهوم . عبدايب : إذا كنت عايزهم فوق معاك .. ما فيش مانع خدهم يونسوك . نوح : لا .. لا .. دول صنف بطال ما يتفعنيش ، أنا حا اطلعهم وأوديهم عجايب في داهيه . : (منزعجة) في داهيه ازاى .. يا سيدنا الشيخ !! حرام عليك . بهية

: ما يمكنش .. انا لازم أفتك بيهم .. لازم أفنيهم ، أبيدهم .

عجايب

بهية : تفنيهم ؟ حرام . . حرام عليك (تبكي) .

أم عبده : هوا إيه أصله ده .. إيه اللي حرالك يابت ؟

بهیة : مش سامعه یا نینه بیقول ایه ؟.. بیقول انه حا یفتیهم .. یعنی حا یموتهم .

قرقر : یا ستی بهیة .. بس لما یطلعهم یبقی یحلها ربنا .. هوا طلسو ع العفاریت بالساهل ، دول لما یتبتوا فی الشوال ما یطلعوش أبدا .. دول یطلعوا حبابی عنین اللی حا یطلعهم . دول یطلعوا علی جتنه البلا قبل ما یطلعهم .. اسألینی انا یا ست بهیه ، دول لما یقرفصوا فی الشوال ، ما یطلعوش ولا بالطبل البلدی ، یبقوا وحشین قوی وخطرین .. یعضوا ویشنکلوا ، ویعملوا حاجات وحشه قوی .

عجايب : اللهم احفظنا .

قرقر: اسألونی انا عنهم، انا اعرفهم كويس قوى ، عفاريت اللشوله دولا .

عجایب : معلهش ، ربنا یقدرنا علیهم ، اتفضلوا انتوا بقی من غیر مطرود . .
فضوا لنا الأوده . خلونا نشوف شغلنا . . بس ابعتی لنا وآبور
سبرتو وطاسه وحله فاضیه .

نوح : انت حا تطلعهم ، والا حا تطبخ لهم .

عجايب : دا شغلنا يا سيدنا لفندى .

قرقر: على العموم هم جعانين قوى .

عجايب : إيش عرفك ؟

قرقر: باین کده من صوتهم .. یعنی لو طلبت لهم کام سندوتش .. حا یبقوا ممنونین خالص .

عجايب : سندوتش ؟! الظاهر انك عمرك ما اشتغلت مع عفاريت .. سيبهم لل انت بس .. أنا حا اطلعهم بالطريقه بتاعتي .

قرقر : انت حر .

: يَا الله اتفضلوا . عجايب (تخرج أم عبده ووراءها بهيه) . : وابعتوا لناكان شوية دره عويجه .. أد حفنه كده . عجايب : عويجه ؟ قرقر : أيوه عويجه . عجايب : وليه العويجه ؟ يعني لازم تصعبها .. ما تخليها دره عاده .. والا قرقر قمح . . يمكن يعملوه بليله . . ٠, : انت حا تعلمنی شغلتی ، دی صنعتی یا سی قرقر وانا اعرف عجايب الأصول كويس . : عدم المؤاخذه .. عويجه .. أنا مالي ، هو اتا اللي حاكله .. انشا الله قوقو تطلب قرطم . : (ملتفتا إلى نوح الذي أمسك بالعود وأخذ في تصليحه) وسيدنا عجايب لفندي مش حا يتفضل ؟. : أتفضل فين ؟. نوح : شويه كده ، لغاية ما نطلع الكام عفريت . عجايب : واتفضل ليه ؟. نوح عجايب : بس علشان الشغلانه دي متعبه شويه .. ويمكن أعصابك مسا تستحملهاش. : ما تخافش انا أعصابي تستحمل أبوها . نوح عجايب : وكان عايزين هدوء تام . : وآدى الهدوء التام (يلقى بالعود جانبا) مه ولا كلمه .. اتفضل نوح شوف شغلك . : ولزومه إيه ياسي نوح افتدى .. ما تسيبه لوحده في الأوده .. يمكن قرقو يكونوا العفاريت ما بيبانوش على حد غريب . : يعنى إيه .. عفاريت حريم ؟. نوح

قرقر : جأيز

نوح : يبقى مش حا اطلع ابدا .. أنا قتيل العفاريت أموت في العفاريت .

عجايب : معلهش .. تقدر تخليك زى ما انت ؟.

ر تدخل عديله وهي تحمل السبرتو والطاسة والحله وكوز به

الذرة العويجة) .

عديلة : اتفضل يا سيدنا الشيخ .

عجايب : وحياة أبوكي ولعي لي السبرتو .

عديلة : عنيه يا سيدنا الشيخ .

عجايب : تسلم عنيكي .

(عديلة تولع السبرتو) .

عجایب : حطی لی علیه الطاسه ، وحطی فیها حفنة دره وقلبیه لغایة مـا یتحمص .

(عديلة تنفذ المطلوب) .

(يفتح الخُرج ويخرج منه بعض أوراق وكتاب أصفر وأحجبة وبخور. يضع الحجابين في الحلة ويكتب في ورقة بضع جمل ويضعها فيها) .

الشيخ عجابب: عايزين أتر من أي حد.

عديلة : يعنى إيه ؟.

عجايب : يعني أي حته من الهدوم بتاعت أي حد من البيت .

نوح : (يقذفه بفردة الشراب) خد الشراب ابو نقرتين ، ما بقـاش

يلزمني .

عجايب : (يضع فردة الشراب في الحلة) .

نوح : كل ده حياكلوه العفاريت ؟ دا انت متوصى بيهم قوى .

قرقر : متوصى بيهم ازاى ! دى فردة الشراب دى حا تكون القاضيه

عليهم . حاتموتهم خنقا بالغازات السامه .

عديلة : هم مين دول ؟

قرقر: العفاريت ياست عديله .

عديلة : عفاريت ، يا مغيث ، يا منجى . أشتاتا أشتوت ، وهو انا اقدر على طلوع العفاريت قدامى ، عن إذنك يا سيدنا الشيخ ، أنا جتنى ما تستحملش .

عجایب : ما تخافیش یا بنیه اطمنی خالص ، ما دام انا و اقف جنبك ما تحملیش هم .

عديلة : البركه فيك يا سيدنا الشيخ ، بس انا ركبي بتترعش .

عجایب : اقری آیة الکرسی خمس مرات .

عديلة : حاضر ، بس انت فاكر الحاجه اللي طلبتها منك ؟

عجایب : فاکر قوی ، وإن شاء الله حا دیکی حجاب تلبسیه ، واقول لك على وصفه تنفعك خالص .

قرقر: هو إيه دا يا ست يا عديله ؟!

عدیلة : اسکت انت دی حاجات ما تعرفهاش .

قرقر : انتي كان بتعملي حاجات عند سيدنا الشيخ . والله عال ربنا يجعلنا من بركاتك يا سيدنا الشيخ ، مش حا تبتدى الشغل بقى . والا عايزلك جدى أحول ؟

عجايب : لا ما فيش لزوم ، الحكايه مش مستاهله . بس عايزك تقرب من الشوالات وتحط الحله على كفك وتمسك ودنك الشمال بإيدك اليمين .

قرقر: حاضر، من عينيه، أما شوف آخرتها.

(يضع الحلة التي على المنضدة في كف قرقر ثم يقلب فيها الطاسه والذره والبخور ويضع عليها الغطاء ويشمر أكمامه ويخرج من الحرج كيسا صغيرا مدلى من خيط ويأخذ في لفه بحركة دايره حول الحلة وهم يتمتم بكلمات غير مفهومه) .

: (في ملل) و آخرتها . أنا دراعي خلاص نمل . قر قر : ﴿ يَقُواً ﴾ أَينكَ يا زُوبِعه ، أينك يا لوبعه .. أينك يا صاحب الروس عجايب الأربعة . (يدفعه بكوعه) اسكت . ما تخسرش الشغل . : أصل الحق مش عليك ، الحق على العفاريت اللي ساكتين لك لغاية قرقر دلوقت . : يعني عايزهم يعملوا أيه ؟ عجإيب : يخلوا عندهم نظر ، يشكوك مقلب والا يلهفوك مقص ، والا يعنى قر قر حا يفضلوا ساييني كده لغاية ما دراعي ينقطم. أنا مالي ، أهي حا ترسى على دماغهم . (يتحرك شوال محمود في قلقلة بطيئة حتى يقترب من أقدام عجايب ثم يدفعه في قدميه دفعة تلقى به على الأرض) . : آه ، آه دماغي ، الحقوني . وسطى انقطم . عجابب : سلامتك يا سيدنا الشيخ ، إيه اللي جرى ؟ عديلة (لا يكاد ينهض متباعدا في خوف حتى يتلقاه سيد فيدفعه في قدميه دفعة توقعه مرة أخرى . فينهض متحاملا ثم يعدو مندفعا خارج الحجوة بأقصى سرعة) . (عديلة تنطلق مولولة من الحجرة . نوح افندى يتناول رشفة من الزجاجة ثم يتناول العود) . : إيه يا سيدنا الشيخ ، حد يجرى كده من العفاريت ؟! قر قر : (وهو يعدو في الخارج) هم دول عفاريت ، دول بلطجيه . عجايب : أنا مع العفاريت ، فلتحي العفاريت ، لو منهم اتنين في جمعية قتل نو ح الزوجات . كنت سويت بيهم الهوايل . يارب اتنين بس . زى دول . . وانا امشى بيهم ام عبده على العجين ما تلخيطوش . ﴿ أَمْ عَبِدُهُ تَدْخُلُ مِنْدُفْعِهُ عَلَى صُوتَ الْصَحِةُ ﴾ . : إيه ؟. حصل إيه ؟. هم طلعوا ؟ أم عبده

قرقر : إيه هم دول ؟

أم عبده : اللي ما يتسموش .

قرقر: لا، ده هو اللي طلع.

أم عيده : هو مين ؟

قرقر : اللي يتسمى ، الشيخ عجايب . كبير محتالي القطر .

أم عبده : طلع ليه ؟

قرقر: عاد إلى قواعده ، في السطوح.

أم عبدد: يعني إيه ؟ مش فاهمه ؟

نوح : (ضاحكا في سخرية) ودى عايزه فهم ، عاد إلى قواعده .. يعنى انسحب . عقب هزيمه منكره ، ارتد بعد خسائر جمه . برضه ما نتيش فاهنه ، بالعربي زاغ بعد ما نقحوه علقه جابت داغه .

أم عبده : هم مين دول ؟

قرقر : اللي ما يتسموش .

أم عبده : ضربوه ؟ يوه ، يا مغيث ، يا ساتر يارب والعمل إيه ؟ اذا كان هو ما اقدرش عليهم مين حا يقدر عليهم ؟ وانت يا راجل ، قاعث ساكت كده !؟

نوح : أنا مبسوط كده ، أنا مع العفاريت ، نموت وتبيا العفاريت (يمسك العود ويغني) يا غائبا عن عيوني ، وساكنا في شوالي .

أم عبده : هوا انت فيك فايده .. وبعدين يا قرقر ؟! إيه العمل ؟!

قرقر : إيه العمل ؟ (مفكرا) إيه العمل .. أقول لك يا ستى خليها على الله .

أم عبده : أخليها على الله ؟! دا اللي قدرت عليه ؟

قرقر : أيوه خليها على الله هوا في حد بيدبرها غيره خليها على الله ، وعلى .

أم عبده : عليك انت ؟

قرقر : أيوه على انا .. انا حا أعرف ازاى اطلعهم لك .

آم عبده : انت حا تطلعهم ؟! ما بقاش اللي انت يا سي قرقر . : يا ستى يوضع سره في أضعف خلقه .. جربي انتي حا يخس عليكي قرقر حاجه ؟ أم عبده : طب بس انبط .. تعالى معايا نطلع نشوف الراجل جرا له إيه .. يمكن نقدر ننزله تاني. . : ما فيش فايده يا ست . . دى العلقه اللي خدها ، مش حا تُغليه يرجع قوقو هنا أبدا ، دى نوك أوت . : يادي التصيبه ، وبعدين ؟ آم عبده : قلتلك جربيني .. مش عاجبك .. أعمل لك ايه ؟ جربيني يا ستى قرقر انت حا يخس عليكي حاجه ؟ (يزوم محمود من داخل الشوال) . : آه .. آه ياني .. أهم ابتدوا . أم عبده : قلتلك خليني اجرب .. ما نتش راضيه . قر قر : طب جرب .. جرب .. زى ما انت عايز . أم عبده : أيوه .. كده الكلام .. اتفضلي انت بقى من غير مطرود خليني قر قر اشوف شغلي . : ﴿ وَهِي تَهِمَ بِالْخُرُوجِ ﴾ أبعت لك شوية دره عويجه ؟ أم عبده : عويجه إيه يا ست .. أنا حا طلع عفاريت مش كتاكيت . قر قر أم عبده : أمال ابعت لك ايه ؟ : تبعتي إيه ؟! إيه ...؟ قر قر (محمود يزوم) . : أيوه افتكرت ، ابعتي حتة جبنه حلوم .. على طبق فول بالزبده .. قر قر على السبع بيضات اللي كنت حا تبعتيهم للشيخ عجايب المهزوم ، وما فيش مانع تبعتي حتة القشطه وشوية عسل النحل اللي كان حايتسممهم .

: ليه دا كله ؟	أم عبده
: مش حاطلع عقـاريت ، يمكـن يطلعـوا جعـانين ابقـي اخــليهم	قرقر
ياكلونى ؟ والا اسيبهم في البيت يخربوه ويلهفوا اللي فيه ؟ مش	
برضه الاستحراص أحسن ؟!	
: برضك أحسن ، حالا حابعت لك اللي انت عايزه هي جت على	أم عبده
كام بيضه أُهو بجملة .	•
(تخوج أم عبده) .	
: وانت یا نوح افندی مش تتفضل شویه . عــلشان نشوف	قرقر
شغلنا .	
: شغلك ؟! انت كان ناوى تطلع عفاريت ؟.	نوح
: دانا حاطلع أبوهم ، دولَ مَا يعصونيش أبـدا ، إشاره واحــده	س قرقر
تطلعهم .	
: طيب ماتيالله تورينا الشطاره كده .	نوح
: بس لازم أكون لوحدى .	فوفو
: بقى كده انت اتعلمت شغل النصب ، انا مش حاسيب	نوح
الأوده لازم اشوفك واتت بتطلعهم .	-
: ليه بس يا سي نوح افندي ليه تلخبط لنا الشغل .	ئرق ر
: ما فيش فايده لازم اشوفهم يعني لازم اشوفهم .	نوح
: حد في الدنيا يشوف العفاريت ؟	قرقو
: كيفي كده أحبهم ، أنا حاسس ان انا حلاق فيهم حاجه حلوه .	نوح
: لا من الناحيه دي اطمن جدا ، ما فيش فيهم حاجه حلوه أبدا	قرقر
دول دكرين ، زى الحنشات ، الله لا يوريك .	
: برضك حا شوفهم .	نوح
: يادي الواقعه السوده يا سيدي قوم الله لا يسيئك ما تعطلش	قرقر
شغلنا ، قوم خسر بعدين بعملوا فيك الل عملوه في الشييخ	

عجأيب ،

نوح : ولو .. برضه حاقعد .

قرقر : (بعد أن نفد صبره) لا ، الظاهر الحكايه ما فيهاش فايده أبدا (لنفسه) ما فيش طريقه غير انى اقول له الحقيقه ويا طابت يا اتنين عور (لنوح) بقى اسمع يا سى نوح افندى . . انا مش حا خبى عليك . . أنا حاقول لك على كل حاجة ، باختصار القول . . الحكايه وما فيها ، ان اللى فى الشوالات دول مش عفاريت .

نوخ : أمال يبقوا ايه ؟

قرقر : بنی آدمین ؟

نوح

نوح : بنى آدمين ؟ اللى هبدوا الراجل العلقه دى كانوا بنى آدمين ؟ يا سلام عليهم .. أحبهم .. لا يمنى عليهم ، علشان ابوسهم مسن عنيهم .. هم فين طلعهم لى (يقذف بالعود وينهض مقتربا من الشوالات) .

قرقر : طب بس اصبر ما تزعقش كده ، علشان افهمك بقية الشغلانه .

: مش عايز أفهم .. أنا عايز اسلم عليهم وأهنيهم واحضنهم (يهجم على شوال آخر غير الذي به محمود وسيد ويحتضنه) اهنيك .. اهنيك من كل قلبي ، يا سلام ، أد إيه انت فشيت غليلى ، أما مقص اللي نتشتهوله .. مش بتاع بني آدمين ، مقص عفاريتي حقيقي .. إنت خليتني اتمني انك تكون بني آدم علشان اضمك للجمعيه .. لسه كنت بقول لقرقر ، لو منكم اتنين في جمعية قتل الزوجات كنت سويت بيكو الهوايل ، إيدك لما أهنيك مبروك (يفك الشوال ويمد يده فيجد به عدس بجيد فتبدو عليه الحيبه) إيه ده ؟! إيه ده يا واد يا قرقر ؟ ده بجيه ؟!

قرقر : جبه ؟! وجابها منين الجبه دى ؟ ده ما كانش لابس جبه أبدا يمكن لبسمها جوه . على العموم معلهش .

نوح : معلهش ازاى ؟ بقول لك بجبه ؟ يعنى لا يعرف يشنكل و لا يضرب مقصات .
قرقر : ليه بس .. تفتكر يعنى ان الجبه حا تحوشه ، على العموم لو حاشته

قرقر : ليه بس .. تفتكر يعنى ان الجبه حا تحوشه ، على العموم لو حاشته نبقى نقلعها له .

نوح: هوا إيه اللي نقلعها له .. وتلبسها له .. ده عدس بجبه .

قرقر : عدس إيه ؟! وريني كده (يحد يده) يا سيدى خضتنى انت غلطت في الشوال .. أنا راخر بقوله ماله قاعد ساكت كده .. لا بيهرش ولا يبصرخ ، أصلهم اتنين .. واحد بيهرش علشان حاجه بتاكله والتاني بيصرخ من الجوع .

(محمود يصرخ) .

قرقر : حالا .. دقيقه واحده ، لغاية ما يجيبوا الأكل ، أكله على كيفك عمرك مادقت زيها .. كانت من نصيب الشيخ عجايب .. أهى دى اللى بيقولوا عليها تكون في بقل وتقسم لغيرك .

نوح : يا الله يا أخى طلعهم بسرعه علشان نعقد الاجتماع .

قرقر : اجتماع إيه ؟.

نوح: الجمعيه .. هم مش حاينضموا ؟.

قرقر: أيوه حاينضموا .. بس مش كده خبط لزق . ما يصحش تاخدهم كده على مشمهم .

نوح : يعنى إيه مش خبط لزق ؟! الحكايه مستعجله ، ولازم نشوف شغلنا ، وتعقد اجتماع عاجل سريع .. علشان نبت في أمر أم عبده وتتخذ ضدها إجراء حاسم ، والا يعنى عاجبك الشباييك اللي مستكراها دى ؟!.

قرقر: لا ، لا ، عاجبانی ازای .. بس انت عندك فكره عن شخصية العضوين دول .. يعني تعرف هم يبقوا مين ؟١.

نوح : مش عايز اعرف .. اللي أعرفه عنهم كفايه جدا ، كفايه انهم رقعوا

عجايب الكلب الهدرين اللي خدهم . كفايه مهـارتهم في فــن الشنكله ، والمقصات .. كفايه ..

قرقر : مفهوم .. مفهوم .. بس انا عايز اقول لك .. ان ظهورهم هنا مستحيل .

نوح : ليه ؟.

قرقر : لأن البيت ده محظور عليهم .. ده يعتبر منطقه محرمه عليهم .

نوح : علشان إيه ؟.

قرقر: لأن دمهم مباح فيها .

نوح : مين أباحه ؟.

قرقر: عدوك اللدود .. الست ام عبده .

نوح : وليه ؟ مالها ومالهم ؟ تطاردهم ليه ؟ وتبيح دمهم ليه ؟ هـــى متجوزاهم ؟.

قرقر : متجوزاهم ازای یا سیدی . . بقول لك ام عبده مرات حضرتك ، تقول لى متجوزاهم ؟.

نوح : أصلك مخولتني ، لأني مش فاكر انها بتبيح دم حد غير جوزها ،
مش فاكر ان الحصومه المستحكمه دى تنشأ بينها وبين حد إلا اذا
كانت بينهم صلة جواز ، طيب إذا ما كانتش متجوزاهم تبقى مالها
ومالهم ، لها عندهم ايه ؟.

قرقر : أجرة الأوده .

نوح : آه .. بقى قولتلى .. يعنى هم دول الجماعه اللى كانوا ساكتين فوق ، والى استولت على عفشهم ؟.

قرقر: أيوه، أهم هم، استولت عليهم ضمن العفش.

نوح : وإيه اللي زنقهم الزنقه السوده دى ؟.

قرقر : طبت عليهم ما عرفوش يروحوا فين وكانوا متعودين ينزلوا على المواسير ، لكن حضرتك كنت واقف فى البلكونه اللي تطل على

المواسير فخافوا منك وملاقوش حته يستخبوا فيها غير الشوالات . : قلت لى ، طيب يا الله ، اطلق سراحهم حالا . : بس اصبر شويه ، لغاية ما البت عديله تجيب الأكل ، وبعدين نقفل الباب ونطلعهم يا كلوا لقمه ، والا ياخدوا الأكل معاهم	نو ح قر قر
ويزوغوا . : والاجتاع ؟. : تبقوا تتفقوا عليه بعدين . (تدخل عديله وهي تحمل الصينية وعليها الفطار) .	نوح قرقر
: الأكل الله . : حطيه على الترابيزه . : أمال فين الشيخ عجايب ؟.	عديله قرقر عديلة
: تعیشی انتی . : یعنی إیه ؟ جراله حاجه ؟. : العفاریت جابوا له الکافیه . طیروه علی فوق . : العفاریت جابوا له الکافیه . طیروه علی فوق .	قوقر عديلة قرقر
: أمال الأكل دا لمين ؟. : للعفاريت . : العفاريت بياكلوا عسل وقشطه ؟. : ما ياكلوش ليه عفاريت ذواتي مش واخدين على التقشف .	عديلة قرقر عديلة قرقر
: بقى كده ؟. : كده والامش كده ، انتى حاتفتحى له محضر سيبى الأكل واطلعى بره خليه يشوف شغله ، هوا حا يطلعك والاحا يطلع العفاريت .	مرمر عديلة نوح
: هو اللي حا يطلع العفاريت ؟ ياخي عفاريت لما ينططوه . (تخرج عديله ويغلق قرقر الباب خلفها) .	عديلة

: يا الله ياعم .. يا الله قوام ، افرج عنهم حالا ، خليهم يشموا نسيم

الحريد ، وخليني اشد على أيديهم وأهنيهم بعضوية الجمعية .

نوح

قرقر : حاضر .. حافكهم اهه .. بس خد بالك من الباب كويس .

نوح : ما تخافش ، انا حا اسنده بضهری ، ما فیش حد حا یقدر بخش أبدا ، أنا باعتبر نفسی مسئول عن حیاتهم .. دول أعضاء جمعیتی ، دول سندی ، یا الله بقی طلعهم .

المشهد السادس

(يسند نوح الباب الموصل إلى بقية الغرف بظهره) .

ريسرع قرقر فيفك الشوال الذى به محمود فيقفز إلى صينية
 الأكل ويأخذ في التهامه

محمود : لو صبرت على دقيقه واحده ، كنت من الجوع .. أما حتة صينية يا سلام سلم ، أنا مش عارف آكل إيه واسيب ايه ، أنا قتيل العسل النحل ده .

﴿ يتجه قرقر إلى شوال سيد ويفكه قيخرج سيد وهو يهرش ﴾ .

سید: یا سلام یا هوه ، أنا أول حاجه حا انادی بیها هی المطالبه بالحریه الخامسه ، ربنا ما بحرمش حدمنها .

نوح : إيه هي دي الحريه الخامسه ؟.

سید : حریة الهرش یا أستاذ ، ربنا ما يحرمك منها أبدا . . إنت مجربتش لم تكون حاجه بتقرصك و نفسك تهرش وما نتاش قادر ؟.

نوح : لاوالله ما جربتهاش .

سيد : يعني ما فيش حاجه قرصتك أبدا ؟.

نوح : لا ، بس عمرى ما قدرتش اهرش ، أنا جايب عصايه مخصوص للهرش ، دى يمكن الحريه الوحيده اللي با اتمتع بيها في البيت حرية الهرش ، أما باقي الحريات فممتوعه لاحرية كلام ، ولا حرية غنا ، ولا حرية بصبصه ، ولا حرية وساخه ، ولا حريه لخبطه .. الله لا

يوريك .. على العموم دا كله حا تحققه ان شاء الله بالجمعيـه بتاعتنا . بس دلوقتي تعالى كل لك لقمه على ما قسم . (يتجه سيد إلى الصينية ويأخذ في الأكل) . : ما تآخذوناش يا جماعه في الأكل الطياري اللي ع الواقف ده لكن نوح نعمل إيه في سي قرقر ، ما دام عملكوا عفاريت . (يبتعد من أمام الباب قليلا) . : إوعى الباب ، إوعى ، لحسن القضا المستعجل يطب ويكشف قر قر الحكايه ، ونروح كلنا في شربة ميه . : القضا المستعجل ؟ يا باي ، أنا حازور . محمو د : أحسن حاجه نعمل ساندويتشات و نا خدها في جيوبنا . سيد : ما تخافوش ، أنا سادد الباب كويس ما حدش حا يستجري يخش ، نوح كلوا على مهلكم ، علشان بعد كده نقدر نعقد الاجتاع على راحتنا . : اجتماع إيه ؟! مش وقته دلوقت ، يا الله يا جماعه اعملوا كل واحد قرقو ساندوتش ، وزوغوا دلوقت ، ما حدش عارف الظروف بعد كده إيه . : والجمعيه ؟. نوح : ﴿ وَهُو يَحْشُو رَغْيَفُهُ ﴾ نتفق عليها بعدين . سيد : بعدين ازاي ؟! المسأله مستعجله خالص . نوح : طيب ممكن نتفق دلوقت على حته نتقابل فيها .. أصل هنا منطقة چمو د خطر .. خطر جدا . : أيوه خطر علينا كلنا ، دي لو طبت علينا مش حاتسيبنا الاقتلى . قر قر : طيب تنقابل فين ؟. تو ح : اتقابلوا النهار ده بعد الضهر في القهوه اللي على ناصية الشارع . قرقر

: بعد الضهر كتير ، احنا عايزين نشوف شغلنا .

ٺو ح

محمود : طيب نخليها الضهر والا الصبح زي ما انت عايز ، بس اظن دلوقت نخرج قبل ما حديقفشنا !.

قرقر : أيوه .. يا الله زوغوا بسرعه ، وانا حاخبى الشوالات الفاضية ، وانعكش الأوده .. قال يعنى حصلت بيننا خناقه جامده ، وانا انتصرت عليكم .

لا یکادان بهمان با خروج حتی یفتح الباب المؤدی إلى السلم
 وتندفع منه زکیه ولعه) .

المشهد السابع

نوح : (صارخا في فزع) زكيه ؟ إيه اللي جابك هنا دلوقت يا زكيه ؟.

محمود : الله !! زكيه !!.

زكية : أيوه زكيه ، مالكم بتبصول كده زى اما يكون التقيتوا عفريت ؟.

قرقر : والله العفريت أهون ، أنا لسه دلوقت مطلع عفريستين بشويسة عسل . . لكن انت اطلعك بإيه . . إيه اللي جابك يا ست زكيه ؟ .

زكية : اسكت انت انسد يابوز الإخص .

قرقر : حاضر ، انسدیت ، حاسکت خالص ، و آنا بقی عندی حاجه ..
کل اللی عندی خلاص قلته .. لغایة ما طلعت العفریتین دول ، لکن
انت بقی ما اظنش فیه قایده منك ، ما کنتش عامل حسابی علیکی
أبدا ، أنا أحسن حاجه أقعد كده و اتفرج عی اللی حا بجری ،
اتفضلی یا ست كبریته .

زكية : ولعه يا روح امك .

قرقر : ولعه ، كبريته ، أهو كله محصل بمعضه ، أهمى حاجمه تسلسع وخلاص .

زكية : قلت لك ولعه يعنى ولعه .. يعنى مشعوطه .. بت تلعب بالبيضه (أم رتية)

والحجر . : أنا مالى يا سيدتى العبي باللي تلعبي بيه ، أهم كلهم قدامك ، بيض قزقر على حجاره ، العيى زى ما انتى عايزه .. بس خدى بالك بقى يا ست ولعه .. ان فيه ورا الباب ده .. عاصفه .. اسمها أم عبده .. تاخد في وشها ميت ولعه . : وانا مالي يا عمر ، بتخوفني والا إيه ؟! انا ما كلش م الكلام ده . ز کیة : أنا مالي تاكلي ولا ما تكليش ، أنا حبيت بس أعمل اللي عليه ، قر قر ودلوقت عن إذنكم ، أكل لقمه ، على الأقل لما يجرى لي حاجه أبقى ميت شبعان ، حضرتهم يا ست ولعه .. الأستاذ نوح ، والأستاذ محمود والأستاذ سيد . : عارفاهم يا روح ستك . ز کیة : يعنى اطلع منها خالص .. حاضر .. حاضر .. اتفضلوا . قر قر : الظاهر ان اليوم ده مش حا يفوت على خير أبدا .. أنا بافكر آخد يحمود الرغيف بتاعي وادخل الشوال تاني ، هي حقيقي القعده مش مريحه ، لكن آهي مأمونه ، بعيد عن الخطر .. والشوال اللي تعرفه أحسن م اللي ما تعرفوش . (يهم محمود بالدخول ف الشوال) . : رایح فین یا سی محمود افندی ، اطلع لی بره یا خویا ، أنا لیه عندك ز کیة حساب . : ما تزعقیش کده یا ست زکیه الله لا یسیئك وطی صوتك شویه ، نوح قولي لي بس إيه اللي جابك هنا ؟. : (تكشف عن ساقها) رجليه يا حبيبي ، وحشين ؟! ز کیة : هم من جهة الحلاوه حلوين ، بس يعني جابوكي هنا ليه ؟. سيذ

: جابونی لیه ؟ علشان اصفی حسابی معاکم ، علشان اشوف لی

طريقه ، علشان أرسى لى على بر .

ز کیة

: طيب انت مش جابه لنوح افندي ؟ عن إذنك احنا .	محمود
: اقعد هنا ، انا جایه لکم آنتوا لاتنین ، لازم تشوفوا لی خلاص ،	- زکی ة
انتوا فاكرينها إيه ؟! ساييه ، فوضى ؟!.	
: طيب يا زُكيه باختى ، الخلاص ده ممكن نشوفه فى أى حته تانيه	نوح
الحكايه مَا اظنهاش مُستعجله أُوى كنَّه وانتي عارفه ان خالتك أم	ري
عبده لو دریت	
: حا تعمل إيه يا ادلعدي ، أنا عايزاها تدري ، لازم اجيبها على	زكية
بلاطه مَا فيش فايده غير كده ، هو كل الطير اللي يتأكل لحمه	
كل ما اجيلكوا من هنا تجوني من هنا الحمد لله اللي قفشتكم هنا	
مع بعض ، علشان نرسي لنا على حل .	
: حل في إيه بس ياست زكيه ، هوا دا وقته ؟.	سيد
: اسكت انت واتلم بلسانك ما تداخلش في اللي مالكش فيه (توجه	ِ ز کیة
الحديث إلى نوح) هه قلت إيه ؟.	•
: في إيه بس يا زكيه ؟.	نوح
: ما نتاش عارف في إيه ، في اللي في بطني يا عومر .	زكية ﴿
: اللي في بطنك ؟! ماله ؟!.	نوح
: عايزه له أب يا حبيبي عايزه له والديا سيدنا لفندي .	ر زکیة
: عايزه له إيه ؟أ.	تحمود
: أب ، أب ، مش فاهم يعني إيه أب ، زى أبوك ، وأبو أبوك .	زكية
: أيوه أيوه فاهم بُس وطي صوتك .	تحمود
: ومستعجله قوى ، على أبو لسلامته ، ليه ؟!.	نوح
: مستعجله ليه ؟١.	ر زکیة
: أيوَ حقيقي ، يعني مش كان يبقى أحسن لو تسيبيه لغاية ما ينزل	محمود ٔ
ويكبر ويميز ، ويختار الأب اللي يعجبه ؟!.	_
: ﴿ وَهُو يُعِصْمُ الطُّعَامُ ﴾ أي والله فكره ، أنا شخصيا ، لو خيروني ما	قرقر
-	

كنتش اخترت ابويه دا أبدا ، كان شحات ابن شحات ، وكان شكله وحش قوى ومورى أمى الويل . لكن اعمل ايه ، طلعت لقيته الله يرحمه أبويه ، وما قدرتش اقول لهم غيروه ، لكن والله لو كان بإيدى كنت مؤكد نقيت واحد تابى .

نوح : مضبوط . لك حق ، أهى دى حريه جديده م الحريات اللي حا تظالب بيها الجمعية . حرية اختيار الآباء .

زكية : بتقولوا إيه ؟ حرية اختيار الآباء ؟ يا اخى بو لما يشتحك منك له . آل يختار الأب اللي هوا عايزه آل ، خش في عبى يا خويا خش . استكردني يا خويا استكرد ، ما انتم أصلكم فاكريني هفيه ، لا ، أنا ما باكلش من الكلام ده . لازم اشوف له أب حالا .

محمود : ليه بس يا زكيه يا اختى ؟ ليه العند ده ؟ دا مش وقته أبدا ، خلينا بعدين ندبر المسألة سوا على رواقه .

زکیه : ماکانش یتعز یا حبیبی ، غالی والطلب رخیص یا روحی ، آل علی رواقه آل ، یا ریت کان ممکن یا سی حوده .

نوح : هوا إيه أصله ده ؟!.

زكية : ما انتش عارف أصله إيه ؟! حا نعيده تاني أصل انا عايزه أب للواد اللي جي بعد كام شهر ، عرفت بقي أصله إيه ؟. أصل انا مش عايزاه ينزل يلاقي نفسه يا ضنايا ، من غير أب ، يعني ابن حرام ، فهمت يا روحي ، والا افهمك كان ؟! يعني بالعربي واحد منكم لارم يتجوزني حالا .

سيد : حالا ؟!.

زكية : أيوه حالا ، حالا ، يعنى يطلع معايا من هنا على المأذون ، رجلي ، على رجله ، قلتم إيه بقى ؟.

نوح : يسا ستسى زكيسه ، الحكايسه مساتجيش كسمه .

زكية : خلاص انتهينا ، كلمه واحده ، أنا مش حادوخ نفسي وراكم بعد

كده ، لازم اطلع من هنا بعريس . فاهمين والالأ ؟.

نوح : إيه هوا دا ؟ هي الحكايه ، عافيه ؟.

زكية : عافيه ؟. بقى كده ؟! طيب انا حا اوريك العافيه تبقى ازاى (توقع بالصوت) يوه .

قرقر : (قافزا من مكانه فى فزع) يا نهار اسود ، انا فى عرضك يا ست زكيه يا اختى ، أنا مفهم الست ام عبده ان العفرتين اللى حاطلعهم لاتنين دكره ، ما كانش عندى فكره أبدا انك حا تشرفى هنا كنت عملت مقدمه وقلت لها ان معاهم نتايه ، اعملى معروف وطى صوتك لحسن تطب علينا تجيب أجلنا ، يا الله يا جماعه ، خلصونا شوفوا لنا حل قوام .

نوح : حل ازای بقی ؟.

محمود

زکیة : ما نتاش عارف حل ازای . خا نعیده تبانی ، واحمد منکسم بتجوزنی .

قرقر: أيوه ، واحد منكم يتجوزها ، ما فيش غير كده .

نوح : أنا ما اقدرش ، ما اقدرش أبدا . دى ام عبده ، كانت تعلق لى المشنقه في وسط ميدان السيده ، دى كانت تاكلني ، اتجوزها انت يا سي محمود ، انت فاضى ، وعلى كيفك .

: أنا ؟! أنا اتجوزها ؟! ده برضه معقول ؟! أتجوزها وانا مش لاق آكل ، أتجوزها وإنا لسه تلميذ ، واروح لهم في البلد بدل ما بكون في إيدى شهاده يكون في إيدى زكيه ولعه ! وياريت زكيه ولعه وبس ، الا وعلى كتفها كان ولد !! ما شاء الله ، دول كانسوا يخنقوني ، لا يا عم ، أنا مالياش في الجوازه دى أبدا ، أنت راجل مقتير مبسوط ، وكان قدامك في حساب الشرع ، تلاته (إلى زكيه) خلاص يا ست زكيه ، نوح افندى حا يتجوزك ، اتجوزها يا نوح افندى .

: ما يمكنش ، ما اقدرش ، حرام عليكم يا جماعه . نوح : ﴿ فِي مَلِلَ ﴾ يا الله بقي خلصوني ، أنا مش فاضيه لكم . ز کیة : أحسن حاجه ، نعمل قرعه . قر قر : اعملوا اللي انتوا عايزينه ، بس خلصوني قوام ، شوفوا لي جوز ز کیة حالاً ، حالاً دلوقت ، فاهمين والآلأ . (يسمع صوت أم عبده من الخارج). : خلاص يا قرقر ؟!. أم عبده (يحدث هرج ومرج ويهم محمود وسيد بالفرار ، فتقف زكيه في طريقهما). : خليك عندك منك له لحسن ازقع بالصوت . زكية . : (مجيبا أم عبده) اصبري على يا ست شويه ، لحسن دول قرقر معصلجین قوی ، (إلى محمود و توح وسید) یا الله یا جماعه شوفوا لنا حل بسرعه ، حد منكم يقول لها انه حا يتجوزها ، وخلونا ننتهي . : يقول لي إيه يا عمر ؟! هو انا باكل من الكلام ده .. يخرج من هنا زكية على المأذون إيده في إيدى .. هي الحكايه سابيه والا إيه ؟. : (يرتمي على الأريكة في يأس) لا .. الظاهر ان أجلي قرب .. يا نوح خسارة الجمعيه .. يا خسارة المشروع .. يا خسارتك يا نوح افندي . : (يمسك الشوال محاولا إدخال نفسه فيه) أنا يا عم حا ادخل جوه محمو د الشوال تاني ، ومشحا اطلع منه أبدا . : بقى ده اسمه كلام ؟! يعنى عايزين ام عبده تيجي تموتني انا ؟! يعنى قر قر هي المسأله مالهاش حل ؟! ما فيش حد عايز يضحي ؟. : (بعد تفكير) أقول لكم . أنا حا اضحى . حا اضحى لكن مش علشان خاطركم أو خاطر ام عبده ، انا حا اضحى علشان خاطر

علوقه واحده .. عارف انها حانتاً لم لو واحد منكم اتجوز زكيه .. حا اضحى علشان خاطر واحده حا تتصدم لما تلاقى ابوها اتجوز على أمها فى آخر العمر ، وحا تتصدم أكتر لو تعرف ان البنى آدم اللى فاكراه مثل أعلى اتجوز الست زكيه ولعه ، وبقى أب لابن مجهول الأب .. أنا حا تجوزك يا ست زكيه .. وأمرى لله لأن ما فيش حد حاسس بيه ولا حايز عل عليه .

زكية : (فى ذهول) انت بتتكلم جد ؟! والا عايز تلفنى .. خد بالك كويس انا ما ينضحكش على أبدا .

سيد : أنا ما اعرفش الف . . كل اللي انتى عايزاه حا اعملهولك . . يالله بينا يا جماعه .

(يهمون بالحروج عندما يسمع صوت الشيخ عجايب من وراء باب السلم) .

عجایب : وله یا قرقر .. ما طلعتلیش الفطار لیه ؟! انت عایزنی اموت من الجوع .. مش کفایه اللی جرالی .

قرقر : يادى الوقعه السوده .. نعمل إيه دلوقت ؟! حا تخرجوا منين (إلى عجايب) طيب يا سيدنا الشيخ اطلع دلوقت وانا اجيب لله الصينيه .

عجايب : (من الخارج) مش طالع الألما تديها إلى دلوقت .

قرقر: أعمل إيه في ابن الأروبه ده !! هاتوا يا جماعه الأكل اللي معاكم .. (يحاول جمع الأكل وإخراجه من الأرغفة وإعادته إلى الصينية عندما يسمع صوت أم عبده من وراء الباب الآخر) .

أم عبده : واديا قرقر .. انت حا تضيع اليوم عندك والا إيه ؟.

نوح : خلاص ما فيش فايده رحنا في داهيه .. الحصار تم من جميع الجهات . وقعنا واللي كان كان . جالك الموت يا تارك الصلاه أشهد أن لا إله إلا الله . (يقفز قرقر من مكانه وينزع أغطيه الأرائك فيضعها فوق محمود وسيد وزكيه .. وزكيه طبلة) .

قرقر : اسمعوا یا جماعه دی آخر محاوله .. دی آخر حاجه نقدر ننفد بیها .. بعمرنا .. یا تخیل علیهم یا نروح فی داهیه .. آنا حافتح لکم الباب و انتو .. تخرجوا علی بره جری و کل واحد منکم یدق باللی فی ایده قوی و یفقر .. وانت یا نوح افندی امسك العود بتاعك ، و تنتن لهم .. فاهمین ؟.

(تفتح أم عبده الياب فتذهل نما تراه) .

أم عبده : (صارخة) يا حفيظ .. يا مغيث .. دول إيه دول يا واد يسا قرقر ؟!.

(بيدأ الدق ويندفع الطابور وهو يترنح إلى الخارج) .

نوح : (وهو يعزف على العود):

ﺗﺮﻟﻨﻰ . . ﺗﺮﻟﻨﻰ . . ﺗﺮﻟﻨﻰ . . ﺗﺮﻟﻨﻰ .

محمود : (هنشدا) أنا الولى .. أنا الولى .

سيد : (منشدا) وانا ابن عمه الشيخ على .

زكية : (منشدة) وانا اللي بزف الصالحين .

(يفتح قرقر الباب أمام الموكب .. بينا هم يرددون الأنشودة مرارا) . (عجايب لا يكاد يرى الموكب حتى يصرخ فزعا ويفر هاربا) .

(يسدل الستار)

الفصل الثالث

(المنظر: بعد سنة. والوقت قبيل العشاء في ليلة صيف. صالة في الشقة العليا، لمنزل أم عبده التي استأجرها سيد و محمود. في الواجهة باب يؤدى إلى شرفة بها بعض قصارى زرع. وفي اليمين بابان أحدهما يؤدى إلى دورة المياه والثاني إلى السلم، وفي اليسارباب يفضى إلى غرفة النوم، وشباك يطل على منور وقد وضعت عليه صينية قلل. في الركن اليمين البعيد أريكة استامبولي. وفسى الركسن السيسار البعيسد بسعض السلال والشو الات. في الوسط منضدة كبيرة حولها مقاعد خيرزان. في الركن اليمين القريب بوفيه وفي الركن اليسار القسريب المنضدة القديمة وعليها كتب وأوراق والمرآة المشروخة... وبجوارها غابة أشبه بسنارة الصيد في آخر الدوبارة التي بها مشبك غسيل. يدو سيد جالسا أمام المنضدة وقد أتم كتابة مسالة وبدا في تلاوتها لنفسه).

المشهد الأول

: (يقرأ):

8 أكتب إليك يا ساحرة وأنت منى على قيد خطوات ، أكاد لو أنصت أسمع هبة أنفاسك وخفقة قلبك .. أكتب إليك لأنى أشعر عند الكتابة بما يشبه متعة اللقاء ، وأحس أنى أنقل إليك ذوب نفسى وخلاصة روحى ، وأكاد أتوهم وأنت تقرئين ما أكتب أنى طاو فى الصفحات قابع بين السطور ، وأنى أمتع العين بسحر عينيك وأدفئ

الروح بحر أنفاسك .

إنى أحسك يا ساحرة فى كل ما أحس .. أحس بك فى كل زهرة ندية وروضة بهية ، وطير شاد ونجم هاد ، وعطر زكى ولحن شجى . أنت معى دائما .. فى كل صحوة وغفوة .. أنت معى غائبة أو حاضرة ، واصلة أو هاجرة .. أنت باقية فى روحى وفى ذهنى وفى قلبى .. بقاء الروح والذهن والقلب » .

المخلص محمود

(يطوى الرسالة ثم يشبكها بمشبك غسيل المربوط فى السنارة وتحين منه التفاتة إلى شكله فى المرآة فتخرج منه تنهيدة مريرة ساخرة ويحدث نفسه) .

ز لنفسه في المرآق) وآخرتها ؟ وايش بعد دا كله ؟ إيه آخرة الهوى المتنكر ، والحب المقنع ده .. انت .. بخلقتك دى ، وبكيانك ده .. مفيش فايده منك مش حا تحبك مش حاسه بيك ، ولا حا تحس بيك أبدا .. خلقتك كده !! تعمل إيه ؟ طب ما انا عارف انها مش حا تحبني ، أنا يائس جدا من حبها ، أنا ما بعملش كده علشان تحبني .. أنا بعمل كده علشان ما اخذ لهاش ، أنا عايز امنحها الأمل اللي انا فقدته ، واعتقد ان انا نجحت في كده .. أنا عملت كل حاجه علشانها .. أنا كرست جهودي وحياتي كلها علشان اسعدها واحقق لها أملها .. أنا قبلت أضحى بنفسي وأتجوز زكيه ، علشان ما اصدمهاش في محمود ، ولو لا ربنا ستر ، والحكايه طلعت علشان ما اصدمهاش في محمود ، ولو لا ربنا ستر ، والحكايه طلعت ربنا يعلم مين أبوه .. قبلت دا كله علشان خايف عليها لتتاً لم ، وفضلت ورا الحيوان محمود الله من البارات والكباريهات وأذا كر له واسهر بيه اليالي لغاية ما خليته ينجح وياخد الليسانس ، وفضلت واسهر بيه اليالي لغاية ما خليته ينجح وياخد الليسانس ، وفضلت أجرى ليل معنهار وانط من ديوان لديوان .. واجيب في واسطه ورا

سيد

واسطه لغاية ما ربنا سهلها له وبقي موظف محترم . وتعدت أديق واقتصد وأحرم نفسي لغاية ما بقالنا شقه محترمه نظيفه عليها القيمه بعدما كتا مش قادرين ندفع أجرة الأوده اللي فنوق السطسوح وخرجتنا منها الوليه على ملا وشنا محبوسين في الشوالات ، وطول المده دي كلها عمال اهدي فيه واحاول ان اخليه يحيها و اكتب لها في جوابات باسمه ، واناجيها بلسانه .. أناجيها بلسانه هو ، وبقلبي أنا .. دا المنفذ الوحيد .. اللي بنفس بيه عن مشاعري ، ويخرج فيه حبى ، ويتلقى منها الردود بتناعتها ، اللذيـذه الحلــوه الهايمه .. حقیقی ، مکتوبه له . . لکن بحس منها بعزاء کبیر ، بحس آن و لو آنی مش مقصود بيها .. لكن بلاق فيها الرد على جوابــاتى ، وعلى هيامي ، وعلى حبى .. أنا حاسس ان الشعور بتاعي مردود ، مش ضايع في الهواء .. هي حقيقي ما تحبش الشكل الظاهر ده (يشير إلى نفسه في المرآة) ، ولها حق . . لكن منهيأ لي انها بتحب الحاجه المستخبيه .. بتحب القلب والشعور ، والروح ، ودا كله أبقى وأدوم وأحق ، (يطلق تنهيدة مريرة ساخرة) أهو كلام بنعزي بيه نفسنا ، أمال حنقول إيه لو ما كنش كده ، كان الواحد زمانه مات من الياس .

(ينهض من مكانه ومعه الخطاب والسنارة والدوبارة ، ويتناول الناى من فوق البوفيه ثم يطفئ النور ويتجه إلى الشرفة . يقف بيها .. ويعزف برهة على الناى ، ثم يتقدم من حافتها على أطراف أصابعه ويقذف بالرسالة ممسكا بيده طرف السنارة) .

(فى هذه اللحظة يفتح الباب المؤدى إلى السلم بمفتاح من الحارج ويدخل محمود يحمل لفائف بها سندوتشات ومأكسولات وزجاجات بيره ويفتح النور ويضعها على الترابيزه ويرفع عقيرته بالغناء) .

: ما كنش كده طبعك يا غزال ، والنبي انا مقدر على دى الحال .	محمود
(سيد يفزع خشية أن تفضج بهية الأمر ويحاول إسكاته بإشارات	•
من يده ، ولكن محمود لا يشعر به ويستمر في الغناء ، فيترك	
السنارة مستندة على سور البلكون ويهرول إلى الداخل) .	
: هس الله يفضحك زى ما حتفضحنا ، هو دا وقت غنا ؟	سيد
: ﴿ يِهَاجِمُ وَيَهْزُعُ ﴾ إيه ده ؟! انت طلعت منين نشفت دمي .	عب محمود
: هس ، وطي صوتك لحسن تسمعك تبقى فضيحه ، وتضيع	_
كل تعبنا هدر . اطفى النور لغاية ما تاخد الجواب ، والا يعنى لا	سيذ
منك ولا كفاية شرك .	
ر محمود يطفئ النور ثم يتسلل سيد إلى الشرفة ويمد يده فيسحب	
السنارة) .	
: (هامسا من داخل الحجرة) ها غمزت ؟	محمود
: ﴿ يَشْيَرُ بِرَأْسُهُ بِالْإِجَابَةِ ثُمْ يَعُودُ مُتَسَلِّلًا إِلَى دَاخُلُ الْحُجْرَةُ ﴾ كَنْتَ	سيد
حا تودينا في شربة ميه ، مالك جي عيارك فالت قوى ، وداخل	
فارد قلوعك إيه حكايتك ؟	
: (يضيُّ الحجرة) حكايتي انا ؟ والا حكايتك انت ؟ إيه الل قعدك	محمود
انت لغاية دلوقت انت مش قلت انك مسافر تجيب قرشين و مش	
ر أجع غير بكره بعد الظهر .	
: دا اللي كان مفروض .	سيد
: وبعدين ؟	محمود
: مَا جَصِلُش قَسْمَه الحكاية حصل فيها لخبطه واضطربت ألغي	سيد سيد
السفر .	•
: (في الزعاج) تلغي السفر ؟ يعني مش حا تسافر ؟	محمود
: مالك بتصرخ كده !! انت مش لسه قابض ، ولا طيرت الماهيه زى	-
عوايدك ، على العموم بكره ربنا يفرجها ويرزقه من حيث لا	سيد
عوایدت ، علی العموم بحره ربه یمرجه رغررت س	

يمحتسب .

محمود : قوى . . أنا معاك خالص ، من جهة بيرزق من حيث لا يحتسب فبيرزق أوى . . بي بقى يرزقه بإيه ؟ عمرك ما تعرف بمصايب . . ببلاوى .

سيد : بلاوى إيه اللي رزقك بيها ؟

محمود : فيه أكتر من كلمه بلاوي ؟

سيد : ما تقوللي بس إيه هي البلاوي دي ؟

محمود : وجودك الليله دى .

سيد : وجودى أنا ؟

محمود : أيوه .. كان لازم تسافر .. أنا كنت عامل حسابى على إنك تسافر الليله دى .

سيد : ولما ما سافرتش حصل إيه ؟ قعدت على قلبك كتمت أنفاسك ؟

محمود : حاجه زی کده .

سيد : يعني إيه ؟

محمود : یعنی بالعربی أنا عارف زکیه هنا اللیله دی .. عملت حساب انك مسافر ، وقلت بدل ما اروح اسهر بره أهو أجیب شویة الشرب والأكل ونقعد نمزمز هنا ، جیت انت بسلامتك حلبت بی ، وقعدت في البیت و خسرت لي كل الشغلانه ، تبقى دى بلاوى من حیث لا أحتسب ، والالاً ؟ إیه العمل ؟ مش تقوم تسافر احسن ؟

سيد : انت بتقول إيه ؟! انت اتجننت ؟ زكيه جيالك هنا في الشقه عشان تسهروا سوى ؟ دى آخر أنواع الفضايح اللي عايز تعملها ؟ عايز الجيران يقولوا علينا إيه ؟ انت مش حا تستريح الا لما تودينا في داهيه . وبسلامتها جايه إمتى ؟

محمود : (ينظر إلى الساعة) أهو كان نص ساعه .

سيد : (في فزع) نص ساعه ؟ انت مجنون ؟ انت مش عارف بعد نص

ساعه مين حا يجيلك هنا.

محمود : مين ؟

سيد : مش فاكر قلتلك إيه النهارده الصبح ؟

محمود : لا . ، مش فاكر .

سيد : مش فاكر الجواب اللي قريتهولك ساغة ما صحيت من النوم ؟

محمود : أبدا أبدا .. أنا لما باصحى من النوم باقعد يبعجى نص ساعه في حالة غيبوبة تامه .. أنا مش فاكر الجواب ، أنا مش فاكر ان انا شفتك النهارده الصبح خالص .

سيد : يانهارك أسود.

محمود : اسود ليه بس .. ما تقول مين اللي حاييجي وتريحني .

سيد : بهيه ؟! افتكرت والالسه ناسي .

محمود : بهيه ؟ وإيه اللي حا يجيبها هنا ؟

سيد : يا محمود يا اخويا . . أعمل فيك إيه ، أكثر من إنى اقرالك الجواب بتاعها . . وأكد عليك انك تستناها عشان حا تطلع تقابلك ، وأترجاك انك تبقى لطيف معاها ، وانك توريها انك بتحبها ، وتخليك رقيق وما تقلش أدبك ولا تمد إيدك ، وتقول لها انك عايز تتجوزها ، وانك حا تخطبها من ابوها .

محمود : إيه !! أنت قلت لي الكلام ده ؟

سيد : أيوه قلتهولك .. أنا قعدت نص ساعه ألقنك الدرس واحفضك حا تقول لها إيه .

محمود : بس . . هي النص ساعه دي اللي اكون في حالة غيبوبه فيها وقلتلك إيه ؟

سيد : قلت لي حاضر . . حاضر .

محمود : حاضر إيه ؟

سيد : حاضر حا تخطيها .

: لا .. دانا لازم كنت في ذهول تام . محمو د : يعني إيه ؟ مشحا تخطبها ؟ سيذ : أَنَا أَخَطُبِ 1. فَالَ اللَّهُ وَلَا فَالْكُ .. بَقَى انَا سَايِكُ تَكْتُبُ عَنَى محمود جوابات حب زي ما انت عايز ومديك توكيل تصفر وتغني بإسمى وقت ما تحب . . لكن لغاية الخطوبه . . وفرمل . . ستوب . : إيه ده ! إنت مجنون ؟ أقعد أتعب التعب ده كله .. وبعدين تقول لي سيد كده .. أقعد اربى فيك ، وانجحك واوظفك علشان خاطرها ، والآخر تيجي تخلابيه كده ، مش ممكن ، ما يمكنش أبدا . : إيه هو ده اللي مش ممكن ؟! أنا ما اخطبش ولا اتجوزش أبدا . عجمو د الشهاده بتاعتك خدها ، مش لازماني ، والوظيفه كان ، أنا ما أبعش حريتي أبدا ، ولا بالدكتوراه . لا يا خال ، دا حتى حرام عليك . : يا محمود يا خويا ، يا حبيبي ، الله لا يسيئك ، خلينا نتكلم على سيد رواقه ... ﴿ يَدُقَ الْجُرِسِ ... يَفْزَعُ الْأَثْنَانُ وَيُوتَبِكَانَ ﴾ . : ودى تبقى مين فيهم اللي جايه بدرى ؟ اسمع يا خال : محمو د إذا كانت بهيه ، أرجوك تقول لها ان انا مش هنا . : مش ممكن ، لازم تقابلها بأي طريقه ، مش ضروري تخطيها ، قل سيذ لها كلمتين لطاف وخلاص . وبعدين بيقي يحلها ربنا ، أرجوك علشان خاطری . : موافق .. بشرط ـ محمود : إيه هوه ؟ سيذ : إنها تنزل بسرعه . يحمو د : حاضر . سيد : طب واذا كانت زكيه ؟

محمود

سيد : حا شيلهالك على راسي .. اللي انت عايزه أعمله أسافر لك لمدة شهر ، بس اوعي تزعل بهيه .

محمود : خلاص اتفقنا .

(يدق الجرس ثانية فيذهب سيد ليفتح الباب فيفاجئ بنسوح افتدى .. يدخل مندفعا وهو يحمل حقيبه) .

سيد : (ف ذهول) الله !! نوح افندى ؟!

المشهد الثاني

نوح : (وهو يضع الحقيبة على المنضدة) أسعد الله التماسي كيف الحال ؟ سيد : الحمد الله .

محمود : الذي لا يحمد على مكروه سواه .

نوح

نوح : (وهو يخرج أوراق ومنشورات) الليله دى عندنا شغل كتير . . خلاص ابتدينا الجد . . اقعدوا .

 (سید ومحمود یتبادلان نظرات الحیرة والتردد ویسترقان النظر إلى الباب فی خوف) .

: (وهو يلبس نظارته ويأخل في ترتيب الأوراق) الطلبات نازله علينا زى النظره .. المنشور الأولى عمل مفعوله .. النظاهر ان الحال من بعضه .. ما فيش حد أبدا راضى عن حاله .. (يرفع بصره فيجد الاثنين مازالا يتبادلان نظرات الحيرة والارتباك) الله .. انتم واقفين ليه ؟! ما تقعدوا احنا ما عندناش وقت .. لازم نفحص كل الطلبات دى . ولازم نراجع قانون الجمعيه .. ونبتدى في تشكيل بجلس الإداره .. وتكوين الشعب .. دى كلها عايزه جهد كبير .. بحلسة النهارده حا تكون جلسه تاريخيه كبرى .. إن شاء الله حا تغير وجه التاريخ .. وحا تكون أول خطوه في سبيل إعطاء الراجل كل

حقوقه وحرياته من براثن المرأة وتحريره من قيودها .. اقعدوا .

سيد : لكن .. (يتنحنع) .

نوح : لكن إيه ؟! فيه حاجه ؟.

ٺو ح

سيد : لا .. ولا حاجه .. بس قصدى اقول ان .. أنا شايف ان الوقت وخرى شويه .. والدنيا ليُلت .

نوح : ليَّلت ؟.. أمال عايزنا نعقد اجتماع في عز الضهر .. إيه ده با أستاذ ده ؟! دى جمعيه سريه .. إنت عمرك ما اشتركت في جمعيات سريه ؟! الجمعيات دى ما تجتمعش الا في ستر الليل . تحت جنح الظلام .. ده عز وقت اجتماعها .. اقعدوا بلاش تضييع وقت .. يا الله خلينا نشوف شغلنا .

سيد : (ينظر إلى الباب في قلق) بس .. ما يمكنش نقدر نأجل ..

: (فى غضب) نأجل إيه ؟! هى لعب ، دى مصالح أزواج ، دى حياه أو موت ، المسألة خطيره جدا يا أستاذ ، إذا ما كناش تلحق نفستا حا نروح فى شربة مية ، الوليه ام عبده ، خلاص فجرت ، بعد ما خلت الشيخ عجايب يستوطن فى الأوده اللي فوق ، وجوزته البنت عديله ، واستولت عليه ، وطول النهار يشبشب ويسحر ويعمل احجبه ، ويطلع فى عمايل ، خلاص فضى لما ، ما بقالوش شغله غيرنا ، هو وراه إيه ، آكل شارب نايم ، وأشيته رضا مع البت عديله ، يبقى وراه إيه غير خدمة ام عبده وأذيتنا لا ، لا ، الحكايه ما تستحملش التأجيل أبدا ، اقعدوا .

محمود: اقعد بقى يا خال ، ما فبش فايده، الليله باينه من أولها .

﴿ يَجِلُسُ مُحْمُودُ وَسَيْدُ وَيُضِعُ نُوحَ أَمَامُهُمَا بَعْضُ ٱلْأُورَاقَ ﴾ .

نوح : دلوقت نقدر نعقد الجلسه .. أنا حاتولى الرئاسه .. انت يا سيد افتدى تتولى السكرتاريه .. وانت يا سي محمود .. عضو مجلس الإداره المنتدب .. (مفكرا) لكن بالطريقه دى مش حاييقى فيه (أم رتية)

أعضاء .. لازم يكون فيه ولو عضو واحد .

(يدق الجرس فيقفز سيد من مكانه فزعا ويجرى نحو الباب ويقف وراءه برهه مترددا) .

نوح : (محاولا جمع أوراقه .. ناظرا إلى الباب فى حذر ومتسائلا فى صوت خفيض) انتوا مستنيين حد ؟!

محمود : لا .. أبدا .. ما فيش حد .. أبدا !.

(يدق الجرس ثانية .. فيفتحه سيد ببطء ، ويمد عنقه من خلال الفتحه ليرى الطارق .. يسمع صوت الشيخ عجايب من خارج الباب) .

عجایب : السلام علیكم یا سی سید افندی . . عدم المؤاخذه . . وحیاة والدك اقدر الاق عندك قطنه بصبغة یود احطها علی البطحـه اللی ف دماغی .

(سيد يفتح الباب ويدخله) .

سي : الله .. الله .. إيه اللي جرالك كفي الله الشر ؟ (يرتمي الشيخ عجايب على الأريكة وقد بدت إحدى عينيه سوداء من أثر كدمة ووضع يده بالمنديل على جرح في رأسه) .

المشهد الثالث

نوح : الله .. إيه الحكايه يا شيخ عجايب ؟.

محمود : الظاهر ان عين صابته .. حسدناك والله يا شيخ عجايب .. لسه كنا بنقول عليك آكل شارب نايم .. وأشيتك رضا مع عديله .

عجایب : الله یخرب بیتها بحق جاه النبی .. الحقنی یا سی سید انا فی عرضك لحسن خلاص .. دمی ساح .. إذا ما كانش بصبغة يود .. تبقی بتلقيمة بن ، بس اوقف الدم .

سيد : حاضر .. حالا .. بس خليك كابسه بالمنديل .

(سيد يخرج من البوفيه زجاجة صبغة يود وقطعة قطن ثم يضمد جرح الشيخ عجايب) .

نوح : إيه اللي جرالك يا راجل .. إيه اللي عمل فيك كده ؟!

عجایب : عدیله یاسی نوح افندی . . خدتنی غدر . . دشدشتنی خالص .

نوح : ليه بس ؟! عملت لها إيه ؟.

عجايب

توح

عيجايب

ولا حاجه والله .. النهارده الصبح الوليه زهره بتاعة الفول النابت فاتت علينا سابت لنا نص قدح فول .. وقالت لى ان بقالها خمس سنين من غير خلفه وان جوزها ناوى يتجوز عليها اذا ما كانتش تخلف .. وطلبت منى وصفه للحمل .. الوليه صعبت عليه قولتلها فوتى عليه آخر النهار أكون عملتلك اللازم وقعدت احضر لها فى حجاب كويس محبش ما يخيش أبدا . وقرب المغربيه خبط الباب ودخلت زهره .. رحت مديها الحجاب . الوليه خدته وقلبته فى إيديها وقول زى ما تكون استقلته .. قالت هوا دا يا سيدنا الشيخ اللى حا يجيب الحبل .. قولتلها ياستى البسيه دلرقت واذا ما نفعش نعمل واحد تانى .. برضه لقيتها موسوسه ، حببت اطعنها .. قولتلها يا ستى ما تخافيش اطمنى .. انا مش حاسيبك أبدا الا لا

: أبدا .

تحيلي . . غلطت في كده ؟!

: انا يدوبك خلصت كلام .. والأقيلك الباب اتفتح وحاجه كده هجمت عليه .. زى اما يكون صاروخ .. أتابى كلامى كان فى دخلة عديله .. وسمعته وهى ورا الباب الظاهر الفار لعب فى عبها خلاها شعللت .. وهجمت عليه .. عاديك .. ما خلتش فيه نفس .. ولا قدرت افهمها ولا اشرح لها ولا آخد منها حق ولا

ياطل .

نوح : ما تخافش ، بكره حا تا خد منها الحق والباطل ، اكتب يا سيد افتدى بسرعه ، العضو الرابع ، الشيخ عجايب محمد عجايب ، قوم يا شيخ عجايب قوم ، خد محلك على الترابيزه ، قوم ، دانت ربنا بيحبك ، العلقه اللى انت اترقعتها دى ، حا تكون نقطة تحول ف حيامك . حا تكون سبب فى تخليد ذكرك فى سجل الحلود ، دى اللى حا تدخلك التاريخ من أوسع أبوابه . بدال ما كنت حتة هلفوت نصاب دجال محتال ماشى فى ركاب شيخة بجرمسات الشرق الأوسط ، دلوقت حا تبقى عضو مؤسس فى أكبر جمعيه سريه عرفها التاريخ ، أكبر جمعيه حا تقضى على الطغيان والظلم والاستبداد . قوم يا شيخ عجايب قوم . . انت امك داعيه لك ، صدق من قال ، رب ضارة نافعه . أو كا قال ، تيجى مع العمى طابات .

عجايب : (في دهشة) إيه أصله ده ، أقوم اروح فين ؟

محمود : قوم ، قوم ، انت وقعت والا الهوا رماك ، آل من عديله لنوح يا قلبي لا تحزن ، قوم يا حلو ، قوم خش التاريخ من أو سبع أبوابه ، قوم لحسن المسأله مستعجله قوى .

عجايب : بس مش تفهموني إيه الحكايه ؟

سيد : دلوقت تفهم ، بس قوم خد محلك .

نوح : يا الله يا جماعه بقى علشان نبتدى الجلسه ، الوقت كالسيف ، أو كأم عبده ، ان لم تقطعه قطعك .

عجابب : قطيعه ، تقطع ام عبده ، وتقطع الزمن اللي رمانا في بيتها .

نوح : قضاك كدا يا شيخ عجايب . أمال انا اقول ايه ، اللي بقالي عشرين

سنه ، أم عبده مع الأشغال ، لكن معلهش ، هانت .

فيا قسلب صبرا إن جسزعت فسربما هوى الزمن على رأس أم عبده بالصرم مكسور البيت شويه يا أستاذ سيد ، معلهش ، مدام مكسور على دماغ ام عبده . ييقى الكسر حلال ، يا الله بينا يا جماعه ، فتحت الجلسه .

سيد : (ينظر إلى الساعة في قلق) احنا حا نطول يا نوح افندى ؟

نوح : احنا والتساهيل ، نبتدى دلوقت نقرا قانون الجمعيه ، انا بقالى شهر باوضع فيه ، واعتقد ان ما سبتش حاجه أبدا ما وفيتهاش حقها ، خد يا سيد افندى باعتبارك سكرتير عام الجمعيه ، اقرا القانون .

سيد : (يتناول الأوراق ويأخذ في القراءة) خطلت وحش أوى يا نوح افتدى .

نوح : الله يبشرك بالخير ، دايما العظماء ورؤساء الجمعيات السريه يبقى خطهم وحش كده ، لكن على العموم شويه شويه حتاخذ عليه ، اقرا .

سيد : (يقرأ) قانون الجمعيه السريه لقتل الزوجات .

مادة ٢ ـــ الغرض من إنشائها:

(١) وقف استبداد الزوجات .

(٢) المطالبة بالحريات السبع للأزواج وهي:

(أ) حرية البصبصه وشبرقة العينين ، شبرقه بريته مبدئيا .

محمود : انا معترض .

نوح : علشان ؟

محمود : علشان مسألة البراءه دى ، انا ما احيهاش أبدا .

نوح : یا أخى قولنا ، مبدئيا ، يعنى تبتدى بريثه ، وبعدين يسهلها ربنا ، والا المساله هبش كده ؟

محمود : إذا كان كنده معلهش ، موافق .

نوح: استمريا سيدافندي.

سيد : (ب) حرية الغوضي المنزلية ، وتحريم جميع أنواع النظافه من كنس

ومسح وتنفيض في حضور الأزواج ولا سيما أيام الجمع والعطلات الرسميه .

محمود : (يصفق طربا) ، حلوه الفقره دى ، قلها تانى يا خال وحياة والدك ، أصل انا احب الفوضى قوى .

نوح : اقراها له تانی یا سید افندی .

سيد : هو إيه أصله ده ؟ احنا ما ورناش وقت .

نوح : طیب کمل .

سيد : (ج.) حرية الغياب عن البيت لدواعي العمل ، مع عدم الاستفسار قطعيا عما هي دواعي العمل هذه ، حتى لا يرهق المزوج في التفكير .

(د) حرية الكذب . مع عدم التدقيق فى الاستجواب حتى لا يكشف الكذب .

(هـ) حرية الاحتفاظ بسرية آثار أحمر الشفاه في المناديل ، والروائح العطرية والشعرات الملتصقه بالجاكتات وعدم الإباحة بمصادرها خشية الحرج .

(و) حرية التصرف في نقوده الخاصة مع تحريم وضع يد الزوجه في جيب الزوج لعدها . أو لسلبها كلها أو بعضها . أو لحسابه عليها .

(ز) حرية انتقاء الخدم ، مع منع طرد الخادمات الجميلات منعا
 باتا ، ومنحهن حق الالتجاء إلى مجلس الدولة في حالة الطرد ،
 والعودة إلى المنزل بحكم مجلس الدولة .

مأدة ٣

نوح : استنى شويه لما تاخد الرأى ، إيه رأيك في الحريات السبع دى ؟

انشيخ عجايب: ناقصين واحده.

محمود : ایه هې دی ؟

عجايب : حرية التحميل.

: حرية إيه ؟ نوح : حرية التحميل. عجايب : كلام إيه ده يا شيخ عجايب .. ده كلام عيب ، ما نقلرش ننص نوح عليه في صلب القانون . : عيب ؟! واللي فات داكله مش عيب ؟ عجايب : أصل يا شيخ عجايب .. حرية التحميل .. حاجه مفروغ منها .. سيبل كل واحد له الحق فيها .. من غير ما ننص عليها .. فيه حد مالوش حق في تحميل زوجته ؟ : زوجته ؟. زوجته إيه يا سي سيد ؟ انا قصدي زوجات الغير عبجايب : يا نهارك اسود ، عايز تنص على كنه في القانون ؟ نوح عجايب : أيوه ازاي بقي ؟ نوح : أيوه .. يعني أيوه .. هي دي فيها حاجه ؟. حرية التحميل بواسطة عجأيب الأحجبة والشبشبة والسحر والذي منه .. يا تنصوا عمليها في القانون ، يا مستقيل .. السلام عليكم (وينهض) . : طيب اقعد بس . نوح : أقعد ازاي . . مش كفايه اللي جرالي . . انتو عايزيني اقع فيه تاني . . عيجايب هوا اللي جرالي دامش من تحت راس ان الحريه دي مش مكفوله .. أمال إيه بقى فايدة الجمعيه سلام عليكم (وينهض) ؟! : طيب اقعد .. حاننص لك عليها .. اكتبها عندك دى يا سيد افندى نوح واكتب بين قوسين (خاصة بالشيخ عجايب) . : واشمعني بقي الشيخ عجايب .. هوا فيه خيار وفاقوس ؟ محمود يا أخى دى حاجه تدخل في نطاق عمله .. يعنى بياكل منها عيش .. نوح وانت لازماك ليه .. حا تعمل احجبه انت كان ؟ : مين يعرف .. حد عارف الظروف ، خليها سايـه كـده من غير محمود

تحدید .

نوح : حاضر .. خليها كده عامه ما فيش داعى للتخصيص ، اقرا المادة اللي بعدها .

سيد : مادة ٣ : شروط العضوية ...

(يدق الجرس فيقفز سيد إلى الباب ، ويبدو الحوف على الجميع يفتح سيد بحذر ولكن الباب يدفع ويدخل منه قرقر لاهثا) .

المشهد الرابع

قرقر : (مندفعا فی الحدیث قبل أن یری الموجودین) الحق یا سید افتدی ... عرفت إیه اللی حصل .. مش دلوقت (یلمح نوخ افتدی فتصیبه دهشة و فزع ویقف الکلام علی شفتیه) الله .. هو سیدی نوح افتدی هنا ؟!

نوح : إيه الحكايه يا واديا قرقر .. مالك ؟

قرقر : لا .. ما فيش حاجه .. دا انا بس .. أصلي ..

سيد : أصلك إيه ؟! فيه إيه ؟! حصل حاجه ؟!

قرقر : (يغمز سيد بطرف عينيه ويقترب منه هامسا) حصل كارثه ..
الست ام عبده قفشت الجواب اللي كان مدلدل من البلكون لأن
ست بهيه ما كانتش موجوده وهي اللي كانت قاعده في البلكونه ..
واستقرته .. وعرفت اللي فيه .. وعامله هيجان وحا توديكو في
داهيه .. شوفولكوا طريقه بسرعه .

سيد : (مذهولا) طريقه ؟! طريقه ؟! دى اتنيلت خالص .

نوح : بتتوشوشوا بتقولوا إليه ؟! قرب هنا يا واد يا قرقر .. قرب ؟! إيه الحكايه ؟!

قرقر : (**بقترب مرتبكا**) ما فيش حاجه .. ده موضوع كان كلفني بيه

سيد أفندي .

نوح : طب اقعد .

قرقر : أقعد ازاى ؟

نوح : أقعد .

قرقر : أنا ورايا شغل ·

نوح : قلت لك اقعد يعني اقعد .

قرقر : والست ام عبده ؟

نوح : ولا تهمك .. انت مصيرك بقى في إيدى حسب قانون الجمعيه ..
المادة (٢) الفقره (ز) .. للأزواج حرية انتقاء الخدم .. اقعد ..
اكتب اسمه عندك يا سيد افندى .. أهو دلوقت بقى مجلس إداره
محترم .. إحنا ممكن كان نعمله سكرتير عام مساعد .. ده بتفعك
أوى يا سيد افندى .. يقشر يساعدك ، في كنس الجمعيه .. في
رشها ، برضه الأمر ما يخلاش .

سيد : (يكتب) عبد الجليل الجرجاوى وشهرته قرقر سكرتير عسام مساعد لشؤون الكنس والرش .

قرقر : ما بلاش حكّاية الكنسُ والرش . . خليها عايمه . . يمكن تمتاجولُ فُ حاجه تانيه .

نوح : برضه أحسن ، اشطبها يا سي سيد ، كعل قرايه .

سيد : المادة ٣ : شروط العضوية :

(١)أن يكون إنسانا عاقلا محترما .

عمود : (صائحا) إيه هوا ده ؟! عاقل إيه و عترم إيه ؟ الظاهر انكم مش عايزين حد ينضم للجمعيه أبدا .. دى شروط معجزه .. دى هى دى الشروط اللي يجب انها ما تتوفرش فى العضو .

نوح : ازای بقی ؟

محمود : لأنه إذا كان عاقل .. مش حا يتجوز .

: وإذا كان محترم ؟ سيد : مشحا يخش الجمعيه . محمود : طيب شيل الشرط ده .. اقرا اللي بعده . نو ح : (٢) أتنين . سيد : خليها (١) واحد على طول. نوح : طب (١) واحد .. أن يكون زوجا تعيسا . سيد : الله ؟! واذا ما كانش متجوز زى حالاتى . قر قر : الجمعيه تجوزه . نوح : طيب واذا ما بقاش تعيسا ؟ قر قر : الجمعيه تتولى إتعاسه . نو ح : ما أتتعسم ؟ قر قو : تطلقه وتجوزه واحده تانيه تتعسه . نوح قوقو : برضه ما اتتعسش . : ييقى طابور خامس .. يجب فصله . ثوح قرقر : وإذا ... : إحنا مش حا تخلص والا إيه ١٢ بس بقي يا سي قرقر خلينا نكمل. سيد : يعنى ما استفهمش ؟ قرقر : ابقى استفهم بعدين .. خلينا نخلص دلوقت ، (ناظرا إلى الباب في سيذ قلق . . ثم إلى نوح في استعطاف) أظن كفايه كده النهارده ؟ : كفايه ازاى .. انتوا إيه ؟ مش حاسين بخطورة الحالة .. إحنا لازم نوح نشتغل ليل نهار .. الحالة وحشه جدا . إحنا اذا ما كناش ننقذ نفسنا .. حا نروح في داهيه . (دقات متواصلة من الجرس .. طرقات متوالية على الباب .. ويسمع صوت أم عبده من الخارج). أم عبده : افتح ياضلالي منك له ، والنبسي لاوديكوا النيابـة ياخبــاصين

ياهلاسين .

نوح : (قافزا من مكانه و هو يلم الأوراق في الحقيبة) يا نهار اسود دى ام عبده . . الحقوني . . لازم فيه وشايه بالجمعيه ، خلاص ، روحنا في داهيه .

(يهرول بحقيبته وأوراقه مندفعا إلى باب الحجرة وخلفه الشيخ عجايب) .

قرقر : جمعية إيه وبتاع إيه ؟ إيه العمل دلوقت .. حا تقولوا لها إيه على الجواب اللي بعته سي محمود م البلكونه ؟

محمود : أنا ياتحويه ما بعتش حاجه .. حد الله بينى وبينهم ، حد في الدنيا يحب بنت ام عبده !! يحب بنت طوربيد ؟ بنت بركان !! يا ساتر يارب .. أنا حا زوغ يا خال واصطفل انت معاها .. أنا طول عمرى لا با احب حد ولا حد بيحبني ..

(يتجه إلى باب المطبخ) .

قرقر : وانا إيه اللي يخليني اقابلها .. هو انا مستغنى عن نفسي .. خذنى معاك يا سي محمود .. أنا مش حملها .

(يختفي وراء محمود) .

ريزداد الطرق والدق فيتجه سيد إلى الباب مرتجفا ويفتحه فى
 تردد فندفعه أم عبده وتندفع ثائرة إلى الداخل وفى يدهسا
 الجواب) .

المشهد الخامس

أم عبده : هوا فين هوا ده ، الضلالي الحباص اللي ما يختشيش .. هوا فاكرها إيه ، سابيه ؟ وكاله من غير بواب ؟ مال من غير صاحب .. عايز يتلف البنت ويخيب أملها ويخسر أخلاقها ، لا يا حبيبي .. لا يا عومر .. إحنا مش من أهل ذلك .. إحنا ناس أحرار ، مش بتوع مسخره .

سيد : هدى نفسك بس يا ست ام عبده .. هو لا سمح الله حد قال عليكو ا حاجه ؟.

أم عبده : يقدر .. دا انا كنت قصفت رقبته ، واطلع البلاعلي جتته .

سيد : طيب امال مزعله نفسك ليه ؟.

أم عبده

أم عبده : مزعله نفسى ليه ؟! على اللى حصل ، هوا اللى حصل شويه .. عايزنى ارقع بالزغاريط .. عايزنى أتحزم وارقص .. هى دى عامله تتعمل هوا ما فيش خشا ما فيش حيا دا احنا ناس أشراف .

سيد : هوا فيه حد قال انكم مش أشراف ؟! دا انتم أسياد الناس .. دا انتم سمعتكم زى الجنيه الدهب .

أم عبده : ولما انتوا عارفين كده .. يبقى لزومه إيه ده (تشير بالخطاب) لزومه إيه المسخره وقلة الأدب .

سيد : ياست ام عبده ، هوا فيه مسخره وقلة أدب !.

: لا .. فيه وعظ ، حوش يا خويه الآيات اللي بتنقط منه حوش ، حوش الأدب اللي بيخر حوش ، آل فيه إيه ؟.. فيه انت معى دائما ، في كل نومه وقومه ، ياخي ان شا الله ينام ما يقوم ، معاه أزاى الضلالي اللي ما يختشيش على عرضه .. بنت زى دى لسه عنيها ما انفتحتش يقول عليها انها معاه في كل نومه .. ازاى ال دا انا او ديه

النيابه ، دانا ابيته في السجن .

سيد : ليه بس يا ست ام عبده .. الراجل قصده بريء و نبته طبيه .

أم عبده : طيبه !؟ ياخي ماطاب له عيش ، آل طيبه آل ، بعدما يقول لها انت نايمه معايا دايما .. يبقى برضه طيبه ، أمال كان ناقص يقول لها إيه ؟.

سید : یا ست دا قصده توریه .. یعنی فی ذهنه دایماً ، وهو نایم وهو صاحبی .

أم عبده : لا يا حبيبي .. لا يا نضرى .. احنا مش من بتوع التوريه ، احنا ناس جد .. ناس أصله .

سید : احنا عارفین یا ست ام عبده .. احنا عارفین فیمتکم کنویس خالص ، و محمود قصده شریف .. محمود بیحب بهیه ، وعایز یتجوزها .

(تسمع نحنحة محمود من وراء باب المطبخ) .

أم عبده : (تلين بعض الشيء) واللي عايز يتجوز الناس يا سي سبد يقوم يتجوزهم بالسنانير والحبال ومشابك الغسيل من الشباسيك والبلكونات .. يرضه دا يصح ، هي مالهاش أب .. مالهاش أم ، افرض حد من الجيران كان شافه ، يقولوا يايه .. يقولوا البنت دايره على حل شعرها ، يقولوا مالهاش حد يلمها .. إنت عارف الناس لسانتها وحشه ازاى ياسي سيد ، وما حدش بيقدر ولا يعرف .

سيد : معلهش يا خالتي ام عبده .. حقك عليه .. امسحيها فيه انا ، محمود برضه معذور أصله يبحب بهيه قوى ويبموت فيها .. يتمنى التراب اللي بتدوس عليه ، والنسمه اللي بتمر بيها .. هي حياته ، هي روحه .

أم عبده : حيلك .. حيلك ياسي سيد ، احتامش بتوع حاجات زى دى .. احتاما نعرفش الحب .. احتاناس جد .

: وهوا ده هزار يا ستى ام عبده ، أمال يبقى إيه الجد ؟. سيد : الجد عندنا يعني جواز .. إذا كان عايزها .. يجي يتقدم ومعاه أم عيده الشبكه والذي منه .. ماذا وإلا .. : وجب يا ست ام عبده .. دا برضه اللي حايعمله . سيد (تسمع نحنجة احتجاج من محمود وراء الباب) . : أهو كده الكلام .. الحكايه مش سايبه . أم عيده : لأساييه ازاي .. احنا ناس نعرف ونقدر . سيد : أنا مستنياكوا .. متتأخروش . أم عبده : نتأخر ازاي .. الليلة دي نقرا الفاتحة .. وبكره . نجيب الشبكه . سبيذ : أمال هوا فين سي محمود ؟.. أم عبده : سي محمود .. أيوه .. بس وصل كده لغاية مشوار بسيط وزمانه سيد جای .. اتفضلی انت .. وانا أول ما بیجی حانزل لکم علی طول .. مع السلامه . : خطيتك بعافيه .. مستنياكم . أم عيده : الله يعافيكي . سبيل (لا تكاد تقترب من الباب حتى يدق الجرس بشدة ، فيرتبك سيد ارتباكا شديدا ويسرع نحو الباب ولا يكاد يفتحه حتى يجد عديله قد اندفعت إلى الداخل وهي تلهث) . : ستى .. الحقى يا ستى .. البوليس كابس على البيت وبيقولــوا عديلة عايزين يفتشوا شقتنا والشقه دي كان . : (تضرب على صدرها) بوليس الاياندامه .. حد عمل حاجه .. أم عبده هم فين هم .. أما شوف إيه الحكايه ؟. ; أهم طالعين في رجلي يا ستى . عديلة ﴿ لا تكاد تتم حديثها حتى يدخل ضابط مباحث ومعه اثنين من المخبرين) .

سيد : (مذهولا) إيه ؟ فيه إيه ؟.

الضابط : خليكوا زى ما انتو كده .. ما فيش حد يتحرك .. فيه واحد هنا

اسمه توح افندی ؟.

أم عبده : (في ذعر) ماله نوح افندى ؟! جراله إيه ؟ فيه إيه ؟!.

الضابط : هوا فين ؟.

سيد : هوأفين ؟.

الضابط : أيوه هو فين ؟.

سيد : إيش عرفني ،

الضابط: مشدى شقته ؟.

عديلة : لا يا حضرة البيه . . شقته تحت . . ودي الست بتاعته .

الضابط : حضرتك ؟.

أم عبده : أيوه انا .. ماله نوح افندى ؟ مش تقولل يـا حضرة الضابـط

وتریخنی .

الضابط : متهم بعمل جمعيه سريه لقلب نظام الحكم .

أم عبده : قلب إيه ؟!.

الضابط: نظام الحكم.

أم عبده : ياخى ان شا الله تنقلب دماغه ويتوجع قلبه . هوا ده يعرف يقلب نظام حكم .. ودا مين بقى بسلامته اللي قال لك عليه الحكايه

دي ؟.

الضابط : يا ست احتا عندنا البيانات .. إحنا مش بنهزر .. تعالوا كده شويه خلونا نفتش .

سيد : وتفتشوا هنا ليه ؟! إذا كان نوح افندى مش ساكن هنا ؟.

الضابط : لأن المعلومات اللي عندنا ان الاجتماعات بتاعته مع أعضاء الجمعيه يعقدها هنا .

أم عبده : بقى كده ؟! نوح افندى يعمل جمعيـه واجتماعـات !! طـــيـب

اتفضلوا فتشوا. ان شاء الله حابيجي نقبكم على شونه.. هوا نوح افندى فاضى الاللبصبصه والغنا . خشوا فتشوا .. الشقة أهي قدامكم .

سيد : (مرتبكا)لكن ..

الضابط: (للمخبرين) يا الله ابتدوا ..

﴿ يَأْخُذُ الْخَبْرِ إِنْ فَي تَفْتِيشُ الصَّالَةُ وَيُتَجِّهُ هُو إِلَى بَالِبُ الْحُجْرَةُ ﴾ .

الضابط : (مشيرا إلى الباب) وهنا فيه إيه ؟

سيد : (مرتبكا) هنا فيه .. فيه .. لا مافيش حاجه ، مافيش حاجه أبدا .

الضابط: متأكد؟.

سيد : جدا.

أم عبده : ياخويا خش شوف وريح نفسك .. آل نوح افتدى آل .. داتلقيه زمانه سطيحه في السكر .. هوا بيفوق لنفسه لما حما يفسوق للجمعيات .

الضابط يدفع الباب فيفاجأ بنوح افندى واقفا خلفه تمسكا
 بالحقيبة والأوراق فيتراجع في دهشة) .

الضابط: الله ؟! إيه ده ؟.

أم عبده : (تضرب على صدرها) نوح افندى .. يا نهار مهبب ومنيل .. انت بتعمل إيه هنا يا راجل !.

الضابط : هوا دا نوح افندى .. هه .. بقى كده !! ما فيش حاجه أبدا ؟! زمانه سطيحه من السكر !! اطلع يا نوح افندى .. اطلع .

(يدخل نوح افندى فيبدو وراءه الشيخ عجايب وهو معصوب الرأس) .

الضابط : ودا إيه كمان ؟.

عديلة : (تشهق من فرط الدهشة) الشيخ عجايب ، بنيلك انت كان بتعمل إيه هنا ؟. الضابط: خش .. خش .. وانت تبقى ايه يا شيخ عجايب .. عضو مجلس إدارة منتدب ؟.

عجایب : أبدا و الله .. أنا عضو عادی .. عضو مستجد ، بقالی خمس دقایق بس ، ولو لا العلقه اللی اترقعتها دلوقت ، ما کنتش دخلتها أبدا .. الله يخرب بيتك يا زهره بحق جاه النبي ، انت اللي كنت السبب .

أم عبده : يا ناس ، يا هوه ، أنا في حلم والاعلم .. نوح افندى والشيخ عجده : عجايب يعملوا جمعيه ، لقلب نظام الحكم ؟ حقه بطلوا ده واسمعوا ده .

عدیلة : یاما تحت السواهی دواهی .. الواحد یشوفهم یقول علیهم غلابه وعلی نیاتهم .

الضابط: (**لأحد الخبرين**) خد منه الشنطه حطها على الترابيزه ، وطلع اللي فيها .

(يهم المخبر بأخذ الأوراق والحقيبة ولكن نوح يتشبث بهما) .

الضابط: اديها له.

نوح : ما يمكنش .

الضابط: (ف دهشة) ما يحنش ليه ؟.

نوح : ما يمكنش يطلع اللي فيها قدام الحريم دول (ويشير إلى أم عبده وعديله) .

الضابط: ليه بقى ؟ فيها قباحه ؟.

نوح : وهم الستات يكرهوا القباحه ؟.

الضابط: أمال فيها ايه ؟.

نوح : بعدين اقول لك ، بس أرجوك تأمر بإخراج صنف الحريم اللي هنا علشان نعرف نتفاهم على رواقه .

أم عبده : أنا اخرج ؟ يا اخى أن شا الله تخرج على ضهرك يا بعيد .. وايش عبده على ضهرك يا بعيد .. وايش عبده على ضهر كلهم اللي عبد .. أنا اللي اخرج بس . أنا لوحدى من دونهم كلهم اللي (أم رتيبة)

تخاف منى ، أنا اللي مستحملاك طول العمر ، ومستحمله همك وبلاويك .

الضابط : طب ياست اتفصلي بره شويه ، أما نشوف آخرتها معاه .

أم عبده : أتفضل بره .. ليه عدوته ؟! ضبابه على عينه ؟! والنبي ما اخرج الا ما اشوف إيه الحكايه .. أنا عارفاه ، وعارفه وحايده ، المسأله لازم فيها سر .

الضابط: يا ستى خلينا نشوف شغلنا .

أم عبده : دابيتي . ما اخرجش و لا اتحركشي .

الضابط: طب يا سي نوح افندى ، اديله الشنطه .

نوح : (متشبئا بها بشدة) أبدًا .. هوا انا مجنون اوريها اللي فيها ايه .. أنا تتيل الشنطه .

الضابط: طيب خليها معاك (للمخبرين) كملوا تفتيش ، خش انت فتش في بقية الأود (يشير إلى باب المطبخ) و دا إيه ؟.

سيد : المطبخ ودورة الميه .

الضابط : وفيهم إيه ؟.

سيد : عضو مجلس الإداره المنتدب .. والسكرتير العام المساعد .. لشئون الكنس والرش .

﴿ يَفْتُحُ الْبَابِ . . وَيُخْرِجُ قُرْقُرَ مَنْفُعُلا ﴾ . "

قرقر: ما قولنا اشطبوها دى .. سكرتير عام مساعد بس .. ما فيش لزوم للفضائح دى .

أم عبده : يابن الصرمه القديمه .. انت كان بتشتغل في الجمعيات السريه ؟!
دى لازم جمعيه وقيع خالص .. سيبهم يا حضرة الضابط سيبهم
بلاش تضييع وقت .. دول جماعه مخابيل .. أنا عارفاهم كويس ..
ما فيش فيهم عاقل غير سي محمود افندي .. لو كان هنا كنا قدرنا
نعرف منه الحكايه وما فيها .

(محمود يخرج متنحنحا) .

محمود : السلام عليكم .

أم عبده: يا نهار اسود .. انت كان معاهم !! لا .. أنا خلاص .. برج من عبده عقلي حا يطير .. لازم اعرف إيه الحكايه ؟! إيه السر ؟!.

الضابط : وده إيه كان ؟.

نوح : عضو مجلس الإداره المنتدب.

أم عبده : منتدب ؟! يا اخى إلهى يندبوا عليك .. يا راجل يا شايب يـا عبده عايب .. مش حا توريني إيه اللي في الشنطه دى ؟.

نوح : ما يمكنش ، أنا مجنون أودى نفسي في داهيه !.

الضابط : انت لسه حا تودي نفسك في داهيه . . دانت حا تروح اللومان .

نوح : معلهش لومان لومان .. برضه أهون من اللي حا يجرالي لو شافت اللي في الشنطه .

أم عبده : آه يا ناري .. لو اتلم على اللي فيها .. لاوريك نجوم الضهر .

نوح : شفت .. مش قلت لك .

الضابط: على العموم اتفضلوا قدامي كلكم .. كده بحالكم بمالكم .. اتفضلوا على المحافظه .

نوح : يا الله بينا .

محمود : يا الله بينا ازاى ؟! هوه إيه أصله ده ؟!.. انت عايز تودينـا ف توكر .. لازم نقول لهم على الحقيقه .

نوح : حقيقه ؟.. إنت مجنون ؟.. دى هى دى اللي حا تودينا فى توكر .. اسكتوا انتم من فضلكم أنا الرئيس وأنا مسؤول عن كل حاجه .. يا الله بينا .. اتمسى بالخير يا أم عبده .

أم عبده : الله لا يمسيك ولا يصبحك بالخير زى ما انت محيرنى ومغرج على الناس .

﴿ يَتَجَهُونَ نَحُو البَّابِ وَيَهُمُ أَحَدُ الْخَيْرِينَ بَفْتُحُ البَّابِ عَنْدُمَا يَدُقُّ

الجرس فجأة) .

سید : (منزعجا) وده بیقی مین ده کمان ؟!.

محمود : واحده من الفردتين .. هم اللي فاضلين .. ما بقاش حد تاني بره أبدا .

﴿ يَفْتُحُ البَّابُ فَتُبْدُو زُكِيهُ وَلَعُهُ ﴾ .

محمود : مش قلت لك .. آدى فرده .. يبقى فاضل التانيه .

زكية : (فى ذهول) يا نصيبتى ؟ ا.. إيه الحكايه ؟ ا.. إيه أصله ده ؟ ا.. جرى إيه كفى الله الشر .. إحنا جايين نتعشى و نسهر و ننبسط و الا جايين نفتح محضر .

أم عبده : بقى كده .. قولتولى .. يا خباصين يا هلاسين ياولاد الصرم .. هى دى الجمعيه السريه بتاعتكم . بقى كلكم ملمومين علشان .. تقعدوا تسكروا وتهيصوا .. وتعملوها أردغانه .. خشى ياختى خشى .. خشى سمى عليهم .. قبل ما يروحوا التخشيبه .. هوا دو قلب نظام الحكم .. ياخى إلهى تتوجع قلوبكم .. من أولكم لآخركم .. بقى كلكم ملمومين علشان خاطر البت المقعوصه لخرى .. اللى زى عصاعيص النقاريه .

زكية : نقاريه مين يا حبيبتى .. ما شبهش والايايه ؟! دانا ولعه والأجر على الله .

أم عبده : ولعه لما تقيد في نافوخك ونافوخهــم .. اتلمــي يـــا بت لحسن والنبي ..

زكية : والنبي إيه يا ادلعدى ؟! حا تعملى فيه إيه .. حا تقطعي الراتب اللي بتجريه عليه .. حا تحوشي عنى الخيرات اللي مغرقني فيها بسلامته نوح افندى .. آل اللي يفرقه العويل يسفه .

أم عبده : سامع يا سي نوح .. سامع .

الضابط : كويس قوى .. كويس خالص .. بلاش نشوف شغلنا ونقف

نتفرج على ماتش الردح اللي بينكم . بس خلاص .. انتهينا .. فوتو قدامي كلكم . : يفوتوا قدامك انت ؟ إ . . دول يفوتوا قدامي انا . . انت لسه برضك أم عبده فاكر انهم عاملين جمعيه سريه وحا يقلبوا نظام الحكم ؟! بقي بعد اللي انت شايفه ده عايز برضه تاخدهم معاك ؟! دا انت لازم على نياتك .. سيبهم لي انت .. انا اشوف خلاصي معاهم .. اتفضل انت وأنا حا اشوف شغلي . : إوعى يا حضرة الضابط .. إوعى تسيبنا .. لو سيبتنا أنا حا بلغ نوح عنك . حا يبقى إهمال في تأدية وظيفتك .. آديني بقول لك اهه . : طيب فوت انت قدامي يا شيخ قطران . عديلة : أبدا .. أنا مع نوح افندى .. الحقني يا حضرة الضابط. عجايب : هو إيه أصله ده .. انتم إيه حكايتكم ؟. الضابط (يدق الجوس). : وادى القرده التانيه .. أهي خلاص كملت . أظن بعد كده مشحا محمود يبقى فيه خوف أبدا . . وآدى قعده (يجلس متربعا على الكنبة بعد أن يأخذ زجاجة بيرة ويفتحها) تاخد لك شفطه يا خال ؟. : ﴿ وَهُو يَتَجُهُ لِيفْتُحُ البَّالِ ﴾ يا آخي احنا في إيه والا في إيه . أما سيد نشوف اللي حا يجرالنا . : يعني حا يجرالنا إيه اكتر من كده ؟ آل ضربوا الاعور على عينه آل محمود خسرانه خسرانه . (يفتح سيد الباب فتبدو به بهيه) . : ﴿ فَى ذَهُولَ وَهِي تَهُمُ بِالْتُرَاجِعِ ﴾ الله ؟! وإيه جابكم كلكم هنا ؟. بهية : (مرتبكا) لا مؤاخذه يا ست بهيه ، أصل فيه شوية سوء تفاهم ، سيد أنا متأسف قوى ، اتفضلي استريحي .

(تقف بهيه في الباب حائرة وجلة) .

بهية : (وهمي تنظر إلى المخبرين) ودول بيعملوا ايه هنا ؟! وإيه اللي شايله بابا ؟.

سيد : ما فيش حاجه . ما فيش حاجه أبدا (يتقدم نحو نوح افندى ويأخد منه الشنطة) هات يا سي نوح افندى الشنطة بتاعتى واتفضلوا انتوا على تحت . يا حضرة الضابط ، أنا اللي مسؤول عن كل حاجه ، نوح افندى كان جاى بيطالبنى بالأجره . فعرضت عليه انه يشترك معايا في جمعيه عاملها ، اسمها جمعية قتل الزوجات .

الضابط : قتل إيه ؟!.

سيد : الزوجات ، الزوجات ، انت مش متجوز ؟!.

الضابط : متجوز .

سيد : يبقى المشروع لازم يهمك قوى .

الضابط: (ضاحكا) بس لسه متجوز جديد.

سيد : يبقى كان شهر واحد حا تحتاج لنا ، واتنفضل شوف الأوراق علشان تصدق ، أهه اقرأ .

(يقرأ الضابط ثم يقهقه).

الضابط: دى الجمعيه بتاعتكم ؟ وعلشان كده خايف تورى الاوراق للست بتاعتك يا نوح افندى ؟!.

نوح : انا مالیاش دعوه یالجمعیه ، أنا رفضت خالص اشترك فیها . أنا راجل با احب مراتی موت ، موت .

أم عبده : إيه ؟ بقى كده ؟ ا.

الضابط : طيب عن إذنكم يا جماعه ، أنا متأسف أوى لسوء التفاهم اللي حصل ، الظاهر ان المعلومات اللي جت لنا كانت مبنيه على مجرد شكوك كاذبه متأسف جدا ، سلاموا عليكم .

(يخرج الصابط والخبرين ويحاول نوح الحروج في أذيالهم) .

أم عبده : (توقفه) بس ، رايح نين ؟.

نوح : مش خلاص خلصنا ؟ الحكايه طلعت فشوش ؟.

نوح : أنا عارف ، هو انا صاحب الشقه .

أم عبده : والشرب والمزه دي مين اللي جايبهم ؟.

نوح : أنا مالي يا ست .

أم عبده : مالك ؟! جاك مله على جنابك ، دا انا حاسود عيشتك . ما بقاش كان غير تجيب لى النسوان الهلافيت لغاية البيت ، أنا ابقى قاعده تحت مستنياك على نار ، وانت قاعد تسكر وتبيص وتفرفش مع الست ولعه (تمسك بتلاييه وتهم بضربه) .

نوح : يا ست والله العظيم انا ما اعرف انها جايه .

أم عبده

أم عبده : أمال يعني جايه لمين ؟ (تشدد الحناق عليه) .

محمود : جایه لی أنا یا ست أم عبده ، سیبنی الراجل بقی ، ده مظلوم .

: (تستدير إلى محمود) جايه لك انت ؟! وكان بتقر بلسانك يا خباص يا ضلال . انت اللي عامل بتحب وعمال تحدف جوابات الغرام من الشبابيك والبلوكونات . انت اللي عمال تضحك على عقول البنات . انت يا نصاب يا فلاق ، والنبي لاوديك في داهيه . شايفه يا ست بهية شايفه السافل اللون المجرم . اللي عمال يضحك على عقلك . . شايفه الرجاله .

سبد : (فى غضب شديد) إيه ده يا سى محمود الكلام الفارغ اللى بتقوله ده ، ما تصدقهش يا ست ام عبده ، ما تسمعيش كلامه يا ست بهيه ، دا بيحبك قوى .. دا بيموت فيك . دا ما بينامش الليل من التفكير فيك ، دا حا يخطبك حالا دلوقت .

زكية : (صارخه) ؟! الحاين ، اللي ما عندوش ضمير!.

محمود : بقى اسمع يا خال ، لحد هنا وبس ، كفايه اللخبطه اللى حصلت دى كلها ، أنا قلت لك أنا لا با احب و لا با اخطب .

سيد : ما تصدقيش ياست بهيه ، دا بيكذب .

بهية : (تطرق برأسها) لا ما بيكدبش ، اللي بيكذب انت .. أنا عارفه مين اللي بيحبني ، وعارفه مين اللي بيكتب لي الجوابات . أنا عارفه مين اللي بيقعد طول الليل يصفر الألحان الجزينه الجميله . أنا عارفه مين اللي قلبه جميل ومشاعره رقيقه ونفسه طبيه ، عارفه كل حاجه . وحاسه بالجرح اللي سببتهولك أول مره شفتك ، وعرفت بعدها ان انا الخطأت الشخص اللي بحبه ، وابتدا شعوري يتجمه اتجاهمه الصحيح ، وحاولت كام مره أقول لك ان انا عارفه ، لكن كنت ما بتدنيش فرصه ، كنت بهرب ، كنت خايف ، واظن دلوقت أحسن فرصه أقول لك فيها الحقيقة قدامهم كلهم . واقول لك كان انا مستعده الى اتجوزك .

سید : (مذهولا) مش معقول ، انا مش مصدق ؟! أنا ، أنا ، انتی ، انتی ؟.

أم عبده : ما شاء الله ، ولك عين تقولي كده قدامنا ؟.

سيد : يا خالتي ام عبده ، أنا مش قادر اقول إيه .. أنا ما كنتش فاكر ان ربنا حا يكرمني للدرجه دى .. أنا ما كنتش متصور أبدا أن صبرى الطويل ده ينتهي بتحقق الحلم اللي كنت يائس منه .. أنا طالب القرب منك في بنتك .. أنا طالب القرب منك يا نوح افندى .

نوح : وجمعية قتل الزوجات ؟.

سيد : فلتسقط جمعية قتل الزوجات . . ولتحي الزوجات .

نوح : واذا عملت فيك زى امها ما بتعمل فيه ؟.

بهية : ما افتكرش ، ما فيش أسهل من مرضاة الزوج ، الحكايه مسا تستوجبش جهد كبير أبدا .. كل الحكايه أن الزوجه تكيف مزاجها على مزاج جوزها .. اذا كان ما يحبش الخروج تبقى تحاول هى انها تحب البيت ، واذا كان يكره التنظيف ، يبقى مش لازم تنظف قدامه .. ده بيته اللى يستريح فيه .. وأظن أقل ما فيها انها تهيأ له فيه الحاجه اللى ترضيه حتى ولو كانت غلط ، ومش ضرورى تضيق عليه ، وتسنكر عليه الشباييك .. لازم تديله شوية حريه ، وشوية هوا ، يخلوه يحس بقيمتها .. ما فيش داعى تشتغل له بوليس سرى ، المهم انها هى تكون كويسه . ومسيره اذا كان بيص كده والاكده انه يقارن بينها وبين غيرها ، ويحس بفضلها ويعرف ان همى الأحسن ، وانه ما لوش غيرها ، ما فيش داعى للشبشبه والسحر والكلام الفارغ .. كل ده نصب واحتيال .

عجايب

: أيوه ، والله يا بنتى لك حق ، أنا عمرى ما فلحت في حاجه عملتها أبدا .. الا حاجه واحده ، اللي هي كانت طالباها بنت الصرم .. عديله .

محمود : كانت طالبه ايه ؟.

عجایب : کانت عایزه اعمل لها حجاب علشان تتجوز . عملت لها الحجاب ، وبعد جمعتین اتجوزتنی ، ووقعت انا فی شر أعمالی .

عديلة : بقى كده ، طيب بس لما تطلع فوق . . وانا اسود لك العين التانيه .

محمود : ودلوقت خلاص وافقتم ؟.

نوح : أنا ما عنديش مانع .

أم عبده : أما نتقق ف الأول على المهر والشبكه .

نوح : طیب ، بعدین یحلها ربنا .

أم عبده : أبدا . . دلوقت لازم ننهي كل حاجه .

سيد : أيوه برضه أحسن .. أنا مستعدلكل حاجه .

أم عبده : أنا عايزه خمسين جنيه شبكه .

محمود : خمسين إيه ؟.

أم عبده : خمسين جنيه .

محمود : طيب خلينا بقي لما يبعتو لنا فلوس من البلد .

أم عبده : بلد ؟ بلد إيه يا عمر . . أنا عايزه الفلوس دلوقت حالا .

نوح : حالا ازاى بس ياست ام عبده . . هي الحكايه إيه ؟ قفش ! .

أم عبده : أيوه قفش . . أنا لازم اربطهم .

سيد : بس ، وبعدين . أيا جماعه .

(يدقي الجرس).

محمود : و دا بیقی مین دا کان ؟

(يفتح قرقر فيجد بالباب الشيخ زين) .

الشيخ زين : يا ساتر .. السلام عليكم .. هي دي شقة سيد افندي الفنط ..

قرقر : (فرحا) شيخ زين !! أهلا وسهلا .. جيت في وقتك يا شيخ زين .. اتفضل .. اتفضل (يدخله ويجلسه على أحد المقاعمة باحتوام وترحيب شديدين) أهلا .. وسهلا .. أهلا .. انفضل . (يجلس الرجل صامتا والجميع ينظرون إليه في دهشة ويتسلل قرقر إلى المطبخ ثم يحضر مقشة غليظة ويقف وراءه ثم يهوى بها على

رأسه فيخر مغشيا عليه) .

سيد : (صارخا) إيه ده ؟! إيه اللي عملته ده ؟ انت اتجننت ؟.

قرقر: (يفرك يديه) بس فرجت (يدخل يده في جيب الوجل ثم يخرج المحفظة مليئة بالنقود) عايزين كام (يعد) عشره .. عشرين .. تلاتين .. اربعين . خمسين .. يدوبك يكملم (يعطى النقود لأم عبده) .

أم عبده : إيه اللي عملته ده ؟..

قرقر : خدى بس دى فلوسهم .. جايبها لهم م البلد .

نوح : طيب وما سبتوش ليه لما يديهالهم ؟.

قرقر 👚 : أسيبه ؟ هوا انا اتجننت .. حا يقعد يقول .. بعد فحص وبحث

وتمحيص وإثبات شخصيه ، وموت يا حمار لما يجيلك العليق .

زكية : (تهم بالخروج) طيب اخرج انا بقى .

محمود : تخرجي ازاى ! دول هم اللي يخرجوا .. يا الله يا جماعه اتفضلوا

كلكم من غير مطرود .. يا الله يا الله .

أم عبده : يا الله بينا ، فوت قدامي يا سخام البرك ؟ .

سيد : اتفضل يا نوح افندى .

قرقر : (يتقدم هو) ولا مؤاخذه سخام البرك .. دا يـقى انا .. نوح

افندى يبقى هباب الطين.

أم عبده : اتفضل يا سي هباب الطين .

نوح : ما فيش فايده . . اللسان الزفر . . حا يفضل طول عمره زفر .

محمود : فلتسقط الزوجات ولتحي زكيه ولعه .

(يسدل الستار)

ختام

للمسؤلف

_	
(قصص قصيرة ١٩٤٧)	أطياف
(روايـة ۱۹٤۷ ۰۰۰۰ ۱۹٤۲)	نائب عزرائيل
(قصص - قصيرة ١٩٤٨)	اثنتا عشرة امرأة
(1984)	خبايا الصدور
(1984)	ياأمة ضحكت
(1989)	اثناعشر رجلا
(رواية ۱۹٤۹ ۰۰۰۰۰ ۱۹۴۹)	أرض النفاق
(قصص قصيرة ١٩٤٩)	ق موکب الحوی
(((, , , , , , , , , , , , , , , , ,	من العالم المجهول
(190. 1)	هذه النفوس
(روايـة ۲۹۰۰ ، ۱۹۵۰)	إلى راحلة
(قصص قصیرة ۱۹۵۰)	مبكى العشاق
(1901)	بين أبو الريش وجنينة ناميش
(1901)	أغنيات
(مسرحية ۱۹۵۱ ،۰۰۰)	أم رتيبة
(قصص قصيرة ١٩٥١)	هذا هو الحب
(1401)	صور طبق الأصل
(روایة ۲۰۰۰۰ ۱۹۵۲)	بين الأطلال
(1407)	السقا مات
(قصبص قصيرة ١٩٥٢)	سمار الليالي
(1907)	الشيخ زغرب
(1907)	نفحة من الإيمان
(مسرحية ١٩٥٢،٠٠٠)	وراء الستار
(قصص قصيرة ١٩٥٣)	ست نساء وسنة رجال
(1907)	هذه الحياة

-- Y79 ---

(رواية ۱۹۵۲ ، ۱۹۵۲)	البحث عن جسد
(مسرحية ١٩٥٣ ، ١٩٥٣)	جمعية قتل الزوجات
(روایهٔ ۱۹۵۳ ، ۱۹۵۳)	فديتك ياليلي
(تصص تصيرة ١٩٥٣)	ليلةخمر
(1407)	همسة عابرة
(رواية في جزأين ١٩٥٤)	رد تلبی
(نصص تصيرة ١٩٥٥)	ليال ودموع
(رواية ۱۹۵۲ ، ۱۹۵۰)	طريق العودة
(مقالات ۲۹۵۷)	أيام تمر
(140A · · · · ·)	من حياتي
(1409)	لطمات ولثات
(رواية في جزأين ١٩٦٠)	نادية
(+ + + + + + + + + + + + + + + + + + +	جفت الدموع
(مقالات ۱۹۶۱)	أيام مشرقة
(1171)	أيام وذكريات
(1977)	أيام من عمرى
(رواية في جزأين ١٩٦٤)	ليل له آخر
(مسرحية ١٩٦٦،٠٠٠)	أقوى من الزمن
(رواية فى جزأين ١٩٦٩)	نحن لانزرع الشوك
(روایة ۱۹۷۰ ،۰۰۰)	لست وحدك
(مقالات ۱۹۷۰ ، ۱۹۷۰)	من وراء الغيم
(1471 1)	أيام عبد الناصر
(رواية ۱۹۷۱ ، ۱۹۷۱)	ابتسامة على شفتيه
(رحلات ۲۰۰۰ ۱۹۷۱)	طائر بين المحيطين
(تصة ۱۹۷۳ ۰۰۰۰۰ (العمر لحظة

الإسستاذ يوسسف السباعي

```
۔ اثنا عشر رجلا
                ــ اثنتا عشرة ابراة
           - ست نساء وستة رجال
                 ــ المــقا مات
               - طاريق العاودة
                 ــ بين الأطـــلال
                  ـ لست وحدك
 - جفت الدموع (الجزءالأول)
- جفت الدسوع (الجزء الثاتي)
              ــ ليل له آخــر
( الجزء الأول)
ـ ليل له آخر (الجزء الثاني)
      سهذه التفوس بهذه الحياة
  - من العالم المجهول - خبايا المدور
           ۔ لیای ودموع ۔ اطیاف
- نفحة من الإيمان - صور طبق الأصل
           - ليلة خمر - من حياتي
  ـ مبكى العشاق ـ ني موكب الهوى
                ب سبجار الليالي
                ــ هذا هو الحب
```

```
- طائر بين المحيطين
                          ــ من وراء الغيم
                     س ابنسامة على شغتيه
                - أغنيسات - الشيخ زعرب
- بين أبو الريش وجنينة ناميش - يا أمة ضحكت
         س نائب عزرائيل سالبحث عن جسد

    وراء الستار ــ اقوى من الزمن

          ــ أم رنيبة ــ جمعية قتل الزوجات
       (الجز الأول)
                              ــ ناديــة
       ( الجزء الثاني)
                               ــ ناديـــة
      ( الجزء الأول)
                               ـــ رد تلبي
     ( الجزء الثاني )
                               ــ رد تلبی
     ـ نمن لا نزرع الشوك ( الجزء الأول )
      ــ نحن لا نزرع الشوك (الجزء الثاني )
                             _ إنى راحلة
                            _ ارض النفاق
                           _ مدينك يا ليلى
```

رقم الإيداع ٨١٨٧ / ٨٧ الترقيم الدولي ٥ ــ ٢٤١ ــ ١١ ــ ٩٧٧

مكت بتمصي م ٣ مشارع كامل كاقي - الفجالا



To: www.al-mostafa.com